

**SIXTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR FOURTEENTH SITTING ON TUESDAY, THE 26th JULY, 2011.

(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

PRESENTATION OF REPORT

2. **Lt. Col. Z.S. ZUALA** to present to the House the First Report of the Committee on Public Undertakings on The Report of the Comptroller & Auditor General of India for the year 1998-1999, 1999-2000 and 2004-2005 relating to MAMCO, ZENICS & ZOHANDCO Ltd.

FINANCIAL BUSINESS

3. DISCUSSION AND VOTING ON DEMANDS

- (i) **Pu H. ROHLUNA**, Minister to submit to the vote of the House various Demands under his charge.
- (ii) **Pu ZODINTLUANGA**, Minister to submit to the vote of the House various Demands under his charge.
- (iii) **Pu P.C. LALTHANLIANA**, Minister to submit to the vote of the House various Demands under his charge.

VANLALNGHENGA
Additional Secretary.

.....

DEPUTY SPEAKER : A tawp berah chuan in zain rilru hmun khatin awm ula, inlaintat tawn ula, unau angin inhmangaih ula, khawngaihna nei ula, thuhnuairawlhin awm rawh u.

I Petera 3:8

Awle, zawhna leh chhanna hun a ni a. Tunah zawhna kan la ang a, Starred Question No. 191-na zawt turin kan Member zahawm tak Pu K. Liantlinga ilo sawm ang.

Pu K. LIANTLINGA : Pu Dy. Speaker, ka lawm e. Hon'ble Minister, Finance hnena ka zawhna Starred Question No. 191-na chu hei hi a ni – Mizoram sorkar hnathawk hlawh bat sak engzat nge awm, 30th June, 2011 thleng hian? tih a ni e.

DEPUTY SPEAKER : A chhang turin a changtu Minister Pu H. Liansailova ilo ko ang.

Pu H. LIANSILOVA, MINISTER : Pu Dy. Speaker, Member zahawmtak Pu K. Liantlinga zawhna - Mizoram sorkar hnathawk hlawh bat sak engzat nge awm, 30th June, 2011 thleng hian? tih chhanna chu 30th June, 2011 thleng sorkar hnathawk hlawh bat sak zat chu a hnuai mi ang hi a ni-

1. Education Department hnuai hian Hindi Teacher CSS-a rawih mek mi 1231 hlawh la pek loh zat chu ₹ 290,97,150/- a ni.
2. SCERT hnuai hian DIET (CSS) leh DRC (CSS) hnuai rawih mek hlawh la pek rih loh chu ₹ 471,01,744/- a ni.
3. State Election Commissioner, Mizoram hlawh arrear ₹ 11,60,380/- a awm bawk.

DEPUTY SPEAKER : Zawhbelhna Pu K. Liantlinga.

Pu K. LIANTLINGA : Pu Dy. Speaker, ka lawm e. Ni e, kan sorkar hian a ba tam viau mai a, cheng vaibelchhe ruk leh tih chuang ba awm hi engtik hunah nge a pek theih ang? tih kha ka zawt duh a, tin, Pay Anomaly-a Association hrang hrang 48 chungchangte kha engtinge tunah hian hma lak a nih dan kha min hrilh thei ang em? tih kha ka'n zawt duh a. Sixth Pay te mi tam takin an lak tawh laiin hlawh la thei lo hetiang zat an awm hi a lungchhiat thlak viau a, tin, an nupui fanau te pawh an khawngaih thlak em em in ka hria a, heng ang te hi entik hunah nge in pek theih ang? Centrally sponsored scheme pawh lo ni ta sela sum leh pai te hi a lo thleng tawh em? tih kha ka zawt duh a ni.

Dr. R.LALTHANGLIANA : Pu Deputy Speaker, a chhan a kha kan Minister hian min hrilh thei se ka duh a. Kan lo hriat dan pheichuan SCERT

a thawk phei hi chu kumin February thla atanga han chhut khan an la la lova, thla engemawzat a ni tawh a, ziritirtu pawh hi a rei viau niin a lang a, enge a chhan ber a kha? State matching share kan tih theih loh vang nge? Mumal deuh hlek khan House hi min hrilh thei sela tih kha ka duh a ni.

Pu H.LIANSILOVA MINISTER : Pu Deputy Speaker, Pu K.Liantlinga zawhbelhna engtikah nge pek theih ani ang? tih a ni a, DIET leh SCERT chu hmanni khan ka chhang tawhin ka hria a, kan plan fund lam atangin advance a pek tum mek a ni. Thla thum hlawh hi chu an lo pe tawh a, hemi atang hian.

Hindi Teacher Centrally Sponsored Scheme hi chu central in a rawn tum a ni a, a Department lam pawhin an umzui a, a lo thleng tep tawh a, kan beisei hnai e, tih chu ka chhanna a ni e.

Tin, Pay Anomaly Committee kha ka lo inring chiah lo na a, amaherawhchu, a Committee kan siam kha July thla chhung a report pe hman tura tih a ni a, mahse, Budget session kan neih tak avangin kan in peih fel hman dawn love an ti a chuvangin August thla chhung kha hun pek belh leh a ni. Pu Thangtea zawhna engvangnge a tih kha avang tak kha ka hre lova amaherawhchu, kan sawi tak ang khan central atanga za a za, Hindi teacher phei hi chu lokal a nih avangin khu lam atanga a lo thlen leh hma kha chuan kan in ba fo thin a ni a, chu chu a chhan ber a ni mai awm e.

Pu P.P. THAWLA : Pu Deputy Speaker, Cooperation Minister zahawmtak chhan atan – Starred Question 192 na –

- (a) Kum 2011-a Cooperation Department-in State Level Society election a neihtir dan khan Mizoram Cooperative Act 2006 dan a kalh em ?
- (b) State Level Cooperative Society zingah Mizoram cooperative Act 2006 dan ang thlapa election neihtir a awm em ? tih ka zawt e.

Pu J.H. ROTHUAMA, MINISTER : Pu Deputy Speaker, Starred Question No. 192 chhanna chu –

- (a) Kum 2011 a Cooperative Department in State Level Society Election a neihtir dan khan Mizoram Cooperative Act, 2006 dan a kalh lo.
- (b) State level Cooperative Society-te hi Mizoram Cooperative Act, 2006 dan ang thlap a Election neihtir thin ani.

DEPUTY SPEAKER : Zawhbelhna a awm lo maw ? Starred Question 193 na zawt turin kan member zahawmtak Pu B.Lalthlengliana ilo sawm ang.

Pu B.LALTHLENGLIANA : Pu Deputy Speaker, ka zawhna Starred question No. 193 na Finance Minister zahawmtak chhan atan – Mizoram chhunga Highway hrang hrang atana pawisa hman tur cheng 4000 lakhs kir ang a sawi kha a dik em ? ka ti a. A figure kha ka rawn dah dik chiah lova, mahse han chhang phawt se.

DEPUTY SPEAKER : A chhang turin kan Minister zahawm tak Finance changtu Pu H.Liansailova ilo sawm ang.

Pu H.LIANSILOVA, MINISTER : Pu Deputy Speaker, Member zahawm tak Pu B. Lalthlengliana zawhna chhanna chu ‘Dik lo’ tih a ni e.

Pu B.LALTHLENGLIANA : Pu Deputy Speaker, kha kha an chhanna a ni a. Amaherawhchu, ka rawn sawi chiang ang a. Kum 2010-2011 chhung hian National Highway hrang hrang atana maintenance pawisa lokal hi cheng nuaih 5493 a ni a. RTI zawhna an rawn chhan naah chuan heta tang hian cheng nuai 1170.977 hi hman angin sawi a ni a. Chutichuan hman bang chu cheng nuaih 4322.023 a ni a. Tichuan, RTI atanga zawhna ‘engtianga dah that nge a bang hi’, tih an rawn chhannaah chuan – ‘dah that a awm lo, mahse 2010-2011 hian engemaw zat hman a ni a. A bak chu Ministry of Road Transport & Highway in Govt. of India-ah a surrender a ni’ tih kha RTI zawhna Deptt.-in an rawn chhanna a ni. Tichuan, Chanchinbu June 1, 2011, Nilainiah khan Zozam times khan a rawn ziak a. Deptt. chuan National Highway 150, (hei hi Darlawn kawng ti mai ila a chiang mai awm e) atan cheng nuaih 601.50 hman a ni a. A dang National Highway 44 chu tender chhangtu an awm loh avang leh tender nawn a ngaih avangin (DEPUTY SPEAKER : Ngawi rawh aw, I zawhna tur taka kha zawt la, an hnena chhanna i va lakte kha i rawn sawi zel a. Hemi chhanna atanga i chhanna rawn piang tura kha zawt rawh) (a chiang lova, hei hi kan sawi chiang dawn a ni) pawisa hman loh a nih thu an sawi a ni. Surrender chu cheng nuai 1699 a nih thu an sawi a. Pu Deputy Speaker, chutiang a nih si chuan kan Minister zahawmtak khan surrender a awmlo a ti a. Department rawn insawifiah naah hian cheng nuai 1699 hi surrender a ni an rawn ti bawk si a. RTI—a zawhna kan zawh hi a dik lovin min chhang thin em ni? Hei hi PWD-a zawh a ni a. PWD-a zawh pawh nisela, Finance Department chuan surrender a nih leh nih loh chu an hre tur a ni dawn lawm ni, an hria em? An hre lo a nih chuan heti zozai pawisa surrender hi engatinge Finance Department-in an hriat loh ? tih kha ka zawhna pakhat ni sela.

Tin, Darlawn Sub-Division-a an hmanna pakhat an rawn ziahah chuan Periodical renewal a hmanna an rawn ziahah chuan cheng vaibelchhe sawmhni panga chuang lai hman a ni a. Advance-in M/S Sunshine Overseas Limited hnenah pek a ni tih a ni a. Hetiang zozai advance-a pawisa company hnena peka, vawiin thlenga Darlawn kawngah hnuhma la awm lo hi engnge a chhan? Engvangin nge heti zozai advance-a pawisa pek a nih? tih kha ka zawhna ni bawk rawh se.

DEPUTY SPEAKER : A chhang turin a changtu Minister Pu H. Liansailova ilo sawm ang.

Pu H. LIANSILOVA, MINISTER : Pu Deputy Speaker, zawhbelhna kha PWD pawisa hman dan report atanga rawn chhan kha a ni a. Amaherawhchu, Department-in a pawisa an hman hi account reconciliation leh account final tak tak hi chu Finance-ah a record a awm tlangpui thin a, chumi atang chuan kan chhang mai ang a. Darlawn kawng pawh kha information kha ka neih loh avangin tuna a zawhbelhna kha ti hian a tlangpuiin han chhang mai ilangin. Finance account record atangin min hrethiam mai ang chu maw. Tin, a chhang fiah tawk thawkhatin ka ring a.

Mizorama National Highway kum 2010-2011 chhunga maintain nan Ministry of Highways-in allocation min siam sak chu a hnuai mi ang hi a ni a. Ordinary repair atan vaibelchhe 13.53, Flood Damage repair atan vaibelchhe 18.39, Special repair atan vaibelchhe 2.01, Periodical repair atan vaibelchhe 23, avaiin vaibelchhe 54.93 a ni a; kha kha kan member pawhin a rawn sawichhuah, a total kha ani a. Heta tang hian ordinary repair leh flood damage repair leh special repair te hi hman zawh ani a. Tin, periodical repair vaibelchhe 23 atang hianin sanction kan hmuh tlai avangin vaibelchhe 6.01 chauh kan hmang hman a, vaibelchhe 16.99 kan hmang bang a, hei pawh hi Ministry of Highways in revised allocation siamin kan hman theih ang chauh kha revise allocation ah a dah a, chuvang chuanin surrender tak tak kha chu a awm ta lo a ni.

Pu B. LALTHLEGLIANA : Kan Minister zahawmtakin surrender a awm lo ani a tih laiin depts. in helaia ka sawi ang khan surrender tak tak chu cheng nuai 1699 a lo ni e, tih an rawn chhanna ni si hi, hei hi RTI a Department-in an chhanna ani a, khalai kha depts. leh Finance Deptt. ah khanin inhriat tawn lohna amount hi ava turu em em ve ? (DEPUTY SPEAKER : RTI kha Finance nilovin PWD atangin ani lawm ni i lak ?) (PU H. LIANSILOVA, MINISTER : Aw, PWD atangin) (DEPUTY SPEAKER : PWD kha a chang lova chuvang chuanin Finance atanga a fel china kha a.....).....min chhang kim thei lovang tih chu ka ring a, amaherawhchu, tunah khan surrender a awm lo a tia Deptt. lamin heti zat surrender a awm an tih si laia a financial control tu berin a awm lo tih kha chu eng atan nge kha kha an hman ?

Pu H. LIANSILOVA, MINISTER: Crore 16.99 kha Financial Year-ah khan an hmang hman ta lova chuvang chuan hman bang angin a awm mai a ni a. Hei pawh hi Ministry of Highways in revised allocation siamin revised allocation-ah a dah a, chuvangin surrender nilovin revised allocation in a awm tihna a nih chu.

Pu LAL THANHAWLA, CHIEF MINISTER : Rightto Information Act hi department atanga chhang tute hian an chhang dik lo ve fo a ni, chu chu a

khin chuan State dangah chuan Right to Information Act hian khatiang defaulting officers te kha an hrem thin a, a chang chuan cash an chawi tir thin a, a chang chuan deptt. hotute hnenah appropriate action la turin an ti thin a. Chutiang chu kan ramah hian kan la tawng lo anih chuan RTI kan hman tangkaina turah hian chutiang zawng chuan thil dik tak a chhuah theihna turin a hmangtute hian hmanng dik selangin a lawmawm khawpin ka ring a. Sorkar tan pawh zir tur a awm anga, mipuiin thudik an hre thei anga chuvangin chhanna thenkhat khat ti zawk ila hi chu a diklo ani tih hetia lo ngaihthlak atang ringawt pawhin a hriat theih a ni. Chuvangin khatiang defaulting officers te kha chu RTI khami a Commission-in a engemaw action an lak theihna turin khin zeuh zeuh a thain ka hria, he ramah hian thudik a len theihna turin.

DEPUTY SPEAKER : A lawmawm e, tikhan kan department lamte pawhin fimkhur nan lo hmanng sela a tha ang. Tichuan, Starred Question No. 194-na hi Pu Lalthansanga ani a, ani hi a nau a borala, a zawhna zawhsak turin tumah dilna a rawn thehlut lemlo a, kan kal kan mai anga, tichuan Starred Question 195-na zawt turin member zahawmtak Dr.R.Lalthangliana ilo sawm ang.

Dr. R. LALTHANGLIANA : Pu Dy.Speaker, Starred question no – 195 na GAD changtu chhan atan –

- a) kum 2009 atanga tun thlenga Mizoram sawrkarin a. Consultant a lak zat.
- b) Principle advisor / Principle Secretary a lak zat.
- c) Eng facilities hamthatna nge pek an nih?
- d) Heng atana thla tin a sum sawrkarin a sen zat?
- e) Eng hun chhung atana lak nge an nih?
- f) An hlawh zat theuh tih ka zawt e?

DEPUTY SPEAKER : A chhang turin kan Chief Minister zahawmtak Pu Lal Thanhawla ilo sawm ang.

Pu LAL THANHAWLA, CHIEF MINISTER : Pu Dy.Speaker, zawhna chhanna chu hetiang hi a ni.

- a) Consultant lak zat hi pathum a ni a.
- b) Principle adviser / Principle Secretary . Principle adviser tih ringawt niloin Principle Secretary tih in an hre duh thoin ka ringa. Principle adviser / Principle Secretary lak zat pahnih tih a ni a.
- c) Eng facilities, eng hamthatna te nge a pek. Principle Consultant, Aviation hi Steno Grade – III pakhat pek a ni a, Grade – IV pahnih pek a ni a, Medical re-imburement facility pek niin TA/DA a nei. Tin, Principle Secretaries hi Household Peon 2, Computer leh Printer pek an ni a. Tin, Consultant an tih a te kha Commissioner status pek an ni.
- d) Tin, thlatin sum sen zat, nuaikhat singkua sangthum za leh pathum vel sen thin a ni a.

- e) Eng hun chhung atan nge an nih tih hi Pu Dy.Spaker a in ang lo nual a, a then chu kum thum te a ni a, a then kum 2, a then chu Co- terminus ang deuh te a lak an ni.
- f) An hlawh zat theuh hi a inang lo nuala, Pu P.Chakrobarty hi Principle Secretary leh Principle Adviser atan lak a ni a, kan chhawr tangkai hle a.Thla tin, ₹ 70,583/- ala a ni. Pu P.L Thanga Principle Secretary hi Ex- Officio designation pek a ni a. A ni hi member secretary State Planning Board a ni a, hemi ah hian hna atam tehchiam lem loh avangin, thil dangah hmang tangkai ang tiin sawrkarin ngaihtuahna a nei a, chutiang chuan Principle Secretary-ah tunah hian dah a ni a. Tin, Pu Lalzawma Wing Commander Retired hi Principle Consultant ₹ 20,000/- tin, Pu Lalrokima Lianhna, Consultant, State Planning Board hi ₹ 25,000/-. Tin, Pu Anil Kumar, Consultant State Planing Board ₹ 25,000/- a ni. Tin, ani hi State Planning Board hi a hna deuh ber chu Monitoring Evaluation leh a tul anga Social Audit-te anih avangin Consultant hi an mamawh a, tichuan Consultant pahnih hi pek an ni e.

DEPUTY SPEAKER : Zawh belhna Dr. R. Lalthangliana .

Dr. R. LALTHANGLIANA : Pu Deputy Speaker, ka zawh belhna chu heti zat hi lak an ni a, a tulna leh kan tangkaipuina ang chi eng nge ni awm? tih ka zawt duh a. Chipchiar tak phei chuan chhan a harsa viau mai thei a, amaherawhchu a tul tak viau na kha min hriattir thei se tih ka zawt duh e.

DEPUTY SPEAKER : Zawh belhna dang a la awm em? A awm loh chuan kan Chief Minister zahawm tak Pu Lal Thanhawla i lo sawm ang.

Pu LAL THANHAWLA, CHIEF MINISTER : Pu Deputy Speaker, kan mamawh em avanga lak an ni a, mamawh lova pawisa han paih mai mai tur kan nei lova, kan mamawh em vangin heng hi kan la a ni. Tin, heng consultant kan tih te hi kan hmang tangkai khawp mai a, project tam tak hi monitor a ngai a. Evaluate a ngai a, a chang chuan social audit-te pawh a ngai a, chutiang chuan tiin report an thehluh atangin sawrkar-in a tul angin action-te a la nual tawh a ni.

Corruption an tih ang chi kut tling lova sum lak tum te an lo awm pawh a min venpuitu atan an tangkai em em a ni. Tin, Principal Adviser-te hi State Planning Board-in kan mamawh a, chuta tan chuan planning lama mithiam lak an ngai a, lak an ni a. Tin, Delhi lamah Planning Commission-ah te, Finance Department-ah te khatiangah khan planning lama mithiam tin, public finance lama mithiam PR nei tha, contact nei tha leh power lama thiamna nei tha chutiang chu kan mamawh avangin kan dah bawka.

Tin, Civil aviation hi Consultant kan mamawh avangin Consultant tha tak, experience nei tha tak kan dah a, kan hmang tangkai em em a ni.

DEPUTY SPEAKER : Starred Question 196-naah kan kal anga, a zawt turin kan member zahawmtak Pu K. Liantlinga i lo sawm ang.

Pu K. LIANTLINGA : Pu Deputy Speaker, ka lawm e. School Education Minister zahawmtak ka zawhna Starred question 196-na chu hei hi a ni.

Mizoram Board of School Education Act hi (Amendment) siamthat tumna a awm em?

DEPUTY SPEAKER : A minister changtu Pu Lalsawta i lo sawm ang.

Pu LALSAWTA, MINISTER : Pu Deputy Speaker, member zahawmtak Pu K. Liantlinga zawhna “Mizoram Board of School Education Act hi (Amendment) siamthat tumna a awm em?” tih chhanna chu hetiang hi a ni. “Tunah tak chuan siamthat tumna a awm lo”.

DEPUTY SPEAKER : Zawh belhna Pu K. Liantlinga.

Pu K. LIANTLINGA : Pu Deputy Speaker, ka lawm e. Kan Minister zahawmtak khan Siamthat tumna a awm lo a ti a, amaherawhchu Education Reform a lo ni a, consultative committee-ah te pawh ngaihtuah tawh a ni a. Kum 2011 – 2012-ah khan Elementary-ah CCE introduce a ni a, curriculum leh syllabus-te han siam tur khan MBSE kuta la a ni bawk si a. Hei hi SCERT mawhphurhna pek a ngaih dawn avangin Amendment hi siam loh chuan a department lam pawh Stipend te, heng Book Grant te leh thildang te hi an hmu lova. Tin, Tribal Scholarship te tal kha an hmu lo em ni? An mangang hlein ka hria a, engnge ni Department lam te nen an in dawr dan ka hre chiah lova. Amaherawhchu, hrechiang zawk turah ka ngai a. Heng te hi 4th Semester an kal dawn hial tawh niin a lang a. Chuvang chuanin ngaihtuah sak theih an ni em? Pek ve theih an ni em? tih kha ka'n zawt duh a ni e. Pu Deputy Speaker, ka lawm e.

Pu B. LALTHLENGLIANA : Pu Deputy Speaker, ka zawh belh tum hi School Education huang chhung tho a nih avangin kan minister zahawm tak khan a chhang thei thovin ka ring a. Pakhatna ah chuan Primary School-a Headmaster te hi Headmaster mawhphurhna chauh hi a ni mai a. One year increment hi an benefit neih chu a ni mai a. Tichuan tunah hian an hlawh, ka hre sual em aw, 4500 atang khan tlema 5500 vel emaw niin ka hria, chuta up sak turin tunah hian an rawn ti mek a. Chu chu tihsak theih a ni dawn em? tih leh Primary School-ah hianin Chowkider emaw Peon emaw an neih loh avangin an buai hle niin a lang. SSA hnuaia Cook hi tlema hlawh tih tam sakin nilenga duty turin a siam chawp theih em? Headmaster te leh zirtirtu te hi Peon leh Chowkider an ni vek mai a. Naupang tamna ah phei chuanin an buai hle thin a. Chulai chu a tih theih em tih ka'n zawt e.

DEPUTY SPEAKER : Zawhbelhna a la awm em? A awm loh chuan a changtu minister zahawmtak, Pu Lalsawta i lo sawm ang.

Pu LALSAWTA, MINISTER : Pu Deputy Speaker, zawhna neitu Pu K.Liantlinga, member zahawmtak zawhbelhna, “Education Reforms Commission in arawn nghawng chhohah hian MBSE Dan hi siam danglam a la tul dawn a, tih theih a ni ang em?” tih kha chu, “Tih theih a ni ang” tih a ni. Mahse, nichina ka han chhanna ah kha chuan, Amendment / siam that tumna a awm em? tih kha, tunah tak chuan siam that tumna a awm rih lo tih kha a ni a. A hun kan tawng chhoh zel angin siamthat ngai chu kan siam tha ang a. MBSE lamin khawih zui tawh lova SCERT lamin an khawih zui tur atan te pawh Danin a tul ang chuan siamthat a la tum dawn a ni. Tin, Scholarship leh Stipend chung chang kha tunah hian kan theih ang ang chuan Centralised Scholarship kan buatsaih a. Hetah hian enggemaw zat chu kan chingfel hlein kan hria a. Amaherawhchu, department thenkhat, department 17 lai a khawih tel avang hian department thenkhatah an lo inthawn ve te, keimahni lam nena inhriat pawh lohna leh keimahni lam a tul ang a pawisa min rawn pek loh avanga kan tih hleih theih loh, kan han tih leh dawn a, tlai khawhnu lo ni tawh si te, tangkhang enggemaw zat chu an awm a, a tam vak chuan ka hre lova. Chuvang chuan tlem harsatna chu kan nei a. Helai hi kawng tam taka Pu Deputy Speaker, hma lak tharna a ni a. Scholarship Board atang hian kan la ching fel zung zung lova, mahse kan chinfel loh hi chu tlem te niin ka hria a.

Tin, member zahawmtak Pu B. Lalhlengliana rawn zawhbelhna kha Primary Headmaster- hote, Middle School Headmaster hote sawi tel nghal law law ila, hmannah pawh khan demand kan sawi ni khan kan lo sawi nual tawh a. Hengho hi anni tan hian transfer-a thingtlang khaw kila han kal a nih loh leh, Lunglei lampang chhimitawp atanga hmar tawp emaw a han kal kha a tul chang hi a awm thin a. A chhan chu seniority-a Headmaster hna te hi appointment pek an nih ve avangin, chutiang karah chuan an hlawn lak atanga Headmaster an nih a, an hlawn belh a hi a tlem khawp mai a.

Chuvangin, choka pahnih han buatsaih a, chhungkaw han pem a han buaipui luh luh tur atan hi chuan tuna kan dinhmunah hian kan Primary Headmaster leh Middle School Headmaster pawh han sawi tel talh ila, an tan hian incentive hi a awm lo kan ti a. Chuvang chuan department dangte nen te pawh a thawk ho a, Finance lampangte pawhin a min hriatthiamnate beisei chungin tunah hian an hlawn hi dinhmun tha ve deuh hleka han buatsaih chu kan tum ve mek a ni.

Tin, Primary School, hetah pawh hian Middle School pawh han sawi tel ve talh ila, High School-te pawh a ni ang a. Grade –IV kan tih ang chi - Chowkider-te, Peon-te leh hetiang hnathawk ho hi engemaw zat an pension a, enggemaw zat vanduai avangin an thi bawk a. Tin, hmun thenkhat a lo awm tawhna atangin transfer-ten an chhuak bawk a. Hengah hianin dislocation, hna hmun awl hi a tam ang reng khawp mai a, amaherawhchu, heng hi keimahni department mai atanga chinfel chi ni lo DP & AR leh Finance lam te atanga chinfel ngai chi te anih avangin kan ti mai thei lova.

Tin, upgradation chungchangah khan hei Midday Meal-a kan Cook ho hi hlawh hniam te te an ni a, fixed pay-a la te an ni lehngal a. Mahse, anni ho hi tlawmngaihna avanga lo inhmang, a tul bawk vanga lo inhmang tawk te phei zawng an awm tak na in, upgradation ang zawng tak hi chu a scheme-ah hianin a inmil vak lova, chuvang chuanin upgradation ang zawng tak hi chuan kan ti lova. A takah chuanin a tul miao vangin zirtir hnathawk hi an ti chho mek bawk a, tin, tuna zawhbelhna hi ram pumah hianin kan harsatna a ni a. Pu Deputy Speaker, a chhan chu School-ah hian thil pawimawh tak tak, Computer-te, bungraw tha tak tak te kan dah ve teuh tawh a, heng hi han venghim tur hian Grade- IV ho hi an pawimawh a, mahselangin, kan sawi tawh angin kan department a tawp mai a ni bik lova, DP & AR leh Finance lamte remtihna te a ngai a ni.

Tin, hei hi kan mamawhna hriain DP & AR lamahte, Finance lamah te kan thlen mek a, anni pawhin min ngaihtuahpui mek a ni tih kha ka chhan theihna a ni e.

DEPUTY SPEAKER : Starred Question No. 197 –na a zawt turin kan member zahawmtak Pu C. Ramhluna i lo sawm ang.

Pu C.RAMHLUNA : Pu Deputy Speaker, Agriculture changtu minister zahawmtak chhan atan ka Starred Question 197-na chu hei hi a ni.

- (a) NLUP hnuaiah hian Officer leh Staff lak thar an awm em?
- (b) An awm anih chuan engzat nge an nih ? Category of post ang zelin min hrilh thei em ?
- (c) Heng te hi hi regular tur nge contract basis a lak an nih ?
- (d) Precedure dik taka lak an ni em ?

DEPUTY SPEAKER : A chhang turin a changtu minister zahawmtak, Pu H.Liansailova i lo sawm ang.

Pu H.LIANSILOVA, MINISTER : Pu Deputy Speaker, member zahawmtak Pu C.Ramhluna zawhna chhanna chu (a) NLUP hnuaiah hian Officer leh Staff lak thar an awm em tih chhanna chu : Awm e tih a ni.

(b) An awm anih chuan engzat nge an nih ? Category of post ang zelin min hrilh thei ang em ? tih chhanna chu 27 Nos. Hetiangin :-

- 1) Project Engineer - 1
- 2) Assistant Project Engineer – 2
- 3) Computer Operator-cum-LDC-8
- 4) Computer Operator – cum- Layout artist – 1
- 5) Village Level NLUP Secretary – 6
- 6) Peon – 8
- 7) Driver - 1

(c) Hengte hi contract basis nge regular a lak an nih ? A chhanna : Temporary in kumkhat atan fixed pay a lak an ni a, an thawh that dan leh mamawh dan azira NLUP co-terminus a chhawr chhunzawm theih an ni a, an hlawh pawh fixed vek a ni.

(d) Procedure dik taka lak an ni em ? A chhanna chu 'Ni e' tih a ni e.

DEPUTY SPEAKER : Zawhbelhna Pu Lalduhawm a ilo ko ang.

Pu LALDUHOMA : Pu Deputy Speaker, khangho hlawh kha khawi atanga pek nge an nih ? NLUP component pathum zinga management component atanga pek tur kha a ni em ?

DEPUTY SPEAKER : A chhang turin Pu H.Liansailova, Minister ilo sawm ang.

Pu H.LIANSILOVA, MINISTER : Pu Deputy Speaker, Ni e, tih kha ka chhanna a ni e. Heng hnathawktu hlawh hi management component atanga meet vek an ni e.

Pu C.RAMHLUNA : Engtik laia lak te nge an nih tih kha ka zawt duh a, vawiinah hian ka rawn keng chiah lova, January thla velah khan an hlawh tur vel te kha issue kha a ni a. Khami hmaa lakte kha an awm em tihte kha kan zawt duh a. Tin, hengho hi khawi khawiah te nge post an nih ? Village level worker pheì chu a hriat theih mai a. Mahse an tlem hle leh nghal a, khang ho kha khawilaiah nge post bik an nih? Khami (a posting a) kha engtin nge an decide ? Helaiah hian an dah lo sia, 6/7 lek kha an ni a. Khua 801 lai kha kan nei bawk si a, (Mizoramah, NLUP ah te kan hmuh danin) khangho kha khawngge dah bik an nih tih te, enge ni an criteria for posting? tih laia kha ka han zawt duh bawk a. Tin, procedure dik taka lak an ni em? tih lai taka kha min chhan dan kha ani a, kan hria a, Post reng reng hi fiiled up dawn chuan Employment Exchange kal tlang a tih a ngai hrim hrim mai a, khami kal tlanga lak kha an ni em ? Advertisement te an siam em ? tih te kha kan zawt duh bawk a, hemi Compulsary Registration Act, Employment Exchange-ah hi chuan post pakhatmah hi anmahni kal tlang lovin a tih theih loh hial kha ani, chutiang te chu follow ani em ? tih te kha kan zawt duh bawk ani e.

DEPUTY SPEAKER : Chhangturin Pu H.Liansailova ilo sawm ang.

Pu H. LIANSILOVA MINISTER : Pu Speaker, zawhbelhna kha han chhan mai theih awm tak, amaherawhchu Chiangtaka in chhan theih loh tur kha ani hlawm deuh vek a, information ka lo nei lova. Lak thar atih khan a lakni vel kha ka lo nei hauh lo mai a information, lakthar an ni tih kha a chhanna ni mai sela, ala rei lo hlawmin ka hria a, kumkhat ala pel lovin ka ring a, tin, anmahni dahna hmun tak pawh hi a then chu Directorate indaih loh naah te, tin, Deputy Commissioner indaih loh naah te, han detailed te pawh chu an awm awmin ka hria a, chu pawh chu Chiang

takin ka sawi mai thei lova, a detail taka chutah khatah an dah e, tih a kha; amaherawhchu, minimum-a an mamawh tur an rawn chhawpchuah, Apex Board-in a alo pawmpui hnua lak kha an nia, tin, a procedure-ah hian NLUP- hi Society Registration Act hnuaia awm, Autonomy nei an ni a, churang chuan Govt. Deptt ang tak chuan an hna lak chungchangah hian anmahni abik deuhna an nei chungin, heng post lak turte hi procedure dik taka lak an ni em tih lai taka hi open advertisement te ti a, tin, DPC anmahni in an siam te hmanga exam leh interview hmanga lak an ni e.

DEPUTY SPEAKER : Awle, tunah chuan Starred Question no-198-na zawt turin Member zahawmtak Pu B. Lalthlengliana ilo sawm leh ang.

Pu B. LALTHLENGLIANA : Pu Deputy Speaker, kha kha chu ka skip mai ang e, ka hmalawkah khan member zahawm tak Pu Thawlan khatiang deuh bawk kha a rawn zawt tawh, demand lamah te kan lo sawi tawh bawk a.

DEPUTY SPEAKER : Chuti anih chuan Starred Question 199-na zawt turin member zahawmtak Pu C.Ramhluna ilo sawm ang.

Pu C. RAMHLUNA : Pu Deputy Speaker, Agriculture Deptt chang tu Minister zahawmtak chhan atan ka Starred Question 199-na (a) Kum 2010-2012 financial year chhungah hian Alu chi supply turin quotation koh ani em ? (b) Koh anih chuan engzatin nge chhang a, tu hnenah nge pek anih ? (c) Engzatnge supply tur tih anih a, eng ang rate in nge supply tur an nih ? (d) Tun thlengin engzatnge supply a nih tawh ? District wise in ? Quintal-in emaw min hriattir thei mai sela a lawmawm ang e.

DEPUTY SPEAKER : A chhang turin a changtu Minister zahawmtak Pu H.Liansailova ilo sawm ang.

Pu H. LIANSILOVA, MINISTER : Pu Deputy Speaker, member zahawmtak Pu C.Ramhluna zawhna chhanna chu, a)-na kum 2011-2012 Financial Year chhungah hian Alu chi supply turin quotation koh ani em? tih ani a, a chhanna chu 2011-2012 Financial Year chhungah hian alu chi supply turin quotation koh a awm lo tih ani a, churang chuan a zawhna b) c) leh d) te hi chhanna kan neilo ani e.

Pu C. RAMHLUNA : Pu Deputy Speaker, kan zawh belh duh a chu, quotation kha koh a awm lo ati si a, hei LADC-ah hian, Lawngtlai lamah khuan Alu Kg.1-ah cheng 60-in an supply tir niin thawm kan lo hria a. A market rate hi Kg 1-ah cheng 11/- te ani a, chutiang vel chu ani a, LADC atang hian ₹ 200 lakhs vel kha pek ani a. Chumi atang/atan chuan hetiang rate hian an supply ani tih hi in hriatpui em? A supplier hi tunge ni? A theih chen chen min chhang teh se.

DEPUTY SPEAKER : Anmahni Council lam a nih chuan House in ava hriatpui awm lo ve, kan Minister te pawhin. A nih leh han chhang teh se, Pu Liansailova ilo sawm ang.

Pu H. LIANSILOVA, MINISTER : Pu Deputy Speaker, member zahawmtakin khatiang a zawhna a han zawh kha keini aiin a hre zawk mahin ka hria. Min hriattir a duh vena hrim hrim a nihna chin a awm ang a, a thatnate pawh a awm thei e. LADC te hian anmahni area chhungah hian Agriculture te, Horticulture te, Soil conservation te thlengin Department an nei ve a, tin, chumi atan chuan Fisheries te thleng pawhin an nei ve a, chumi atanah an mamawh nia an inhriat ang hian thlai chi leh sangha chi te pawh an lei ve thin a, churang chuan heng hi chu kan approval pawh ngai lova anmahni ina an lo tih ve procedure hmanga an tih ani a, an rate a san leh san loh lam thleng pawh khan anmahni tih tih a an tih ve ani e.

DEPUTY SPEAKER : Anmahni House lama in zawh tur niawm tak heti lamah kan in zawt ani lo maw. A nih leh Pu Lalduhoma leh Pu P.P. Thawla ilo sawm ang.

Pu LALDUHOMA : Pu Deputy Speaker, Alu hi kan la ching ve zel si a, a chingtu te hian a chi engtin nge an ngaihtuah? Supply a nih tawh si loh chuan nge quotation awm lo in supply tir sorkar in a nei zawk? tih lai kha ka hrechiang duh a. Tin, Alu chi siam hi chu kan state sorkar hian kan la tlin lo turah ka ngai a. Amaherawhchu, a multiplication center hi kan sawi na a rei ve tawh a, a tih pun theih a, khami tal kha neih hi ava hun ve tawh ve mawle, engtin nge sorkar hian hma a lak?

Pu P.P. THAWLA : Pu Deputy Speaker, NLUP semah hian Alu chin trade thlang an awm em? tih ka zawt a. 2- naah Mizoramah hian Alu hi demand a sang ve hle mai a, 2012 kum tir lampang, a chin hunlaia ching hman ve turin 2011-12 kan budget atang hianin quotation te call in supplier te siam a, a ching duhte tan sem theih a ni ang em? tih ka zawt e.

DEPUTY SPEAKER : Chhang turin Minister zahawmtak tak Pu H. Liansailova i lo sawm leh ang.

Pu H. LIANSILOVA, MINISTER : Pu Deputy Speaker, zawhbelhna kha zawh awm tak a ni a, amaherawhchu, kan zawhna atang hianin khatiang zawhna kha a awm thei ang tih ngaihtuahna a lo awm pha lo deuh hlek a, general deuh in kan chhang ang a, min lo hrethiam mai turah pawh kan beisei a. Member zahawmtak Pu Lalduhoma'n zawh paha a thil han sawi kha, thil pawimawh tak a ni a, amaherawhchu, kan ramah hian hun rei tak atang khanin Alu chi siamna tur multiplication centre te an lo buaipui tawhah khan, kan hlawhchham deuh zel mai a, a hri tha lovin kum hnih/khat

lek hnuah a bawm leh mai thin a, chuvang chuan hmalak tharna hi kan nei rih lova. Tin, a direct seed an tih, Member zahawmtak Pu K. Liantlinga'n Session hmasa lamahte pawh khan a zawt tawh a. Hei hi KVK-ah te kan han trial tir chhin a, anmahni mithiamte enkawl naah chuan a hlawhtling viau mai a, chu chu a par atanga a chi siam a, Alu chin hi a ni a. Amaherawhchu, kan mipui te, loneitute hnena han vawrhchhuah tur erawh chuan kan mithiamte hian a trial hi la kalpui zel rih loh chuanin an ti a. Chuvang chuan Alu chi siam chungchangah leh a chinah pawh hian kan hlawhtling lo viau rih mai a ni. Chu chu ka chhan theihna ni mai rih selangin. Tin, zawhbelh naah khaw lai atangin emaw a chi hi lei a awm em? han tih a kha, Central Sponsored Scheme, RKVY te, tin, tunah hian Vegetable Initiative tihte a lo awm thar a, heng atang hian a vegetable anga han chinna tura kha tlem a awm thei a, mahse, khang thlai chi kha approved corporation emaw National Seed Corporation emaw atangte a kan lak anih loh chuanin tun hmaa thlai chi lei chiam chiam ang chi kha kan kalpui tak loh avang hian kan ti ta lova.

Tin, ka sawi fo tawh a, kan Sorkar tan tirh khan Alu chi kha 20000 qtls. lai lo lei tawh a awm a, chu chu tlem azawng kan hotuten kan bial lamah an han ti a, an ngaih pawimawh avang khan qtls. 20000 chuang kha sem a ni a, a harvest hunah khan a thar zat report kan han kova uluk takin kan enzui a. A chi-a sen zat hmun lia thena hmun khat pawh kha kan thar miah lova, chuvang chuan a chi hian kan thar mai zel niin kan hria a. Tin, kan ram ngaw ei chhetu pakhat hi niin kan hre bawk a. Chuvang chuan, vegetable initiative hnuaiah te, tin, leiletah Rabi crops-ah emawte kan ching anih loh chuan Alu-ah hi chuan a chi lam a kan in senso hmun lia thena hmun khat pawh kan thar bawk si loh chuan thil fello kan chhawm zui zel dawn niin kan hria a, kan kalpui chak ta lo viau rih a, chu chu kan chhanna ni mai rih selangin. Nakinah kan ngaihtuahnate a lo puitling deuh ang a, tha deuh zawka kan kalpui theih hunte a la awm ang tih kan beisei a, zirtirna pawh kan pe zel a.

Tin, Pu Thawla han zawhna taka kha chu chuan a chhang thei nghal maiin ka ring a. 2010, 2011 emaw 2012-ah pawh hian tuna kan dinna kha kan kal dan a la ni rih a. Tin, NLUP hi chu a ngheta eizawwna tinzawn a nih avang hian Alu hi a ngheta eizawwna atan, kan mamawh zualpui han tharna atan han tih pawh kan tih dan hi a lem rih em mai a, kan la kalpui thei rih lo. NLUP atan hian activity thlanah kan phal lo, a tel lo.

DEPUTY SPEAKER : Ni e, Alu chi hi tunhma atangin sorkar hian in supply thin a, a dawngtu lam hian an thar hma thin lutuk a. Tapchhak zawlah an thar mai thin a. A pung mawh em a ni. Tunah Starred Question 200-na zawt turin Member zahawmtak Pu B. Lalthlengliana i lo sawm ang.

Pu B. LALTHLENGLIANA : Pu Deputy Speaker, ka zawhna Starred Question 200-na Education Minister zahawmtak chhan atan, 'Mission hnuaia school hrang hrang hi eng anga enkawl zel nge sorkar hian a tum?' tih a ni a. A Demand wind up naah te pawh a sawi lang nual tawh a. Zawhna a lo kal takah chuan han chhang ve leh reng reng se la.

DEPUTY SPEAKER : A chhang turin Minister changtu, Pu Lalsawta i lo sawm ang.

Pu LALSAWTA, MINISTER : Pu Deputy Speaker, Member zahawmtak Pu B. Lalthlengliana zawhna ‘Mission hnuiaia school hrang hrang hi eng anga enkawl zel nge sorkar hian a tum?’ tih chhanna chu hetiang hi a ni: ‘Mission hnuiaia school hrang hrangte enkawl zel dan tur hi ngaihtuah mek a ni’ tih a ni.

DEPUTY SPEAKER : Kha kha ni e, hmannah Demand lamah te sawi tawh a ni a, zawhbelhna a awm lo a ni ang. Hei Question 201-na pawh hi Pu Lalthansanga zawhna a ni a, tumah a hlan chhawng si lova kan kal pel leh mai ang a. 202-na Member zahawmtak Pu C. Ramhluna zawt turin i lo sawm leh ang.

Pu C. RAMHLUNA : Pu Deputy Speaker, vawiin chu question a chhuak tam hle mai. A lawmawm e. Agriculture Department changtu Minister zahawmtak chhan atan Starred Question 202 - (a) NLUP Implementing Board Meeting Hall hi sak a ni em? (b) Khawiah nge sak a nih a, sanction amount engzat nge? tih ka zawt e.

DEPUTY SPEAKER : A chhang turin a changtu Minister zahawmtak Pu H. Liansailova i lo sawm ang.

Pu H. LIANSILOVA, MINISTER : Pu Deputy Speaker, Member zahawmtak Pu C. Ramhluna zawhna (a) NLUP Implementing Board Meeting Hall hi sak a ni em? tih chhanna chu ‘NLUP Implementing Board Meeting Hall hi sak a la ni lo’ tiha chhan a ni a. Tin, (b) Khawiah nge sak a nih a, sanction amount engzat nge? Sanction amount chu ₹ 50.00 lakh a ni.

DEPUTY SPEAKER : Zawhbelhna Pu C. Ramhluna.

Pu C. RAMHLUNA : Pu Deputy Speaker, ka zawhbelhna chu hei hi ni se la, nuai 50 senga Hall han sak that leh hi a tul viau na enge ni aw tih ka ngaihtuah deuh a. Nangmahni lampang atanga a tul dana kha inhriattir theih ni se la a thain ka hria. A chhan chu hall te hi chu a tam tawh mai a. Department hrang hrang hian anmahni Directorate-ah pawh meeting Hall kha nei vek tura tih kha an ni hial thin kha ani a. Khatah khan kan lengta lo viau tihna em ni a, a chhan chu hemi nuai 50 senga Hall hranpa han sak leh tak a kha, hetia han ngaih mai hi chuanin non-productive expenditure te pawh kha a ang rum rumin ka hria a, NLUP-ah miin nghakhlel takin an thlir si lai a, helai a han tih leh taka lai a kha engeni a pawimawhna viaua kha min hriattir thei sela thain ka hria a. tin, chubakah chuan tuna sak la nita lo fo a kha sanction khatiang zat awm si a kha, engvanga tunthleng thlenga la sak loh nge anih? A hmun a awmlo nge ni a? Engnge a dinhmun? tih laia kha Pu Deputy Speaker kan zawhbelh duh ani e.

DEPUTY SPEAKER : A chhang turin a changtu Minister zahawmtak Pu H.Liansailova i lo sawm ang.

Pu H. LIANSILOVA, MINISTER : Pu Deputy Speaker, zawh belhna kha hetiang hian han chhang mai ila, a tha awm e. NLUP Implementing Board hi a thlatin bi deuhthawa thut ngai leh a kar lakah pawh a Board Member bak te pawh meeting neih reng ngai a. Chuvang chuan Meeting-na tur hmun hi an mahni Office-ah an nei tha lova, Agriculture Office amite an han ring a, amaherawhchu, hmun dang amite pawh hi a Department leh midang ten lo hmanve thin ani bawk nen, mamawhna an han enin Board lam hianin kan neihve mai hi a tha, kan mamawh anih hi an ti a. Tin, training inpek ve reng ngaite a lo ni bawk a, chutiang avanga Meeting Hall sak hi han rawt ani a. Chutiang chuan Apex Board atang tein lo ngaihtuah sak a, lo pawmpui a ni a.

Tin, a hmun tur hi an mahni Office chungzawl Roof Terrace, khumi Planning Board chung khu a ni ang chu, khu khu tinzawn ani a. Amaherawhchu, Governor In atang khuan Security thil velah engemaw fello a awm thei palh ang e, tih a awm tak avangin helai hi a security lam ngaihtuahtu te nena la inbiak zui mek ani a, tin, chutih rual chuan Soil Conservation Directorate khuanin Hall an nei lova, keinina kan chhawr ve theih tur hian intawmin tih nisela tihtein kan Implementing Board Chairman-te nen an lo inbe bawk a, a hmun tur hi a khawi zawkah nge ni ang tih hi la sawi fel tur ani a, remchang erawh chu a awm ani. Chu chu ka chhan theihna a ni mai e.

DEPUTY SPEAKER : Awle, tunah chuanin zawhna leh chhanna hun a tawp a, kan business dangah kan kal dawn ang a, hei vawiin niah hianin kan Member Pu Lalthansanga (Chatea) a nau a boral a, a lo kal thei lova, tin, Pu Lalthanzara, ani pawh chawhma a lo kal thei dawn lova, inthenawm an ni a. Chawhnu lamah kan C.M, kan House Leader hoin kan Minister Pu Hiato leh kan Parliamentary Secretary Pu Zothangliana, kan member Pu Robiaka ten programme an nei a Dapchhuah lamah an kal dawn a, chungte chu kan lo hre dawn nia. Tunah chuanin Presentation of Report kan ti ang a, Lt. Col. Z.S. Zuala, Chairman, Committee on Public Undertakings in 'First Report of the Committee on Public Undertakings on the Report of the Comptroller and Auditor General of India for the year 1998-1999, 1999-2000 and 2004-2005 relating to MAMCO, ZENICS and ZOHANDCO Ltd.' tih hi House-ah han present rawh se.

Lt. Col. Z.S. ZUALA : Pu Deputy Speaker, i phalna leh he House zahawmtak remtihna in 'First Report of the Committee on Public Undertakings on the Report of the Comptroller and Auditor General of India for the year 1998-1999, 1999-2000 and 2004-2005 relating to MAMCO, ZENICS and ZOHANDCO Ltd.' hi he House zahawmtak-ah hian ka present e, ka lawm e.

DEPUTY SPEAKER : A copy te kha han sem rawh ule. Le, a copy kha kan sem zo tawh anih chuan tunah chuan Financial Business kan ti

ang a, Demand kan sawiho dawn a. Vawiin hi kan Minister 3 te Demand kan sawi dawn a. Tunah hun kan heh loh nan Demand hi a rualin la leh mai ila, tha kan ti em? Anih chuan tunah kan Minister zahawmtak Pu H. Rohluna, a Demand No. 17 leh 36 te hi House-ah rawn submit rawh se.

Pu H. ROHLUNA, MINISTER : Mr. Deputy Speaker Sir, on the recommendation of the Governor of Mizoram and with your permission Sir, I move the Demand No.17 & 36 for ₹ 289,66,03,000/- only for meeting expenses during 2011-2012 in respect of the following Departments - Demand No. 17 – Food, Civil Supplies and Consumer Affairs – ₹ 2,29,37,03,000, Demand No. 36 – Environment & Forests – ₹ 60,29,00,000, Total – ₹ 2,89,66,03,000 only. Thank you Sir.

DEPUTY SPEAKER : Awle, tunah chuan Pu Zodintluanga Minister zahawmtakin a Demand No. 22, 26, 46 leh 48 te hi House-ah rawn submit rawh se.

Pu ZODINTLUANGA, MINISTER: Mr. Deputy Speaker sir, On the recommendation of the Governor of Mizoram and with your permission Sir, I move the demand No. 22, 26, 46 and 48 for ₹. 1,40,23,63,000/- for meeting expenses during 2011 – 2012 in respect of the following Departments - Demand No. 22 – Sports & Yourth Services Department – ₹. 35, 29, 47,000/-; Demand No. 26- Information & Publicity – ₹ 7,45,00,000/-; Demand No. 46 Urban Development & Poverty Alleviation - ₹ 93,69,16,000/-; Demand No. 48 Information & Communication Technology - ₹ 3,80,00,000/-; Total = ₹. 1,40,23,63,000/- only. Thank you sir.

DEPUTY SPEAKER : Tunah Pu P.C. Lalthanliana, a Demand No. 19 leh 29 te hi House-ah rawn submit turin han sawm ve leh teh ang.

Pu P.C. LALTHANLIANA, MINISTER : Mr. Deputy Speaker sir, On the recommendation of the Governor of Mizoram and with your permission sir, I move the Demand No. 19 and 29 for ₹. 85,22,44,000/- only for meeting expenses during 2011 – 2012 in respect of the following Departments - Demand No. 19 Local Administration Department - ₹ 45,88,89,000/-; Demand No. 29 - Social Welfare Department – ₹ 39,33,55,000/- Total = ₹ 85,22,44,000/- Thank you sir.

DEPUTY SPEAKER : Awle, kan Minister pathum ten an Demand te an han submit a, kan sawiho zui dawn anga, vawiin chu minute sawm den den kha kan ti leh dawn em niang? A tha em? Member ten minute sawm den den kan ti ang a, Opposition Group Leader te minute 15 kan pe leh dawn nia. Tunge han sawi hmasa ber ang le? Pu P.P. Thawla ilo sawm ang.

Pu P.P. THAWLA : Pu Deputy Speaker, han sawi hmasaber leh phawt mai ila, Demand 17-na, Food Civil Supplies & Consumer Affairs-ah hian a Demand pawh vaibelchhe 229 chuang a ni a, lawmawm hlein ka hria a. He ram leh hnam Pathianin min siam dan hi chu he Department nen hian a inrem a, pawimawhna lai em em pawh a awm ve a. Chuvang chuan he Department a that leh that lohah hian Ram leh Hnam awmdan tur a inngahna thui tak a neiin ka hria a. Pawimawh hlein ka hria a. Tun sorkar hi kum hnih leh a chanve tha kan kal tawh a, hei sorkar hmasaah khanin Food & Civil Supplies lamah hian Mautam lungchhiatthlak tak kumah pawh khanin mualphona leh harsatna em em hre lovin kan kal chhuak a. Sorkar thar kan dil chhuah, a lo pian hnu kum hnih leh a chanve vel lai kan kal tawh na a mipui vantlang tamtak ten kan hriat lar em em tak mai chu Buhfai lama kan harsatna te, Gas lampanga harsatna te, Oil lampang harsatnate hi thingtlang bialtute chu, kan zin veivah hian mi an sawi khum zing em em mai a. Chuvang chuan Minister kha dem thu a awm lem lova, he sorkarna kalpuitu party hrim hrim hi a vanduai ta emaw ni chu aw, tih te ka rilru in ka ngaihtuah a, a lehlamah chuan pawl ka ti viau thin a, tan lak a tul hle in ka hria a. Nikum tir deuhah khan Vety. lama artui kan dap thin kha ka va dap leh chhin a, “Ka Pu, nikum 2010 May atang khan helai Khatla Vety. Department-ah hian Artui supply a awm tawh lo, i duh chuan Selesih a rawn kal in plate khat te chu a pek theih ang”, tih kha chhanna ka dawn dan a ni a. Artui plate khat va dawng tura Selesih a va kal kha chu senso tam dawn lutuk khan ka hria a, neilo law law mai ang ka ti ta a, ka kalsan ta a, chu chu ka han tarlang duh a.

Ka bial bikah, a kil em avang te, harsatna tam tak kan paltlang thin avangin han sawi chhuak leh ta ila. Kan DCSO, tuna kan neih lai hian tan a la nasa hle a. Ram leh bialin harsatna kan tawh loh nan a ti a, a hnenah te pawh lengin lawmthu te pawh ka hrilh thin a. Tun thleng chuan harsatna em em kan neilo. Amaherawhchu, fur hi a zualpui kan la hmabak chhah hle in ka hria a. Hun chanve vel kan kal tawh a, August, September, October thleng hi fur zualpui kan la hmabak a. Chuvangin, heng karah hian kan lo harsa palh ang tih hlauhthawn thil tuah tun atanga a changtu Minister zahawmtakin tan min lak sak hi tul ka ti hle a, chu chu he House zahawm takah ka han sawi chhuak duh a.

A bik takin Kawlchaw Lui kan kan chiah a, khawthlang lampang kawngpui chhukthla, mitam tak awmna bial lamah khuan, Kawlchaw Lui leihlawn a awm tawh lova, tui alo lian a, motor a kal thei lo fo mai a. Helamah hian tun dinhmunah chuan a contractor ho hi phurh man pek chawp zela an inphurh tir pawh hian kan duh khawp a la tling lo a ni. Chuvangin leihlawn kan neih lohna kawngpui lamah mitam tak awmna a ni lehngal a, tun atanga kan Minister zahawmtakin a kut leh ke hote hmanga tan min lak sak a, mualpho lova he kum hi min chhuahpui hram turin ngenna vawiinah hian ka han tarlang duh a ni.

Tin, chulo lelah ka han sawi duh chu carrying contractor nilo store keeper ho te hi motor neilo a bar pawh an awm chuang lova, contractor nih hna an chhang lem lova, deposit pawh an dah lem lova, contractor an duh duh hming in S.K. ho te hian buhfai an thiar ve thin a. A contractor ho pawn duhkawp phurh tur an neih loh laia S.K. ho tena an lo phurh ve thin hi

contractor ho lung a awi lova, harsatna an tawk a ni. Anni chu load pe chhuak thei tu an ni a, a hmuna lo dawngsawng thei tu an ni a, mahni phurh chu kim se, kim lo se, engtinngan tih riral pawh hriat ni lo hian an zalen viau mai a. Contractor ten an phurh theih chhun chhunah pawh an harsat em em laia Store Keeper ten an lo phur tel ve ziah mai hi contractor-te ho chan ngaihtuahin a tha tawk lovin ka hria. Ka thuthang hriat pakhatat pheih chuan Store Keeper pakhat chu buhfai (contract hna) a phur a, kawng lakah khaw pakhatat hianin a stock ta a, tichuan, chumi khaw tan ti si a, a khua thleng si lo hian chung lai a dahna bawr velah chuan a zuar chur chur mai ni awm tak a ni. Special permit-in bag khat hi ₹ 500 ten kan hmu ve tawk thin a, mahse, black te chuan ₹ 1000 in an hralh thei si a. Chuvangin hetiang ang kawngah hian Food & Civil Supply Minister lampangin beng min chhit sak a, fimkhur taka hma min lak sak hi tul ka ti hle a, chulai chu ka han tarlang duh a ni.

Pu Dy. Speaker, Demand No. 36-na Environment & Forests Department-ah hian vaibelchhe sawmruk, nuai sawmhni pakua vel Demand kan nei a, heta ka han tarlan duh chu kum 2007 October thla khan Tokalo Wild Life Sanctuary kha puan a ni a, a lawmawm ang reng hle a, hei hi Palak dil thlang lampang ngaw khu a niin ka hria a. Hemi atan hian sum eng emaw zat ruahman ani a, tunah hian engzatnge hman ral anih tawh? Hemi Wild Life Sanctuary hlawhtlin nan hian? An hmalak dan tlangpui hi Minister zahawmtak hianin he House-ah hian min hrilh thei sela, a lawmawm hle ang tih kha ka han sawi duh a ni.

Pu Dy. Speaker, Demand No. 22-na - Sports & Youth Services ah hian kan Minister zahawmtak hi a chhuanawm a, a in fit ka ti bawk a. Kumtir lampangah khan Artificial Turf, Assam Rifle Ground a kan phah hlim a, a hawn nan a Football Tournament ropui tak kan neihah khan Chief Minister Team-a awm tur kha ka ni a, ka bial a hlat em avangin kha Tournament-ah khan ka rawn tel hman ta lova, Best Player lawmman dawng tur kha ka ni a, ka tello kha vanduai ka in ti khawp mai, Chief Minister Team pawh kha an vanduai ka ti a ni, a lawmawm ka ti hle a. Tin, lehlamah chuan kan Minister zahawmtak hianin a hmaa he Department lo chang tawh tute hnathawh hi thlah thlak awm lo hian a chhuzawm char char ni hian ka hria a, chutiang ang rilru chu a lawmawm ka ti a, chuvang chuan a hmalak tawh naah hian kan fak ve a ni.

Tin, chutihlai chuan keini Kolodyne lui piah lama mi cheng Maraland lampangah hianin Sports Department hian tlemin min hlam chhiah deuh emaw ni chu aw ka ti a, ka han vui lek lek deuh a ni. Kum 2000 hmalamah kha chuan Kawlchaw leihlawn kan la neih loh avangin harsatna tam tak kan tawk a, 15th May, 2000 hmalam a Mara Autonomous District Council-a Chief Executive Member ka nih lai khan (Kolodyne lui) Kawlchaw leihlawn te saw ropui taka hawn a ni a. Chumi atanga tun kum sawm inkarah hian kawng hrang hrangin hmasawna kan lo nei tawh a, chuvang chuan khimi ram kilkhawr tak atang sawn Mizoram State ti hming tha tur hian kan thalai tam tak te sawn Sport lamah hian tan an la a, Football lamah te pheih chuan hei Saiha bialtu kan Minister zahawmtakte fapa tur Malsawmtluanga (mama) an tih te pheih chu India ramah pawh milar an ni a, tin, a ni dawtah pawh hian Ng. Beirona, Saiha College Veng a mi te, B. Beikhokhei, Saiha College Veng a mi

te, S. Thahlu, Saiha College Veng a mi te, C. Lalzuiliana, Saiha College Veng a mi te, Ricky Zoramthanga, New Colony a mite pawh hi Football lamah hian an lar chho mek zel a. Chutiang ang chuan kan lo contribute ve mek a ni, he Zoram tan hian. Boxing lamah te pawh Hrokhu te, K. Lalnunsiami te chutiang ang chuan kan thang thar te zingah an lang tham a, LPS Pro-fight lamah te pawh duhsakna changtu tam tak, an hming te pawh kan hriat nual tawh kha, khatiang ang khan hma kan lo sawn ve a ni. Chuvang chuan Sport and Youth Services hmalaknaah hian Saiha District-ah hian lang sar deuh va kut min thlaksak turin ka ngen a ni. Tuipang khua hi British hunlai atang tawh a khaw lar a lo ni tawh a, amaherawhchu, Football field kan la nei lo a ni. Tuipang khuaah sport lama hma an sawn theih nan project te min siam sakin hma min lak sak se tih hi thalai zawng zawng aiawhin kan sawi duh a ni.

Tin, Sihhmuiah khuan Cricket field ropui tak an siam mek niin ka lo hria a, a lawmawm hle a, sum engzatnge ruahman a nih a? Engzat percent nge zawh a nih tawh? tih member te min hrih thei se ka duh hle a ni. Cricket field hi eng ram nge kan hman? Mimal nge? Hemi hi House hian kan hriat tlan a tha hle in ka hria a ni. Tin, tlawmngaia an ram lo donate te an awm em? tih te pawh hriattlan a tha hle a ni. Chung ho chu compensate pek an ni em? Contract an pekah pawh duh sak leh sak loh an awm em? tih te pawh hi hriat a chakawm hle a ni.

Demand 26-na Information and Publicity-ah hian keini thingtlang mi chengte tan chuan he Deparment hmalakna hi lang vak lo hian kan lo chhawr tangkai hle a ni. Sorkar hmasaah khan Video leh TV te sem a ni a. Kha khan nasa takin thingtlang khuate min ti beng var a, a lawmawm ka ti a, chhonzawm leh hram sela tha ka ti a, ka han tarlang duh a ni. Pu Deputy Speaker, Demand No.19-na, LAD Minister hmalakna hi lawmawm ka ti hle a, chu chu ka sawi theih tawk ni mai rawh se, ka lawm e.

Pu H. ZOTHANGLIANA : Pu Deputy Speaker ka lawm e. Demand No.32 Sport & Youth Services chungchangah hian sawi tur a tam khawp mai a, lawmna tur hlir ti ila a fun khawm berin ka hria a ni. Engpawhnise kan Minister hmalak naah hian thalaite kan hlim, kan lawm. Ministry hmasa hun a thalaite 'khelmual tha, khelmual tha' tia kan au vak vak a, kan auhchhuah theih loh kha tun Ministry-ah hian auhchhuah alo ni ta a. Kan auh bak piah lama thil tam tak min tihsak avang hian kan lawm hle a ni tih hi thalaite aiawh pawhin kan sawi ri hmasa duh a ni.

Tin, Demand No. 46 - Urban Development & Poverty Alleviation-ah pawh hian lawmna tur a tam khawp mai a. A bik takin urban area a mi harsa velechhawng tak tak te, mahni a in leh lo sak kawnga hma la hlei theilo te tana 'economically weaker section' an tih ho tana in sakna tur scheme kan Minister in Central sorkar atanga rawn pawt lut a, mi tam takin in tha tak tak an lo nei thar ta te hi thil ropui tak ani kan ti a. Hemi kawngah hian Lawngtlai District saw tlemin kan vanduai deuh hlek a. Ministry hmasa hunah te khan District headquarter ni ve meuh siin Census Town-ah Lawngtlai hi min lo telh loh avangin tihngaihna a awmlo kha a ni a. He Housing Scheme-ah hian telh kan la ni lo a. Amaherawhchu, tun Census publication lo chhuak mai tur 2011-ah hi chuan telh kan ni ve tawh dawn a. Chumi

zulzui chuan kan Minister chak tak hian Lawngtlai tana hetiang ang scheme hi a hma thei ang bera min tih chhuahsak theih kan duh tak meuh a. Nangmah kaltlangin wawiin niah hian kan mamawh thu kan sawi ri duh a ni, Pu Deputy Speaker.

Tin, Demand No. 19 - Local Administration Department chungchangah pawh hian lawmna tur a tam khawpin ka hria. Kan Minister hmalakna a zarah V/C inthlan dante pawh thianghlim, fel fai zawka tih anih theihna turin State Election Commission buaipui tura dan te siamrem alo ni ta te pawh hi thil danglam 'change' lawmawm tak a ni. Chutiang ang zel chuan Local Body Fund V/C te hnena pek thin a pawh tunhma zawng zawng aia mumal leh fel fai zawkin, sawisel kai lovin, tha zawkin kalpui alo ni ta te pawh hi a lawmawm kan ti tak tak a ni.

Demand No. 29 – Social Welfare Department-ah hian sawi tur tam tak karah thil pakhat chauh han sawirik ka duh chu Multi Sectoral Development Plan Fund for Minority Concentration Districts an ti a MSDP tiin kan sawi mai thin a. Hemi hi Lawngtlai District leh Mamit District in kan dawng mek a, thil lawmawm tak a ni a. Chutihruah chuan he scheme a hi a danglam khawp mai a. A dawng theitu tur tak taka te hi Religious Minority anni tur ani tih a ni kher a. Chumi avang chuan Lawngtlai District lamah te chuan a tirah hmundang deuhah te pawh thil tih tur tam tak buatsaih a ni chungin a tawp naah chuan Chakma District bikah, Chakma area deuh bikah Buddhist te, Hindu te awmna lam bikah khan tih a ngai a ni tih a ni a. Kan lawmpui rualin a tuam chin hi duhthusam chuan a zau ta lo deuh hlek tih kha ka sawi duh a. Chumi avang chuan scheme dang entirnan, BRGF han tih te leh thil dang dangah te hian khalai thil awmzia te kha kan hotuten min hriat tel sak ve hi a tha dawn hlein ka hria a. Chu chu ka'n sawi ri ve zawk a ni. Pu Nirupama'n a ngai haw em lovang chu maw.

Hei, Food, Civil Supplies & Consumer Affairs Department-ah hian kan Member zahawmtak Pu P.P. Thawla khan an bial lam harsat dante kha a rawn sawi a. Chutih rual chuan Ministry hmasa nen khan an khaikhin a. A khaikhin dan a kha mi tam takin Mizote hi chu kan hriatrengna te hi a reilo khawp mai a, an tih te kha min ngaihtuah chhuah tir deuh a. Han ngaihtuah ngun deuh chuan tun Ministry-ah hian change duhawm tak tak hi a thleng teuh zawk a ni tih hi sawi ka duh a ni. Entirman- Ministry hmasa hunah khan nutling, patling tlaivar thak thaka Gas bur thutpuia khawlaia hun hman te kha a tam hle a ni. BAFFACOS suma maktaduai tel, sing tel Sorkarin a dawng chung khan Bahra laih thawmte hriat tur a awm a. Burma atanga Buhfai lei a tul thute kan hria a. Tlawmngai Pawl hrang hrangten tan an lak a, Buhfai mirethei zawkte hnena a thlawn te, subsidized tea an hralh te, an semchhuah te kha kan hria a. Khatih laia kan Chief Secretary nupui ina 'Josepha Buhzem' siam a tul thu leh a siam thute kha kan la theihngihlil zo bik lo a ni. Khang ang zawng zawngte kha tun Ministry-ah hi chuan a awm tawh lo. Duhthusamin kan hnianghnar thur thur lo tih hi chu kan pha lo. Amaherawhchu, chu chu Mizoram State pachhe ve tak hian a 'afford' ve lo tih hi chu kan hriatthiam ve pawh a tul a ni. Kohhran te, NGO ten Buhfai an sem a tul ta em ni. Tun Ministry-ah hian mipuiten hnianghnar takin kan duh ang ang kan hmulo deuh a nih pawhin a hun takah kan retailer ten hmun kilkhawr te teah pawh Buhfai hi an la sem zat zat a nih hi. Carrying Contractor duh sak bik, hnungthak inhihpui nia ngaih loh theih loh te an awm ta lo. Kan Minister hian thianghlim takin thil a kalpui a, Carrying Bill te

pawh an bat tam dan azirin, a percentage-in chhut ula, felfai takin, bat rei tawh dan azirin pe rawh u, a ti mai a. Chutiang chuan Congress mi leh sate pawh an invulh ve vak vak hauh bik lo, fair takin an kal a ni. Hengte hi 'change' lawmawm tak a ni.

Environment & Forests, Demand No.36-ah hian thil duhawm tak tak sawi tur a awm teuh rualin (warning bell) Pu Deputy Speaker, ka ti tawp tawh dawn mai anga. Lawngtlai bikah DCF Wildlife hian transfer a dil a, a dilna hi kan Minister-in a approved tawh bawk a, khawngaih takin he dilna hi tihhlawhtlin vat ni rawh se, mi tui lo chung chung a an awm hian mipuiin kan tuar ani tih hi a tawp nan kan sawi tel hram duh bawk a ni Pu Dy. Speaker ka lawm e.

Pu LALROBIAKA : Pu Dy. Speaker ka lawm e, hei sawi tur a tam khawp mai a, a bik takin Demand No. 17-na atang khan kan tan ve anga. FC & CAS deptt. ₹ 2,29,37,03,000/- lai mai kan han nei hi a lawmawm in a thlamuanthlak ka ti a. A bik takin he deptt. hi Intin fairel bel khawih anih avangin a pawimawh hle a, nitin, zantin kan ei bel anih avangin heti zat kan han nei hi a lawmawm ka ti a ni. Amaherawhchu, Pu Dy. Speaker, hei hi a tam tawh lovang tih a rin theih a, nitin, thlatin a kan buhfai lei belh ngai thin te han chhut chuan hei hi a bei tham hle ang tih chu kan hriat lawk thain ka hria a ni. A bik takin kan Minister chak tak hi han fak ka duh a, vawiinniah Supreme Court ruling te awmin, a thiarna chungchangah, buhfai chungchangah harsatna tam tak kan nei a, tin, kan han ministry chhoh atang khan harsatna tam tak Rel han rawk te, oil phur hel tena lo beih te tam tak a awm a, chutichung chuan chu harsatna karah chuan tun hi min hruai thleng a ni.

Sorkar hmasa kha kan en chuan, opposition lama rawn sawi hmasatu khan a rawn sawi a, a theihngihl lui nge ni a, a theihngihl der tih kha hriatthiam har ka ti a. Sorkar hmasaah khan tam a tla a chutiang khatiang chuan kan harsa ani kan ti a, a dik ani, kha kha kan hai lo. Amaherawhchu, chutih rual erawh chuan sorkarin kha kan tam na avanga min chhawmdawl nan BAFFACOS ah vaibelchhe tel, vaibelchhe 125 lai min rawn pe a, khati chung khan kan harsa em em ani tih kan hria a ni. Kan harsat zia chu kohhran tinin Buhfai kan sem a, Tel kan sem a, chi hrang hrang Dal thlengin kan sem a ni. Keipawh khatihlai khan a semtute zingah Kohhran aiawhin ka tel ve nghe nghe a ni.

Chu mai nilovin YMA ten an sem a, YMA mai nilovin chi hrang hrangin nichina sawi tak ang khan Chief Secretary nupui te hialin Josepha Buhzem te hial an siam a ni, khatiang kha ani a. Vawiinniah erawh chuan harsatna hrang hrang nei chungin tun hun hi kan thleng ani a, meialh en an awm lova, bahra khur laih tur zawnga kal vawiin niah hian an awm lo. Kan sawrkar chak tak, kan leader Pu Lal Thanhawla hmalaknate, tin, kan Supply Minister remhriatnate hi a ropui ka ti a, sawrkar hmasa angin T.V lamah te, chanchinbu lamah te an in advertise ve ut lo, amaherawhchu mipuiin hei hi kan hria a ni. Tunah hian nichina kan sawi ang khan contractor a ti thei bik, Bill pawh tang ve ngailo te an awm lo a, a seniority in carrying bill pawh lak a ni a, khatiang khan hma ala chho hi a puitlin thlak ka ti a, hei hi ram ro chhinchhiah tlak a ni. Tin, gas nisela, khawpui

chhungah Gas Agency kan han neih belh a, chumi piah lamah thingtlang lam atang pawhin Gas agent thar tam tak kan neih belh a ni. Chumi zingah chuan keini pawh kan tel ve a, West Phaileng kan bial bikah Agent thar kan han neia heng avang te hian, a Minister chungah pawh lawmthu kan sawi duh a ni. Tin, khawpui chhungah pawh Agency thar mai piah lamah khanin connection tharte pawh he kan sawrkar hnuah hian singnga chuang pek thar an ni leh tawh te hi a lawmawm ka ti a, a Gas hrim hrim chungchangah pawh hian a hmaa sawrkar ai kha chuan hma kan sawn ani, step eng emaw zat kan kai ani, tih hi kan sawi duh a ni.

Tin, Demand 36-ah khan Environment & Forest-ah hian vaibelchhe 60 leh nuai 29 lai kan han neia, hei hi a tha thawkhat hlein ka hria a, Forest bikah hian hei kan rama Forest hmalakna tur tam tak awmah hian, nasa lehzuala kan Forest a thawk tute official te pawhin hma an lak nasat hi a pawimawh hlein ka hria a, abik takin khawthlang lam bialtute a hmingin kan han ni a. Keini hi Forest neihthatna hmun ni tawh mai te pawhin a inhriat theih ani. Chutiang chu a nih avangin tunlai global warming kan han tih te, tin, ecological balance kan han tih te, heng zawng zawng karah hian a steering vuantu in ni tih kha, in inhriat atan a thain kan hre lehzuala, chutih rual chuan a bik takin hei keini bialah hian Dampa Sanctuary te kan neia, chung avang te chuan thil harsatna emaw, awlsamna te pawh heng avang te hian tam tak a awm a ni.. Chutiang te chu a nih avangin kan khaw hrang hrangte he sanctuary nena in ngheng tlat kan nih avang hian, heng avanga harsatna te pawh kan nei thin a ni tih kha i hria a, Minister pawh hian a hria a, chung avang te chuan chhawmdawlnate a ni emaw, thil chi hrang hrang awm theiah pawh min duhsak thin a, a lawmawm ka ti em em ani tih kha kan sawi duh a ni.

Demand a tam si a, kan sawi senglo anga, abik takin kan sawi leh duh chu Demand No 22-na, Sports & Youth Services, hei hi sawi tur a tam khawp mai a, khawlaia han awm tel tel tawh naah chuan, term hmasaah chuan Football field tha, Stadium tha kan mamawh a ni tih kha, thalaite thunawn a ni ringawt mai a ni. Tv-ah te, Chanchinbuah te, tin, sms te thlengin Field tha kan mamawh, thalai ten Field tha kan mamawh, tih a ni ringawt mai. Amaherawhchu, chumi chu hre rengin he Sorkar a lo dinna tur atana campaign a nih atang khan kan hotuten, thalai te khawvel hi kan hria a ni, thalai te mamawh kan hria a ni, hei chu kan ti ngei ang, tiin tan an rawn la a. Chumi hria chuan kan thalai te pawhin he Sorkarna tur atan hian tha tam tak in thawh tih kan hria a. Khang avang te khan lawmthu ka'n sawi duh a. Hei, kan sawi seng lovang a.

Sport chi hrang hrangah kan Sorkar a lo din atang hian hmasawna leh hlawhtlinna tam tak kan hmu tawh a. Infrastructure-ah te nasa takin hma kan sawn a ni tih ka'n sawi duh a. Chutih rual chuan keini bial bikah pawh Pu Thawla sawi ang deuh khan hlawhtlinna tam tak kan nei tawh a. Hei, Lalrinpuia, Lalchhuankima W. Phaileng fapa hi thla hmasa mai khan United States-ah Table Tennis, Sub-Junior ah champion a'n ni hlah mai a. He Assembly House-ah pawh hian ka'n sawi lang duh a. A lawmawm ka ti a, tin, ka lawmpui tak zet zet a ni tih kha ka'n sawi duh bawk a ni. Tin, kan Sport Minister hian a ngaihna a hriain ka hria a. Sport, game hrang hrangah te harsatna kan neih thin chu, India ramah kan awm a, an tawngte kan hre lova. Khang avang te khan harsatna, kan skill emaw a bika kan thiamna te kha ti chhuak hlei thei lovin kan awm fo thin a. Chumi chu hriain kan Sport Minister chak takin Hindi zirna te, English zirna te a'n hawng, a'n buatsaih te hi a lawmawm ka ti a. Heng te hi nasa zawka kan chhawr tangkai zel hi kan Sport person te pawh hian kan

tum a ngai a ni. Manipur te kan en thin a, anni advantage chu tawng an thiam avang te a ni tlangpui thin a, anmahni skill hrim hrim piah lamah. Chutiang te chu a nih avangin tawng kan thiam te hi a ngai a ni. Chuvang chuan heng kan kawtkai chhawpchuah a lo awm ta te hi kan chhawr tangkai a ngai a ni tih kha ka'n sawi duh a. Sawi tur a tam khawp mai a. Infrastructure-ah te, Rajiv Gandhi Stadium te, AR Lammual Astro Turf, Indoor Stadium Pitarte Tlang, Champhai Indoor Stadium tih te, tin, Keitum, Bungtlang Indoor Stadium, tin, Saidan Regional Sport Training Centre, Sport State Academy Zobawk te, Thenzawl Hockey Cricket Stadium, Mini Sport Complex Lengpui, kan sawi seng lovang, Pu Deputy Speaker. Chuvang chuan sawi vek lo zawk mai ila a thain ka ring a. Sport lama hma kan lakna leh kan hlawhtlinna hi sawi sen a ni lova. Medal ringawt, National-ah te, International-ah te kan lak hnem tawh zia te a ropui hle a ni.

Point khat lek, Information & Publicity ah hian. Hei hi Sorkar tawtawrawt an ni a. Sorkar tan an pawimawh em em a. Tin, Staff te pawh an thiam, an chhuanawm. Chung avang chuan kan Sorkarin heti zozai mai Budget a'n nei hi a lawmawm ka ti a. Information hi tih chak an ngai a, tin, ngun zawka vil an ngaih mai piah lamah hian Information lam pawh hian, ka hma a mi te sawi ang khan hmun kilkhawr zawk te tana an hmasawn ve na tur leh an hriatna te tih zauhna tur atana tunhmaa T.V te, Radio te an pek thin te kha a chhonzawm leh theih tawh lawm ni te kan ti a ni e. Ka lawm e.

DEPUTY SPEAKER : Aw le, tunah tunge sawi leh dawn le ?
aw, Pu R.Lalrinawma i lo ko ang.

Pu R.LALRINAWMA : Pu Deputy Speaker, ka lawm e. Hei department pawimawh tak tak, 8 kan sawi ho a ni a. Pakhat sawi nan minute khat erh awrh kan nei a. Chuvangin thluaithlum vak lovin ka ngaimawh zawng zawng kan sawi ve anga. Demand no 17-na, Food, Civil Supplies and Consumer Affairs-ah hian tuna ka hma a an sawi ang khan APL quota FCI atanga a to a kan leina avang khan helaiah Ration-ah a tlawma pek leh si avanga thla tin vaibelchhe 10 chuang kan seng chung pawhin vawiin ni thlenga harsatna lutuk tawh lova kan awm thei hi kan Minister a fakawm hle in ka hria a.

Kan sawi tawh ang khan, kan han sorkar hlimah fur nasa lutuk avang te kan hre theuh a, rail kawng chhia nasa lutuk avang te, tin, Supreme Court-in “truck-in 90qtls bak a phurh loh tur” tia all India a thupek a chhuah avang te in harsatna nasa tak kan tawh a. Chuti chung chuan Bahra lai thawm te emaw NGO leh kohhran te hial inrawlh te pawh a ngai lo tih te kan sawi lang tawh a. Tin, tunah pawh hian Pu Deputy Speaker, fur, monsoon stock an tih ang hi hun hmasa lamah te chuan advance in thlathum chung half quota hi lo lak thin a ni a. Tunah khatiang ti miah lo khan thingtlang godown lian zawng zawng hi chu fur tla tur hi chhek khawl niin kan hria a. Kan minister zahawmtakin zawhna chhannaah te pawh a sawi tawh a. Hengte hi a lawmawm hle in ka hria a.

Tin, Consumer Affairs lam hi kan tih chak a tul hle in ka hria a. Tute pawh hi consumer kan ni theuh mai a, engemaw zawng tal in, chuvang chuan kan right te pawh hi kan hriat a, claim nachang te pawh hi kan hriata, kan claim ngam te

pawh hi a hun ve tawh hle mai ka ti a. District forum te kan nei a, State Commission te, hengte pawh hi hmang tangkai ila, tichuan vawiina mipui kan phunna tamtak a hi kan right kan hriat loh vang te pawh hi anihna lai a awm a ni. Chuvang chuan Consumer Affairs hian consumer a kan right te, consumer awareness lampangah te hian tan han la deuh sela, a duhawm hle in ka hria a.

Tin, Demand No 19-na LAD-ah hian, hei V/C 800 chuang an enkawl a, khawkhata a pa kei ka ni inti the thaw enkawl tute an ni a. V/C te hi an pawimawh hle mai a, democracy-ah grassroot level a rorel tu, mipui chawbel ngheng a roreltu an ni a. Sorkar pawhin a ngaipawimawh a, an kutah hian khawtlang development sum tam takte a kal a ni a, tun sorkar chhoah pawh. An sum hman a hi fimkhur tak leh dik tak leh langtlang a an hman hi kan ram hmasawanna tur a ni, kan khawtlang hmasawanna tur a ni tih hi an hriat hi a pawimawh in ka hria a. Tin, account vawn chungchangah te, hengah te pawh hian a department hian a khat tawka training han pek te pawh hi a tha awm mang e ka tia, Pu Chairman, chutih rual rual chuan an lawmman te pawh hi tihsan ve hi a hun tawh hle in a lang a, sawrkar in engkimah agency-ah a hmang a, an tangkai em em a, chutih rual chuan an lawmman te a bei tham hle a, chuvang chuan lawmman te pawh hi ennawn a hun hle in ka hria.

Demand No 29-na Social Welfare hi Department pawimawh tak ani a, rualban lo te, hmeithai/chhumchhia te an enkawl a, chutih rualin NGO hrang hrang ten he depts hi an bel bawka a, Department pawimawh tak an ni a, an hmalakna te hi a lawmawm thin em em a, Old Aged pension, tun Ministry tharah a latute tihpun a lo ni a, a latu number a lo pung chho te hi a lawmawm a, chutih rual chuan a then in a 200 an lak lai in a thenin 250 an la erawh hi chu a rual khai a tih theih ni tawh se a duhawm hle in ka hria.

Tin, Pu Chairman, Demand No 46, UD&PA, hei an hnathawh alang chhova, Deptt naupangte an ni a, chu ti chung chuan Aizawl khawpui leh a chhehvel te an han cheina kawngah, retaining wall te, step checker tile han phah te, khawpui ati mawi hle a, handrailing nalh tak tak te an han siama hei hi a lawawm ka ti a. Tin, an hnathawha lawmawm em em chu Municipal Council, khawpui enkawltu tur sawrkar hmasa huna tum leh tum lova an tih, a dan te pawh an han siam ve a hman tlak mangloh, khang ang kha tun sawrkar tharah rei lo teah dan te siam tha in a takin a chang chhova, vawiin niah thuneihna te pawh an han pe tan a, amaherawhchu, he House atanga an thuneihna a va inrawlh tum lek lek na te, i veilam atang te a an awm hi a dik lo hle a, hei kan Minister chak takina khawpui enkawltu tur an kutah te pawh an dah tan chho ani a, heng te hi a lawmawm hle in ka hria a

Demand No 22-na, Sports & Youth Services- ah hian ka hmaah an sawi tawh a, hmalakna infrastructure lamah te a ropui em em a, kan thalai te an lawm hle a vawiin niah, tunhma a khawilai emaw a fawr a thu kual mai mai thin te khan vawiin niah chuan Sport lamah te hian an phur thar em em a. Hengte hi a lawmawm ka ti a, tam tak an sawi tawh a, kan sawi lan ve duh chu sawrkar hnu rei lo te 2009 August, ni 29-ah khan Vana pa Hall-ah hun rei tak an lo tih tawh loh incentive cash award, (sport thei te tan a lawmman an pek thin) kha mi 578 hnenah an han pe te kha a lawmawm ka ti a, tin, tug of war tunhma a an recognised loh, incentive te pawh an pek ve ngai loh, national levelah te pawh Gold-te pawh rawn la ve thin an ni a, chung te pawh chu incentive award te an han pe ve ta te hi alawmawm em em a. Tin, December, 2010 ah khan infiammi 290 hnenah cheng 14,99,750/- an pe leh a, tunah

hian mi 336 hnenah cheng 2,29,650/- pek leh tur a hma lak mek ani a, heng te hian sport mite, kan thalai te ati phur em em a. Tin, 'Catch them Young' policy han kal pui te hi a fin thlak a, naupang sport lamah an naupan lai atanga han zirtir chhoh te , tin, infrastructure- ah te leh sports material-ah te hmalakna a nasa em em a, Riffle Association-ah te, Shooting Gallery Aizawlah te leh Lungleiah te kan hmu a. Tin, boxing lamah boxing ring District-tin a dah tur han tih te hi a lawmawm hle mai a. Hei Rajiv Gandhi Sports Stadium-te pawh chak taka hmalak chhoh ani a, vaibelchhe 150 senna tur, hengte Indoor Stadium Pitarte tlangah an din tur te, Champhaiah te, tin Keitumah te, Bungtlangah te. Nichin khan i veilam atang khan Saiha lam te kha hmalakna a awm lo ang deuh te khan an han sawi deuh naa, hei record kan neih ve ah chuan Saiha District-ah te pawh indoor stadium te, improvement of ECM playground tih te, improvement of Vengpui playground tih te, heng te hi hmalakna Additional Central Assistant atanga hmalakna ani a, hmalakna tam tak a awm a, hengah te hian a lawmawm hle a.

Chutih rual chuan Pu Chairman ka bial chhungah pawh Zemabawk field-ah pavilion min siam sak ve a. Ka bial saw Aizawl leh a chheh vel kan tih a hi ani a. Aizawl atang pawh a hman tangkai theih playground changtlung te kan mamawh hle a, tin, sawng Zuangtuiah te pawh Volleyball Court siam na tur tha tak mai hmun a awm a, TNT bulhnai deuhah sawn, sawng te pawh saw Zuangtui leh TNT te saw volleyball lamah te hian hma an sawn em em a, tin, Tuirial Airfield (Budget General Discussion-ah pawh khan ka sawi tawh a) Tuirial Airfield khu Sport Department kut a awm niin ka hria a, khung te khu chei that a, hei kan sport person te hi hengah an han practice a, phaiah boruak alo inthlak a, hmun lumah an chak loh leh phah thin na hi henglaiah hmun lum deuhah te training pek hi a tha hle a, khung Tuirialte khu Airfield hlui ani a, chei that nise, kawngpui atanga a panna kawng te khu a chhe em em mai a, bike racing nan te an hmang a, an tangkai pui hle na chungin tun aia tangkai zawk khuan hman theih a nih hmel a. Chungte chu ka'n sawi lang ve duh a, an Department hmalakna a lawmawm a, tuna an Demand pawh hi lungruak taka pass pui turin ka'n sawm duh a nih chu. Ka lawm e.

Pu NIRUPAM CHAKMA (CHAIRMAN): Sawi tur kan la awm em? Tu nge sawi leh ang. Pu B. Lalthlengliana.

Pu B. LALTHLENGLIANA : Minister zahawmtak khan min rawn melh a, ka sawi a duh deuh a niang ka'n sawi ang e.

Pu Chairman, ka hma a thusawi tu tam tak khan Supply Department chungchang an sawi a, khatih hunlai a NGO leh midang dangten buhfai an sem chung chang te an rawn sawi a. A bik takin Lawngtlai North bialtu khan khatih hunlai kha ala hrepha lovin ka ring a, a hmel han en leh a kum han en in ala naupang deuh te pawh ani ang e. Khatih hunlai a gas phur, Aizawl khawchhungah phei chuan 'gas duh em' anti a an rawn inkhak ri ruih ruih a. (Interruption)

Pu H. ZOTHANGLIANA : Point of Order Pu Chairman, chutiang ang hre pha lo tur em em a naupang chu kan ni bik lova, khatih hunlai khan Selection Grade Lecturer ka ni ve tawh a ni. Tin, Central YLA (Central Young Lai Association) President ka ni bawk.

Pu B. LALTHLENGLIANA : A nih chuan Pu Chairman, a lo theihngihlh palh ani ang e. Ni e, thil hriat loh hi a neih ve theih a khalai kha a hre lo palh ani ang e. Aizawl khawpui chhungah chuan tuna ka beng a la ri reng chu 'gas in duh em' ti a gas in khawng ri kha ala ri ring em em mai a tunah erawh chuan a awm ve ta lo a, a ngaihawm khawp mai.

Tin, buhfai chungchangah hian Mizorama ngei ngeia piputen thleng thina an ngaih kum 50 danah Tampui mitthi thleng thin chu kan sorkar lai khan alo thleng a, chumi avang chuan thenkhat chuan bahra khur an lo lai ani maithei, chutiang lo deuh te pawh chu an awm ani maithei. Chutih lai karah chuan Sorkar khan nasa takin tan ala a, mi pakhat tan kg. 3 ten kan pe kha a ni a, tunhma State kan nih hma Mizoramah kum 1959-a tam lo tlak tuma kan harsat dan te, kan retheih dante ngaihtuah chuan tun tum tam chu tlemin kan ziaawm a, tam lai hun leh tam pawh ni tawh lo hun nena tehkhin chu Pu Chairman a tih chi loh, Mizoram mipui hian an hre vek in ka hria a. NGO leh Kohhran buhfai semtute pawh khan an hre vekin ka ring a. Tin, buhfai carrying contractor tih chungchangte kha chu kan sawi duh lo mai mai a ni a, tlatlum leh tlum lo hi chu an la awm chiang khawp mai, bill la thei leh thei lo pawh an la awm chiang khawp, sawi zui lo ila, gas chungchang pawh ti khan tawk mai teh se. A hmingin MLA te ni mah ila, Gas chungchangah chuan Consumer Union ten an control bawk a, connection 5 pawh nei ilang vawikhat a lo thlenah number chumi inkar an tih a kan number a awm ve loh chuan kan la thei lova, VIP quota te hi kan lak ngai zen zen loh kha a ni a, tunah chuan VIP atang lo chuan gas te pawh lak tur kan nei ngai tawh lo a ni, kha kha Pu Chairman Supply ah chuan ni mai sela.

Tin, Forest-ah hian tawite sawi ka duh a. The Mizo District Council Forest Act, 1955-ah Mizoram luipui dung zawng zawng kam sir tawn tawn (either side of the river) tih kha a ni a, amaherawhchu, Forest Department interpretation-ah hian both side a an tih avangin luipui dung zawng zawng a sir tawn meter 800 Forest-in a humhalh anga ngaih a ni. Tunah hian tlangram loneite tan ram a lo bua/chereu zel avangin tlangram lamah thlawhhma lak tur a awm mumal lova, Pu Chairman, a theih dan kawng zawngin luipui dung lama Forest ram hi tlangram lamah sawn theih dan hi zawn a, kan rama kut hnathawktuten luipui dung phai lamah hian eizawna nei ta sela, chutichuan kan ziaawm in ka ring a, chu te mai chu Forest-ah hian ka sawi duh a.

Tin, Social Welfare-ah hian MLA tena kan sem ve thin te he Sorkarah hian ka dil ve thin a, ka hmu hleithei mang lova, PA Set phe chu pakhat chiah ka la hmu a, chu pawh chu a laklawh em avangin min pe hram ru tiin ka chhuhsak deuh ti tih a ni mai a. Chuvang chuan, tun aia tam zawk leh changtlung zawkin sem ni thei sela, bialah NGO leh a duh dang tam tak

an awm a chungte chu pek ve a ngai thin a, kha kha kan sawi lang zawk duh a. Tin, thil pakhat ka han sawi duh chu Social Welfare bik chauh nilovin Department tinte a Officer kai sang zel te, entirnan, Director post-te a lo ruak a, Joint Director-ah kum 3 an thawk phawt tur a ni tih ang chi hi direct recruitment a Officer lak te an nih chuanin a hma in experience kum 3/kum 5 tal an nei tur ani tih hi chu a dik ka ti a, chuti nilova Officer hniam te atanga kai chhova Joint Director te lo ni tawh kum 3 in nghah tir kher hi, he dan hi chu siam that atan a tha ka ti. Director-ah charge an la thova, hriat loh leh thiam loh an nei chuang lova, chutih laia kum 3 han in nghah tir kher kha a tul lova in tih khawtlaina niin ka hria a, chu chu kan sawi lang duh a.

Tin, Sports-ah hian, nia kan Member zahawm tak tak ten Mizorama Sports-a kan hmasawn zia in sawi a, a dik khawp mai. Amaherawhchu, a bul chu MNF sorkar lain a chi tha, tui luang kiangah kan phun a, a hnah pawh uai ngai lo tur, a kung pawh duah tak tur, chutiang chi tha chu kan han tuh a. A chawr no ta viau a, tunah hian par a chhuang a, chumi par a chhuang lai tak, a mawi lai tak chu Minister zahawm tak hian a rawn nang a. A hmaa kan project siam zawng zawngte atanga bul tan chhovin, chutiang hmang chuan a'n chhunzawm chhova. Hetianga a chhunzawm duhna atang ringawt pawh hian fak tlak niin ka hria a. Chutichuan, tunah hian a par a vul a, Member-te pawhin kan sawi laih laih a, kan lawm a ni. A rah tak tak erawh chu MNF hunah kan lo ve leh dawn a ni tih kha k'an sawi duh a ni. A rah tha tak, a chi tuh zel tur kan la seng ang. **(Pu Nirupam Chakma, Chairman : Tuna chi ang chu ni lovin).** Aw, ngawi rawh, min tih khawtlai avangin minute min pek belh ang, Pu Chairman. Rajiv Gandhi Stadium cheng vaibelchhe 25 kan sorkar laia kan tihchhuah tawh hmangin Minister-in Mualpui-ah kan phal lo chung a sawn a, a sawn takah chuan "E" kan ti mai ang a. Chumia zawh theih a nih loh avangin tun State Budget-ah crore 15 dah a ni a, 13th Finance Commission a lo hmin leh chiah si a, chutatanga tih theih chu ni se a va tha dawn em! tih kha ka sawi duh a. A chhan chu thildangah State Plan Fund atanga pawh a tam bawk si a tih lai kha tawi te ka sawi duh a.

Tin, chumi bakah chuan Mizoram State Sports Academy, Zobawk ami kha crore 10 kan sorkar lai khan kan hmu a, tun sorkarah hian crore 7 hmuh a ni a. A vaiin crore 17 hmuh tawh niin ka hria a. Chu chu tan a la ni miah lovin ka hria a, Lunglei lam hi ka zin ngai lova, titi pawh ka hre lova. Hei hi engati nge kan Minister hian a tan mai theih loh, ngaihtuahna dang an hmang a 'Change' in ti bawk a, a change leh dawn em ni? Thildang atan hman leh tur em ni? tih kha min rawn hrilhfiah se la. Tin, chu bakah chuan District hrang hrang Sports Complex atan crore 25 DPR siam atangin crore 11 hmuh a ni a. Khang te pawh kha (Pu Nirupam Chakma, Chairman : Minute 2 i la nei aw.)hman a ni em? Ngawi rawh, Pu Chairman, tawi te ka'n sawi leh ang e.

UD&PA -ah hian sawi ka duh a. Ka kianga MLA zahawm tak Pu Ramhluna nen Salem Veng Local Council ten Pu Ramhluna thusawi an rawn sawisel avangin a hmunah kan zu kal a. A dik tak chuan kan MLA zahawm tak khan dawt a sawi lo a ni. Kan zu kal a, leilawn sei tak a ni. Culvert hi chu a dictionary meaning-ah chuan kawng hnuai kawr lung rema siam tih a ni a, leihlawn sei tak mai a lo indawh zui mai a. A hna hrim hrim chu a tha lo kan ti lo, kan zu hmuh takah chuan, a tha khawp mai. Amaherawhchu, kan office lamina Work Order-a a name of

work an ziah dan ang kha chuan RCC Culvert siam tur a ni a, Culvert hmuh tur chu a tam lo hrim hrim a. Khatiang a nih chuanin thil ngaih sual theih tam tak a awm thei a ni. Work Order-ah 'Construction of RCC culvert on Internal Road at Salem' tih tawp kha a ni a, Estimate amount ₹ 4,50,000/- culvert kha chu anilo Chiang a, culvert zawng tan chuan culvert zawn hmuh ngaihna a awmlo. A bo ati lova, zawn hmuh zawh loh ani a ti mai a, chuvangin kan pahnihin kan zu zawng nawn leh a, culvert chu kan hmu chuang lova, leihlawn sei tak, bialtu MLA fund atanga puihna nen siam zawh ani a. A tha khawp mai, kei pawhin a hmunah pawh tha ka ti. Department pawh tunhnuah an fimkhur ka duh chhan chu work order 56 naah pawh khan construction of jeepable internal link road near John Siamkunga's house at Salem veng ₹ 2,50,000/- an ti leh a. John Siamkunga hi V.C te leh khuliah party hruaitu te pawh kan zawt a, tumah John Siamkunga hi a awm lova, a in bulah hetiang hi a awm bawk lova V/C te pawn he pawisa hi kan hmulo an ti bawk a, chutiang ang chu tuna work order an tih dan hi ani. A mak khawp mai.

Pu Chairman thil pakhat leh chu Repairing and renovation of footpath within northern area of Aizawl ₹ 6,00,000/- an han ti leh tawp mai a. Northern Aizawl kha chu a zau si a, khawiah ber hian nge an siam dawn, va zawng leh mah ila kan hmuh pawh ka ring lova, khatiang anih kha chuan. Tin, kha aia mak leh zual chu Pu Chairman Bethlehem Vengthlangah khuan H.Chhunthanga's house to Zosangliana's house at Bethlehem Vengthlang ₹ 4,00,000/- engnge siam an tum a hriat lova, footpath nge, lungrem nge an tih dawn, culvert nge, enge kha kha a hriat loh reng reng (CHAIRMAN:Hun remchangah i sawi dawn nia).Chuvang chuan ngawi rawh Pu Chairman lawkin, khatiang anih avang khan nimina chanchinbu leh thildang (CHAIRMAN:Minute 15 a ni tawh a nia). an rawn tih khan kan MLA privilege a khawih in ka hria a, chuvang chuan hetiang work order department tena an siam dik loh avanga kan member te thu sawi, pawn lam atanga an rawn counter vak vak mai hi Member privilege khawih thil niin ka hria a. Tun chinah chuan department te hian Sorkar thila hma an lakah hian fimkhur sela, PAC-ah pawh hei hi thil tam tak ngaihtuah a awm mek ani a, chuvang chuan hetiang hi tun hnuah kan fimkhur zawkna turin department lam hi Minister zahawm tak hian hrih chian nisela, MLA te chuan report kan hmuh ang kan sawi mai lo thei lova, chu chu ani.

Tin, Pu Chairman, pakhat ka sawi duh chu mirethei insak hi kan hun laiin Champhai te pawh tender tawh ani a, amaherawhchu, kan pe hman lova, Minister hian heti zawng hian a rawn ti ta a ni. (CHAIRMAN :I hun a tawp tawh a) Ngawi rawh pakhat chauh Champhai mirethei insak pakhat Bawngkawn a pa pakhat pek daih mai te kha a dik thei dawn em ni. Chuvangin economically weaker section tana pawisa building a sak tur thensawm ani hi tha ka ti. Amaherawhchu, beneficiary te pek an nih hian fimkhur sela, a thain ka ring a, chu leh khulai Bungkawn, Lawipu veng sak thingthuap tawh chhunzawm hleihtheihloh khu zawh thuai anih theihna turin kan minister hian engtinng e hma a lak tih kha kan zawt duh ani. Zawhthuai nisela tih kha kan ngen duh bawk ani. Pu Chairman mi i dawh thei a, ka lawm e.

Pu NIRUPAM CHAKMA, CHAIRMAN : Pu S. Laldingliana ilo sawm ang.

Pu S. LALDINGLIANA : Pu Chairman, Demand No. 22 naah khan tawite sawi duh ka nei a. Hei, Member zawng zawngin kan sawi a, hun hmasa lamah tepawh, Sports lama hma kan sawn zia hi sawi tam a ngai lova, kan hria a, a chhan zawk hi sawi ka duh a ni, vawiinah hian. Hei, a bul atang ka tan duh chu kan Chief Minister atang hian ka'n tan ang a, kan Chief Minister zahawmtak hi kan hriat angin infiammi, Sports lama tui em em mai a ni a, a thatlai hunah tephei chuanin Mizoram aiawh mai nilo, Assam aiawh tepawha Hockey te lo khel hial tawh a ni a. Carrom Board te phei chu a thiam laileng khawpa an ti a, Carrom Board atang hian Kel hi engzatnge a hlawh chhuah ang aw tih sawi fe tham a awm a ni. Chutianga infiamna lama a tak taka lo luhchilh thin chu a ni a, chumi hnu kumte a lo upat hnuah pawh, a infiam peih tawhlo hnuah pawh, Sports Association lamah pawh hruaitu ni chho in. Hei, kan hriat angin vawiin thleng pawhin Mizoram Olympic Association-ah pawh President niin, Indian Olympic Association-ah pawh Member ala ni a ni. Chutiang anga infiammi hruaitu kan nei a.

Tin, a thachhang dawltu turin kan Sports Minister zahawmtak Pu Zodintluanga kan han nei leh hlauh a, kan hria a, thalai infiammi a ni a, vawiin thlenga infiammi te zinga la tal hrai hrai peih. Tin, a record te hi a tha em em a, Mizoram Tennis bik han sawi ta ila, Pu Deputy Speaker, Lalzuia Open-ah te, Mizoram Open-ah tepawh vawitam tak Champion te, Runners Up te lo nitawh niin Mizoram aiawha India ram hmun hrang hrangah tepawh lo khel zak zak tawh ani. Chutiang ang hruaitu kan neih avang chuanin rilru zawng zawng, ngaihtuahna zawng zawng sengin thalaite tana khawvel thar kan siam dawn a ni tia inthlan laia kan lo intiam tawh kha tunah hian a tak takin kan han tihhlawhtling chho mek a ni a. Kum hnih leh a chanve, kum thum em pawh a ral hma-a heti tak maia Sports lam leh thalaite hmakhua ngaia hma kan lakna hi thil mak a nilo, hetiang hi thil thleng thei tur reng ani, hetiang Leader hruaina hnuai hian tih kha ka'n sawi duh a ni.

Thil tamtak sawi tur a awm a, mahse 2/1 chauh Sports lama sawi tur ka neih chu Sorkarina kan infiammite tana Coach rawihna tura a hranpa ngat maia pawisa an dah hi a lawmawm ka ti a. Nikumah khan nuai 40 dah chhoh a ni a, Sports Association hrang hrang ten Foreign Coach-te, National Coach-te an han chah chhuak chho a. Hei hian nasa takin hmasawna a siam a ni tih kha ka sawi duh a.

Tin, infiammite tana Incentive Cash Award an han siam ve te hi lawmawm ka ti em em a. Nikum 2010 chhung khan infiammi 290 tan cheng 14,99,750/- hi semral a ni tawh a. Kuminah hian infiammi 366 tan cheng 22,96,500/- hi semral leh tura ruahman leh a ni. Nichinah khan kan Member zahawmtakte khan an rawn sawi chhuak tawh a, thil hote anga lang, mahse pawimawh em em chu kan infiammite hian tawng lamah harsatna an nei thin a, chumi avang chuan National Participation chungchang thu-ah te, Coaching Camp zawm chungchang thu-ah te hian an hmasawn tur angin hma an sawn thin lo a ni, tawng lama harsatna an neih avangin. Chumi avang chuan USHAM te, SCERT nena tangkawpin kan Minister zahawmtak hian tawng zirna Spoken Hindi/Spoken English te infiam mite tan an siam leh tlat mai te hi, hote anga lang, mahse pawimawh deuh mai, hma kan sawn theihna tur atana awmze nei deuh mai a ni a, henge hi a lawmawm ka ti em em a, ka'n tarlang duh a.

Tin, 'Catch them Young' tih hi ka sawilo thei lova, he Sports Programme hi a lawmawm satliah mai nilovin a ril em em a ni tih hi vawiinah hian ka sawi duh a ni. Hei, kan Chief Minister zahawmtak hian a sawi thin a, "Mizote hian talent cho chhuah tham kan nei a ni" a ti a, hei hi thudik tak a ni. Kan talent hi a tha em em a, kan cho chhuak mek a, kan cho chhuak zel dawn a. Chutianga awmze neia kan cho chhuah hma pawh hian Pu Zoramthanga chungchangte pawh ka sawi tawh a, Champhai-a kan thiante ka zawh chuan 'Khawiah nge a zir thin' tia ka zawh chuan Bawng khel hi a hnek thin an ti mai a, chutiang mai maia inzir chho chuan khawvel a thleng thei tlat a ni. Mahse vawiinah chuan kan Minister zahawmtak kaihhruaina Sports policy, sport programme hnuaiyah hian naupang ten awmze neiin, systematic-in an duhthlanna berah sport an lo zir chho ta a ni a. Hetiang a nih hi chuan tuna tanga kum 10, 15 lo kal leh turah hi chuan kan nau te hian sports discipline hrang hrangah hian khawvelah Mizoram hi an pholang dawn niin ka hria a. Hei hi a lawmawm ka ti a, ka'n sawilang leh duh hrim hrim a ni.

Tin, Demand No. 17, Food Civil Supplies & Consumer Affairs ah hian sawilan leh ka'n duh chu kha hun hmasa lamah khan kan hria a. MNF hun ti mai ila, han sawi lawng mai ila. Khangah khan harsatna a awm love, kan ti a. A lo awm em em lo anih pawhin a mawh lo, a chhan chu kan ngaihtlak tawh ang khan Kohhran zawng zawng kan tang a, NGO zawng zawng kan tang a, chumi piah lamah chuan BAFFACOS atang khan sum a sing tel, a nuai tel crore kha kan dawng tlat a ni, kan ram hian. Chuvangin harsatna a awmlo hrim hrima. Tin, khatih hun laiah khan YMA, kan tih NGO-te an tang em em a, Pu Deputy Speaker, keimah ngei pawh Sub Headquarter-ah President ka ni a, a chhan a chu YMA in tih theih kan nei lo a nih paw'n, kawng a lo chhia anih pawn keimahnin kan phur mai ang kan ti a. Chutiang chuan hmun engemaw zatah chuan a phurh pawn kan phur mai a ni. Chutiang chuan a khaw nawtin a ram tan khan kan tang takmeuh meuh a. Josepha buhzem te pawh kan sawi lang hial a nih kha. Khatiang ang a nih avang khan Buhfaiah hian kan lo harsa lo a nih pawhin a awm lo lem lo, harsa lo tur pawh kan lo ni reng a ni. Tun dinhmunah erawh chuan hei kan hria a, rail kawng chhiat vang te, tui len vang te, kawng chhiat leh engemaw ruah sur nasat avang ten nikum lamah te tlemin harsatna kan han tawk a. Mahse, chuti chung pawhin kan Minister hi a tang hle a, tumah chhuanchhama thi emaw, khatiang kha kan nei lo reng reng a, vawiinniah pheih chuan supply a kan dinhmun hi a tha hle tawh a ni tih kha ka'n tarlang duh a.

Tin, hemi paha ka'n sawilan leh hram duh chu Mizo te hi hmannah ka sawi tawh a, engkimah sorkarah hian kan innghat lutuk deuh hi a fuh lo em aw! tih hi kan in zirtir te pawh hi a tha tawh lawm ni? Eng a that loh hlekin sorkar kan mawh a, tui a that lohin sorkar kan mawh a, buhfai a harsatin sorkar kan mawh leh bawk a. Hei tunah te hian han en ta ila, Mizoramah hian khawi khuaah mah hian mahni kham tawk thar chhuak hi kan awm tawh lo reng reng, kum khat tla chu sawi loh, thla hnih tla pawh hi kan thar tawh lo reng reng. Chutiang anih avang chuan sorkarah hian kan innghat ngawt ngawt mai a, sorkarin man to takin Economic Cost-in Buhfai kg khatah cheng 22 leh pawisa 13 in an lei a. Hei hi cheng kua velin subsidise rate in a'n hralh chhuak leh ta a ni a. Hengte pawh hi hmannah general discussion-ah khan ka sawi tawh a. A hminga keini ram hruaitute leh sorkar officer liante hi chuan 'no lost no gain' te pawh hian buhfai hi

economic cost a buhfai te pawh hi kan lei ve hi a hun tawh lawm ni tih hi vawiinniah hian ka'n tarlang ve duh hrim hrim a ni.

Tin, Demand No. 46 na Urban Development & Poverty Alleviation chungchangthuah hian tawite ka'n sawi duh chu, hei Zoram hmun hrang hrang hi han thlir ila, hmasawna ruhrel indin chho mek zawng zawng hi chu 90% kan sawi sual angem? UD & PA hnathawh deuh vek a ni mai hian ka hria a, lawmawm ka ti tak tak a. Hei EWS Scheme hnuai hi kan sawi anga, hemi hnuai mirethei In sak sak mek District hrang hranga han hmuh te phei chuan Pu Deputy Speaker, a lawmawm tak tak a, Congress Party, Congress sorkar hian mi harsa, miretheite nen kan inzawm zia hi a tichiangan ka hria a. Kan Minister zahawm tak tawiawmin tlem lai lawk khan Kolasib-ah kan zuk kal a, EWS hnuai mirethei In sak sak kal mek te a hmunah kan thlir a, a then chuan an lo luah tawh a. Nu pakhat hmeithe phei chuanin a lawm lutuk kha, mittui tla zawih zawihin lawmthu a sawi a. Tunhma kha chuan ruahsur apiang hian kan puanthuah hi kan dah sawn kan dah sawn a, a far lohna lai a piangah kan hung sawn thin a, kan dah sawn thin a. Vawiinah erawh chuan mang lamah pawh kan man phak loh Rangva In chung hnuai, Tile bang chhungah kan han awm ve ta hi kan lawmzia hi sawi ngaihna pawh ka hre lova, Pathian leh Congress hi a lo va tha em a ti a ni. Chutiang khawp chu a ni a, hei hi thil lawmawm tak a niin ka hria a.

Tin, ka bial chhungah ka'n lut zawk a nga, Lunglei lamah sawn District Park kan nei a, tlemin a hla deuh hlek a, chubakah a awmna saw a tlang ten a zir loh avang sawn thlasikah phei chuan dar 12 velah phei chuan haw mai hi a ngai tawh thin. Chutiang anih avang chuan UD&PA atang bawh hian Theiri at tlangah sawn Lunglei Recreation Centre siam turin tunah hian Project a inmun chho mek a, sawng te saw siam puitlin anih hunah phei chuan ava lawmawm dawn em ka ti a ni.

Tin, Pu Deputy Speaker, Demand 26 - Information & Publicity-ah hian thawktu indaihlohna avangin tlem lai deuh khan Officer 5 lak an ni a. Tunah hian Aizawl bakah district hmun hrang hrangah posting pek an ni tawh a. Hemi department bik hi ka sawi duh chu hei, nichinah kan Member zahawmtak khan a rawn sawi chhuak tawh a, Sorkar tawtawrawt an ni a, a tih kha thu dik tak a ni. Sorkar hmalakna puangzartu an nih bakah mipuite thil hrih hretu an ni a, Department pawimawh tak an ni. Motor an neih loh avangin harsatna tam tak an tawh a, duh angin an cover tha thei lo thin a, hei hi Sorkar hian a ngaihsak thei ang em? Privatization scheme te khan a lo huam ve anih pawh in engemaw special case a ngaihtuah a tul mange aw! tih kha kan tarlang hram duh a.

Tin, Demand No. 19 – LAD leh Social Welfare-ah hian tawite a ka'n sawi duh chu, chipchiarin kan sawi hman tawh lovang a. LAD atang hian thingtlang hmun kilkhawr tak tak, thingtlang bialtu kan nihna angin, pawimawh siah step siamna te, culvert siamna te min han pe thin te hi a lawmawm tak tak in ka hria a, vawiinah hian lawmthu ka sawi duh a. Tin, chubakah department hmalakna hi a lawmawm in ka hria a, Social Welfare atangin Hall sak na te leh tui harsatna hmunah tui, tanky siamna tur te min han ngaihtuah sak thin a. Tunah ngei pawh hian Pu Deputy Speaker, ka bial chhung Lungrang South-ah chuan tui a harsa em em a, PHE Minister zahawmtakin

tuizem pahnih siamna min pe a, kan la khawp lo deuh a ni. Chutiang anih avang chuan LAD Minister zahawmtak hian Social Welfare scheme atangin tuizem siam na te min han pe leh a, heng te hi a lawmawm in ka hria a. Tin, chubakah department hmalakna Hmuifang tlanga Park sak/siam mek te saw kan kal lo maithei a, tunah sawn 40% vel zawh ani tawh a, sawng te saw nakinah chuan Mizoram tan hian assets ala tling dawn a ni. Tin, chutiang zel chuan Lunglei lam Pukpuiah te pawh tunah hian Park siam chhoh zel ani a, heng zawng zawng hi kan thalai te tan ro tling ala ni dawn tih kha ka'n tarlang duh a ni, Pu Deputy Speaker, ka lawm e.

DEPUTY SPEAKER : Pu K.Liantlinga ilo sawm ang.

Pu K.LIANTLINGA : Pu Deputy Speaker, ka lawm e, hun min pe a. Kan demand sawi tur hi a tam riau mai a, Minister pathum chan ani a, a harsa viauin a rinawm a. Amaherawhchu, hun te min pek belh ve leh zel aniang chu, alo rei ta deuh anih pawhin.

Food, Civil Supplies & Consumer Affairs chungchangah hian sawi ka'n duh chu, Pu Deputy Speaker, petrol leh diesel chungchang vel, adulteration hi a nasa em em a. Tun aia chak zawk hian hma a lak theih loh em ni? Hmanni khan petrol pump te kha an han khar sak a, Department hian a aia chak zawkin hma la se tha in ka hria a. Tin, hmanni khan petrol ka han leitir a, gallon kan neih mai loh avangin polythene in kan lei tir a, a var vek mai a, a eng reng reng lo mai a, petrol var hi a awm ta em ni aw? tih tur khawp khan a dal a ni. Chu chu khawnvartui pawlh nasa tak ani a, heng te hi en ngun atan a tha mang e, ka ti a.

Tin, buhfai chungchang thuah hian hmun thenkhatah chuan kawngpui dung te chu godown la khat chiah lo mahsela, rural area-ah te chuan an dah khat tawh pawh ani ang a. Helai buhfai kan indaihlohna hi han sawi ka duh deuh a. Statistical hand book-ah hian Agriculture hoin a an production an tarlanah hian ram hectare 51859-ah buh thar theih na a awm a, chuta an thar chu Metric Ton 66132 an thar a ni. Hei hi an thar dik tak ni selang chuan tunah hian kan harsa lo tur a ni a, kan mamawh hi thlakhatah hian 12,000 Metric Ton vel a ni a, tah hian Economic cost-in 8000 Metric Ton vel te hi lei a ni a. Tah chuan Economic cost-ah hian sum leh pai tam tak kan seng si a, 100% ai a tam zawk kha an subsidies a ni a. Chuvang chuanin helaia kan harsatna chhan hi Agriculture Department-ten thawk tam ang a in lan tumna, buh thar tam ang a lan tumna lo lang a kha, Central lam thlirna atan pawh in mamawh tam hlei nem, tih mai theih anih na lai a awm a, kha vang khan Economic cost-a APL tur te pawh kha lei vak vak alo ngai ta a ni a, chuvang chuan heti laiah Department dang dang te pawn kan report hi tih fimkhur a ngai viau in ka hria. Central lamah te pawh rilru hrehawmna nei lem lovin a dik tak report thin ila, a bul atanga tan that a, tih dik hi a tul in ka hria, hetiang ang em em hi chu Mizoramah kan thar lovin ka ring tlat, Pu Dy. Speaker, Supply Minister pawh hi dem ngawt theih lohna lai pawh hi a awm ve a ni. Department dang te report atang pawh a han en in. Tin, 2001 Census kha tehfungh an hmang a ni te pawh an ti a, mahse, 2001 census pawh ni sela

kan buh thar report hi hetiang ang hi anih tawh si chuan kan quota chu min ti tlem tho tho dawn, eng census pawh nisela, tuna kum 2011 census te pawh hi lo ni sela, a dik tak tak thei chuang lo a ni. Economic cost-ah sum leh pai tam tak a kal ral phah a. False report te hi a awm em ni aw? tih theih niin ka hria a.

Tin, carrying contractor te bill chungchang hi chu harsatna an tawh nasa a, duhsak bik leh eng emaw an awm thin a. Kei pawh hi carrying contractor hi kum sawm vel ka lo thawk tawh a, ka hrechiang viau in ka hria a. Tun dinhmunah erawh hi chuan kum 2009 atang hian harsatna a awm lo a ni, bill seniority a pek an ni a, a lawmawm hle mai a, thil tih dik hi a pawimawh hlein ka hria a.

Tin, pakhat leha chuan kawng chungchang hi a ni. Kawng hi a chhe lutuk a, motor in a tuar nasa em em mai a, churang chuanin Supreme Court atanga motor a phurh man leh phurh dan tur rate te tih hniam anih hnuah pawh hian kawng enkawl dan hi a tha tawh lova, harsatna a siam a ni. Kawng a that loh chuan motor a kal tha thei lova, helai hi chinfel theih ni se a tha khawpin ka hria, Pu Dy. Speaker.

Tin, Environment & Forests chungchang Demand No. 36-naah hian Mizoram hi most dense forest a hi 0.64 % vel chauh a ni. Ngaw kan nei tawh lo, churang chuan Village Reserve Forest ruahmanna han siam te kha a tha in ka hria a, ka Resolution-ah khan Riverine Reserve Forest kha highland area a sawn tur kan tihah te khan an hmalak na kha kan Minister-in a report tawh ang khan a tha in ka hria a, a lawmawm hle in ka hria a. Highland Area-ah khan Sq.km 2800 vel kha sawn chhoh tur awmin ka hria a a lawmawm hle a ni.

Demand No.46-na UD & PA-ah hian sum leh pai an ngah viau mai a, Plan leh NLCPR-ah hianin cheng vaibelchhe 77.33 a awm a, non-plan cheng vaibelchhe 16.34 vel a awm a, amaherawhchu, performance report hi an pe lova, plan fund an ngah em em mai a, performance leh work programme hi chu ti thei sela chuan a lawmawm hle in ka hria. Aizawl Municipal Council ah hianin hnathawk turin man power an nei lova, ADA hi sawn luh tur a ni in ka hria a, hengah hian dan te siamin sawn luh thei ni ta sela, anni hian enkawl sela, infrastructure development-ah hian technical mi te an mamawh a, tun tumah khan crore 10.14 vel an pekah pawh khan DPR kha UDA & PA emawin an siam sak a la ngai a ni. A hmalakna hi chu a lawmawm in ka hria a, tin, subject transfer hi ti chiang thuai thuai sela a tha bawkin ka hria ani.

Tin, Demand 22-naah hianin Sport chungchang hi, tun hma kha nuai 400 atanga 500 hmang thin kha an ni a, tunah hi chuanin nuai 3520.47 lai mai budget a awm hi ka lawm hle a ni. Mizoram State Sport Council-in cheng nuai 1907.16 hman tur an nei hi a lawmawm hle a ni. Mizoram State Sport Council hi executive order-in a awm thin a Bill put lut a, act a a awmna chu kum 2002 kha ani, mahse an duh vak lo a ni. Sport Directorate a (Amalgamate) dah mai kha an duh dan a ni a. Sport Association hrang hrangten tang rualin Sports Directorate-a in chhun luh kan duh lo an ti a, Pu

Rualchhina, Minister Sports kha a fakawm hlein ka hria, ‘Minister ka ni a, a tha in tih ang chu ka ti ang’ a ti a. Director, Sports & Youth Service khan Minister dang zawng zawngte pawh kha State Sports Council Bill hi pass lo turin an nawr a ni, nasa taka nawr tuah khan kei pawh ka tel ve a, khatih lai khan Financial Memorandum-ah pawh (MSSC) Bill an pass dawn lai khan cheng nuai 100 chauh a awm a ni. Tunah hian nuai 1907.16 a awm a thalai te pawh a ti thang a ni. Tunah hian Minister tha tak mai kan neih takah hian hmasawna a kal nasa ta a ni. Sport Stadium-ah te, tin, Sports Stadium-te pawh dinthar ani ta te hi a lawmawm hle in ka hria a. Hengah hian kan Minister pawh hi a fakawm ka ti a. Tin, khatihual khan nimin lama ka sawi Art & Culture Department ami Artist ho chungchang kha, Sports lamah thahnem kan ngai a, hma kan la a tih lai kha ka sawi a. Chutihlai chuan Artist te hian Promotional fund te hi nei ve se kan tih te kha Sports fund atangte hian a sawhthlak ve theih hial loh em ni ka ti a ni. A chhan chu Human Resource Development hnuai hian Art & Culture te, Sports te, chi hrang hrang hi awm vek tho anih avangin helai hi chu ngaihtuahna neih a tha mange ka ti a. Tin, infrastructure chungchangah hian lawmthu sawi ka duhna chu, ka bial chungah, Pitarte Tlangah Mini Sports Complex cheng vaibelchhe 15 man lai mai an han dah hi a lawmawm hle in ka hria a. Chulaiah chuan lawmthu kan sawi a ni.

Tin, Catch Them Young chungchang hi Association ten an enkawl hi a tha thawkhat em em tho a. Amaherawh chu, tul ber ni a ka hriat a chu Education Deptt., nen coordination tha tak neiin Physical Education Teacher te leh kan Coach te hian School Boys and Girls-ah hian heng Catch Them Young hi kalpui thei sela a tha in ka hria a. Chu chuanin kan (Sports development) hmasawna tak tak tur hi chu a bul, a basic tak tak a ni. Tuna an tihdan hi chu, mi an duh leh an kal a, an duh leh an kal lo thei a. A thalo chu ka ti chuang miah lova. Amaherawh chu, a main atan talent search anih avangin elementary-ah te hian ti nasa thei sela a duhawm hlein ka hria a. Pu Deputy Speaker, hun a tawp dawn tawh si a, ka sawi zo law law mai ang e, ka lawm e.

Tin, Demand No.19 – Local Administration Department. Hemi 13th Finance Commission chungchanga V/C te thuneihna zau zawk leh sum leh pai hmanna te an pe hi a lawmawm ka ti a, hetiang hi a nghahhlehawm hle a. Sorkarin duh duh a zuk ruahman ngawt lova, V/C ten tha an tih leh tul an tih anga hma an la tur hi a tha hlein ka hria a. Khami chungchanga The Mizoram (Establishment and Independent Local Body) Ombudsman Bill an pulut leh a. Sum hmandan dik tur te, administration felfai neihna tur atan te a he bill kan han pass te kha a fakawm hlein ka hria. V/C administration, sum hman dan endik tura hetiang bill kan neih ang hian kan Sorkar-a Department hrang hrang sum leh pai endik thei tur Financial Ombudsman emaw administration lamah emaw hian Dan te hi nei ve thei ila chuan, a lawmawm hle in ka ring a. Chu chuan Performance Budget hi tha takin kalpui sela. An Work Programme leh Work Report te tha takin siam se, corruption hi 50% a rehin a rinawm a. Ombudsman tuna mi ang hi State level-ah kan nei anih kha chuan corruption 30% vel kha chu a reh leh ang a. A bak 20% vel corruption la awm kha chu, a ven hneh a awl tawh dawn a ni.

Pu Deputy Speaker, hei tawite minute khat lek, Demand No.48 – Information & Communication Technology hi tunlai ram hmasawnaah I.T. hi hmalakna nasa taka kan neih a ngai a. Plan-ah hian nuai 380 an dah a. Chu

chu a beitham hlein ka hria a, wawiinah hian. A aia tam hi kumtharah chuan sum dah theih ni sela, a thain ka hria a.

Tin, a tawp berah chuan Demand No.29-na hi han kai leh ka duh a. (Deputy Speaker : Duh tawk tawh rawh hei kan chawlh a hun tawh) Hei chiah hi khawngaihin ka'n sawi leh ang e, Pu Deputy Speaker, hei Director post ngheta siam hi a lawmawm hlein ka hria a. Joint Director hi kaisan tir mai sela, a seniority-ah kum nga la tlinglo mahsela. Chu chuan a hnuai mite zawng zawng hi post tam tak kha a insiamrem theih dawn a. Helaiah hi chuan Department hi an vaiin an lawm deuh vekin ka ring a, Officer hote, Officer lo ho thleng pawhin. Director charge te hi a tihngheh theih mai lawm ni. A service leh thildangte tifelin, ruahmanna fel tak siam theih nisela tih kha ka sawi leh hram a nih chu, Pu Deputy Speaker, ka lawm e.

DEPUTY SPEAKER : Awle kan chawhma hun a tawp a. Kan chawl rih ang a. Dar 2-ah kan lut leh dawn nia.

2:00 P.M.

DEPUTY SPEAKER : Le, Demand kan sawi chhonzawm leh anga, member pasarih chiahin an la sawi a. Tunge ni sawi leh nghal ang le, Pu K.S. Thanga.

Pu K.S. THANGA : Pu Dy. Speaker, ka lawm e. Demand hi a tam deuh avangin hunin a daih dawn lova, chuvang chuan a pawimawh pawh kan cover leh pek hman dawn lova, i veilam amite ang hian chance hi min pe tha duh bawk silova, Pu Dy. Speaker, chuvangin ka theih chin chin kan sawi anga.

A hmasa berah chuan Demand No. 17-na Supply Deptt. hi kan sawi hmasa duh a, hei crore 229 lai an nei a, hei hi kan sorkar ngilnei takin mipuite tana hma a lakna pawimawh tak ani a, kan hriat angin tunah hian buhfai hi kan intodelh lo em em mai a, kum khat a kan tharchhuah zawng zawng hi thla hnih ei pawh hi a tling mang lo a ni si a. Tichuan, FCI atanga buhfai kan dawn FPL kan tih mipui nawlpui ei tur hi quintal 40000 vel ani a, kan mamawh chu quintal 130000 vel lai alo ni a, tichuan, thla tinin Finance atangin crore 17 vel Supply Minister ten an dil a, chuta return lo awm chu crore 7 vel bak a nilova, crore 10 chuang hi thla tin loss ani. Mahse kan ram mipuite dinhmun avangin tunah hian chung chu ti lo thei lo kan ni a hei kan Chief Minister hovin Agriculture Ministry-ah buh thar tam kumah te kan han ti a, mahse chawplehchilhin a theih dawn lova, chuti chung chung chuan hei kan la kal zel a ni. Hei hi ram mipui te duhsakna lantirna pawimawh tak niin ka hria a crore 120 plan a khung te pawh a daih loh ah pawh kumtin kan loss chung pawh hian kan kal hi ropui ka ti hle a.

Tin, nichinah khan member thenkhatten an sawi a, sorkar hmasaah khan buhfai a thlawn a sem tih te pawh kha, sorkar hmasa kalta khan tam harsatna a tawk a, kohhran hrang hrang te, mimal angte pawhin

buhfai lamah NGO te tanpuina mi rethei, mi harsa te pek a ni. Congress sorkar pawhin Pi Sonia Gandhi, kan ram harsatna te hriain kan chah chhuak a, Lengpui Airport-ah hruaituten kan lo hmuak a. Tichuan, Mizoram hmun hrang hrangah tam nasat zualna hmunah Helicopter-in kan tlawh tir a, i ti mai ang, a tlawhna tur hmun te siam a ni a, khatah khan vaibelchhe 55 min rawn pe a, amaherawhchu, a agency kha Mizoram sorkar ani lo thei lova, khangte kha a thlawn a an sem kha an lawm viau ang tih pawh ka ring a, khatiang khan Congress khan sawi chhuak ta lo ila kan sorkar kha a dinhmun a chhe hle a ni. Amaherawhchu, thil tha tih hi keimahniin a hlawkna, a hming kan tum lo emaw keimahni kuta kan tih lova midang kuta kan tih pawh hi Pathian hian a lo hre khawp a, mal a lo sawm a, vawiinniah pawh hian sorkarna te pawh min pe niin ka hria, heti lai hi kan sawi ve duh hrim hrim a. Mi tam takin hei hi kan hrechiang lo a ni. Vaibelchhe 55 kha Congress Party-in kan sawichhuah ani a, chuvanga hman theih ani tih kha ka sawi duh ani, he House-ah hian.

Tin, buhfai te, tunah hian gas te a tha a, tunah hian gas connection ringawt pawh hi chhungkaw sing 5 leh zaruk leh pakhat tunah hian pek thar a ni a, chutiang chuan agent pathum agent puitlinga dah bakah RGVVY atangin mini agent an tih 13 thlan an ni a, 12-in appointment an la tawh a, pakhat thlan leh mek a ni a, chuvangchuan supply lamah hian vawiinah hian tlaivara gas nuchang/pachang intlar te, chain a thlun pet put te a awm ta miah loa kan han awm thei hi, kan Minister chak tak hi vawiinah hian chawimawi phu hlein ka hria a. Tin, hemi Monsoon stock kan tih te pawh hi sawrkar atanga pawisa, sawrkar hmasaah chuan sum pek belh tawk tawk a tih thin ang kha a ni a, mahse, tunah chuan a awm sa atangin a manage a, duh khawp chu nilo mahsela a hran pain Finance-in pawisa a pek belh miah lo a ni. Chutiang khawp chuan kan Supply Minister hi thahnem a ngaihna, a inpeknaah hian lawmawm ka ti a.

Tin, sawrkar hmasa a, carrying bill chungchang te kha mi tam takin kan hria, House-ah te pawh sawichhuah a ni thin a, a ti thei tlem te te leh Minister te nena hnungthak inhiat theite tan khan Bill kha a tang ve ngailo a, amaherawhchu ti ve theilo deuh leh sawipui tu neive lo, sawi pha velo deuh, Minister awm nghenglo tan kha chuan a kum a kum tel a tang a ni. Kei ngei pawn chutiang chu ka buaipui ve ani. Tin, chu bakah Carrying Bill inleisak te pawh kha a awmthin a ni a, tun sawrkarah chuan first come, first serve an ti a, upa in 'tui kang nghah' an tih ang khan kan kala, heng te pawh hi kan sawrkar hmasawna. 'Change' hlawhtling taka kan kalpui mek zinga pakhat niin ka hria a, lawmawm ka ti a ni. Chu chu khalai kha nimai sela. Kan Supply Minister hi a tak takin vawiinah hian he ram tan hian a thawk a, a ngaihtuahna a hmanga, lawmawm ka ti a, vawiin ni a harsatna, sum leh pai harsa chung chungah hetiang a ti thei hi lawmawm ka ti a ni.

Tin, Demand No – 36 na Forest hi hei vaibelchhe 60 lai an nei a, helaiah hianin kan sawi duh a chu, hei keini a hmingin Agriculture lamah te kan awm ve a ni a, hei afforestation, ram ngaw siamna chungchangah hian Forest conservation hi ngaipawimawh vetu ka ni a, hmanah Lunglei hemi Dawn lampang a divert thin lai khan Range pakhat lo intar hi ka hmu a, eng Range emaw ni ani, Forest Range a kha, mahse engmah thing hmuh tur a awm lo a, a tartu Range Officer leh District DFO, Divisional Officer te tan khan zahthlak ka ti a, khatiang kha Forest Range enkawl dan tur hi a niin ka ringlo a, vawiinah hian thahnem ngaih a na a, kei ka bialah te pawh sawn kumtinin Congress Unit te leh V.C te hi kawng dungah sawn thing kan phun tir

thin a, mahse enkawl a hautak a, tum angina a hlawhtlinna a sanglo a, hei department leh sawrkarin a rawn tih bakah hian, khaw hrang hrang te hian chutiang chuan kan ti thin a ni. Chulaiah chuan Pu Dy.Speaker kan sawi duh a chu, hemi kan lei thatna, fertile land a hi, a low lying, a ram hniamna laia hi a ni lawi si a, amaherawhchu kan lui dunga tuite ti tha tur hian hemi kan Forest Reserve Area a hi kan humhalh siloh chuan a buaithlak a, chu chuan kan ram lui hi a ti kang chho mek zel ani bawk si a, chuvangchuan ngaihtuahna pakhat ka neia chu, hei hi insawn ta sela ahnuia lei thatna ram hi Forest area atang hian chhuak sela, lo hmunah siam ta ila. Tikhan motor kawngin helai a leitha lai ram hi, chuan tlangram lam a lei chhe lai deuh hi Forest ho hian siam tha leh zawk ta sela, tichuan, chuta tang chuan tuihna chu a rawn supply thei tho ang a, tih te ka ngaihtuahnaah chuan a awm deuh a. Kan ram economics ngaihtuah ngai bawk si, Environment ngaihtuah ngai lai bawk si hi a buaithlak khawp mai a, chuvangin hetiang te hi kawng a awm thei ang em aw? Kan eizawna kawng a tha zawnga kal pui ngai bawk si lai hi tih te kha ka'n sawi thuak thuak duh a ni.

Pu Deputy Speaker, Sport & Youth Services, Demand No.22 na, hei kan Sorkar tirh atangin kan Chief Minister leh Sport Minister-te thahnemngaihna in Sport lamah hian harhna nasa tak a thleng a ni tih kan hria a. Vawiinah hian thalai te an hlim a ni tih kan hria a. A changtu a la thalai bawk a. Vawiinah Mizoram chu Sport lamah harhna (revival) kan chang a ni tih kan hmu a ni. Vawiinah hian kan thalai tam tak ten infiamna (discipline) hrang hrangah eizawna tih tham an hmu mek a ni tih hmanni a General discussion-ah pawh khan tlem ka sawi tawh a. Vawiinah hian heng kawng hrang hranga hma lakna Catch them Young kan han tih te atanga intan te, tin, a awm sa, a incumbent vawin nia lo upa tawh deuh, mahse la hman tlak si te tha pawh hmang telin kan Sport Minister hian kawng hrang hrangin hma a la nasa hle a. He ram hian a rah pawh hi tuna kan chhawr mai piah lamah hian a aia nasa hian kan chhawr dawn a. Mizorama thiltih theih loha kan ngaih, artificial turf, kan tih te, Lammualah phah a'n ni a, hei, Lungleiah an phah leh dawn mek a. Tin, khuti laiah Rajiv Gahdhi Stadium ah te phah a ni zel dawn a. Tin, district dang dangah te pawh hian Sport Minister hian phah a la tum zel ni te in ka hria a. Chuvang chuan Sport ah hian chuan ram pum hian kan hriat avang leh thalai te pawh hian, a sawi uar deuh pheih chuan politician te hian Congress hi vote lo mahse, thalai vote ringawt pawh hian Congress hi chu an Sorkar leh ang, han tih boruak te pawh hi vawin niah hian thil tak niin a lang a. Chu chu a lawmawm ka ti a. Kawng hrang hrang a tam em avangin vawiinah hun a chep si a, ka sawi zui lo mai ang.

Pu Deputy Speaker, pahnih khat lek tak tak, i veilama mite i duhsak ang em em chuan ka rawn ti ngam lo ang a, mahse, tawite ka'n ti ang chu. Information & Public Relation Department, Demand No.26-na hi tlemin hei Sorkar programme pawimawh leh V.I.P te cover a ram hmasawna kalpui dan te puang zartu hi an ni a. An indaih lo deuh thin em aw? tih te hi ka ngaihtuahnaah a awm ve deuh a. Heng hi ngaihtuahna hmang lehzual deuh a Sorkar/Ram hmasawna activity te pawh hi eng ang pawhin ti ila mipui te hriattir te hi a pawimawh em avangin helamah hian tan lak tulin ka hria a.

A tawp berah i ti tawh mai ang. UD & PA, Demand No. 46 na, hei pawisa pawh vaibelchhe 93.69 kan hmu a, hei, a lawmawm khawp mai a, hmasawna, Aizawl khawpuiah pawh a kal dawn a ni. Mizoram khawpui lianah pawh tih a lang theiin ka hria a. Chutih laia Pu Deputy Speaker, ka sawi ve tam vak ngai lova, ka bial tlem han sawi ve ka duh chu, hei Hlimen, Melthum, Saikhamakawn

te hi hmannah tlem ka sawi tawh a. Hemi Sport lamah pawh Infrastructure, Field, Playground tha te, hetiang ang hi hmun an nei a ni. Sorkarin tan a rawn lak chuan Aizawla hmun awm lo chung chung a ram zawng lo hian, sawti lai saw han chei deuh a, engngemawzat han invest a, National Games te pawh han thlen theihna tur hi kan nei nual a, chungte chu Minister hian min lo hriat sak sela, tih kha kan sawi ve duh a ni e. Pu Deputy Speaker, LAD te, Social Welfare-te sawi tur a pawimawh teh lul nen mahse hunin a daih ta lova, khang kha ka rawn support a ni tih kan sawi duh a ni e.

DEPUTY SPEAKER : Pu Lalrinmawia Ralte ilo ko ang.

Pu LALRINMAWIRALTE : Pu Deputy Speaker, hun min pe a, ka lawm e.

Demand No. 36, Environment & Forest atang hian kan tan anga. Kei hian Chawngzawng humhalh thu thlengin ka lo aupui ve tawh a. Kan Home Minister zahawmtak hi ramngaw leh nungcha humhalh chungchanga kalna apianga puang thin anih avangin a sermon-ah hian ka inhmuchhuak leh zual pawh a ni mai thei. Rilruah a khatliam ve deuh a. “Ramsa humhalhna mimalin a neih theih dan kawng zawn nise”, tih hi Party Manifesto-ah Congress party in kan lo dah a. Amaherawhchu, a har a. Wildlife Conservation Act, 1972 ang atang ten a theih reng reng lova. Tuna community reserve kan han tih ang te pawh hi Wild Life Conservation (Amendment) Act, 2002 zar kan zo na a ni a.

Hemi chungchanga kan sawi duh chu community reserve hi kan ti rau rau a nih chuan lukhawng nei tham law law in khaw tin leh hmun tin hian ngaihtuahna hmanng ila, kan zalenna awm ve chhun nungcha leh thing leh mau tea thuneihna, kut thawh theihna kan neih ve na anih avangin. Neitu nihna a lenna hmun lovah chuan thing leh mau leh nungchate hi humhalh tak tak theih an ni lo tih a ni a. TV-a kan hmuh tlan thum dur dur ho hi abikin African Continent chhimlam pang ram hoah khu chuan Wild Life Reserve zau pui pui khu mimalin an nei a, an sum hnar a ni a, an ram ti lar tu a ni a.

Chuvang chuan a humhalh kawngah pawh tan an la nasa em em a ni. Keiniah erawh chuan ram in, state in, sawrkar-in a neitu nihna a chan vek avangin keini chuan mipui thinlung hrim hrimah hian mi ta va thlir mai mai anga inngaihna a awm a ni. Amaherawhchu, tunah chuan community reserve-te leh a chungchanga nungcha te thlengin community-in, a khawtlangin a neitu nihna kut thlak ve theihna kan lo neih takah hian uar tak leh zau taka kan tih hian tourism-ah te pawh hian kan mikhual hipna tur tha tak anih ka ring a ni. Hmanniah khan kan PCCF thusawiah hian niin ka hria a, Canada leh USA –a Red Indian hnam ropui tak Cree hnam ho ina hrilhlawkna an lo sawi kha a sawi chhuak a, rilru a khawih hle a ni.

“Thing zawng zawng kih thluk an nih hunah, ramsa zawng zawng kah ral, kah thih vek an nih hunah, lui zawng zawng kan tih bawlhhlawh vek hunah, boruak te hi hip tlak lova a bawlhhlawh hunah pawisa hi a ei theih loh tih i hre chhuak ang”, tih hi. Cree Prophecy an tih kha a ni a. American Indian ho.

American Indian, Pathian siam thing leh mau i ti ang nungcha te nena in nghenga in dam chhuah tawnten heng thu an lo sawi te hian rilru a khawih em em a, hemi chungchangah hianin Forest department leh khawtin hianin thawhhona tha zawk, keimahni state chhungah hian nei a, community reserve te a zau thei ang ber a nei a hlawkna hmu let thei khawpa tan kan lak hi a ngai a ni. African ho thufingah chuan, “A hlawk chuan a awm reng mai a ni”, an ti a, “If it pays it stays”, an ti. A hlawk chuan a awm reng mai a ni, thil hi. Ramsa humhalh te pawh hi a hlawk chuan an awm reng anga, an pung zel ang. Hei hi wildlife conservation-ah chuan khawvel hmuh dan dik tak a ni zawk a, tunah erawh chuan hlawkna hmu zawng in kan kalpui miah lova, chuvangin kan community reserve ho hi chutiang kawngah chuan uar lehzuala hmalak na atan a itawm ani tih kan sawi duh a.

Supply chungchangah hian a lawmawm em em a, lawmthu sawina tur kan bialah te pawh gas dealer propose mek te pawh kan nei ve a. Lawmthu ka'n sawi tel nghal zauh bawk a ni. Demand No 22, Sports and Youth Services-ah hian kan kal leh nghal lawk anga, lawmawm em em, kan hmasawna lawmawm em em nia ka hriat chu nichinah khan member zahawmtak ten an rawn sawi lang tawh a. Hei, kan Sports Minister chak tak leh viak tha tak hmalakna in foreign coach-te leh national coach, Sports discipline hrang hrangah chah luh an niin kan infiam mite coaching an rawn pe a, coaching pawimawh zia hi kan sawifiah thiam ve lovanga, zirtirtu tel lovin zirlai lehkha thiam tak a chhuah theihloh ang deuh chiah hi a ni mai a.

Kan hmuh angin hei kan hmuh tawh chin kum reilote term chanve chhung lekah hian Badminton Association tena an lo hman tangkai turin, kan players te hman tangkai turin foreign atangin Badminton coach te, Silai kap hovina an lo chhawr tangkai turin coach te, Chess association tena an hman tangkai theih turin Chess coach te, Cricket coach te, Snooker and Billiards coach te, Karate coach te, Basketball coach te leh Swimming, Aquatic coach lam pang chi te a lo chah chhuak teuh tawh mai hi a lo ni a. Tunhma khan a hming chuan sports discipline tlemteah foreign coach hmel te chu kan hmu na in tun ang em em a hetiang a hmalakna ropui hi kan hmu ngai lovin ka hria a. Nichina an sawi tak ang khan tawng lama harsatna te phuhruk turin hmalak na a awm bawk a, heng te hi a lawmawm ka ti a. Kan Sports Minister hmalakna hengte avang ringawt pawh hianin kan thalai te hian sports lamah hmasawna ropui zawk an neih theih phah a, a chungah hian lawmthu sawi tur tamtak thalai ten kan nei a ni tih kha kan sawilang leh duh a ni.

Demand no 29, Social Welfare-ah hian sawitur a tam khawp mai a, he House zahawmtaka kan lo pass tawh, ‘The Scheduled Tribes and other Traditional Forest Dwellers (Recognition of Forest Rights) Act’ kan adopt tak, Mizorama hman ve tura kan thlan ve takte pawh kha a taka hman anih theihna turin tunah hian kan minister zahawmtak hmalak na hian kalpui mek a ni a. State level-ah te committee din a ni a. District level-ah te, chutiang chuan hma lak mek a ni a. Forest Department lamte leh a reserve te nen pawh in sut buaina hmun tam takah kan nei a.

Khawthlang lamah kan bialah te, kan district chhungah te khuan hetiang harsatna hi kan ngah em em a. A pawnga forest reserve huat thu lam nilovin thil fello tam tak siamfel ngai a awm a. Hengte hi he dan hman hian kan siamfel dawn a, kan Minister hmalakna chak takah hian lawmthu ka sawi duh bawk a ni.

Tin, chu lovah chuan, Panchayaty Raj Act tih te pawh hi hmang ve ta ila, Panchayaty system hian kal ila te pawh kan han ti thin a. Amaherawhchu, kan VC te huat thu lovah tuna kan kal danah hi chuanin inzirna tur kan la ngah ani. Thuneihna tam tak nei ta ila tuna VC zawng zawng kan tihna ni lovin, VC tam tak fimkhur lohna leh chet mai mai dan en hi chuan an kuta thil lian tak dah pawh a hlauhawm tih chang a awm thei a, chutiingin miten lo sawi pawh nise haw thei lo tam tak an awm in ka hria. Account pawh wawng hlei thei lo te pawh hi an tam viau niin ka hria a. Minister zahawmtakin min lo ngaithiam sela, sawiselna hrim hrim ni lovin, chungte veng tur leh khalh ngil tura Local Body Ombudsman Bill, kan han passed ta a, kan VC te hna thawh dan sawisel duh ten sawisela khalh ngil tura dan tha tak mai, House-ah an pu lut a kan han passed a, chumi kengkawh tura hmalak an tum te hi lawmawm ka ti em em ani.

Demand 29-na Social Welfare chhungah tho hian anmahni lam khawih deuh ni a lang, keimahniah chuan Minority Affairs Deptt kan nei lova, amaherawhchu, an ni hi Nodal Deptt an ni a, nichinah Lawngtlai East bialtu zahawm tak Pu H. Zothangliana'n a sawi ang khan Mamit District pawh Minority Fund kan tih mai kha nei thei tur a thlan ve kan ni a. Kan Minister hian chak takin hma ala a, sum te pawh central sawrkar atangin kan hmu tawh a, amaherawhchu, a hming han sawi lang mai ila Pu Deputy Speaker, a pawl lovin ka ring a, Pu Suhas Chakma-in Supreme Court-ah alo complain avang in, minority area-ah kan hmang tlem lutuk alo tih avang in min stay rih niin ka hria. Amaherawhchu, an in sawi fiah ang a, kan hmang leh thei maiin ka ring a. Kan Minister zahawmtak hian hemi lam kawngah hian chak takin hma ala a, a chungah lawmthu ka sawi ani.

Tin, hemi Demand No.29-na Social Welfare chhungah kan khung theih ni a ka hriat chu Human Trafficking chung chang hi ani a. Mizoramah pawh hian Community Health Action Network leh Centre for Peace and Development, Pi Angela-i te pawl hi, hemi human trafficking lam buaipuitu an ni a, an hah hle in ka ring a. A Department lamah chuan Social Welfare ah he lam pang incharge officer te pawh an in dah a, amaherawhchu, a crime tak tak zu chhui chhuak a, zuk buaipui erawh chu police lam hna ani a, kan hre thova. Hetiang harsatna nei te leh tanpui ngai te lo buaipui tu ber annih avang in helam kawngah hian nasa leh zuala tan kan lak a ngai. Tun hnaia Pu Deputy Speaker, Mizo fa ngeiin a kan experience tha lo tak mai phai lam atanga kan Mizo nula te chhan chhuah ngai an lo awm thin te, heng hi saphoin an sawi ang deuh a vurtlang tui chunglana te reuh te lo lang an sawi ang hi ani ang tih ka hlau a. India hmarchhak hi human trafficking, mihring inruk thuah hian a dinhmun hlauhawm ber a ding te zing ami kan ni. Chu chu khawvel thlir danah pawh ani a ni. Europe khawmualpui, khaw chhak lam Comunist tlu chhia, sawrkarna inthlakthlenga mipui taihai buai tam tak Europe khaw thlang lamah, an hmeichhia tam tak inzuar tura an chhuk chiam chiam thin ang deuh khan keinih hian buaina leh harsatna chi hrang hrang avangin nunau mipui an buai nasa, India hmarchhak leh a chheh velah hian. Chuvang chuan kan dinhmun hi a derthawng a, kan Minister zahawmtak hian tuna hma a lak anga la zelin awareness hi mipui in kan mamawh in ka hria a ni. Phai lama kan fate kan tirh liam dawn hian ngaihtuahna thuk zawk kan hman hi a tul tawh in ka hria a ni. Kum tin a hmeichhia nuai tam tak nawhchi zawrh luihtir khawvel huapah an nih ang deuh hian keimahni hnam tlem te pawh in khatiang ang deuh te pawh kha kan tuar mek thei ani tih te kha ngaihtuah chungin hma min han lak sak thei

sela tih kha ka'n han ngen nghal bawk ani e. Pu Deputy Speake, hun te ka hmang over deuh a min hrethiam dawn nia, ka lawm e.

Pu HMINGDAILOVA KHIANGTE : Pu Deputy Speaker, ka lawm e. Kan Minister zahawmtak pathum te Demand, Demand No. 17-na atang hian han tan ila, thui tak sawi tur awm mahse kan sawi hnem tawh a, ka'n sawi duh lai taka chu kan sorkarin sorkarna kan han tan tirh khan harsatna kan siam ni miah loh kan tawng a chungte chu - North Cachar Hills District velah khuan leimin hmun 36-ah an awm a, pahnih pheih chu major landslide ani a, a siam chhung a rei hle a, an siam zo ta maw tihah khan khulai helho an che leh a, chuvangin food supply leh supply chi hrang hrang kha a buai nasa ani tih kan hria in ka ring a. Tin, chu lo lehah chuan a hnu lawkah Supreme Court-in buhfai motor in a phurh zat tur a rawn tuk leh bawk a, chutih laiin Bairabi atanga kan buhfai lo chhuak thin kha Bairabi a lei thlen dawnah khan PWD ten a that na tur zawk hriain quintal 90 bak a kaltlang thei lovang tih te anni bawk a. Tin, khatih lai tak khan Bairabi kawng kha a chhe em em a, mangan thlak khawpa chhia a nih kha kan hre vek a, chungte avang chuan harsatna kan tawk a, amaherawhchu, kan Minister zahawmtak hian chung harsatna zawng zawng chu paltlang in Mizoramah chhuanchham awm lovin min siam a, chuvangin a chungah hian lawmthu sawi kan ba a.

Tin, chutih rual chuan Mizoram ina kan vaia kan hman LPG, Gas kan tih mai cooking gas chungchangah kan harsa phian a. Amaherawhchu, hun hmasa aia kan harsatna chuang a awm lova, heng kan harsatna te hi a chhan chu Mizoramah hian connection pangngai nei hi kan lo tlem viau mai a, kal kawngah a remchang ah motor gas cylinder phur lo pawt thla mai mai te kan tam a. Tin, tunhma kha chuan thingtlangah he domestic cooking gas hi kan hmang chiam lo. Chuvang chuan a sing pawn rawn pung mahse kan House Leader-in a sawi angin mikhual nuai 2 kan kawl a, chungte avang chuan domestic gas hi chu kan harsa viau tho ang tih hi a rinawm a. Chutih lai chuan remhre takin Mini Gas Agency, Mizoram ah hmun 13-ah kan Minister zahawmtak hian an sawi chhuak a, kan hawng tan mek a, a lawmawm hle ani tih kan hriat a tha awm in ka hria.

Tin, Demand No. 36-na Environment & Forest ah hian thui tak ka sawi lovang a, ka ngaimawh lai te kan sawi ang a. Zoram in Mau kan ngah viau emaw kan tih laiin kan lo tlachham ruai mai a, mautam avang te pawh a niang. Tin, Silchar lama Paper Mill a kal thin te pawh kan han ti tawp a. Zoram chhungah hian mau enkawlna awareness hi kan tlachham viau emaw ni chu aw tih turin vawiin niah hian kan la awm a, mau tuai kan ei nasat zia te han en hian Pu Deputy Speaker, a control dan te hi a awm lawm ni tih te ka ngaihtuah a ni. Chanchinbua kan chhiar angin 'kan bai zo tak ngial dawn alawm maw le' an tih kha ka rilruah hian a tla na viau a ni.

Tin, a dawt lehah chuan kan sawi fo, kan sawi reng, sawi nawn pawh nuam Sports & Youth Services Demand No. 22 na hi han sawi leh ta ilang. Kan hotute leh kan thian te han sawi loh lam deuh hlek kha han sawi ka duh a, Infrastructural development chi hrang hrang kan ngah tawh ziate kha chu a chiang reng mai a. Kan sawi duh chu kan Minister zahawmtak

hmalakna ‘Catch Them Young’ an tih hi discipline zawng zawngin kan tuipui a, a chim hum hum emaw tih mai tur a ni. Chu ‘Catch Them Young’ kan neih hnu a kan hmasawna te hi tlem han sawi ka duh deuh va. Judo ah Sub-Junior National ah hian Gold 1, Silver 3 leh Bronze 5 nikum khan kan rawn hawn a ni. Tin, a dawt leh Muaythai-ah hian nikum khan Gold 4 leh Bronze 2 kan hawn a, kumin erawh chuan kan hawn tam leh zual Gold 6, Silver 6 leh Bronze 2 kan rawn hawn a ni. Tin, Wushu-ah pawh hian Gold 2, Silver 2 leh Bronze 2, Chess thlengin Gold kan rawn hawn a ni, tin, Karate-ah pawh chutiang bawk. Tin, Taekwondo-ah hian National Sub-Junior ah lawmman kan la hnem tawh viau va, tin, hmanni lawk khan Taekwondo bik han sawi zui ila, ni tla seng lo lalram kan tih kumpinu lalram hnuiaia ram 14 intihsiaknaah khan India ram aiawhin pakhatna la zingah kan zuk tel ve a, a lawmawm em em a, an lak zat te sawi lemlo mah ilang. Tin, ka hma lawk khan tui hle mah ilang Games & Sports hi min zirtirtute an awm lem loh chuan hmasawn a har hle mai a, Foreign Coach discipline chi hrang hrangah 9 ngawt kan Sports Minister chak tak hian min lo lakchhuah sak reng a. Chutih chungin he kan ramah hian National Championship level hi vawi 9 lai min neihsak tawh bawk a ni, chungte chu lo nei lo ta ilang chuan helaia tui taka infiamna zir mite hian zir leh chuan tur, thiam leh chuan tur an neih loh avangin heng hi kan thatpui em em a ni. Tin, National Sports-ah khan kan zuk kal a, kan ti tha viau nghe nghe a, Bronze leh Silver te kan rawn hawn ve nual a. Tuna Coach, Foreign atanga lo kalte leh kan ram a National level championship kan neihte hian hun lehah chuan a aia tam, a aia sang min thlen tir ang tih ka ring, chu chu Pu Deputy Speaker, kan sawi chak a ni.

Tin, chu lo lehah chuan Demand No.46-na Urban Development & Poverty Alleviation-ah hian hna tam tak an thawh tawh rualin pakhat chauh ka’n sawi duh a. Aizawl Beautification hian namen lovin Aizawl a tichangkang a. Tin, tunhnai maia kan hriat, In kan sa a, septic tank kan buaipui em em a, kan mistiri rawih a that loh phei chuan a lo defect a, a leak a, kan buaipui a ni. Chungte ngai tawh lo chuan kan lei hnuiaia hian bawlhhlawh chi tin reng a luan ralna tur ro an rel mek a. Hei hi ropui ka ti a, lawmawm ka tingawt mai tih hi Pu Deputy Speaker, ka han sawi chak a.

A dawtlehah chuan LAD-ah lut chho ila, Demand 19-na. LAD hi thingtlang lamah te phei chuan kan kut leh ke ber a ni a. Tin, thingtlang development a thlen vak lohna hmunah pawh hian engemaw zat hna li, hna nga te min han pe ve a, kan lawm em em a. Step te leh tuikhur siam te, eng eng emaw (kar kawng te) kan han siam ve hi kan lawm hle a ni. Tin, tunah hian Village Council ho hi kan India ram sorkar a hausak tak em avangin he ram budget atanga pawisa kan pek loh pawhin development fund a rawn luang lut tam tawh a. Sorkar agency an ni si a, an hnenah hian a luang lut vek. Pawisa hi an ngah viau a, an hmang tangkai hle nachungin an hmang sual ang tih hi a hlauhawm rum rum a. Ka hma lawka kan hotuten an rawn sawi ang khan VC te hi hei aia tha rorel dan, hnathawh dan kan hrih hi a tha awm hlein ka hria a. Chutih laiin, an hah khawp mai a, anmahni hna hi an thawk hman lo tak meuh a. Lawmman te pawh hi tih san sak deuh atan a thain ka hria.

Tin, Social Welfare, Demand No. 29-na hi ka’n sawi kai leh lawk ang a. Social Welfare hi Mizorama rualbanlote enkawltu an ni ber mai a. Rualbanlote hi an thahnem viau a. Zoram pumpui enkawltu atan chuan Department hi a lo te lutuk a.

ni awm mang e aw ka'n ti deuh a. Chuvang chuan, kan sorkar chak tak hian a tih len dan te hi a ngaihtuah thei em aw tih te ka ngaihtuah rum rum a ni. Pu Deputy Speaker, heng pawimawh tak taka ka ngaihte hi ka'n tarlang ve a. Kan Minister zahawm takte pathum Demand hi a chipchiarin sawi hman lo mah ila thlawp tlak an ni a, pass pui turin ka rawn support e. Ka lawm e.

DEPUTY SPEAKER : Tunge sawi leh dawn? Pu R.L. Pianmawia ilo sawm ang.

Pu R.L. PIANMAWIA : Pu Deputy Speaker, a hmasa berin kan Minister pathumte Pu H. Rohluna, Pu Zodintluanga, Pu P.C. Lalthanlana te Demand hi ka support a ni tih ka'n sawi duh a. A hmasa berin Demand No. 17-na Food and Civil Supply chungchangah hian han sawi ka'n duha chu sorkar hmasa hunah khan an insawi pawr viau na a, kan bialah chuan a harsa khawp mai a. Chuvangin, a harsat deuh avang khan Presbyterian Kohhran te, Sipai pawl te, Darlawn Welfare te khan eitur kha an rawn sem nasa khawp mai a. Anni avang khan tam avanga mitthi kan awm em lova, a lawmawm a. Tin, Director te pawh keipaw'n VC angin ka zuk fak vak a. Harsa tak chungin min rawn thawn a, a nghei lo pawlah kan tang a ni. Chungte chu an fel vang hrim hrim kha a ni lo tih kha a chiang a. Chuvangin theihtawp kan lo chhuahve vangte pawh kha a ni tih kha ka sawi tel duh a.

DEPUTY SPEAKER : I fakna chhan pawh kha an fel vang pawh chu ani chuanglo ani maw.

Pu R.L. PIANMAWIA : Aw, nilo Food & Civil Supply ah hian retailer bill chungchang te hi thingtlangpa in a harsatna kan tawh thin ani a. Hun hmasaah/Term hmasa-ah khan chuan LOC a chhuah dawn hian Minister atangin list a thleng hmasa a, a pek tur list a thleng hmasa a, chuvang chuan thingtlang tan chuan chan kha thil theihloh tluk ani a, damlo mangang kan han sawipui ve te pawn an chang theilo a, tun hunah erawh chuan seniority in kal ani a, cancer vei leh engemaw bik tan tih lohah chuan a tlan khalh theih lohva, a lawmawm tak meuh meuh a, thingtlang retailer lo ni ve tawh tawh tan pawh bill kha sawibuai ngai miah lovin hun a lo thleng ve mai a, hei hi a ropui tak meuh meuh ani tih ka sawi duh a.

Tin, Food & Civil Supply bikah hian ka la duhthawh tlat a, hmanni khan ka sawi tawh a, Weight and Measure chungchang kha sawi tel leh ka la duh a, an ni hi tihchak a pawimawh ka ti a. An ni kan tihchak hian thingtlang miretheite chanpual a siamtha em em a. An thawhthat loh chuan tun lai khawvelah, duhamna khawvelah hian mirethei zawkte chan a chhe em em a, hengho kan khawngaih ber a te, kan VIP te chhanchuahna kawng khat a chu (Sorkar angin) an ni tih that kha a ni tih ka sawi lang leh duh a.

Demand No. 36-na Environment & Forest ah hian kan sawi leh duh a chu, thilthar lo langchhuak ta chu he Sorkarah hian, pakhat naah chuan R.O. Transfer a tihthat leh dawn a clip hnih clip thum pe chin hmun tha tha a an awm ang a kha he Sorkarah hian a awm ta miahlo mai ani. Hun hmasa lam khan chuan R.O. Transfer

dawn hianin temporary transfer order kan ti dawn nge an chhuak phawt a, tel hnih tel thum va pe leh chin kha hmuntha ah an awm leh mai ani. Tikhan, Order kha an siamtha leh mai ani, tun hunah erawh chuan kan Minister hi chuti/khati tia han sawisel a, order thlak leh tura tih paw'n a theih bau loh mai a. Chuvang chuanin a clip khan awmzia a nei lova, change thar ropui tak ani tih ka sawi duh a. Tin, anni atang hian keini Tuivawl bial phei chuan lawmna tur kan ngah hle a, hun hmasa lamah hmasawna hrang hrang Gas sem te, Cooker semte kawng hrang hrangin hmalak a lo ni tawh a. Tunah hian hmathar hlawhtling zawk min buaipui sak leh mek a, an chungah hian lawmthu sawi tur kan ngah hle in ka hria a, hemiah hian an ni chauh ani lova, Social Welfare Department-te nena inkawp a ruahmanna min siam sak ani a, chuvangin an department pahnih chungah hian Tuivawl bialin lawmthu a sawi tak meuh meuh ani tih ka sawi duh a. Tuna hmabak tam tak la awm zingah (Ngaw tha nei chhunah chuan) Mauchar ram ngaw ang te (khi hmuh hmaih theih an ni tlat lova) helai atangin hmulo mah ila, satellite atangin a lang Chiang a, khingte khi a humhalhna tur khian hma nasa zawk a lak a ngai ani tih kan sawi tel duh a.

Tin, min hmaihthelh deuh nia kan hriat a chu Forest Department a hmasawna tur hrang hrang hi Darlawn Division atang hian ruahmanna thehluh tam tak a awm a, sawm vel lai a awm a, hei hi CCF Planning-ah a tang reng mai a, hengte pawh hi mipakhat kut a tih tan reng theiha a awm hi thalo in ka hria a. Chuvang chuan, hmasawna tur kawnga ruahman sa tawhte hi chu kal chho ve thei sela a tha in ka hria a. Tin, YMA tena vantlang tana ram an lo enkawl, community tana an lo ruahman ang chi hi, hmanni Session-ah khan zawhna chhan a ni tawh a, tanpuina pek theih thu sawi a ni a. Kha kha pek awm kan la hre ve tlat lo mai a, keini lamah khian min lo hriatsak se, tih ka sawi duh a.

Tin, Sports lamah ka'n kai ang a, Demand No. 22 -ah. Sports Department hi an fakawm hle mai a. Hei, a rim ara kan la hre mang lo emaw kan tih lai hian Lalthazuala, Darlawn Boxing Championship, National Level-ah pawh Silver leh Medal dawng a lo awm ve tawh a. Tin, Jenny V.L. Hmangaih sangi pawh Muay Thai-ah Gold Medal la thei te in an lo siam a. Tin, Pro-Fight-ah Zarzoliana pawh Champion kan nei a ni. Heng zawng zawngte hi kan la chhawr mang lo emaw kan tih lai khan min lo chherchhuah sak tawh reng mai a, an chungah hian lawmawm ka ti em em mai a. Pu Deputy Speaker, i remtihna in an thuvawn hi a mawi em em a, hei hi kan lo neihna chhan a ni tih ka sawi duh a.

Mizoram pum tuam chhuak turin Catch them Young programme hi siam a ni ang a, coach te, trainer leh players te mamawh tur materials te leh a tul ang coaching fee, honorarium tihte a pe thin ang tih te a lo ni a. Tin, PYKK-ah Mizoram khua zawng zawng khelmual leh Sports material pek vek tur tih an thu dah kha alo ni hrim hrim mai a. Khavang kha a niang chu, Tuivawl biala khaw 24, khaw rethei tak tak tepawh hun hmasa lama Football te, Volley Ball te la thlen lohna khan a thleng vek tawh a ni. Chuvangin, Sports discipline, football leh volley ball hmupha china kan han awm ve ringawt pawh khi khawtin khi kan lawm tak meuh meuh a.

Tin, hemi bakah Darlawn Playground siamna turte, Sakawrdai te, Vaitin te min pe a, kum hlui lamah. Tin, tun kumah Zohmun field te min laih sak a, Ratu Pavilion sakna turte min pe a. Chubakah, field puitling neih ve theihna turin kan Minister-in DPR alo siam tir vek a, kan sawi leh kan tih hma in, 'In pa,

vana mi chuan in mamawh te a hria' tih ang deuh khan field puitling tihna tur kha nuai 498 vel DPR a lo siamtir a, hlawhtling mai turah kan ngai a, mahse kan tan dawn chauh a ni, Pu Deputy Speaker, a lawmawm hle in ka hria a.

Tin, Demand No. 26 na-ah ka'n kal leh ang a, Information and Publicity-ah hian, a zar zo theih hi a tlem khawp mai a. Kha, a hma khan an lo sawi a, TV leh Radio sem tihvel kha, kha kha chu a then then chu kan dawng ve tawh a. Tin, Upa Pawl te, YMA te, hmun pawimawh tlawhna tur atana hun an siam thin ang kha a awm khat ta riau mai a, tun kum kalta khan Upa Pawl, Darlawn ten an chang ve hlauh mai a. Hei hi tam zawka tihdan, sum tam zawk ruahmana tihdan hi awm thei se kan duh hle a ni.

Tin, Demand No. 46, Urban Development and Poverty Alleviation-ah hian a tel pha chinah kan lo tel ve hlauh a, kan bial, abikin Darlawn. Hemiah hian a lawmawm em em na chu DPR an siam an thethlak dawn khan priority list palinaah kan awm a, mahse, kan Minister hian min duhsak hle tih hriatna chu a dang chhuah hmain palina kha a rawn tichhuak a, a chungah kan lawm tak tak a ni tih kha ka sawi duh a.

Tin, Demand No. 48-na Information & Communication Technology-ah hian lawmthu sawive kan chak a, lawmthu kan la sawi thei si lova, min lo hriat sak sela.

Tin, LAD Demand No.19-naah hian nasa takin hmasawna he sorkarah hian a awm a, a lawmawm a, hmabak leh erawh chu, han tih tura kan rawt duh erawh chu LAD tender singnih khat lek leka khawtin ten an chan thin a hi tender a tih a ni a, an han buaipui lehna kha cheng tam tak a ral a, 5% an cut leh bawk si a. Khawngaihthlak awm takah kan siam a ni ringawt mai a, kan thingtlang mi te kha. Chuvangin kum thar lo awm leh turah hi chuan tender ni tawh lovin, a thawk thei tura kha khawtina mi kha pek mai, cut awm tawh lovin, awlsam takin khawtina mi te kha min tihsak mai se. Tin, V.C. te hi sorkar hmasaah khan tunlaia tawngkam lar tak, bang chhak sah thlaka bang thlanga bel tih kha an lo hmang a, V.C. lawmman tihsan an duhnaah V.C. member an titem bawk a, tikhan an lo ti a, administration a chhiat phah vek a. Mi tlemtein chanvo tha sum leh pai leh khawtlang development thil an lo khawih a, hetianga mi 2/3 lekin an khawih chuanin lo chingpen deuh pawh nise a awm a ni. Chuvang chuan a hmaa member, kan sorkar hmasak a an ruahman member zat kha tih tam leh a, an lawmman pawh hi tihtam tur a ni. Hei hi a theih pawhin a lang a, AMC-ah V.C. sum leh pai ral a awm tawh lova, hei hi min hriatsak sela.

Demand No.29-na Social Welfare-ah hmasawna ropui tak kan chang hi lawmawm ka ti a. Nidanga Anganwadi Centre sak tur tul tam tak kan dil te kha, tunah hian sanction an rawn pe chhuak zel tawhin ka hre mai a. A lawmawm em em mai a, hawn thar a piang hi sakna tur pawisain a rawn umzui zel tawh mai a, a lawmawm hlein ka hria a. Tin, chhungkhata eizawngtu boral kan ti mai a thingtlangpa te chuan kan lo nghahfak ve em em, sum leh paia chhawmdawlna awm thei a kha tunhma zawnga Darlawn ICDS bial chhunga mi 10 quota kan neih thin kha mi 20-ah min tihpun sak tawh a. Chuvang chuan beiseitute beiseina pawh tunah chuanin a thlawn tlem tawh dawn a ni tih ka sawi lang tel duh a. Lawmthu ka'n sawi tak meuh meuh a. Amaherawhchu, ICDS

Office building tur erawh khi chu hmabak ko takah min dah sak se tih ka sawi tel duh a ni e. Ka lawm e.

DEPUTY SPEAKER : Pu Nirupam Chakma ilo sawm ang.

Pu NIRUPAM CHAKMA : Pu Deputy Speaker, ka lawm e. Ka sawi duh hmasak chu department thenkhat Power te, Food & Civil Supplies te, Essential Commodities ti mai ang, mi tin khawih, chhungkaw tin khawih hemi Department pahnih hi kan sorkar tirh atangin mipuiah eng engemaw sawisel kha a awm ve a. Amaherawhchu, thil pakhat ka sawi duh chu thil tha lo lai sawisel kha a awm thin a, thil tih that lai chu appreciation a awm tur ani. Chanchinbuah pawh appreciation lam a lang vak lova, thil tha pui pui thil tha lo va ziah a tam lutuk a, hemi kalkawng hi tha lo ka ti a. Power & Electricity department demand sawi ni chu a nilo na in thil pakhat ka sawi duh chu, this is for just giving an example, 2008 - 2009 ah khan revenue collection chu 100 crore leh 19 lakhs ani a, chumi kum 2008 – 2009 ah keimahni generation bakah Mizoram pawn lam atangin NEEPCO te NEPC te, TSEN, ESECL atang te NTPC atang te in power kan lei zat chu 58.68 crore kan hmang tawh a ni, revenue a kan lakluh chu 1.19 crore ani. 2009 – 2010 kumah khan revenue collection kha restrically in a reduce a 67.86 crore chauh a ni. 2010 – 2011 ah 72.58 crore ani a, demand kan sawi dawn a lawm, ka sawi tum awmzia chu Pu Speaker, Pu Chairman, 2010-2011 kumah khan power department a kan hman zat chu Mizoram pawn atanga power kan lei zat chu 64.47 crore ani, 2008 – 2009 aiin a tam zawk daih, mahse, chuti chungin revenue collection chu a hniam ani.

Pu B. LALTHLEGLIANA (CHAIRMAN) : Vawiin demand-ah sawi i duh leh teuh si ang a, vawiin demand-ah lut la, naktuk Demand chu naktukah i sawi dawn nia, kha kha chu naktukah sawi nise.

Pu NIRUPAM CHAKMA : Ngawi rawh, Pu Chairman, hei hi example-ah ka hmang a. Supply Department-ah ka kal teh ang. Supply-ah khan Pu Chairman, BPL, IAY Ration card issue zat ka zawt a, Starred question-ah min chhang a ni a. Total number of ration card 3,16,882, thla tin a buhfai mamawh zat chu 1,16,912 quintal ti a min chhanna ani a, pawisa kan sen tawh zat, 2008 – 2009 kumah 1,81,51,34,589 ani a, 2009 – 10 kumah 210,72,53,974, 2010 – 2011 ah 224 crore 28 thousand three hundred fifty nine a ni a. Kumtina buhfai a kan senso hi a pung zel a, chuti anih chuan 2008-2009 kumah khan Electric-ah kan harsa lo kan ti a ni. Amaherawhchu, 2009-2010, 2010-2011 ah kan harsat zia kan sawi a, chu chu kei chuan ka hrethiam lo. Hemi Power & Electricity Department-ah khan sorkarin pawisa tam tawh chu kumtin a seng ve a ni, mahse chuti chungin engngatinge Mizoramah a harsa kan tih? Engnge ni a awmzia? Electric-ah distribution a tha lo em ni? Engngatinge tariff lak zat kha a tlak hniam tawh?. Chuvang chuan hmannah pawh ka sawi a, engnge department-ah conspiracy a awm em ni ka ti mai. Chutiang ang bawh in Supply Department-ah 2008-2009 kum atangin 2009-2010 nikum thleng a pawisa sen zat kan en chuan a tam daih, chumi awmzia chu buhfai tam tak

kan lei tihna a ni a, mahse, chuti chungin engngatinge harsat thu kan sawi zel, engnge ni a awmzia? Power chungchanga example ka pek nachhan pawh kha a ni a. Pu Chairman, hei hi eng emaw zat chu a dikna chin pawh a awm thei a, mahse ka ngaihtuahnaah chuan propaganda a tam lutuk, opposition propaganda, MNF hian propaganda an ngah thiam anih ka ring, a tak chu ani lo a ni, example ka'n pe ang che u, "Gas a harsa a min ziah sak rawh" an rawn ti thin a ni, kan inah te pawh vawi tam tak an lo kal thin a, anih leh gas a harsa anih chuan anih leh khawi gas connection bu kha rawn la rawh u ilo enchhin teh ang ka ti thin a ni, mahse, tuman an rawn la ngam chuang si lo, a harsat thu chiah hi an rawn sawi a, an hmuh leh hmuh loh thu han zawt ila an tim leh bawk si a, in hmulo tak tak anih chuan Supply Department-ah ka lo ziah sak ang che ka ti thin a ni. Chuvang chuan Mizoramah hian propaganda tam lutuk hi a tha lo ka ti a ni.

Pu Chairman, if the Government spends less on the purchase of rice or purchase of power anih chuan ka hrethiam mahse a tlem lam ni lovin a tam lam a nih laia harsatna kan han tawh thin hi chu Minister zahawmtak takte hian in lo enfiah a ngai in ka hria, department kalphung te hi in enfiah ngei chu a ngai a ni.

Tin, Pu Chairman, public distribution chungchang hi session hmasa pawh khan kan sawi tawh a, kan thenawm state Tripura ho tih dan khu a tha ka ti a, a hmun ngeiah kal in ka zuk zir tawh a ni, an kalphung hi ka zir tawh a ni, (one of the best retailer system in India) retailer ho hian an quota an hmuh rualin commission chu an hmu zel, 3000 pawisa deposit tur atangin commission chu a card in 2900 chauh an deposit a ni. Chuvangin Retailer in Buhfai a khul rual rual in an commission kha an hmu zel, an mahni pawisa in an khul a, rei tak hnuah bill te kan pe a, a thenin an nghak thei si lova, 50% in an zuar mai mai a ni. Hemi kalphung hi a thlak thei lo a mi, an Buhfai an khul rualin commission pe ila enge harsatna awm? Chuvangin Department kalphung kha siam danglam a ngai viau in ka hria a ni.

Tin, Sport chungchangah khan lawmthu ka sawi duh a rei tak MLA kan ni tawh a, kan bial lamah sport department hian hna an thawk ngai lo, mahse, tunah hian Football ground 2 min pe a UD & PA leh Sport atangin, chumi rual chuan material tam tak pawh min pe a ka lawm hle a ni. Kuminah pawh pahnih tal chu min pe rawh se.

Tin, Catch Them Young policy hi an achievement report ka en thin a, session hmasa pawn kan sawi a, kan bial lamah, hemi policy hi an kalpui vak lo niin ka hria a, kumin lamah catch dan kha ngaihtuah sela, a bik takin aquatic, swimming lam hi Chakma ho hian an thiam em em a ni. Please don't mind, I think we know better swimming than Mizos. A chhan chu lui bulah kan awm ani. Chuvangin he sport hi western belt-ah promote theih dan a awm a ni, cricket pawh chutiang bawkin. Chawngte field is the biggest field in Mizoram, tiin kan chhuang thin a ni. Tin, Cricket ground-ah pawh siam theih ani tih Minister kan hrilh duh bawh ani.

Tin, Social Welfare Department-ah Multi Sectoral Development Plan for Minority Concentrated District tihah khan District pahnih select tawh a ni a,

Lawngtlai leh Mamit. Amaherawhchu, Pu Chairman kum khat a kal a tunah kan implement mek chu a ni, a tlai mah mah a ni. Implement chak sela pawisa te pawh Central atanga release zung zung theih nan, pawisa kha hman chak a ngai ani. Tin, kan bialah khawngaih takin kan thiante khan min thik lo sela. Kuminah Lawngtlai District-ah IAY 700 hemi scheme atangin kan hmu a. a tam zawk chu keima bial a hman tur a ni a. Rawn pem ula kan pe mai ang che u, ka lawm e.

Pu B.LALTHLEGLIANA (CHAIRMAN) : Tikhanin chawhma a mi nen ka rul tawk chiah che. Tunge sawi leh ang ? Pu Lalduhoma, Member zahawmtak ilo sawm ang.

Pu LALDUHOMA : Pu Chairman, Environment & Forest-ah hian kan tan ang a. He Department hian nikumah khan dan thar pakhat a siam a. Chu chu ‘Mizoram Forest (Establishment & Regulation of Saw Mills and other Wood based Industry) Rules, 2010’ a ni a. He rules hi a hmanna chungchangah hian harsatna min thlen thei ang em? tih zawhna ka zawt a, tun Session-ah hian. Chutiang awm lo tur ang chuan min chhang a. Mahse hei bill te chu helaiah uluk takin kan chai a, kan pass hma in. Rules te hi chu kan hnenah alo thleng ve lova, depts., in an lo siam mai a. He Rules, section 2 hian harsatna min siam dawnin ka hria a. Section 2-ah hian Saw Mill definition a awm a, saw mill size a in ziak a. Hei Tripura leh State dangah te an define naah hian a size an teh kher ngai lo a ni. Tin, a Saw Mill-ah tak kha chuan a paw em em lova, secondary wood based industries or shop tihah hian a size an han dah tlat mai a. Hei hi Furniture Workshop kan tih ho a hi anni a, vertical band anih chuan thingzaina khawl, a ara tung chho chi anih chuan 9 inches aia sei lo tur an ti a ni, hacksaw blade tiat vel anih chu, a te lutuk. A bial chi circular saw anih chuan 12 inches diameter aia lian tur a nilo a ti a. Khatiang khawpa thingzai khawl kha eng company mahin an siam baw lo, a te lutuk. Tuna kan Furniture Workshop neih zawng zawng hi kha aia lian vek an nih avangin, hei aia lian neih an phal dawn lo a nih si chuan kan tawp vek a ngai dawn a ni, kan workshop neih zawng zawng hi. Chuvangin hei hi en ngun nise a thain ka hria a.

Pu Deputy Speaker, ka ding tan chiah a ni a. Section 4 naah hian harsatna dang lo awm leh a chu Saw Mill leh Furniture Workshop kan tih ang chi kha Industrial Estate chhungah chauh a awm tur a ni tih a ni leh a ni. Industrial Estate kan neihna hmunte chu kan hria a. Chhungah chuan Furniture Workshop te hi an awm mang lo reng reng a. Veng hrang hrangah mahni awmna hmunah workshop an nei a. Industrial Estate-ah chauh awm tur a nih chuan khawchhunga kan Furniture Workshop awm zawng zawng hi sawn chhuah vek tur tihna a ni a. Chung Industrial Estate-ah chuan an insawna tur ruahman a awm baw si lova. Hei hi a felhlel hlein ka hria a. Tin, Industrial Estate reng reng hi Forest ram atanga km 8 chhungah a awm tur a nilo, tih a ni leh a ni. Saw Mill a ni emaw, Woodbase workshop a ni emaw, Forest area atanga km8 chhunga dah a lo thianga ta lova. Tuna kan Industrial Estate zawng zawng hi Forest area atanga km 8 chhunga awm vek a niin ka hria a. Awm phal loh naah an awm ta vek mai a ni, he rules avangin hian. Chuvangin, hman rual ruala problem tam tak, a hmaa awm lo rawn awm thar tur rawn siam chhuak thei rules han siam mai a hi engatinge aw! Ka ti a, ka hriatthiam loh

vangte lo ni hlauh se ka duh hle a ni. Hei hi nakinah min hrilhfiah sela, a tul a nih chuan siamthat vat a tulin ka hria.

Tin, private plantation chhunga thing kih dan “felling of trees-in private plantation” tih guideline kha kan nei a. Forest ram chhunga plantation kih dan chu a khirh em em a. Khami guideline leh a dan a te kha chu keini final mai theih a ni lova. Private plantation ami chu kan State Sorkar siam theih a ni a, simple takin a siam theih a. Simple pawh a simple zawk a, tunah chuan a ziaawm viauin ka hria a. Amaherawhchu, Forest area-a a Department-in a ngaih tlat si, chumi chhunga Forest Plantation nei private tam tak awm bawk si hi, private plantation ni si, Sorkarin Forest area a tih chhunga awmte tan hian a khirh em em mai a ni, an thing kih hi. Chuvangin, Mizo riluin Forest Plantation-a an tih ang kan rawt a ni. Hmang mai ila tuman minrawn khap chuang loving, tu’n min hek bawk lovang. Harsatna insiam sak lo zawng hian Sorkar hian ro min rel sak se a thain ka hria. “Forest area chhung alawm” tia kan sawi buai dawn anih chuan Forest area chhunga sangha dil zawng zawng hi, “In sangha man suh u, Forest ta a ni”, tih mai tur a nia, an ti silova, an leilet te pawh hi, “In buh kha lo seng suh u, Forest ta ania”, an ti chuang bawk silova. Engatinge teak plantation anih avanga heti tak maia an zuk hauhtlat mai bik, hei hi a rualkhai lovin ka hria a, chubakah Parliament in Dan a siam tawh a, Forest area a plantation nei te zawng zawng hi chhuah zalen vek tur anni hrim hrim. Chumi atan chuan hmalak mek ani tho tho bawk a, chuvangin chulam hawia lo tih tan deuh te hi a tha lawm ni ka ti a.

Tin, Forest area chhungah hian periodical patta te, LSC te kan sorkarin kan Dan siam ngei hmangin a pe teuh a, chu chu nimin khan Revenue Minister zahawmtak kha ka zawt a, “Heng in pass leh LSC pek te hi a valid em? ka ti a, a petu Minister ber khan a valid leh valid loh kha a hrechiang thei tlat lo mai. Forest lamin “Kan ram chhunga mi hi chu pakhatmah a valid lovang” an lo ti ve bawk sia, khalaiah khan min an sual avangin In an zuk sa emaw ram an zuk nei emaw ani lova, sorkarin Dan ang thlapa a pek avangin right an nei a ni. Chuvangin Sorkar Department hrang hrangte hian kan mipuite an ti luhai em em a, hei hi in co-ordinate a, chinfel a thain ka hria a ni.

Tin, Bangladesh ramri border fencing-ah hian ramsa inkalpawhna tur (corridor) ruahman a ni lovin ka hria a, hei hi thil thalo tak a ni. Ramsa humhalh kan tih kan tih laia khatianga an inkalpawh theihna kan dangchat tlat anih chuan a dikin ka ring lova, hei hi ngaihtuah zui nise a thain ka ring bawk a.

Tin, Sports-ah hian kan kal anga, incentive cash award kan pe a, mi tam tak a tiphur a, a lawmawm a ni. Kan State Sorkarin a pek bakah hian SAI te pawhin a lo pe ve thova. Amaherawhchu, hei hi a lawmawm rual rualin inkhelh laia accident tawh te, hliam tuar te tan hian engmah provision a awm lova, thil hi a tirah chuan tih famkim te a har bawk a, helai bik te hi kan Minister hianinrawn enzui thei selangin a lawmawm hlein ka ring bawk a.

Tin, catch them young tih hi a tha a, ZNP hi a chhawrbawk ber tur pawh kan ni dawn a, a chhan chu Sports-ah chauh kan apply dawn lova, politics-ah kan apply dawn a ni. Vacancy kan ngah ber a, hei tuna ruling-ah te chuan seat 32 a khat sa tlat a nia MNF-ah lah ka la fit ti hi an la kuh tul mai bawk sia. Pu Dy. Speaker, hman deuh khan, a hming chu sawi lo ila, kan senior politician nomination file dawn lai vela damlo unconscious a awm kha a khum sirah, “A pawl mange, nomination a file thei dawn lo anih hi”, an tia, a muhil emaw an tia, a unconscious emaw an tia, a rawn meng duar duar a, “File thei ang”, a rawn ti e, an tia. Khatiang anga chawlh tum lo hi party dangah hian an tam si a, keini chu candidate nei tha ber party kan ni dawn si a, churang chuan hei catch them young hi politics-ah kan apply dawn a ni.

Food & Civil Supplies lamah kan kal leh anga. Nichinah khan thu inchuh a awm a, Sorkar hmasa khan buhfai a thlawnin kan sem, tih leh in sem lo, tih kha a hrechiang ve ber, a reltute zinga mi ka nih angin ka'n sawifiah anga, kan thelh ange.

Mautam avanga tanpuina dilna kha, kan thlai leh buh a chhe zat kha rawn report rawh u, kan ti a, chu Committee-ah chuan kohhran hrang hrang pawh an tela, NGO leh Party hrang hrang aiawh pawh an tel vek a ni. Tichuan anlo zuk thehluh a, a tlem si a an thehluh a kha, kei phei chuan, ‘I siam tha leh ang u, dawt deuh pawhin inflated deuhin i siam tha leh ang u, Mautam denchhen a pawisa kan hmu tamna tur a nih chuan’ tiin, ka rawt nghe nghe ani Committee-ah. Mahse anlo zuk thawn thla hman tawh si a, kan siam tha thei ta lo a, kan beisei ang pawh kan hmu ta lo a, khami a tanpui nan khan Central in pawisa min rawn pe ta a, Crore 50 min rawn pe a ni. He crore 50 hi engtin nge kan hman ang tih kha, Committee-in kan rel a, tahchuan, ‘kan tam avanga min rawn pek a ni bawk a, thla li chhung ration a free in i sem ang u, chumi atan chuan hei hi i hmang ang u,’ kan ti a, kan rel thlap a ni, a minute pawh ala awm vek. Churangchuan kan tih tih zawnga ngaihtuah tur ani lo, kan vaia kan tih tlan NGO te nena kan rel ho a ni tih kha hria ila.

Tin, Ramrikawnah khuan FCI Godown khu kan nei a, Pu Dy.Speaker, ka sawi zing tawh a, kan ning tawh a ni khu khu. Traffick a tih khawloh bakah, an riaka motor lianah, zun ek thiar engkim mai leh K.S nen lam, kan society a ti buai, churangchuan hei hi a rang thei ang bera min sawn sak turin Minister zahawmtak hi kan ngen duh a. Zawhna ka siamah khan ‘hmalakna chu a awm,’ tih te chuah khan min chhang a, eng hmalakna nge awm? Engtikah nge awm? Tunah eng dinhmunah nge a awm tawh, khawia sawn tur nge a nih, engtikah nge kan sawn theih ang? tih kha, nghakhlel takin kan lo thlir meka, khawngaihtakin min rawn en sak se, tih kan ngen duh bawka.

Tin, T.V-ah te kan ena, tunlai India ram buhfai tam zia hi, a dahna an hrela a, kawng sirah te an daha, naupang sikul kal theilo khawpin sikulah te an dah a, buhfai tawtin an tawt a, chuti khawpa India rama buhfai tam lutuk an buaipui a nih si chuan economic price-a kan lei atan te pawh zuk ngaihven ve ila, tlawm te te in a lei teuh theih mai loh maw, tih te kha mawl deuhin, pakla hisap deuhin kan sawi a nih chu. Tin, Local procurement hi kan tih ve a thain ka hria a, economic price a kan lei teuh tho si a nih hi chuan, a ram pumpuia khatia tlangzarh vak chi pawh ala nilo a, a bul tan nan chuan leilet thatna deuh area-ah khan, selected area bikah khan, “Local

procurement kan ti dawn”, ti ila, man sang tawkin leisak ve ila, kan seng teuh tho a, a transport-ah te kan save teuh dawn a ni, khang khaw bul velah te khan, retailer kaltlang khan kan semchhuah tir ve maithei a ni, chu chu incentive tha tak a ni anga, buh thar tam kumah te kan puang bawk a, thil inhmeh tak anih ka ringa, hei hi bultan atan tha ka ti a, eng ang chiaha lianin nge kan kalpui zel theih ang tih erawh chu hunin larawn ti Chiang sela.

Tin, nichin lawka thingpui kan in lai khan Sakawrdai lam atangin message ka dawng a, Sakawrdaia Godown atangin, specialin buhfai kg ah cheng 12, bag ah cheng Rs 600 in an hralh reng mai a, heng hi Dan ani em ni? Minrawn ti a, ka information dawn kha a dik leh dikloh chu ka hrelo a, amaherawhchu, heng hi thil awmthei a nih avangin ngaihven zui atan a tha khawp mai.

Tin, hei Assembly Committee hrang hrangah kan awm a, a bikin PAC-ah te. Sawi hrehawm tak chu Supply department tluka sum leh pai riralna, recovery chhiatna hi a awm miah lo. Hei hi thutak a ni. Thenkhat suspend an ni a. Thenkhat an hlawh atanga deduct tur tih te a ni a, an pension a, thenkhatin Departmental Inquiry an faced a. Kum 7 Departmental Inquiry nei, la fel chuang lo te pawh an ni. Tunah khawng an awm tawh? han ti ila, an lo retire tawh daih emaw, an lo thi tawh emaw te a lo ni a. Khatiang ang chi kha hei Sorkarin sum kan duh a, chhiah kan tipung vak vak si a, a dik taka kan lak tur ngei ngei ang pawh ngaihven that loh avanga a tawpa a ngaihna hriat loh avanga Certificate Officer hnena refer leh tak rikngawt (Certificate Officer hnena refer khan ral mai mai rawh se tihna ang tluk deuhthaw hial a lo ni bawk si a) chung chu a tam em em mai a. Tan lak fe a ngai, thil chronic lutuk a ni a. Kan Minister pawh ka dem hran lo. Amaherawhchu, effort nasa tak, tumruhna nena neih a ngaiin ka hria a ni.

Tin, Mau hi kan sawi fova, Private Bamboo Plantation hi NLUP hnuaiyah te pawh hian han uar ni sengin, mi, a mimal huana a ching a nih chuan, duh leh a tuai pawh zuar ang hmiang. A tuai avang ringawt pawh hian min mau hmun an nei duh dawn a. Hei hi uar chi niin ka hria.

UD & PA ah hian ka'n pakai leh lawk ang a. EWS Housing Scheme hi a tha a, a lawmawm a. Amaherawhchu, kan bialah te pawh han en a, Kohhranin hnatlangin, YMA in hnatlangin an in sak sak ngai ngawih ngawih hi kan la nei a ni. Heng ang deserving case lutukah hi chuan, bialtu MLA ten a, 'hei chu minrawn ngaih pawimawh sak hram teh u khai', kan tih hi kan Minister zahawmtak hian min lo ngaih pawimawh sak hram hram turin ka'n ngen duh a.

Tin, SGSRY hnuaiyah hian Self Help Group hi a thar a la din theih em? Heng te pawh hi bialtu MLA te ngeiin mi hlawhtling tur nia kan hriat intelkhawm an awm a nih chuan kei pawhinrawn recommend duh ka nei a, a la theih a nih chuan dinchhuah pui ngei nana hmang tur recommend chak te pawh ka nei a ni.

Tin, USHAP Loan kha, beneficiary 234 lai, Bank 9 laiah khan a ni a. Hei hi MRB te hian an honour chiah lo nge, helaiah hian mi an buai a, tin, department dangin an tih te pawh kha an buai khawp mai. Heng hi indawr chian hmasak a tha hlein ka hria a ni.

Tin, ka bialah khuan Tuithum Project kha JNURM hnuaiiah khan hman atanga awm tawh a ni a. Hei hi kan hlamchhiah ta deuh nge ni, tourist tan pawh a pawimawh tak tur a nih avangin a dinhmun han tihthat leh nise ka duh a.

Tin, University panna kawng, kan minister zahawm tak te nen hmanni tuk zingah kan zuk kal a. JNURM atangin 13 crores DPR theh luh a ni a. University pawh an lawm khawp mai. Vawiinah hian lawmthu ka'n sawi a ni.

A tawpna berah chuan Social Welfare-ah hian pakhat chiah ka'n sawi duh chu, Pu Deputy Speaker, hei, Director te an lo awm loh hian hmui te hi a ni thin a, Secretary ten emaw, tu tu ten emaw. Hmui hi chuan hna dang an lo ngah a, an lo hre tak tak lova, inhrilhfiah chawp te hi a ngai duh a, a buaithlak duh a. Tunah hian charge lain an awm mek a. Recruitment Rules hi kan nawr chhuah kan tih ve ngam deuhthawah ka ngai a, nikum kum tir atangin an lo nei ta a. He Recruitment Rules-ah hian Director post atan Joint Director-a kum 5 awm tawh tih leh, Deputation leh Condone-in tih a ni. Tuna charge latu hian kum 4 service a nei tawh a. Dan ang thlapin Condone in a puitlingah dah theih tawh a ni. Kumhnih lek nei te pawh lo condone tawh thin a ni a, tunhmate pawhin. Tichuan, a Department pum pui an kang suau anga, promotion an hmu deuh sap sap anga, an vaiin an hlim anga, tha takin hna an thawh theih ka ring a. Dan palzut chuang silova, dan ang thova kan official-te hlim taka kan siam theihna kawng a awm anih hi chuan tihsak tha hle in ka hria a, hei pawh hi thil tul tak nia ka hriat avangin kan sawi ri ve a ni e.

Pu T.T. ZOTHANSANGA : Pu Deputy Speaker, ka lawm e. Hei a hmasain kan sawi hmasak duh chu UD&PA kha a ni a, hei UD&PA hi a fakawm ka ti khawp mai a, an department thawhhona hi a tha niin ka hria. Hei, chanchinbuah i remtihhain Aizawl Post 21st May-a rawn chhuakah chuan tun term chhunga kan Minister-ina a sum a zuk pawh chhuah tawh zawng zawng hi ₹ 43,922.80 (cheng nuai singli sangthum zakua sawmkua pahnih point 80) daih mai kha a lo ni tawh a. Nuai singli chuang kha lo zuk pawh chhuah tawh a ni a, a ropui ka ti khawp mai a, tunlai mihringte kan harsatna ber chu In leh Lo hi a ni lo thei lova, hmun himah awm kan duh a, tunah hianin EWS Housing kan tih hnuaiiah hianin In sangkhat leh zanga Aizawl khawpui pawnah kan han sa mek a ni a.

Tin, chutih rualin hemi a khawpui bikah hian In 1096 (sangkhat leh sawmkua paruk) chenna tur an han ti leh mek a, tichuan, In thar nei turin In 3046 (sangthum leh sawmli paruk) zet an han awm a. Hei hi a lawmawm ka ti khawp mai a, In neilo te, mirethei lam he sawrkar hian a hawi niin ka hria a, NLUP mai pawh nilovin In leh Lo ben belna kawngah te, tin, RD lam atangin rangva kan han han semna chungchangah te, mirethei lam hawi tak tak sawrkar niin ka hria a. Chuvang chuan lawmawm ka ti khawp mai a, hetah a changtu Minister-in theihtawp a han chhuahna te Zoram mipuiin kan han hmu chho zel a, chungah chuan lawmawm ka ti a.

Tin, hei EWS Housing kan han tihah hian Champhaiah khian 450 han sa tur kan ni a, chu chu kan sa mek a, engemaw zat kan sa tawh a. Hei hi a lawmawm khawp mai a. Chutih rualin a sum min han pek hi tlemin a kar a hla deuh hlek thin a, a lo hlui hman deuh hlek ang tih hi kan hlau a. Chuvang chuan

helaite kha chu han en ho zui kha chu a tha awm mange kan ti a. Champhaiah nasa takin hma kan sawn a, tam tak kan lawm a ni tih kha ka'n sawi ve duh a ni. He Department atanga sum hai chhuah tawh zawng zawng kan en kan en a, ani zawk hianin kan sorkar hmasa ni lo khanin tuma thal ve theih loh tuikhur hi a lo hre zawk emaw ni ka ti deuh a ni.

Tin, Pu Deputy Speaker, Food & Civil Supply chungchangah khan hei lawmawm tih deuh mai ka nei chuan retailer Champhaia mite hi an fel ta thut nge ka hre lova, tunhma kha chuanin retailer buhfai lei khawm Aizawla phur thla luk luk hi an tam em em mai thin a ni. Tin, Kerosene-te pawh a ni a, khawnvartuite Aizawl check gate-ah tam tak takte an lo man thin a. Tin, Forest Department lam kaihhnawih Meihawl phurhthlakte pawh kha a tam em em mai thin a, tunah hetiang an awm ta lo ngawt pawh hi 'change' a thleng a ni lawm ni kan ti a, lawmawm ka ti a. Chutih rualin Gas-te pawh tunhma chuan "Saitualah Champhai chan tur an lo ambush leh ta, Khawzawlah an lo la thla alawm maw le" an ti a, Champhai hi kan ro leh tawp zel mai thin a, amaherawhchu, tunah chuan a kalkawng dik tak an thleng ta niin kan hria a, a lawmawm ka ti khawp mai a. Tin, Carrying Bill kan han tih a kha, kan sawi duh leh a chu hei mi tam takin an lo la hleitheih tawh lova, chutih lai chuan engtinng e tiin kan DCSO hnenah kan zawt a, Minister-in a seniority-in a ti e, an lo ti a, Champhai khi kan vannei khawp mai a, DCSO fel tak kan nei a, Ti khian mumal takin felfai takin a sawisel duh tan pawh sawisel hleih theih loh khian carrying bill chung changah hian kan hotu ten hma an la a, khi khi lawmawm ka ti a, ka'n sawi duh nisela. Tin, BUFFACOS chung chang kha kan han sawi leh thin a kan sesion hmasa te khan BUFFACOS chung chang hi chu thu hlui ani tawh a, kan sawi tawh lovang chu maw tiin ngaihtuahna kan siam a, amaherawhchu, sawrkar han thlauhthla tu te khan in an pute thil tih dik lo hi sawi leh hram hi an duh nge maw ni an sawi chhuak leh thin a, nichina kan Member zahawm tak Pu Duha han sawi ang khanin Central atang in a vaibelchhe tel kan dawng ani a, chutah chuan thlali vel chu buhfai isem ang tia a rawt thu te kha Pu Duha khan a rawn sawi a ni a, MNF hun lai khan eng emaw chen chu an sem ani. A dik pawh a dik a, amaherawhchu, Buffacos sum hrim hrim a kha a kal dik lo nasa khawp mai.

RTI hmang a tun May thla chhunga kan han zawh chhuah na ringawtah pawh hianin term hmasa chhung khan kudam ringawt pawh kha 61 sak ani a, tin, an sak that a kha 263 ani bawka, staff quarter kha 36 an sa a, staff quarter 128 repair ang khan a awm bawka ani. Zoram dung leh vangah han kal ila khatianga an kuthnu kha engmah hmantlak a awm lo. Tichuan, Staff quarter an sakna zawng zawngah hian vaibelche li, nuaih sawmkua pahnih, point sawmruk paruk an seng ani. Chu chu Buffacos sum central atang alo luang lut, an mahni theih vang leh fin vang ni hauh lova he lai Mizoram in tampui mitthi kan tawrh avang a kan lo do let na tur a central in an rawn tih ani. Nichinah khan within Aizawl North han tih kha a zau mah mah ani ang tih te kha ka rilruah a awm a, hei buffacos beneficiaries te han en a ka bial Vapar khua ami te ka hmu teuh mai a, mahse, Vapar khi ka tawng lo ngaithla thiam ula, kan hnam pui, kan unau Paihte te deuh vek an ni a, mahse Vapar khua a dawngtu beneficiaries te chu Mizo deuh vek an ni nia maw le. Mizo in khatiang in an daih lo reng reng, phuah chawp ani, a thlawna buhfai sem kan han tih te pawh kha a tak takah chuan buffacos sum kan dawn kha kan hmang tha si lova. Pi Sonia-i alo kal dawn a, Tuipuibari leh Tuithumhnarte pawh a rawn tlawh kha kan la hria in ka ring. Khatia a rawn tlawh dawnah khan in khawng e Buffacos sum kan rawn pek zawng zawng, engtinng e in lo tih? Zoram sawrkar kha awkai takin a awm a, tah chuan kan

hotu ten Zo tlangval kan ni alawm, chhan ngai chu kan chhan ang chu, kan sawrkar ni lo mahse la an ti a, tichuan, Pi Sonia-i khan sum tak tak kha minrawn pe leh ani. Kha kha an theihngihl kahlau a, kha kha an buhfai han sem leh na pawh kha ani tih kha kan sawi leh duh a.

Nichina Pu Duha han sawi ang khan Buffacos-a kan sum dawn zawng zawng kha a sem in sem ta ila cheng singkua theuhin chhungkaw tinin kan chang thei ani. Khalai te kha chu anmahni ho hian in kan pute helaia thu tawh lote thiamlohna lai sawichhuahna remchang anrawn siam leh thin emaw chu aw! ka ti a, han sawi tawh lohte pawh a that teh lul nen ka ti a, tin, khatih laia kan rilrua thilawm fo pakhat a chu Arakana anawm lai khanin kan pu berin a thil sawi pakhat chu, ' roelna kan kutah a awm tawh dawn a, kan hrek riltam anga, an pumpui hnuhah kan chelh ang a, kan duh duhna lamah kan kaihruai tawh mai ang' tih kha a ni thin a ni. Chuvang chuan Zoram mipui kha min ti riltam te te a, kha min tih riltamna atang khan sorkarna kha chhum lo chat lova chhonzawm zel kha an tum a ni, kha lai kha thil pawitakawm niin ka hria a. Tin, hei kan Supply Minister hi engang chiahin nge a buai ka hre lova, term hmasaa kan Supply Minister-te kha chu Mauchar-ah te an va kal a, LSC , VC passed panga min pek loh chuan in khuaah Buhfai arawn lut lo ang, ti ang deuh te khan an va tawng a ni, kan Minister hi chuan a ti ve em lo ang chu maw.

Tin, Forest Department chungchangah khan a pawimawh ka ti khawp mai a, nichina ka ngaipawimawh em em Forest tih chungchangah khan hei Gazette-ah te pawh pek kan han ni a, mahse Pu Duha'n arawn sawi kha ka thlawp tawp mai a, thing kih leh eng emaw chungchang kha chiang deuhin arawn tarlang a. Ram ri kan Sorkar hmasa ten an lo humhalh kha kei chuan tun thleng hian hrehawm tihna ka la nei a. Kan ram tam tak kan chan a, tah khan Zoram mipuite hnenah referendum pawh lo la sela, ram tam tak kan chan a, sikul 34 zet te pawh kan han chan a, khalai a kan hung hnan loh a pawn lam kha kan ta ani lo ti ti lo mah ila a zalen tawh lo a ni, a rah seng tu tur chu leh lam vek anni tawh, kha lai kha kan ram hmangaih tu te hian ram hi an lo hlep thla niin ka hria a, pawika ti khawp mai a, kha lai kha ka ngaimawh te zing ami ani a. Tin, tun Sorkar han danglam lehna riau a chu Forest Department-ah chuan Department work kan uar lo a ni. A hma khan Department work hi kan uar ang reng khawp mai a, a hotuten tlem an tham a lawm tih kha ari ari a, khami an reh ta ringawt pawh hi a lawmawm ka ti.

Tin, Pu Deputy Speaker, sawi tur a tam khawp mai a eng ber hi nge kan sawi ang tih a hriat hleih theih loh chu ani a. Hei Social Welfare Department-ah hian, nia nichin khan Pu Duha khan arawn sawi chiang ang reng khawp mai a, Recruitment Rules chungchang kha arawn sawi a, arawn sawi ang kha a nih chuan tha ka ti mai a. Hei Sorkar a kan Department hrim hrim hi, Department tam tak (hi anmahni ka sawi na nilovin) Department tam tak hi an lo inhung ang reng khawp mai a, a top post ah hian MCS emaw IAS emaw an lokal mai ang tih hlau niawm tak hian lo inhung hi Department tam takah hian a awm a ni. Kha kha Social Welfare hi chu ani lo turah ka ngai a, khatiang a engemaw harsatna a awmlo a nih te kha chuan nichin a Pu Duharawn sawi ang kha chu a tha ka ti khawp mai a. Tin, anni Department hian hei harsatna, wheelchair kan tih ang te, bengdar kan han tih ang chi te, hei kan Minister hian min pe deuh mawlh mawlh mai a, tunah chuan khilam Champhai lamah chuan bengdar hi min chah min chah tawh mai ani, hawn

thei tur riauah min ngai a. Chu chu kan Minister leh a Department-ten min pek thin vang ani a, tunah te pawh hian phone in min rawn ti a, “I rawn haw leh hunah chuan bengdar min rawn hawn ang che” tiin min rawn chah a, kan Minister te pawh kan la dil chho mek zel dawn ani a.

Hei vawiinah hian sawi tur a tam khawp mai. Sports chungchangah hian han kal leh lawk ila, tun Sorkarin a tih fuh deuh ka tih chu veng bikin field kan lo neih tawh te, Sorkar a an han pe lut thin hi ropui ka ti a. A dik tak chuan Mizoram ang economy tha lo hmunah hi chuan Sorkar tello chuan infiamna ani emaw kawng dangah pawh thui tak hi kan tlan thei lo hrim hrim. Hetia veng bikin an lo neih hian Sorkarte leh engemaw events-ah kan va hmang dawn a, tute emaw (an committee te) hnena va dil vel thin hi a buaithlak khawp mai a. Tunah chuan kan Sorkar hnenah pawh LSC te pawh anlo hlan tawp tawp a, tichuan, Sorkarin anlo promote ang a, a hlawkpui tak tak tu chu a veng mipui te tho kha anni. Khalai a kan Minister-in thiam tak mai a hma an la hi lawmawm ka ti khawp mai a, Sorkarin a hmun leh hma a neitu nih na an chang a, tichuan, a hlawkpui tu tur pawh mipuite zawng zawng hi kan lo ni vek mai si a, khalai kha hmun tinah kan veng field te, kan khawtlangin a ram kan lo humhalh ang chi reng rengte pawh hi Sorkarin mipuite tan a a hmanna tur ang chi ah hi chuan mipuite hian rilru ngaihtuah na fim hmangin Sorkarah i hlan zel ngam ila a tha awm mang e tih ka ngaihtuah a. Tin, hei 2006,2007,2008 -2011 thlengin kan sum dinhmun, kan plan, kan non plan ang chi te Sports Department-ah hian kan en kan en a, 2006-07 kan Sorkar hmasaah te kha chuanin nuaih 435 a nih lai te khanin 417-ah te an tla leh rih thin a khatiang kha a ni a, keiniah chuan hei 800-ah te 900-ah te a kang dawrh dawrh mai a, kan Sports lama kan hotupa in kan Chief Minister phurpuina azarah nasa takin hma a sawn niin ka hria a. Sports chungchangah hian sawi tur a tam khawp mai a, ‘lawmna tur hliir a lo ni e’ tih ang deuh kha a ni a, Zoram mipui kan lawm a lammualah “kheldual tha” ti a kan au huk huk laite kha ka rilruah a la cham reng a, khangte kha a ropui ka ti a kan sawi leh duh a ni e.

Tin, Pu Deputy Speaker, sawi tur chu a tam a, hei Department dangte pawh kan la sawi hman chiah lo chu a nia Local Administration Department-ah hian pakhat lehah chuan Champhaiah khian District khawpui kan ni ve a, hmun rem tak mai kan nei a, khilaiah khianin VC Rest House min rawn sak sak thei hram turin kan LAD hotupa pawh kan ngen duh a. Tunah khian, Champhaiah khian kan VC-te khi an tha khawp mai a, nasa taka beihnate han tawh thin mahsela tunah khian kan fihlim angreng khawp mai a, tunah khian party thenkhat hruaitute chuanin kan VC te tih mualpho tumin TV-ah te an han ti a, nasa takin an han ti mualpho va, amaherawhchu, chutih rual chuanin chungte chuanin a Block angin ngaihdam te an in dil kual leh mek a ni a, khangte kha kan sawi duh a, a riva ang mai mai hi chu a ni lo, a tak takah chuan ngaihdam dila tlan kual zar zar pawl te pawh an awm ve bawh a ni. Kan VC-te an tha a, kan lawm a, tuna kan Sorkar tluang taka kan kal chhohnaah hianin kan pu berin a duhna rorelna dik hi khilai tlangah kan lo kalpui ve a, theih ang tawkin, Sorkarin hma a sawn zel theihna turin keimahni theihna ang chi theuhvah hna kan thawk a. Tin, Champhai khi kan vannei khawp mai a, kan department hotute khi theihtawpin an thawk a, nasa takin tun kan Sorkar hnuaiyah hian kan thang chho mek a ni tih kha kan sawi

duh a ni, chu chu ni mai sela. Demand hi a rawn lan ang hian a vaiin lawm takin ka support e.

Pu K. LALRINTHANGA : Pu Deputy Speaker, ka lawm e. Vawiin ni a kan sawiho tur Demand No. 46-na UD&PA atang hian kan tan ang a. Aizawl khawpuiin solar city kan nei tur ringawt mai hi lawmawm ka ti a, cheng nuaih 50 tunah ruahman niin nuaih 13.04 released a lo ni tawh a. Hun reiloteah solar city kan nihna lang chho tur hi ropui ka ti a ni. Thil dang pakhat UD & PA atanga ka rawn sawi leh duh chu Urban Sanitation chungchang hi a ni a, Public Private Partnership (Model) Department in a rawn introduce chhova, veng hrang hrangah Village Council te nena thawk hovin motor an han hmang a. Tun hmaa bawlhhlawh paih motor a rawn kal dawn nge dawn lo tih hre lova kan han nghak a, a changa rawn kal lova, bawlhhlawh uih tak tak kan kawl reng thin a kha a reh chho ta a, tun hunah hian chungte chu Aizawl khawpui ten kan han tangkai pui chho ta hi lawmawm ka ti a ni.

Thildang leh chu economically weaker section te tana Housing Scheme ruahmanah hian hmun tam takah in tam tak sak a ni a, lawmawm ka ti a. Chutih ruala ka han sawi duh chu Kolasib-ah khuan Phase I ah 50 an sa ve a, Phase II 250 tur a ni a, a vaiin 300 lai a ni a. Kolasib Urban area-ah khuan Rengtekawn khu a tel ve a. Amaherawhchu, tute nge a ngaihtuaktu ka hre chiah lova, 'Nangni chu in tel ve lovang' tiin Rengtekawn khu an tel ve lo a ni. Urban an nih theihna tur atana veng mamawh si, housing assistance lo kal huna an tel ve lo hi ka khawngaih deuh a. Chuvangin, hun dangah hetiang remchang te hi a awm leh a nih chuan telh ni ve thei se la a lawmawm hle ang tih ka sawi duh a.

Chutih rual chuan LAD-ah hian han kai chhoh nghal ka duh a, a inhne rem angreng riau a. Hetianga an tel si loh lai khan chuan thil buaithlak a awm a. LAD te hianin hetiang khawpui chung atana Housing scheme tha tak an neih rual hian thingtlanga kan mipui harsa tak takte hi housing loan hi cover deuh zawk ta se tih hi rawt ka duh a. A thei nge theih loh chu ka hre hran lem lova. Enge ni a kalphung ka hre lova. Amaherawhchu, thingtlangah hian IAY te tlem te te, khaw khatah pahnih te an han pe a. Khaw thenkhat chuan an chang lova. Cheng 3500 lek a ni . Anni tan hian a manganthlak a. LAD lampang hian housing loan an semah hian thingtlang hi chang deuh bik ta sela thain ka hria a, chu chu ka rawn tarlang duh a ni.

Social Welfare-ah kan Minister zahawtakin Bilkhawthlirah ICDS Block min dahsak a, lawmawm ka ti a. Hun kal tawhah khan Thingdawl, Kolasib atangin Serlui bial zawng zawng a zuk hmui vek a, harsatna nasa tak mipuiten an tawk a ni. Amaherawhchu, Bilkhawthlirah Block thar min pe a. Chutiang chuan mipuiten an tangkai pui chho hle a. Lawmawm ka ti a, lawmthu ka'n sawi duh a ni.

Demand No. 22-ah Sports and Youth Servicee-ah hian hmalakna nasa tak a awm a. A lar zualte ka Member puiten an rawn sawi tawh kha chu sawi pawh ngaiin ka hre lova. Kan la hriat vak loh thenkhatte hi tarlan a thain ka hria. Kolasib-ah khuan Regional Sport Training Centre, Saidan-ah sak mek a ni a. Hemi atan hian vaibelchhe 4.92 ruahman a ni a. Chutatang chuan vaibelchhe 2.97 sanction tawh a ni a. Hetia sak chhung hian naupang 80 training theihna tur atana ruahman a ni a.

Ruahman a ni chung chuan tunah an training mek a. Chumi training zing atang chuan naupang pahnihte chu Airforce zir turin thlan an niin an kal tawh a. A lawmawm ka ti a, kan Sports Minister hnenah lawmthu ka sawi duh a. Hetiang hian hma la chho zel se thain ka hria a, kan tarlang duh ani. Chubakah chuanin khu Sairangah (hei hi chu a lar deuh hlek a, nichinah te pawh khan zawhna te kha a awm a) information kan dawn atangin han tarlan ve nghal law law thain ka hria a. Khumi cricket stadium siamna atan khuan crore 11.6 ruahman niin, nuai 1013 an lo released reng tawh mai alo ni a. Hun reiloteah Sport Minister hmalak nain cricket ground tha tak kan nei dawn niin ka hria a, lawmawm ka ti a. Tin, Lengpuiah mini-sport stadium complex vaibelchhe khat leh point 88 ruahman niin chutiang chuan hma a la a. Hnahthialah te, SAI Hostel hetah Mission Vengthlangah te ruahman chhoh zel te leh thil dang dang ruahman ani chho hi a vaiin kan sawiseng lo ang a, Zobawkah te sawi teuh tur a awm a, khangah khan lawmthu ka sawi a.

Chutihrial chuan Mizoramah hian tuna kan Chief Minister tha hnemngaihna leh Sport Minister-te nena thawhhona tha tak hnuaiah hianin a hman hman hianin Sport lam tan hi chuan project hi kan siam ta ani awm mange aw ka ti a, hma kan sawn nasa hle a. Kan Minister hian, “I bial tanah i duh ber lo thlang rawh, Field kan laih sak ang che”, te a rawn tia. Kan Chief Minister-in, “Indoor Stadium tur i duhna hmun berah nang project lo siam tir rawh”, te a ti a. Khatiang khanin bial dang te pawn an lo siam nual ani tih ka lo hria a, chutiang chuan sport lampangah hian hma kan sawn chhoin reilo teah a rah kan hmu dawn ani tih kha a lang a, lawmawm ka ti a, kan sawi duh ani.

Food & Civil Supply-ah hian nichinah khan kan han sawi nial nual hlawm a, ka han sawive duh lai chu tianghian chhut thain ka hria a, vaibelchhe 125 kha kan hmuh ani a, khatiang vaibelchhe 125 BAFFACOS atanga kan hmuh rual khan kohhran hrang hrang leh tlawmngaipawl leh Political Party te khan buhfai kha sem a ngai ani. Engatinge sem kan ngaih aw? tiin ti zawng hian ngaihtuah ta ila. Vaibelchhe 125 kha buhfai lei nan hmang ta ila, Kg ah ₹ 20/-in lei ta ila, quintal 625000 kan lei thei ani. Quintal 625000 kan lei thei a, chu chu Mizo buhthar ang zawng in chhut ta ila. Tin, nuai 89,14,285 a tling a, a phur zawng chuanin phur 29,71,426 a tling thei ani. Chuan khami phur kha khaw tinah lo sem ve leh ta ila, Mizoramah hian khaw 700 vel lo awm ta sela, khawkhatin buhphur 4245 kan thar chhuak thei a, kha kha khawkhatah in 50 emaw 100 emaw lo awm ta se. In 50 emaw alo awm chuanin khawkhatah khan, in tinah phur 82 kan thar thei a ni. In 100 a awm chuanin phur 42 kan thar thei a ni. A pangngaia Supply Department atanga buhfai rawn kal nena khang kha han ei ho chu ni ila kan hnianghnar hle ang. Khatiang zawng khan a ngaihtuah theih a. Khatiang tlawmngai pawl te leh kohhrante inrawlh ngailo khan a awm theih a ni tih kha ka tarlang duh a, chu chu nise hun a tawp ta bawk a.

Forests chungchangah hian ka han sawi leh lawk duh chu, a tawp nanah – hmanni khanin kan Minister hi ka han bia a. Hei tunlai in Forest Department in thing lampang an strict a, kan ramah thing a harsa tawh a, chartin tepawh cheng 500 a lo kai chho tawh a. Thing rawn phurtu an man sak a, Minister ka han phone a. Ani chuanin ‘an man tawh hi chu ka inrawlh duhlo’ a ti a ni. Chutiang chuan kan Minister zahawmtak hian thil ti diklo lakah chuan hna a thawk thin a ni tih kha ka sawi duh a. Lawmawm ka ti a. Pu Deputy Speaker, ka lawm e.

DEPUTY SPEAKER : Tunge sawi leh ang? Pu R. Selthuama.

Pu R. SELTHUAMA : Pu Deputy Speaker, ka lawm e. A hmasa berin Demand No. 17 na – Food and Civil Supplies chungchang han sawi ila. I veilama mite khan nichin khan Mautam tam anih lai pawhin buhfai a hnianghnar tih kha an sawi a, a dik khawp mai. Amaherawhchu, sawi tawh ang khan a hnianghnar vek loh avangin Congress thalai pawhin Bhavan-ah khan buhfai te an sem a ni. Tin, Chief Secretary nupui meuh pawh khan Josepha buhzem tepawh kha a siam a. Sorkar khan hnianghnar tak chuan sem sela kha kha chu ngailo awm tak a nia, khangte kha an theihngihl ta em niang aw ka ti a.

Tin, chubakah chuan Mizoramin Mautam Tam kan tuar a, 1959-ah kan tuar a, District Council hunlai in. Chutih lai pawh chuan Tampui mitthi an awmlo a ni, loan te an la a, chutiang chuan keini pawhin kan hre ve phak a, kan tlangval ve tawh a. Tichuan, kan han tuar leh a, 2006/2007 chhovah, tahchuan Central Sorkarin tanpuina arawn pe a, BAFFACOS tih hmingpuin, helam atanga proposal an zuk siam angin crore 125 an pe a. Kan Annual Plan bakah crore 125 a an rawn tanpui chuan, nichina an sawi tawh ang khan buhfai-ah hi chuan hnianghnar tak tur kan ni. Chuvang chuan, khatiang khawpa Central Sorkarin an rawn puih pawha kan la hnianghnar ta lo anih chuan a Sorkar nih kha a zahthlak viau tur a ni a. Chuvang chuan, Central Sorkar hi an fel a, min rawn tanpui thin hi a lawmawm a ni tih ka'n sawitel duh a.

Tichuan, Sorkar thar a lo piang ta a, 'change' a awm ang tiin kan sawi thin a. Kan sawi ang ngei chuan kan Minister feltak hian hna uluk takin a thawk a, a thiltih reng rengah ri phut phut lovin, mahse rinawm takin, tha takin a thawk a. Chuvang chuan, Carrying Contractor hovina an pawisa lak thinte pawh a thei thei leh a chuhhelh helh tena la mai lovin a indawtin, a seniority-in an kalpui ta a. Tunah hian hmanlai anga inchuhbuai awm tawh lovin an hunah a sakalin a lo thleng ve tawh a. Hengte hi 'change' ropui tak a ni. Amaherawhchu, kan duh ang tawk erawh chuan kan hniang hnar lo deuhva. Chuvang chuan kan Minister zahawmtak hi a Demand te hi pass pui mai bakah hian pek belh theih te chu nisela a lawmawm awm mange aw ka ti nghe nghe a ni.

Tin, kan hriat angin hei Gas-ah te hian kan harsa khat a, amaherawhchu, engemaw hun laia zan khaw tairek thleng thleng a tlaivar a, intlar te kha tunah hi chuan a awm lova. Chuti chung chuan kan la awlsam lo a ni. Mahse, kan Minister zahawmtak hian hma a la a, kuminah ringawt pawh khan Connection thar pawh kha singruk emaw vel lai kha an pek belh a. Tin, chubakah khan agency pawh kha thahnem tawk tak kha an siam belh a ni. Amaherawhchu, tuna Aizawl khawpuiah hian bial bik nei hian an han siam a, hei hi a tha ber em chu ka hre lova. Keini bial angah te saw chuan kuminah hian January ni 28-ah khan kan dawng a, tichuan, February ni 28-ah kan dawng leh a, March thla chhungin kan dawng lova, April ni 5-ah kan dawng a May ni 16-ah kan dawng leh a, tin June ni 15-ah kan dawng leh a ni. Thla khatah vawi khat kan dawng a, chu chu bur khat ani a. Hei aia tam deuh hlek hianin a agency te hianin min han tih sak thei sela, kan Minister zahawmtak hianin a lo nawr theih dan deuh te hi a awm emaw ka ti a. Tin, a nih loh chuan a Agency te pawh hi inchak hleih deuh te pawh hi a awm ve theih a. Bial khat ngawr ngawr nilova, bial bik nei lova,

intawm ang deuhva an kal te pawh kha a tha thei zawk awm mang e aw tih te pawh ka rilruah a awm deuh a. Chutiang zawngte pawh chuan min lo ngaihtuah sak thei sela. Keini lam min bialtute saw an la thar nge ni an la harsa deuh ka hre lova, amaherawhchu, thla khata bur khat ringawt mai hi chu tu chhungkua tan pawh a harsa a ni tih hi a lang a. Chuvang chuan hei aia hnianghnar deuhhleka a awm theih dan erawhchu min lo ngaihtuah pui thei sela a thain ka ring a. Amaherawhchu, a tlangpuithuah chuti lutuka harsa chu kan ni lem love, a bik takin engemaw harsa zual chuanin special in kan dil thei tho a, tih kha ka'n sawi duh a. A tlangpuithuah erawh chuan hma min lo lak sak ta sela, agency te hi, sorkar lam hian min lo nawr pui thei deuh sela a lawmawm awm mang e aw ka'n ti a. Chu chu ka rawn ngen duh pakhat a ni.

Tichuan, a pahnihnaah chuan Environment & Forests-ah hian, hei Mizoram chhunga ka han zin chhuah ve te hian ka hawi ka hawi ve thin a, tunhma lam kha chuan Mizoram te hi Ngaw a nih loh pawhin Mau a awm ve chuk thin a ni. Mahse, Mautam a vang hian tunah hi chuan Mau hmuh tur hi a tlem ta hle a, a hak an tih ang chi te pawh kha a tam lo a ni. Mau tam a han reh tawh naa hei kum hnih/kum thum a liam tawh a, chutichung pawh chuan Mau hi a vang ta hle mai a, hetiang anga kan kal zel a, tin, Bazarah te hian Mau tuai te hi duh ang tawka lei tur a awm reng hi chuan Mizoram hian Mau hi kan tlachham mai awm mang e aw tih ka ngaihtuah a. Chuvang chuanin kan sum hnar tha tak mai Mau hi engtingnge kan humhalh theih ang tih hi ngaihtuah tulin ka hria a. NLUP hnuaiyah chhungkua 1405 in mau hmun siam an thlang ve a. Tichuan, Forest Department hian an enkawl a, an enkawl chhunah hi chuan an la ti tha khawp mai a. Tuizem te pawh an pe tawh a, 1st leh 2nd installment te an pe tawh a. Engangin nge an din chhuahpui dawn chu kan hre lo na a, heng hote hian an din chhuah pui theih chuan a zia awm deuh ang. Nakum lama NLUP kan han tih leh te pawh in chhungkaw tam zawk hian thlang thei ta ang selangin Mizoram tan a tha ang a, kan sum hnar tha tak te pawh ani angem aw tih hi ka ngaihtuah a. Chuvang chuan, Department lam te pawh hian mau that leh tangkai zia thingtlang lam mi te pawh hi tun aia uluk zawk hian lo zirtir thei ta sela a tha ngawt in ka ring. Chung te chu kan sawi tel ve duh a.

Tin, a bik takin Aizawl khawpuiah NLUP hnuaiyah hian Agarbati stick siam hi thlang an tam em em mai a. Tunah hian a khawl te pawh han pe ta ila, mau hi a supply hnianghnar a hmuh tur a awm dawn lo niin a lang. Chuvang chuan mau hi kan chin uar a tha awm mang e ka ti a. Tin, a bik takin tun kum 2/3 chhung hi chu mautuai/rawtuai vel hi kan Forest Department lam hian bazaar a zuar te hi man thei deuh ta sela, hei hi a humhalhna tha ani mai awm mang e aw, kan ti a. Chutiang ang te chu lo ngaihtuah turin helaiah hian ka'n ngen nghal duh ani, kan Minister zahawmtak hi.

DEPUTY SPEAKER : Minute 5 khi kan hun tawp na tur a ni a, kan pek belh mai ang che, khiti lai khi.

Pu R. SELTHUAMA, MLA : Tichuan, hun a kal duak duak a. Pu Deputy Speaker, ka'n sawi leh duh chu Urban Development and Poverty Alleviation tih hi ani a. Anni hi, kan Minister zahawmtak hi a kum lamah te ala

naupangin a viak a tha a. Chuvang chuan an hmalak na hi a tha hle in ka hria. A bik takin bawlhhlawh paih chungchangah hian tute mah kan mawhpuh chuang lova, a hma a UD&PA in an lak hma khan kar khatah vawi hnih te kan veng angah sawn an lo kal a, chung pawh chu an paih tha viau in kan hria a. Amaherawhchu, Minister thar fel tak maiin hma an la a, chutah chuan PPP mode in an han ti ta a. Tunah hian kar khatah vawi 3 bawlhhlawh paih an lo kal ta ziah a, a hma ai kha chuan kan fai ta a. Bawlhhlawh lo tiang khawm nghuk te kha a awm ta lova. Keini kan inbulah sawn a remchang deuh nge ni, a hma kha chuan tlem a han hla deuh kawngpui bul lo ami te chuan buara te hian anrawn dah khawm a, a lo kal hun tura alo kal loh thut phei chuan ni khat lek pawh nise bawlhhlawh hi a vum tham fe mai thin a. Amaherawhchu tunah chuan kar khat a vawi 3 alo kal tawh avangin khatiang te kha a a wm ta lova, kan khawpui hi a thianghlim sawt hle hian ka hria a. Heng te hi hmalakna tha, 'change' a thleng ang kan tih tunah hian kan Minister zahawmtak hian arawn thlen tir ta niin ka hria, lawmawm ka ti khawp mai. Tin, BSUP hnuaiah mirethei insak te pawh kan sorkar hmasa khan an lo tan a, sawng kan bialah te pawh Lawipuah sawn an tan tawh a, MLA kan tlin tirh khan kei pawh ka zu kal a, hma an la tha khawp mai a, amaherawhchu, kum hnih a kal ta a hmalakna a chak lova, kum thum a ral hi chuan a tih tur ang ang te zo thei se, Aizawl khawpui chhungah miharsa tam takten an luah thei turin hma min lak sak turin kan ngen duh a ni.

Tin, IHDP hnuaiah mirethei in te an sa a, chung an sak chu kan Minister leh Pu Deputy Speaker, i ho khan Mamit ah khan kan kal a, khang te kha a tha hle mai a. In neitute pawh an lawm em em mai a ni. Khatiang ang thil tha kha chhonzawm zel se a thain ka ring a ni. Tin, minor works te pawh an nei a kuminah te pawh hian nuai 65 bawr vel an nei niin ka hria a ni. Tichuan nikum hmasa khan UD & PA hnuaiah te kan bial chhunga sum kan hmuhna tur (ka hre sual a nih loh chuan member ZS Zuala bial te pawh hi an ni a) a lapse avangin hnathawh tur kha engemawzat thawh lohvin a awm ta a ni. Kan veng chhung leh kan bialah te chuan han thawk sela chuan kan sorkar hun chhungin chhuanawm tham kha a awm dawn a. Chuvang chuan minor works a an pawisa neih atang te hian lapse avanga an thawh loh te kha min thawh sak thei ang em? Min thawh sak thei se tih kha kan ngen leh duh a ni.

Tin, Sports-ah hian Mualpuiah Rajiv Gandhi Stadium bul tan kan nei a, kan zo tep tawh a. Annual Plan-ah crore 15 dah belh a ni a, i veilam ami te khan thil dangah hman theih nise an ti a. 12th Finance Commission in crore 25 a pek khan a bul lo tan tawh se chuan 13th Finance Commission khan min pek belh mai tur a nia. Crore 15 pawh dah belh a ni ta zawk a, an zo thei lo anih chuan hmundanga atangin tan an la thei dawn a ni. Ka bial chhungah sawn a bik takin Pu Zoliana te thahnemngaihna in field zau tak mai Lawipuah an lai a. Saw saw sum tam tak seng lovin a zawh theih a, saw saw min han zawh sak se chuan North East sport te pawh lo thleng dawn ta ila Football ground pawh kan neih phah ang. Pawisa tlem seng a zawh mai theih a ni a, kan Minister hian hma min lak sak thei se ka ti khawp mai. Hla tak tak atang sawn anrawn in khel thin a, bial dang pawhin an tangkai pui em em dawn a ni. Awle chu zawng chu ka sawi duh chu a ni e, ka lawm e.

4:00 P.M.

DEPUTY SPEAKER : Sawihona kan chhonzawm leh ang a member 16-in in sawi tawh a, tunge sawi leh tur leh, sawi tur in awm tawh loh chuan Minister-te ka sawm tawh mai dawn em ni.

Pu JOSEPH LALHIMPUA : Pu Deputy Speaker ka lawm e. Minister 3 an hna enkawl sum hman dan tur vawiin niah kan sawi hova, an Demand hi ka support ani tih kan sawi hmasa duh a ni. Ka ngaih pawimawh thil thenkhat han tarlan ka duh a. Sport-ah hian thil pahnih lek ka sawi duh chu, Lungleia Thuamluaia mualah Artificial Turf min phah sak dawn a kan Minister hian, nikum Lunglei District Football in elna (tournament)-ah kan CM-in min puan sak tawh a, vawin niah hian kan CM leh Minister te hnenah lawmthu ka sawi a ni. Mipui leh thalai an lawm hle a, chutih lai chuan Pu Deputy Speaker, ka'n tarlan duh chu hmanni deuh khan chanchinbuah Lunglei Dist. MNF a Sub-Headquarter-a an General Secretary-in zoram mipui zawng zawng an lawm dawn emaw kan tih laiin Thuamluaia mualah hian Artificial Turf phah a tul em ni? Inkhawmpui leh thildangah kan hmang duh dawn si a, tih kha chanchinbuah a rawn ziaka ka rilru a tina khawp mai a. Chutih laiin Lunglei District Sports Council leh Football Association te chuan hmanna ka va kal pawh khan hun chep tak karah an resolution te, an lawmthu sawina te min lo hlan a ni. Lunglei chanchinbu chuan opinion poll a buatsaih a, chutah chuan mi 446 in sms in an chhang a, mi 23 chiahin phah an duh lo a ni. A hnuah an sawi fiahnaah chuan Congress Sorkar hna thawh chak tak mai hi nasa takin Lunglei thalai 443 laiin min support a ni tih a chiang hle a ni. Chutih lai chuan hmasawnnain a thlawh khum pawh pawl ti lo Lunglei District-ah sawn mi 23 an la awm ve a ni tih kha a tarlang a ni.

“Sport Department lama awm chi pawh a ni love, Social Welfare Deptt., lama awm chi ani e” an ti a. Engngeni Social Welfare lampang hian an enkawl ka hre chiah lova, enkawl inthlakthleng deuh te pawh a ngai a ni mai thei. Engpawh nisela, a bik takin Lunglei thalaite leh mipui kan lawm hle ani tih he House zahawm takah hian nangmah kaltlangin Zoram mipui hnenah ka sawiduh a ni.

Tin, pahnihnaah chuan ‘Catch Them Young’ chungchangah foreigner coach tha tak takte kan Minister zahawmtakin chahchhuakin a ruai a, a lawmawm hle in ka hria a. Lunglei-ah sawn Serkawn a kan veteran pakhat Pu K.Kailiana chuan kan sorkar hlim te khan tihian min hrilh a. Ani saw Industry Officer retired a ni a. Badminton-ahte pawh rampum huapah te pawh lo khel ve thin a ni a. Kum 20 kal ta vela India ram Sub-junior-ah Lunglei tlangvalte Badminton-ah an zuk champion khan an thiam khawp mai a. amaherawhchu, an khelh dan an entawn a, thla 2 thla 3 hnuah chuan anmahni khel tawk thei kha an awm leh mai a ni. Mizoramah pawh hian Football team tha tak tak te India ram Club tha tak taka khel te an awm a. An rawn chhuak a, an tih dan kha thalaite hian an entawn a, anmahni khel phak an awm mai a ni. Chuvangin hmasawanna tak tak nei tur chuan khawvel huap a coach pangngai, mi tha kan rawih a ngai a ni. Chutiang anih loh chuan kan hria a, Football Tournament pawh kan Health Minister hmalakna in buatsaih a ni a. Aizawl leh thingtlang kilkhawr tak In 100 khua lek te kha an danglam chuang lo reng reng a ni. An inhneh chhawk an inhneh chhawk a. Chuvangin hmasawanna liantham nei tur chuan coach tha neih a ngai

a ni tiin min hrilh a. Vawiinah kan Sport Minister zahawmtakin chutiang kawng zawng chuan hmalakna a tak takin a han kalpui a, nichinah kan Member zahawm tak tak ten an sawi a. India ramah pawh Medall tam tak, India ram bakah khawvel hmundang atangte pawhin kan dawng anih kha. A lawmawm hle in ka hria a, kan han tarlang duh a. Tin, ka bial chhung Zobawkah State Academy, ka hriat dan hi a sual lo in ka hria a. Nakinah kan Minister zahawmtakin a wind-up naah minrawn sawifiah sak sela. Kan sorkar hnuah khan PWD a kan engineer te nen a hmunah kan kal a. Survey an nei a nileng lengin karhnih/karthum an va kal a ni. Member zahawmtak khan sorkar hmasaa bul tan tih kha arawn sawi a, mipuite hian thuchiang an hriat a tha in ka ring a. Keini ngaihdanah chuan kan sorkar hnu a bul tan niin kan ngai a. Hei hi thuchiang hrilh bakah hna hi pawisa pawh minrawn pe tawh niin ka hria a, tan thuai theih nisela ka duh khawp mai a. Kan Minister zahawmtak kan ngen a.

Tin, Demand No. 48 hi kan tarlang tam lo hlein ka hria a. He House zahawm takah Member naupang ber nih manah thalaite tan hei hi a pawimawhin ka hria a, Information & Communication Technology hi. Kan ram thalai tam tak hemi kawngah mahni ram tan mai pawh ni lovin India ram pawnah te pawh hnathawk thei tura chherchhuaktu tur anni a. Hmalakna lianpui pui ruahmanna a awm mekin ka hria a. Nimahsela vawiinah hian ala rah chhuak lo nge, a la hmin chiah lo nge ni thahnemngaihna kawngah hei hi nasa lehzualin hma la sela. Kan thalaite tan hian Information technology lamah rah duhawm tak a chhuah thuai hi ka nghakhlel khawp mai a. Hmalakna kal mek te pawh a awm phei chuan a wind-up naah kan Minister zahawmtakin min han tarlang sak sela ka duh a. Tin, chutih rual chuan Infotech chungchang te, Education Demand kan sawi lain kan sawi a. Information & Communication Technology hi Education Department nen hian tanho dan zawng sela ka duh khawp mai a. Pu Deputy Speaker, High School-ah a ni emaw, Higher Secondary School-ah a ni emaw, College-ah a ni emaw hemi kawngah hian engtinngah zirna sikulah zirlai naupang te, thalaite hnenah hemi kawngah hian tanpui thei turin hma lak theih a nih ang tih kha, kawng dap theih a nih chuan ka lawm viau ang a. Ka sawi ang khan thalaite aiawhin naupang ber ka nih manah ka han tarlang a ni.

Tin, Pu Deputy Speaker, Demand No.46-na UD&PA Department-ah hian sawi tur ka ngah khawp mai a. A bikin hei kan hotuten kan Sorkarah Lunglei District enkawlina kawngah mawhpurhna min pekna kawngah ka rilru pawh hian ka concentrate deuh hlek a lo ni bawka a. MST Station kan dilna hmunah convention centre vaibelchhe 18 chuang laia sak tur min ruahman sak a, UD&PA Minister-in, engemawzat Central Sorkarin minrawn pe tawh niin ka hria a. Hei hi engtikah nge hma kan lak tan theih ang, tuna a dinhmun te, kan nghakhlel hle a ni tih ka han sawi a.

Tin, Sorkar hmasa hunah khan NGO hrang hrang meeting-a telve ka nih avangin kan buaipui luai luai thin chu Shopping Centre a ni a. Hmanniah kan Chief Minister zahawmtak leh kan UD & PA Minister zahawmtak hmalaknain Lungleiah Shopping Centre sakna tur min ruahman sak a. Hei hi Delhi lamah te pawh an thawn thla tawh niin ka hria a. Vawiinah hian Lunglei khaw mipui aiawh pawhin lawmthu ka han saawi a.

Pu Deputy Speaker, bangthlang thiat a bangchhak pin kha kan District-ah sawn kan experience tlat mai a. Sorkar hmasaah khan Central

Sorkar khan EWS Housing Scheme hmangin miharsate chenna in nei mumal lo, nei thalo te, chhungkaw 500 tan sanction minrawn pe a. Chhungkaw 200 tan chiah khan min pe a, 300 chu hmun dangah ti mai ang, District pawnah an duhna hmunah min dah sak ta a ni. Vanneihthlak takin an lo la hnatlang hman lo hlauh mai a, Sorkarna kan chang a. Kan Sorkar hnu thlahnih lek chhung khan kan hotu, kan Chief Minister zahawmtak leh kan UD & PA Minister zahawmtakin khang bangthlang an thiah tawhna zawng zawng a tam zawka kha min thawmphui sak leh a ni. Tunah hian Lunglei khawpui chhungah miharsa, mirethei chenna in neilote sak sakna turin mi 500 tan pawisa min han pe ta a. Mi tam takin tunah sawn an sa a, an luah tawh a. Thenkhatte phei chuan hei min lo luahpui rawh, min lo tlawh ngei ngei rawh te an ti a. Pathian zarah kan dam ang a, session zawh te chuan kan va tlawh turah pawh ka ngai a. Tah hian bangthlang sahthlak a, thiat a, bangchhak pin tih kha experience kan lo nei tawh a. Kan Sorkarah hian an thiah tawhte kha min pin sak leh a ni tih kha ka sawi a, lawmthu ka sawi a ni.

A tawp berah chuan Aizawl khawpui lo thianghlim tawh zia, lo fai tawh zia hi a chhunga chengte hian kan hre tam tawk lo ang tih ka hlau a. Hemi kawngah hian Minister emaw, kan Sorkar Officer-te emaw hian nitin damchhung atan an thawk reng thei lo. Mipuite inzirtir a ngaiin ka hria a, hei PPP mode-in bawlhhlawh leh sulhnu pawr deuh paihin nitin hmun tam takah Motor tam tak a tlan a. Amaherawhchu, hmun tam takah hian tlaiah te, zanahteh, tlaithimah te ka kal a, Bawlhhlawh Motor lo tlan hma hian bawlhhlawh paihna hmun tur nilovah, (nichina Member zahawmtakten an sawi ang khan) bawlhhlawh lo chheh lailaw engemawzat a lo awm thin niin ka hria a. Hei hi Sorkar thiamloh nilovin mipuite hian hemi kawngah hian kan Sorkar hmalakna hi tun aia nasa zawka kan support, kan thlawp a pawimawhin ka hria. PPP Mode hmanga mipui ten mawhphurhna neia thianghlimna kalpui ani hi lawmawm ka ti a, sum leh pai engemawzat sen nimahsela kan Minister huaisen tak hmalaknaah lawmthu ka sawi a, Lungleiah min tih sak ve thei angemaw tih kha kan ngen ve bawka a.

Pu Dy. Speaker, a tawp berna atan chuan langtlang sorkar LAD-ah Demand No. 19 naah kan hmuin ka hria a a lawmawm hle a ni. Session kan neih hmasak berah kan Chief Minister-in “langtlang sorkar kan siam ang” a ti a. 13th Finance Commission atangin Village Council-te pawisa hman tur cheng vaibelchhe engemawzat ruahman a ni, chung an ruahman zawng zawng leh an hmuh tur zawng zawng vawiinniah he House zahawmtakah hian member zawng zawng ten an hmuh zat tur nen min han pe vek mai te hi lawmawm ka ti a. Chung atang chuan a bialtu MLA te hian kan bial chhunga V/C te nen eng hmalakna nge kan neih ang? Eng hna nge kan thawh ang? An hmalakna hi an pawisa an hmang dik em? tih te hi kan en velethei a ni. Chuvangin kan LAD Minister zahawmtak hmalakna leh kan sorkar hmel lanna, langtlang sorkar hi vawiinniah hian kan hotute hian an la chhawm nung zel niin ka hria a, chu chu Demand support pahin lawmthu kan sawi a ni, ka lawme, Pu Dy. Speaker.

DEPUTY SPEAKER : Sawi duh kan la awm em le, kan awm tawh lo maw? Aw, ti leh hram ang Pu Ramhluna.

Pu C. RAMHLUNA : Hei vawiinah Demand pathum, Minister pathumte Demand kan sawiho a, a lawmawm hle a, demand pawh a tha a.

A hmasa bera ka sawi duh chu Demand No. 46 UD&PA hi a ni a, hetah hian Pu Dy. Speaker sawi duh nachhan ka nei a, Friday-a ka thusawiah khan dawt sawi anga puh ka ni a, kha kha han insawifiah tulin ka hria a, chumi avang chuan han din hi ka duh a, khamiah khan thil sawi fuh loh deuh ka nei emaw ni aw ka tia, kan en let leh a, Construction of RCC culvert on internal road at Salem Veng tih chungchang thuah khan beih ka tawk a, Chanchinbuah khan a lo chhuak a, dawt sawi anga puh ka ni a. Hna kan thawk a, a bo angina a sawi a, MLA si in hetiang a thil a sawi hi, thil Chiang lova a sawi hi a tha lo a ni, a mualpho thlak ani tih ang lampang khan mi rawn charged a. Kei khanin ava pawh awm ve ka tia, hrehawm pawh ka ti viau nghe nghe a. Tichuan, chanchinbu a lo lang kha PWD hote ka zawt a, hei hi culvert ani thei em ka tia, “Culvert a nilo kha kha chu bridge anih kha” tih kha min chhanna ani a. E heu, chuti chu culvert zawnga kan lo zawn kha kan lo tvisual ani maw ka ti a, tukin zingah ka zu kal nghe nghe a, culvert chu a lo awm lo ngei reng a, bridge chu tha takin an lo dawh tih kha ka hria a. Hei hi an culvert lo dawh a chu a ni a, Pu Dy. Speaker, that chu a tha e, mahse culvert a nilo tlat a ni, hei hi chu bridge ani a. Culvert chu hei hi ani ta a, hei hi culvert dik tak chu a ni, hei hi bridge ani a. Chuvang chuan keini chuan culvert kan zawng a, anni chuan bridge an lo dawh a chuvang chuan vawiinniah hian kei chuan dawt ka sawiin ka hre lo tlat a ni. Chuvang chuan Pu Dy. Speaker, UD & PA in culvert anga an sawi, bridge thlalak hi House property atan ka pe duh tlat a ni, min lo dawn sak la, a thain ka hria a, vawiinah hian Mizoram mipuiin a dawt sawia minpuh hi dawt sawi niin ka inhre lo a, an Lei dawh erawh chu a tha viau, a lawmawm pawh ka ti a, mahsela khatiang anga diklo taka in puhna erawh kha chu awm tawh lo sela thain ka hria a. An work order anga thawk niselang chuan kan buaiin ka ringlo a, Department-ah engemaw tia remchang zawk ni a anlo rin anvanga an lo siama kha, a work order copy tal kha siam tha leh ta nisela, ‘Construction of RCC bridge’ tih ni selang chuan kan buai miahin ka ringlo a ni. Chuvangin RCC culvert-a kha chu abo niin ka ringa, bridge erawh chu a awm e, tih kha vawiinah hian kan sawi duh a, chu chu ahma lama han sawi ka duh a ni. Tin, khatiang chiah kha ani ka sawi ni.

Tin, adang kan sawi leh duh chu vawiinah hian Pu Dy. Speaker, Urban Local Body, Local Council inthlan a kha hmanni ah khan Commissioner te nen State sawrkar kha an indawra, inthlan tir tur ni khan sawina kha awmin ka hria a. Municipality Rules enta ila Rule No – 15 ah khan Municipal Council kha anmahni khan State Election Commissioner te nen khan indawra inthlan tir theihna kha an nei a ni tih hi vawiinah ka sawi duh a, kha kha State sawrkar khan an mahni thuneihnaah la lehin State Election Commission kha anlo contact a nih chuan, Dan an bawhchhia a ni tih kha vawiinah hian ka sawi duh a ni, Rules No – 15 ah khan a Chiang em em a, an mahni pawh khan anlo dissolve tawh a, tichuan State Election Commission pawh kha anlo dawr tawh a ni a, mahse kha kha a ni a, chuvangchuan Election Commission, Local Council ho in anlo tih ang khan kalpui theih nise a va tha e tih kha vawiinah hian kan sawi duh a.

DEPUTY SPEAKER : Khati lam kha chu duhtawk la, Demand lamah inher rawh le.

Pu C.RAMHLUNA : Pu Dy. Speaker, Food & Civil Supplies, Demand No – 17 ah hian han sawi ta ilar, tun hma ai chuan buhfai hi a improve viau niin ka hria a, a lawmawm ka ti a. Keini ang thingtlang bialho tan pawh, vawiinah hi chuanin thla a muang deuh hlek tain ka hria a, Minister pawh a chungah lawmthu ka sawi a. Chutih rual chuan buhfai hi tunlai hlo thlawh hun laiah hi chuanin per head-ah hian 3 kgs talin pek theih ni sela, tih hi ka van duh e, a chhan chu thingtlang ho tan chuan 2 Kgs ringawt hi chu kham ngaihna awmin ka hrelo. Chu chu vawiin a Demand-ah hian ka han ngen sak duh a, chu bakah chuan ka sawi leh duh chu hman atangin ka sawi tawh a, Minister hianin nin pawh a ning maithei a, vawiinah hianin head load pawisa hi “kan lo ngaihtuah ang e” an tih thin kha, pek ala ni talo tlat mai hi, hei hi chu hrehawm ka ti angreng khawp mai a, minlo ensak leh hram sela. Tin, Chini hi kan bial chung thingtlang bialah chuan an hmulo a ni ber mai e. Dikchiah chuan thla khatah vawi khat te emaw, vawi hnih te emaw, 1 kg te maw, 2 kg ten an sema, helai hi khawngaih takin minlo ensak leh sela a thain ka hria. Tin, Carrying Bill hi a dah tam theih deuh lawm maw ni aw, tih te ka ngaihtuah a ni.

Tin, Demand No – 36 ah khan han sawi leh ta ilar, Environment & Forest chungchangah khan, hei kan member zahawmtak Pu Lalduhawma hi ka fak riau a, Forest hi a ngai pawimawh em em maia. Tuna ka rilrua awm chu hei 13th Finance Commission in pawisa tam tak an nei a. Working Scheme leh Working Plan siam chak a nih loh chuan 13th Finance Commission pawisa pawh hi release harsat chang a awm dawn a. Chu chu tunah hian chak deuh zawka an kal a tha lawm ni? tih te ka ngaihtuah a. Tin, ka rilru a awm pakhat leh chu, Session hmasa pawh khan ka sawi tawh nghe nghe a. Forest Teak Plantation hi khi lai Tuirial kam chho zawng zawnga mi te khi a fai duak tawh mai a, tunah chuan. Khelmual ang maiin a fai tawh mai a. Khing lai te khi engzat nge maw an lo hman tak a, engzat nge ni an dispose tak tih te pawh hi hriat a chakawm riauin ka hria a. Khi lai khi tha deuh hleka enkawl a, phun belh te pawh hi a tul lo’ m maw ni aw? ka ti a.

Tin, Pu Deputy Speaker, thil pakhat ka’n sawi leh duh chu, EWS, Economically Weaker Section ho hianin Champhaiah khianin In leh lo te an han nei ve a, in an sak dawn hian mi thiltitheih tak mi pakhat hnen atang khian thing lei a ngai deuh fo mai a. “To deuh hlek a lei te a ngai e”, an ti a. Chu chu report kan dawng a, telephone te in. Hei hi, Pu Deputy Speaker, kan minister zahawmtak hian min lo en sak sela, tunge maw ni aw? tih te kan hre si lova, keini chuan tih te kha ka ngaihtuah a. Tin, a dang lehah chuan R.O transfer chung chang thua clip 2, 3 han tih vel te kha awm deuh khan ka hria a. Min tih chhan a maw ni aw te ka ti a. PCCF te kan lo ni ve tawh thin avang khan. Khatiang kha chu a awm lo a ni tih kha helaiah pawh hian kan sawi ve duh hrim hrim a ni.

Tin, a dang lehah chuan Sport & Youth Services ah hian, hei Lawn, grass kan phah a, a lawmawm em em a. Thil pakhat ka rilrua awm erawh chu, Artificial grass-ah hian field and track events hi rin aiin tih a harsa viau awm mang e aw, tih te ka ngaihtuah a. Mi tam tak sawi dan pawh a ni ve tho mai a. Chuvang chuan hetiang Artificial grass ni lo hian natural grass te hi phah dan a awm lo’ m ni? A tlawm te pawh hi a tlawm zawk mai awm si a. Khung Kolkata velah te pawh

khuan zu lei mai tur, a tel a phah mai tur te hi a awm si a. Khami khan field and track event leh thil dang te pawh kha a take care thei awm si a, tih te ka rilruah a awm a.

Pu Deputy Speaker, thil pakhat ka'n sawi leh duh chu, hei, Social Welfare Department-ah hian thil pakhat ka'n demand duh a. District Social Welfare Officer hi Lawngtlai hian nei ve thei ila, tih te hi ka duh khawp mai a. A chhan chu tunah hian Saihaah kan nei a, Saihaa DSWO hianin duh angin min enkawl hman lo deuh niin ka hria a. Chuvang chuan DSWO hi Lawngtlai lamah hian min dah sak ve thei se, tih kha ka rilru ah a awm deuh a. Chu chu ka'n sawi duh a.

Tin, LAD-ah hian thil pakhat ka'n sawi leh duh chu hei hi a ni a. Tuna NLUP-ah hian VC ho te hi ram pek theihna thuneihna pek an ni nia hriatna ka nei a. A dik emaw ka hre lo, kan hriat ve theih chhunah chuan chu chu nia, kha kha a hmasa lamah pawh khan NLUP hlawhchhamna pakhat a ni tlatin ka hria a. Chuvang chuan hemi ram pek chungchang hi V.C. te kutah ringawt hian in nghat lo se a tha lawm maw ni aw ka ti a. Tin, ram nei hi Mizoram-ah hian kan tam tawh em em mai a, thingtlangah pawh hianin ram hi pahnih/pathum nei lo hi an awm tawh mang lo a ni. Chuvang chuan he NLUP-ah hian an ram neihsa hi hmang tangkai thiam sela, a tha in ka hria a. NLUP apex board emaw, tute pawh ni ta ang nise, khang ho khan a ram hi a pawimawh lai ber lai chu a ni a, chuvang chuan khalaiyah khan V.C.-te kuta dah ringawt lo deuh khan entir thiam sela, tin, chubakah chuan an thil chin tur te kha, kha rama kha a inmil em, mil lo em tih te pawh kha en sela, a tha in ka hria a. Chu chu vawiinah hian tha in ka hria a Pu Deputy Speaker, kan sawi duh a ni e, ka sawi theih tawk ni mai sela, ka lawm e.

Col. Z.S. ZUALA : Pu Deputy Speaker, ka lawm e. Nichina kan MLA zahawmtakin a rawn sawi UD & PA atanga han tan kha ka duh a. Hmanni a a thusawi zul zui a chanchinbua an rawn chhuah kha sawi ka duh a. Khuti laia 'an hna hmuh tur a awm lo' tih ang zawnga a sawi kha Local Council-te khan an rawn react a, hemi an work order te pawh hi kan en pui a, kan hmuh danah chuanin Culvert tih a ni a. Slap culvert ang a ni mai a, henge pawh hi an zawn dawn te hianin a work order-a an supervisor-te pawh zawt se chu engmah buaina hi awm tur a ni lova. Anni Local Council ngaihdan kha chuan culvert an siam a ni mai a. Mahse kha kha Bridge a ni e an tih kha chuan a ni mai a, anni ah kha chuan culvert anga ngaih thlap kha a nia. Kha kha min lo hriat sak dawn nia.

UP & PA hnaah hian hei hi work order an hmuh dan anga sawi kha a ni a, tin, nichinah khanin Pu Thlenga, kan member zahawm tak khan nuai thum leh a chanve Pu John Siamkunga in bula mi tih kha Damveng a mi a ni a, hna pawh an la thawk lova, hmuh tur a la awm lova. Khungte pawh khu kan bial chhunga mi a ni a, a zawh tur tak zawt se an hrilh mai ang, hetah pawh hian Local Council hi an awm a, tunge an zuk zawh hi, hriat tum hian an zawt lo emaw ni chu aw ka ti. Miin an hriat an hlau a, hriat tum hianin min zawt ta ula chu kan in hrilh anga, engmah heti laiah hianin inchhan buaina hi a awm lo reng reng ang. Bad intention a awm lo reng reng.

DEPUTY SPEAKER : Nakinah in sawi veleh dawn nia.

Col. Z.S. ZUALA : Tin, he mi chung changah hianin UD&PA hi veng chhung developed na hna kan hmuhna ber hi a ni a, a Minister hi ala thalai zek zawk bawk a, a energetic-a khuti lai bridge nangni'na in tih a, keinin slap culvert kan tih te pawh kha a hmunah min zu en pui thlap a, chutia hma la chu an ni a, chuvang in khutah khu chuan engmah inhnial buaina awm turah kan ngai lova. Tin, a dawt lelah chuan in Food & Civil Supply-ah hianin kan hre reng a tunhmain gas kan lak dawn in zan khaw tairek thleng thleng in kan nghak a, kan gas bur ruak te kan tingmit a, duty te kan dah a, khatiang hun kha tunah chuan a awm tawh lova, 'gas a lo thleng dawn' tih veng tinah an auva, awlsam tak a kan la thei ta te hi a lawmawm a. Tin, buhfai hi a subsidy nasa tak leh kan state sum thlatin a vaibelchhe sawm deuhthaw seng a man tlawm a kan sawrkarin min pe thei reng te hi a lawm awm hle in ka hria.

Tin, a dawt lelah chuanin Forest- ah hian han lut ta ila, mau tuai hi tunah hian bazarah tam tak an la zuar ta a, whole sale in an la zuar ta cheu a, hei hi kan mipui, a zuartu te hian rawtuai ai hianin mautlawn hian pawisa an hmu tam zawk dawn tih hria se a tha ngawt in ka hria. Rawtuai heti taka kan lak chereu chuan nakinah mau nei lovin kan awm mai dawn a, hetah hian kan NGO leh Deptt hian hma an la nasa hle a, mahse hei aia nasa hian hma ala lak theihin ka ring. Tin, ram kang hi tun kum atang hi chuan (ka lo notice ve dan chuan nikum ai chuan) nasa takin hma kan sawn. Hman deuh khan Champhai lamah kan zin a, Lo hal hun lai ani nghe nghe a, chung hun lai chuan Lo chinlo ram tikang chu vang tak ani. A lawmawm hle in ka hria.

Tin, ramsa humhalh hi hman deuha Champhaia kan kal chuan , DC office kan Chief Minister zahawm tak zui hian kan va visit a. A Office-ah Silai pali hi a lo in tung a, ka zawt a, ani chuan, "Heng hi ramvak ho ta ka man sak ani, licence nen in lo kal hunah ka lo pe kir ang che u ka ti a, tun thleng in an la rawn lam lo", a ti a. DC, Mizoramah chuan a first posting ani ang a, hnam dang mi ani leh nghal a, a thahnem ngaihnaah hian zirtur a tam hle in ka hria.

Tin, LAD hi local administration chungchangah, ate nau leh lianah kan pur ber ani a, development leh engkim maiah, tunah hian zawi zawi in min tin san a, UD&PA lamah hian kan bet ta zel a, hei hi an hnathawh tenau eng eng emaw, hall kan neih theih phah na chhan te pawh hi anmahni an ni a, tin, local step te leh road engemaw kan neih theihna hi anmahni ho hi an ni a, an hnathawh hi hmuhtur a tam a ni.

Tin, Social Welfare hi naute awm atanga putar enkawl thleng an hna ani a, kan society-ah hian an pawimawh em em a. Amaherawhchu, Anganwadi sakah hian pawisa allotment hi a tam tawk lo a, a tawpah hian MLA fund hi min rawn pur leh tho tho si a, hetah hian fund hi tih tam theih dan awm thei se a lawmawm hle in ka ring.

Tin, a dawt lelah chuan Sports hi an sawi nasa tawh a, hei hi chu sawi ngai lo in an hnathawh that zia chu kan hria a. A bik takin kan vengah sawn tunhma Revenue-in a District Office a an hman thin Kawlthei huanah sawn, saw saw Revenue khan hmun dangah Office hmun tur tha deuh mai an lo nei a, saw mi hmun saw NGO te leh Sport lam hotuten an dil a, helai hmun hi in chhuah san dawn chuan Sport lamah pe ula, heti laiah hian Indoor Sports Complex leh Youth Center min sak sak rawh u anti a, hma an

la a, tunah hian Revenue lamin an hand-over mek a, Land lease pawh buaipui mek niin ka hria a, hetah hian Revenue Minister pawh hi a thil phal naah leh min duhsaknaah lawmthu kan sawi a. Tin, Sports Department pawhin hma min lakpui a, hmanna min chhannaah pawh khan crore engemaw zat a sakna tur kha an ruahman mek a, process mek niin kan hria a. 13th Finance Commission chhunga pek tur anga sawi niin ka hria, nakinah wind-up hunah min rawn clarify sak thei se a lawmawm ngawt ang.

Tin, Demand tam tak Department eng engemaw sawi hman loh tam tak a awm a, heng ho hi an hnathawh naah a that avangin han sawi belh tur a awm chuan loh avangin kan sawi hman loah i ngai ang u, ka lawm e.

Dr. R. LALTHANGLIANA : Pu Deputy Speaker, ka lawm e. Social Welfare-ah hian Old aged pension, kum upa zawk te hamthatna leh anmahni chhawmdawlna tur atan, Sorkar hmasa hunlai kum 2007-2008 bawr vel lai khan a hmaa cheng 100 thlakhat a ni thin kha thlakhat cheng 250-ah tihpun ani a, hei kum 5 dawn a ral tawh a, a tihpun dan kawng hi a awm leh thei em aw? tih kha ka'n sawi duh a. Tin, Sorkar hmasain Tanhrila Tribal Art Center, Saizahawla Boarding School bula a ruahman khu a tha viau a, amaherawhchu, kan hmang thangkai em tih erawh chu ka hre lo a. Tin, saw Lunglei, Kawmzawlah Tax-Lavia Model Residential School din ani a, kan hria in ka ring a. Hei hi mirethei harsa zualpui, BPL fate tana tih ani a, kan hmang tangkai viau turah ka ngai a, Sorkar hmasa hunlai khan hawn ani a, tangkai leh zual a kan Sorkar hian hman dan zel ngaihtuah tha in ka hria a. A bialtu hi waviinah a changtu Minister ani bawk a, ka'n sawi lawk duh a ni. Tin, Disable Commission tih hi sawi rik a ni thin a chanchinbuahte, waviin thleng hian kan Sorkar hian a la din thei lova, rualbanlote enkawlina chungchang hi a pawimawh ka ti khawp mai a, Mizoramah hetiang hi kan pung ve zel a chu chu kan tarlang lawk duh a ni.

Tin, Pu Deputy Speaker, LAD-ah hian lehkha pakhat thingtlang hla deuh atangin fax-in min rawn thawn a, ka confirm lutuk lova, mahse, telephone-in min rawn be zui a, Thenhlum thlang Dampui Lunglei district-ah sawnin a bul lawkah sawn Thorang Wildlife Sanctuary a awm a, chu chuanin he Dampui khua hi lak an tum a nih ka ring a, chumi chungchang chuanin he khua In 67 awmnaah hianin Congress VC an ni a, a rawn thawn tu hi Congress VCP a ni nghe nghe a. Tahchuan, tlem lai deuh khanin kan RO, saw lampang changtute leh a staff te kalin, "He khuaah hian VC in nei dawn tawh lo, School in nei dawn tawh lo, eng in nei dawn tawh lo (electric), cheng nuaih 10 theuh kan pe ang che u a in khua in chhuahsan tur a ni", tih kha thinthawng deuh maiin kan lo dawngsawng a, mipui min ti chia i hle an rawn ti a. Chumi avang chuan vauna karah chhungkua 42-in he khua hi chhuahsan turin hreh chungin an in buatsaih a, pawisa pawh hi an dawng tawh niawm tak a ni. Chhungkaw 42 bakah hianin chhungkua 25 te hianin chhuahsan an duh ve lo hle mai a, chutah khua chhuahsan turin tih a ni a, hmun thenkhatah pawh awmin kan hria a, mahse keini khua hi kan mawl vang deuh nge ni heti em em mai a min rawn ti hi chu, sawihona pawh a awmlu lutuk mai a hi an ti deuh a ni. Chuvang chuan a pawimawh lutuk a Wildlife preserve na tura tih anih rual khanin eng emaw lutuk a khaw thenkhat kan ti anih chuan a

tha lovin ka hria a, hei hi kan Minister beng hriat atan kan tarlang lawk duh a ni. Forest & Environment-ah hianin Sorkar hmasa hunlai khanin 2005 niin ka hria December thlaah Bethlehem vengah hian Advance Research Centre tih kha din tura lung phum a ni a, kha kha enge ni a kal tak zel dan? tih kha kan Minister hian min hrih thei se ka duh a. Tin, Sahuan thar Sorkar hmasa in a din chhuak hman a, PTC Sairang lamah, a lawmawm hle in ka hria a, hei hi tangkai taka tun aia nasa lehzuat a mi tam takin an tlawh theih tura buatsaih chhoh zel kha tha ka ti a. Tin, Mamit District-ah Bio-diversity Conservation of Rural Livelihood Improvement Project kha Sorkar hmasa hunlai khan din a ni a, hei hi Advance Research Centre Bethlehem a mi ang deuh bawk khan India hmarchhakah kan inchuh nasa em em mai a, chang awmchhun kha kan ni a, kan Official khatih laia buaipuitute pawh kha an fakawm hle in ka hria a, Assam Chief Minister phei chuan nasa takin Tiger (Sakei) in nei tawh lo ti te khan min hek a. Chumi karah chuan kan hlawhtling a, a kal zel dan a hi vawiinah hian hriat a chakawm deuh in ka hria a Dampa Tiger Reserve Area chhungah a ni.

Tin, Food Civil Supplies-ah hianin Sorkar hmasa hun lai leh tun hun kan inkhaikhin a ni deuh ber mai a, kei chu khaikhin ka tum lova, amaherawhchu, kan hun lai kha harsatna lian tak kan tawh Zoram mipui pawhin kan la theihngihliah miah loh erawh chu mau a tam a, a mangan thlak a ni. Kan duhthuinh khang kha kan pumpelh thei lova. Mau a tam a, harsatna tam tak kan tawh a, sorkar pawh a chiaih loh theih loh a ni. Amaherawhchu, chumi karah chuan mualpho lutuk lovin eitur nei lova thi sawi tur an awm lova, a lawmawm a. Chutih karah chuan kum khat chhung a niin ka hria a, ka hre sual lovin ka hria a, cheng singkhat thla khata la lut thei lo, la lut tling lo ho sorkar hnathawk leh hna thawk lo erawh kha chu buhfai a thlawnin khatih hunlai sorkar khan kan pe a ni. Tuna kan sorkar hun mek lai hi harsatna in tawh ve deuh te pawh a ni mai thei a, gas te hi chu a to lutuk deuh a ni, Heng hi chu engemaw tia mi harsa bik te tan hi chuan subsidise dan hi a ngaihtuah theih lo'm maw ni aw, Backward state kan ni a ka ti ve deuh a. Tin, buhfai to tih te leh oil te pawh hi ₹ 62 petrol a ni a, diesel ₹ 42 a ni a, a sang lutuk ve deuh tawh a. Nakin lawkah chuan kum tawp lamah chuan 100 a kai lovang tih pawh hi sawi theih loh khawpin harsatna kan tawh a ni tih kha ka'n tarlang leh duh a ni.

Tin, helaiah hian “Congress retailer-in buhfai KG 1 ₹ 14 in a hralh” tih Tuirial Airfield Retailer Pi F. Lalnuntluangi'n a tih dan chungchang an rawn tarlang a. Government rate baka a hralh hi May 21 te, June 10 te khan ₹ 14 KG khatah a hralh a. A hnuah erawh chuan complain nasa tak a awm avangin a ti chhonzawm ta lova tih te tarlan a ni a. A khaw mipuite an mangang hle a. Mahse, ani chuan, “Congress kan sorkar a, kan duh zat zatin kan hralh ang” a tihsan vel mai mai tih te hi tak tak a nih chuan a tha lo ka ti a. Engpawh ni sela, mipui hmakhua ngaia heng kan eitur retailer, min kawlsaktute leh min hralhsaktute hian fimkhur deuha an kal hi chu a tha awm mang e, ka ti a ni.

Ka'n sawi leh duh chu Pu Deputy Speaker, kan I&PR Demand-ah hian hei TV ka'n en a nizan atang khan. Sport, sport tih ringawt mai kha a ni a. Kawng lehlamah chuan nichin thleng pawh khan ka'n en a, a channel-ah khan Forest lampang te pawh kha chhuak ve se ka duh khawp a. Sport hli mai, ‘SAI hotupa a lo kal chuti khati’ an ti nawn zing ve lutuk a. Sum kan seng tam lutuk deuh mai awm mang e aw. Department pakhtah pawh Sport bik advertise nana nileng zankhuuaa tih hi ka'n ti

deuh a. Engpawh ni sela, kan Minister-te khan Demand in sawi, kan sawisak che u kar hmasa atang khan Demand tih ni apiang khan tih nachang lo hre ve ula chu a tha ngawtin ka ring a. Kan lo ti lo zo tawh a, naktuk chiah kan hmabak tawh si a. Hei hi ka'n sawi duh a.

Tin, Right to Information Act, 2005-ah October 12 khan India ramah hman tan a ni a. Mizoram sorkar pawhin kan han hmang tan chho hi kan tangkaipui hlein ka hria a. Amaherawhchu, tukina zawhna kan sawiho tawh ang deuh hlek khan henga a chhanna chungchanga doubtful engemaw awm ang chi hi uluk deuh hleka kan kalpui hi chu a tul mang e tih kha ka'n tarlang lawk duh a ni.

Tin, ka'n sawi leh duha chu hei sorkar hmasa hunlai khan chanchinbumi, media ho ngaih pawimawh an ni a. Printed media te leh Electronic media kan han tih ang chi te, chung tana Journalist Welfare Fund kha Budget-ah harsa tak chungah dah kha a ni a. Vawiin ni thlengin an hmang tangkai viau a. Pawisa an hman vek loh la tlingkhawm ang chi pawh nuai 20 chuang an nei tih te kan hria a. Manipur-ah hian hengho pension ve theihna tur ang chi te pawh hi a awm niawm tak a ni. Hei hi engemaw tia kan ngaih pawimawh thain ka hria a, tin, department hrang hrang tena advertisement hrang hrang atana sum kan dah beitham a hi rilruah a cham reng a, kan hunlai pawhin ani tho va, tun aia nasa zawk a tan lak hi a tulin ka hria a, kan tarlang duh ani.

A tawp berah chuan Pu Deputy Speaker, hemi Sport lam pangah hian kan Minister zahawmtak hi congratulation kan pe duh hrim hrim a, ka lawmpui a, a chungah lawmthu sawi tur awmin ka hria a, a chhan kawngli/kawngnga han sawi ka duh a. Pakhatnaah chuanin Sorkar hmasain a thil tihtawh rinawm tak maia an chhonzawm a hi fak tlak ani. Rajiv Gandhi Studium Assam Rifles Ground-ah te dah ila kan tia, kan ti fel vek tawh a, a hmun a chu an sawn chu ani na a, an han tihlawhtling hrim hrim, kan Sorkar lai pawha sanction hmuh hman tawh, pawisa tha tak maia an hmang hi lawmawm ka ti khawp mai a. A chungah hian lawmthu ka sawi duh a, tin, chumi rualchuan khulam pang a kan buatsaih, Mualpui lam pangah hian Artificial Turf hi kan ti zel dawn em ka hre lova, thenkhat chuan complaint te pawh chu an rawn sawi bawk a. Khatiang hlir kan sawi chuan lungdeng ta ila, fei khawh ta ila, kan tichhe viau lo ang maw ti pawl kha an awm ve a, Football leh engemaw ringawt ngaihtuah lo deuh hianin Sport discipline dang tam tak hi ngaihtuah deuh ta ang sela, Minister hian tih kha kan duh deuh ta ani. Tin, Sorkar hmasa a District hrang hrang a Serchhip tiamlohah chuanin District Sport Complex, Indoor Games tihna tur te, Lawn Tennis tihna tur te, Play ground tihna tur project a siam vek tawh a kha tha takin a chhonzawm niin kan hria a, chuvang chuan lawmthu kan sawi duh a. Tin, Zobawka kan Mizoram Sport State Academy DPR peih vek tawh a, Sorkar hmasa hun lai pawh a tangka kan han ruahman fel vek tawh chhonzawm an han tum thawm kan han hriate hi a lawmawm ka ti hrim hrim a. Aizawl leh Champhai a Indoor Stadium sak nana Aizawlah vaibelchhe 13, Champhai-ah vaibelchhe 11 bawr vel ani awm e, khang kan hmuhte chhonzawm zel tur anni te kha a lawmawm ka ti a. Chhonzawm lohva dah tawl ringawt, Sorkar hmasa ruahman tawh Sports-ah chuan a awm mang lova, chuvang chuan, an chungah hian lawmthu sawitur awm in ka hria a, ka'n sawi ve duh hrim hrim a.

Tin, Mizoram Women Hockey Training Centre, Thenzawl ami Sorkar hmasa hunlaia hmalakna te leh Artificial Turf te pawh pah tura ruahmanna te,

Mizoram Women Hockey Training Centre, Kawnpui a neih tur ang chite pawh kha a chhunzawm zel niin kan hria a, lawmawm kan ti khawp mai a, a chungah hian lawmthu sawitur hi Pu Deputy Speaker, kan ngah ve hle in ka hria a. Tin, chutih lai chuan tlema complain, zia chu a ni chiah lova, tlem awm ve deuh chu Directorate Sports lampang hi chuanin Sorkar dan hmang deuh hlek hianin material football te leh engemaw hi an procured a, tender mumal takin. Sports Council hi chu an zalen lutuk deuh a, duhdan danin thil hi an lei kual nasa deuh a ni tih hi sawi hi a awm deuh a. Hei hi tak tak em ni ka hre lova, chumi anih chuan Sorkarin tihdan phung kan neih hi hmang ve sela tih kha ka duh khawp mai a, chu chu ka sawi duh a ni.

A tawp ber tak takah chuanin, ka Department lo enkawl tawhah hianin project kan siam a, 'Project for Sports Academy in Mizoram' tih kan siam a, Asian Development Bank-ah te pawisa kan zuk ruahman a. Tin, hemi piahlahmah Govt. of India atangin tangka engemaw zat kan hmu a, hemi avang hianin School-ah 'Catch them Young' nei tur khan kan puang a, a hawngtu kha ka nia, 2005 ah helai Vanapa Hall bul lawk, Petrol Pump pen thlakna laiah khian lianpui in 'Game On' tih intarna hnuaiah khian kan hmuh ka ring a. Hei hi a rawn chhunzawm hi ka lawm khawp mai a, mimal takin ka Department chan tawh thil 'Catch them Young' ka lo tih tawh an chhunzawm hi, ram pum huap anga an lo ti ve hi a lawmawm ka ti khawp mai. Tahhian, Academy 8 awmin, Academy hrang hrang 155 ruahman a awm a, hetih hunlai hian a learners pawh hi 7725 lai kan nei hman a, a lawmawm ka ti khawp mai. Hetianga kan Minister-in he Policy pawimawh tak mai a rawn chhunzawm hi lawmawm ka ti khawp mai a. Helai hian with a think, catch them young tih kha kan han dah a. 155 Sports Academy target hi 9-14 years tih a ni a, helai hian hi chuan, mahse tunah hi chuan catch them young tih hian tlema upa deuh pawh a huam thei turah ngai ila. Engpawhnise, he ngaihtuahna, School lampanga a bul kan lo tan, wawiina an han chhunzawm hi ka lawm khawp mai a, Sports Minister hi thlak lul suh u tih ka duh khawp mai, ka lawm takzet a ni. Hei hian nasa takin mental/physical/spiritual development khatiang kha a siam dawn a ni tih kha a lang chiangin ka hria a. Chuvang chuan 2008 kumtira International Alliance for Youth Sports kan ti mai a, USA te nena kan thawh hona MoU kan signed a copy te pawh hi a la awm tha a. Hengte pawh hi hma a la zau thei anih chuanin rawn chhunzawm chho thei ta ang sela a tha ngawtin ka ring a, nichina kan ngaihthlak tak ang khan. School Education Department te nena kan in tied up, kan in coordinate chhoh chuan kan ramah hian Sports lamah hian nasa takin hma kan sawn chho ang tih ka ring a. Hei Minister dang pawhina entawn tlak tak nia ka hriat chu kan Sport Minister hi Chief Minister nen pawh thil an tidun tha bik a nih ka ring a. Nizana Pu Zoliana, Director interview-naah khan vaibelchhe li kha awlsam tak mai a, thil zawng zawng hi Sport vek a ni ti a, Pu Lalkhama Vice Chairman Planning ina an chhan pawha an tlang thei chi ang zel ang chi kha kan Minister pawh hi nih tum ta ang ula, a that ka ring a. Chuvang chuan Mizoram hian NLUP hi a mumal thei lutuk lo a nih phei chuan Sport lamah hian NLUP hi telh ve theih dan a awm lawm mawni chu aw ka ti a. Puitling Scholarship chuh ang deuh hlek hian singhni lek lek in kan sem ta deuh bawk nen hian heti zawng hian Pu Deputy Speaker, hetah Sport lam pang promote nan te hian kan NLUP pawisa te hi hman kual dan te hi awm phei se chuan kan ramah hian Infiamna lamah hian nasa takin hma kan sawn ang tih hi ka bei sei a ni. Duhsakna wawiina kan Minister pathum te inhnathawh kal chho zel tur atan ka hlan a ni, ka lawm e.

DEPUTY SPEAKER : Sawi duh kan la awm em ? Awm tawh lo maw? Hei mi 20 laiin an sawi tawh a. Sawihona kan duhtawk dawn anga. Tunah chuan kan Minister te kan sawm a nga an Demand te windup a pass han dil turin. A hmasaberin Pu H.Rohluna, Minister zahawmtakin a Demand te han windup sela, pass han dil sela a tha ang.

Pu H. ROHLUNA, MINISTER : Pu Deputy Speaker, ka lawm e. Hei vawiina kan Demand sawihonaah hian member ten thahnemngai takin ka Department chan ve te min sawi saka a lawmawm hlein ka hria a. Member 20-ah 19-in Food, Civil Supplies chungchangah thurawn tha tak tak te, a then phe chu Department-in kan phu lova fakna te, tin, thil inthlak thleng a tha lamin danglam tak tak a awm a ni tih te min sawi sak a, a lawmawm ka ti hle a.

Tin, Environment and Forests lamah member 16 laiin insawi bawka, 20 zinga 16 in min sawi sak avangin lawmthu ka'n sawi duh bawka a. Ka Department enkawl ve hi Department inzar pharh tak ve ve kan nih avangin sawi tur pawh a tamin ka ring a. Kan member ten dimdawi taka kan hmalak vena te, kan theih ang tawka kan chhuah vena te, min hriatthiam puia vawiinniah kan tlin lohna lai te pawh tam tak sawitur a awmin ka ring a, chung karah te pawh chuan a ruh lang rawt rawta min sawi sak duh lovin, helaiah thurawn tha tak tak zawkte, helai roelna sang bera min sawi chhuah sak zawk avangin vawiinniah hian lawmthu kan sawi hmasa duh a ni. Helaiah mipuite aiawha awm kan ni a, mipuite aiawha ding kan ni a, chuvangin kan ram mipuite thatna tur te, kan ram thatna tur te leh kan mipui tena chaw, ei leh bar a harsa lutuka an awm loh nana kan thawh tlan pawh hi a tul reng a, chung atana theih tawp min chhuahpui thin avangin lawmthu ka'n sawi duh bawka a ni.

Hei, vawiinah hian a hmasain Member zahawm tak tak ten a an thusawi te hi a vaiin han react dawn ila hun a duh dawn a. Kan Session hi a rei tawh ang reng a, a tawp lam keini hian kan la chang ta chauh kha a ni a. Chuvangin nileng lenga han thut hi rin aiin a hahtlak a, tunah pawh hian zo ila ka hnungah hian Minister zahawm tak tak dang pahnih ten an la ti leh dawn ani a. Chuvangin, kan Member ten min hrethiam sela, an thusawi te avaiia kan react thei lo anih pawhin min lo hriatthiam ka duh a. A bik takin Pu Deputy Speaker, i dinglama thu Member zahawm tak tak te phe chu office lamah te tul a awm chuan kan la titi tlang, sawi tlang zel ang a. Min lo hrethiam se ka duh a. Tin, han react loh theih loh hi chu tlem a zawng awmin ka hria a, chung chu kan ti ang a, hun a reilo thei ang ber hman ka tum turah ka ngai a.

A hmasa berin Pu P.P.Thawla thusawi hi hriatthiam har ka ti ang reng a, a bial lamah tun dinhmunah hian harsatna a awm hran lova ti chung khan sorkar hmasa hi buhfai lamah kan tluk lova ni, LPG lamah te a rawn ti lawi a. Hei hi ni e, theihtawp kan chhuah a, bial pawh kan thliar chuang lova. Nikumah phe kha chuan a harsa khawp a, a bial lamah leimin / kawng min te avangin, chuti chung chuan head-load te pawh in sorkarin a theih ang angin tan a la a. A bial mipui te pawh nghei lovin kan dah sak thei a. Chutiang chuan theih tawp a tan kan lak sak naah khan a ni pawh a lawm niin ka hria a. Vawiin ni a hetia Sorkar hmasa nen han khaihin tur ang kha chuan

kan inphal lo deuh hlek ani, a chhan chu nikum a kan harsatna tawh dan kha a namai lo ani. Leimin a nasa a, chumai nilova phai lam atangin buhfai te alo thleng thei lova, gas te pawh chutiang tho chu ani, leimin avang te, tuilian avang te, mihring in kan control theih piah lamah harsatna kan tawh chho va. Tun thal chhoah hi chuan khua a that a, kawng a that bawh hi chuan pangai takin supply hi a kal a. Khati khawpa kan harsa chung pawh in hunbi pangaiah kan sem thei a. Kuminah pawh hunbi pangai thlap thlap in ration a quota kan siam ang ang hi chu kan sem a, kan la kal chho zel ani tih hi kan sawi duh a.

Tin, carrying contractor nilo, store keeper tena buhfai an thiar thin tih hi, hei hi sawi rik hi a awm leh thin a. Amaherawhchu, “chiang kuang takin han hria ula, report minrawn pe rawh u” ka tih hian minrawn hrilh thei an awm lo laiah hian action lak a har ani. Chuvangin, kan Member zahawmtak pawhin chiang kuang taka a store keeper, chutianga anmahni motor hmanga ti an lo awm anih chuan, contractor chanvo chhuhsak an lo awm anih ngat chuan hei hi chu min hrilh chiang se kan hrem ang. Chu chu min hriatsak se ka duh a. Amaherawhchu, amah pawhin chutianga an awm chuan office lamah te pawh chianguang takin a approve-na awmin min hrilh thei se ka duh a ni, a chhan chu tu emaw titi helaia kan sawi, action han lak dawn tak taka lak theih si loh a awm hian a buaithlak thin a, chutianga ang chu chianguang takin min hrilh se ka duh khawp mai.

Tin, Carrying bill emaw retailer bill emaw hemi chungchangah Member zahawmtak Pu B. Lalhlengliana kha a awm ta lova ka'n react tho dawn em ni. Hei hi seniority in strict takin kan kal a, Ministry hmasa nen hian hei hi chu danglamna a awm a ni, Ministry hmasaah kha chuan a ti thei thei, a che thei theiin bill hi an la deuh niin kan hria a. Tunah hi chuan seniority in bill an theh luh atanga bill register a seniority in kan pe a ni. Party angin a ruling an ni emaw ni lo emaw, chhungkhat laina an ni emaw ni lo emaw kan thliar lo, chutianga ang chuan a seniority in kan kal a, amaherawhchu helaiah hian humanitarian ground a consider tur chin an awm a ni, phaiyah a bill neitu emaw a thisen zawmpui ani emaw refer anih in a sum an neih loh avanga out of turn a anrawn dil anih erawh chuan khami ang kha chu kan consider a ni. Khami ang tih loh kha chu seniority in kan kalpui a ni, tumah kan thliar lo ani tih kha ka'n sawi duh a.

Tin, Pu Lalduhoma Member zahawmtakin a Sakawrdaiyah buhfai Godown atangin Kg ah ₹ 12 in special in an pe a, a bag phei chuan ₹ 600 in hralh ni awm ang a report a dawn kha a inspector kan han bia a, chutianga ang a awm aw zawng lo mai a ti a. A thu dawn na kha a dawng sual deuh a niin ka ring a (Pu Lalduhoma : Ni e, Pu Dy. Speaker, a sual thei a mahse midang deuh te pawh kha zawt thin sela mawle tiang angah hian) hei hi chu tun ang laiah hi chuan kan strict deuh hlek a, amaherawhchu miin an nghei tak tak anih chuan chawlhni hmanna tur te neilo tak tak chu Kudam atanga lo leitir kan phal a ni. Tunah hian BPL chhungkua hung deuh hi chuan thlakhatah 35 Kg, (central norms in kan kal lo thei lova, AAY te telin) tla lo hi chu an awm a ni. Chung hote chu an chawlhni ei tur, ni hnih khat ei te emaw an neih loh miao chuan, meialh en ringawt a an thut chu kan rem ti bik lova, chung atan chuan a special-a pek chu kan nei a ni tih kha ka'n sawi duh a.

Amaherawhchu, a bag a pek hi chu kan phallo a ni, a bag a pek te hi chuan buhfai hi a hek lutuk a ni, chuvangin a kg-in ration card-ah an chhinchhiah ang a, a kudam rate-in an lei tur a ni, chutiang chuan tuma nghei chu kan phal lo. Kan center enkawltu te pawh lo pe tur chuan kan in chah a, amaherawhchu phal rai deuh a pek erawh chu kan phal lo a ni.

Tin, Pu C. Ramhluna, Member zahawmtakin a sawi angin Chini hi a bialah thlakhatah vawikhat an sem tih hi thlakhatah hian vawikhat bak kan sem lovin ka hria a, chuvang chuan an hmu tha hle a ni. Chuvangin heih chu sawisel tur a awm lovin ka hria, thlakhatah a vawikhat tal a bial te khan an dawn kha chuan regular takin an dawng tih na a ni, a kilkhawr ve hle naa ka lawmpui khawp mai. Duhthusam hi chu kan pe thei bik lova central atanga quota nei kan ni a, kan quota bak chuan a sem theih loh a ni e.

Tin, Buhfai hi kg 3 talin sem nise tiin sawi a tam a, mahse tuna kan dinhmunah hi chuan kan la ti thei rih lo a ni, kan neih ang ang hi regular taka a sem hun pangngai a kan sem a, a nghei zual tak tak (Buhfai zuar awm lohna khuaah) Kudam atangin kan suah hram hram a, nghei lova kan insiam hram hram hi member tin min hriatpui ka duh a ni. Chu chu kan hriat tlan a tan a thain ka hria a ni. Buh kan la thar lova, kan thar tam na na na chuan kan sem thei ang chu. Hetiang taka ti ve thei tura min han ring te hi a lawmawm ka ti khawp mai. Tichuan supply lamah chuan kha kha a tlangpui ni ta sela.

Tin, Forest lamah hian Wild Life Sanctuary hi member Pu Thawla han sawi kha MADC kut a ni a Forest-in directin kan enkawl lo. Tunah hian 2010-2011 ah hian cheng nuai 34,22,000 proposal Central-ah MADC-in an rawn siam kan theh thla a, Central lamin engzatnge an rawn sanction dawn tih erawh chu kan chiang chiah lo ni. Tichuan kan sawi tawh a Luipui kam tha, tlang rama sawn chungchangte han sawi ri kan awm a, amaherawhchu, heng te chu Private resolution a kan passed tawh, kan umzui dan pawh kan sawi tawh kha. Tichuan, member zahawmtakina Saw Mill rules chungchang a rawn sawi kha Department pawn kan buatsaih lai khan kan hria a ni. Supreme court order-a Empower Committee din pawmpuina a ngaih tlat avangin kan duh angin keini hian kan duang thei lo a ni. A nih loh chuan vawi hnih vawi thum hi an hnenah kan thlen a, kan draft peih tawh hnuah pawh. Amaherawhchu, an approve thei lova, an approve theih dan tur a tawpah phei kha chuan engtingge ni ang? Hei hi kan neih a tul si a kan han tih tawh hnuah hetiang hianin anniin min approve sak theih hnuah khan final a ni ta a. Chu chu Cabinet-in min pawmpui a. Cabinet-in min pawmpui tawh hnuah Central Empowered Committee-ah thlen leh a ni a. Anni'n min pawmpui ta a. Tunah hi chuan Saw Mill Rules hi hman theihin a awm ta a ni a. Hei hi kan tih mai loh chuan tunah hian kal ngaihna a awm chuang lo a ni. A log in, a tum ringawt hi chuan thing hi kan thawn thei lo a ni a. Tunah phei chuan CET-in Central Empowered Committee-ina kan Saw Mill Rules hi min pawmpui takah phei chuan rail wagon te pawh hi min pe hleitheih tawh dawn lo niin a lang a. Chungte a nih avang chuan...(Interruption) Saw Mills hi Wood-based Industrial Estate-ah din thuai a, hna thawh tan thuai a tul tawh a.

Pu C. RAMHLUNA : Pu Deputy Speaker, zawhna lawk. Saw Mill licence hi pek chhuah a ni tawh em aw?

Pu H. ROHLUNA, MINISTER : Pu Deputy Speaker, hei hi a hmun tur pawh la tihfel a la ni lo a ni. Reserved forest atangin a ground distance ah 8 km ah hian wood based industrial estate, Industry Department-ina notification a chhuah a, chutianga siam chu a ngai a. Tunah hian Industry-in a ram tur an zawng vel mek a, an la final chiah thei lova. Forest Department nena inrawn tlangin, reserved forest atanga 8 km a hla a ngaih avangin a hmun tur hi a vang em em mai a. Tunah hian Industry hian khawi khawi emaw hi chu identified deuh tawh chuan an insawi a. Chu chu la final chiah loh a ni. Chungte chu final hma hi chuan tih theih a ni lovang.

Pu LALDUHOMA : Pu Deputy Speaker, forest area atanga km 8 chungah tih te kha chu zawm loh theih lohva Supreme Court thupek a ni a, kan hria a. Amaherawhchu, a boruak mel a nih chuan hmel loh a. (PU H. ROHLUNA : Ground distance a ni.) Khati a nih chuan kawng thui zawng atang te khan chhut a, a pehhel dan te kha zawn ve thiam turah ka'n ngai a. Kan sawi zawka kha chu a saw mill size kha a ni. A saw mill size-ah khan Supreme Court-in sawi a neih ka ring lova. Tin, state dangah pawh a size an telh lova. Khami wood based industry, vertical saw mill a nih chuan a opening inches 9 (PU H. ROHLUNA : 9 inches a ni a. Tin, Circular a nih chuan 12 inches diameter a ni tur a ni tih a ni.) Inches 9 te chu hacksaw blade chen chauh a ni a. Khatiang anga te kha a company pawhin an siam lo hrim hrim a. Thing han zaina tham pawh a ni lova. Khalai kha chu tihsual palh a ni lo maw aw.

Pu H. ROHLUNA, MINISTER : Tih sual palh pawh a ni lova, CEC-in a pawm theih chinah khan a ni. State dang Rules erawh chu kei chuan ka hre chiah lova, kan Officer lam chuan an Chiang viauin ka ring a. Tunah hi chuan CEC, Central Empowered Committee kan sawi tak, Supreme Court-in a din, khamiin min pawmsak theih chinah chiah khan kan kal a ni. Kha ai khan ti lian ta ila chuan min pawmsak leh thei si lova. Chuvangin, min pawmsak theih chinah, a Rules neih a ngai baw si a. Min pawmsak theih chinah khan kan kal a ni tih kha ka hrilhfiah thiam dan chu a ni mai.

Pu LALDUHOMA : Pu Deputy Speaker, khalai kha churawn en chian ni se tha ka ti a. State dangah pawh hmun tam takah Saw Mill a awm a, khatianga te an ni lova. Khatianga te kha khawiah mah hman tham ani lova. Sitting room a Sofa a thu chungah tih tham lek a ni a. A ngaihna a awm lo reng reng a. Chuvangin khalaite kha chu hriatsual palh te pawh an nei ve anih ka ring a. Tripura a an rules te pawh ka kaw ve tho a, khatiang kha a awm lova. Chuvang chuaninrawn enfiah turin min tiam sela. Tih that a ngai anih chuan tih that nisela. Chuti anih loh chuan Mizoramah hian thing kan in zai miah lovang.

Pu H. ROHLUNA, MINISTER : Pu Deputy Speaker, hei hi kan enchiang viauin ka hria a. CEC ah pawh vawihnih vawithum thlen a ni a. Chuvangin an pawm theih

chinah khan kan kalpui ani. Khang bak kha chu tunah ennawn leh thin mah ila CEC hian min approve sak ka ring lo ani. Chu chu tuna a awmdan a ni.

Tin, Bangladesh Border Fencing-ah hian ramsa inkalpawhna siam nilo awm angin Member zahawm tak Pu Duhan a sawi a. Dampa Tiger Reserve zawnah te chuan ramsa inkalpawhna tur corridor hi an siam niin ka hria a. Chu chu a depts., a kan officer te, kan Chief Wildlife Warden te nen pawh kan sawitlang a. Kha kha chu a awm niin ka hria.

Pu Deputy Speaker, duh aiin hun lak rei a awl mai dawnin ka hria a. Kha kha a tlangpui thua kan react theih deuh chu ni mai sela (Interruption)

Dr.R.LALTHANGLIANA : Pu Deputy Speaker, nichina kan sawi zawk sawmi Thenhlum bul Dampui a VCP ngeiin an harsatna a rawn sawi hi kan hria em aw ?

Pu H.ROHLUNA, MINISTER : Pu Deputy Speaker, kan hria a. hei hi a VCP hian insawnchhuah a duh loh avang zawka kan member zahawmtak hnena thlen zawk a ni. In 61 an ni a, VCP zawk hian VCP nih reng a duh a. Chuvangin a mipuite lamah hian duh lo turin a thlem a. An insawnchhuahsan vek ang a, a lalna a tawp ang tih a hlau ni berin ka hria a. Chuvangin hei hi kan Member zahawm tak hian a thudawna hi finfiah tha leh deuh se ka duh khawp mai. A chhan chu a depts., lam atang pawhin kan enchiang taw thawkhatin ka hria, hei hi chu. (Interruption)

Dr. R. LALTHANGLIANA : Pu Deputy Speaker, engpawh nisela, hemi lehkha hi a copy hi ka pe ang alo enfel sela tih kha kan phut nise. Thudik tak an rawn sawi tih lam kha a kawk lova. Amaherawhchu, VCP meuhin ziaka a rawn tih avang hian.

DEPUTY SPEAKER : A inchhawk deuhin aw. A bialtu a awm a, Pu Zodintluangan tawite han sawifiah sela.

Pu ZODINTLUANGA, MINISTER : Pu Deputy Speaker, kan bial a ni a, he project a hi. Vawiina kan member zahawmtak Dr.R.Lalthangliana, Forest Minister anih lai atanga bul tan kan ni a. Khulai Dampui mai ani lova, Kawnpui leh Darnkawnte pawh a hunlai atanga project siam a ni a. Tun kan sorkar hnuah Dampui khu a rawn chhuak hmasa a. Kawnpui khu tunah rawn sanction mai turin a awm mek a. Darnkawntu khu tunah harsatna kan la nei tih kha kan sawi duh a ni.

Pu K.LIANTLINGA : Pu Deputy Speaker, oil man sang chungchang thute kan han sawi a. Ration chungchang vel te. Engtingge Department hian hma an lak aw tih lai kha kan hre duh deuh a ni.

Pu H.ROHLUNA, MINISTER : Pu Deputy Speaker, khalam kha chu kan la sawichho turah ka ngai a. Mahse, hun lak rei loh hram ka tum ang a.

Buh thar hi ka'n ti daih teh ang, nakinah ka la sawi thovang. Kan buh thar hi a tlahniam nasa em em a. 2007 chho leh tun 2010-ah te hian buh kan thar hi a tlahniam chhoh zel avang hian Mautam tam vanglaia kan buh thar leh nikuma kan thar a in ang thuak a, nikum kha chuan kan thar tam deuh hlek a. Leilet lam an thar tha deuh, Agriculture report atangin. Tlangram lo neih hi chu chhan hrang hrang vangin a tlahniam a, chungte avang chuan Buhfaiah hian kan intodelh lo nasa a. Tunah hian 25% kan mamawh ang hi kan thar chauh a ni. Chu chu a nih avangin thla thum chhung mamawh Mizoram kan thar chauh avang hian, a bak zawng chu Civil Supply-ah kan innghat tihna a ni a, chuvangin a hautak hle a ni. Tunah hian i veilama Member zahawmtak takten an sawi, an hun laia Buhfai a thlawna kum khat sem ni anga an insawi te hi, khatih lai khan vanneihthlak takin Pu Duha te ho nen khami State Level Committee-ah kan tel tlang a, NGO te nen khan. Home Minister Room-ah pawh vawi tam tak kan Committee a, hengte hi kan sawiho thin a. Tin, Disaster Management Minister Room-ah pawh kan sawiho thin a. Kum khat hi chu kan inpein ka hre lova, ka hriat sual loh chuan thla li vel hi a thlawnin kan inpe a ni. Chu chu ka hriat dan a ni. A chhan chu khatih hun lai khan Opposition lama kan thut ve lai kha a ni a. MLA ka ni ve tawh hlauh a, chu chu ka hriat dan a ni a. Chuvang chuan kum khat kha chu a nilo a ni. Natural Calamities Fund atangin Central-in min pe a. Chu min pek a chu kan mipuite, buh thar thalo, tam tuar mangang zualte chhawmdawl nan i hmang mai ang tih a ni a. Arawn pek chhan tak zawka chu Sazuin buh a eichhiat chhawmdawl na tur, tlang ram loneitute tan a ni. Amaherawhchu, a dan lo deuh hlekin kan kal tlang ta a, cheng singkhat chin kum khata pawisa la lut chin kha i pe mai ang, a lamtawi zawng chuan BPL chin kha tih ang deuhin khatah khan kan rel a, kan ti ta kha a ni a. Chu chu a nih dan phung dik tak zawk a ni a. Chuvangin, kum khat kha chu a thlawnin sem a nilo, thla li vel a ni tih kha ka'n clarified duh a ni.

Tichuan, kan buh thar khati taka a tlem takah chuan kan inngahna hi heti hi a ni ta a. Central-in kg.35 zel ang hisapin allocation min pe a. Chung avang chuan chhungkaw hung deuh te hi chuan kham ngaihna a awm lova. Chuvangin, tunhma atanga kan kalphung pangngai ang deuhin APL (Above poverty line) ah phei chuan kg 2 ang zelin tunah hian per head angin siam a ni a, minor-ah erawh chuan a chanve puitling quota chanve a ni mai a, khatiang khanin siam a lo ni a.

Tin, BPL leh AAY bik hi chu kg. 35 angin Central norms angin kalpui a ni a. Chuvangin, tuna Central-a allocation kan hmuh ang pangngai hi BPL pawn an kham chuang lova, AAY pawn an kham chuang lo a ni. Chuvangin Economic cost-in, a man tovin cheng 22.13 per kg. in lei a ni. Chu chu ₹ 9.30-in retailer-ah Sorkarin a pechhuak a. ₹ 12.85 kg. khatah Sorkarin a hlauh zar zar a ni. Chutiang chuan mirethei, mi harsa zawkte tan Ration Card neitute tan khan Sorkar a inpe a. Thlakhatah hian cheng vaibelchhe 10 ang hian a chawhrual theih a, chu chu sorkarin hmuh let leh na tur awm miah lovin buhfai man tlawm zawka mipui ten an lei theih nan hian

sorkar a insengso a ni. Sum harsa tak chung pawhin kan hotuten i ti hram ang hmiang min tih sak zel a, thla a thar dawn hi chuan engtinngne niang kan tia kan inrawn khawm laih laih a, economic cost a quintal sing riat han lei hi chu a namai lo a ni vaibelchhe 17 chuang hian kan lei thin a ni, khami ringawt a kha. Chu chu anih avangin a hautak a, buhfai hi ren pawh kan ren reng a, kuminah phei chuan sum harsatna leh chhan hrang hrang vangin advance monsoon stock hi allocation kan la lawk lo lehngal a, chutiang chuan monthly a quota lei atangin saving kan han ti chho tak tak a, a kawngbo thin kan han tih ang te kan thawktute nen theihtawp chhuahin kan veng a, chutiang chuan tun dinhmun hi kan thleng chhova. Hmun kilkhawr zual tun ang lai furah hi chuan kan inchhek tha thawkhat viau a, favang kan han tih mai September thla ang ei tur ang hi chu kawng chhe zual laiah kan centre ah hi chuan kan dah deuh vek tawh a ni. Chutiang chuan a system leh a enkawl dana hi tih tak taka han tih hi chuan kan thawktute pawn thahnemngai takin a pelhe tur leh khatiang kha vengin tihian theihtawp min chhuah pui a, tun dinhmun hi vawiinniah hian kan thleng a ni. Hei hi supply department in record kan siam ve chu niin ka hria a, advance lak awm miah lova khatiang zat stock a awm thei kha ropui kan ti ve thawkhat a ni.

Ration card chungchang te hi sawi a tam thin a, ration card hi nia siam dik a har khawp mai. Kan han sorkar tirh phat 2009 ah khan a diklo nasa ani tih kei ka luh hlim pawhin ka hria a, theihtawpin siam dik in tum teh ang kan ti a, a nghahchhan tur ti mai ila, record eng eng emaw te pawh kan zawng a, mahse a awm hleithei silova. V/C te kan ring lo hleithei lova NGO te kan ring lo hleithei lova chutichung pawhin kan retailer a hlawk lo bik lutuk anga a la tha thei lovang tih hlau te hian card 20 chuang te an lo belh ta mai thin a, khatiang khanin a dik hleithei lo a ni. Veng pahnih phei chu Aizawlah pawh kan manchhuak a, kan siam dik tir a, a tirah phei chuan an tang viau a, mahse kan hriatchian em avangin kan DCSO ten an siamthat tir a, chutiang chu ani a. Kristian theuh si, mahni rinnaah rinawm inti theuh si hi kan rinawm thin lo hian harsatna min siam thin hi a pawi ka ti a, hei hi nakin zelah pawh, a hnam ang pawha kan in ennawn nan ka duh khawp mai a, a dik chu dik ti mai ila, a diklo chu diklo ti mai ngam tlang ila chuan harsatna awm lo tur a ni a. Vawiinniah village record te anih loh pawhin a veng ang ten family record mumal tak te han rinchhan tur hi kan nei silova, siam dik hi a har em em mai a ni. Tunah hian a record dikthei ber tura kan ngaih 2011 Census, Family Census data hi, hei hi Census Directorate lamin han inpeih thei se chuan, hemi rinchhan hian tih hram dan awm se, chutah chuan ration card diktak, population dik takin kan nei thei ang a tih hi tunah chuan kan beiseina chu a ni mai.

Chutiang tihloh chu NREGS (Job Card) kan han ti a, khaw tam takah alo dik bik chuang silo a, lehlamah record dang kan tih pawhin a dik tak tak thei baw chuang silo a, nghah chhan tur hi a awm thei lo a, chuvangin a diktak kan duh anih chuan Census Record hi ring phawt mai ila, a tel duhlo te pawh kha zawiin an dinhmun/chungchang te chu kan la ngaihtuah mai anga Census duhlo hote chu kan ti a ni. Tin, kan han sawrkar hnua Carrying contract atana tender kan han chhuah hnua hian department in, 1.5 % atanga 2.5 % vel ang hian carrying charge a hi kan ti hniam thei a, hei hi kan record, sawrkar sum kan save na tha tak ani tih kha kan sawilang tel

duh a. Price escalation han ngaihtuah phei chuan pung zel tur ni awm taka kha kan tihnam thei zawk a ni tih kha kan sawilang duh bawk a ni a.

Pu LALDUHAWMA : Pu Dy.Speaker, khawngaihin, khatilai kha engtinng e thil man te alo sang tawh chung a in han tihnam zawk theih dan lai tak kha, min han hrilhfiah thui deuh thei em a? Thil lawmawm tak a ni.

Pu H.ROHLUNA, MINISTER : Member zahawmtak rawn zawhna kha hrilhfiah thui vak pawh a ngai lo, contractor leh tu te emaw inthuralin rate hleihluakin an lo siam a, sawrkar hmasain, chu chu a ni mai. Chuvangchuan a dik ang pangngaiin tender kan han ti a, chung atang chuanin savings kha kan siam thei a ni, tih kha ka chhan dan tawite a ni.

Tin, Godown kan neih hi thenkhatah hi chuan tha tak tak awm ve tawh mahse a tam zawk hi UT hun laia sak te an la ni a, chuvang chuan godown hi kan mamawh a, tunah hian kan la sa tha tak tak theilo a, amaherawhchu, tunah Central lam atangin Lungleiah te, tin, Mamit leh Aibawkah hian concrete-in, Lunglei a mi phei hi chu 1000 metric ton dah theihna tur a ni a, Aibawk leh Mamit hi 500 metric ton dah theihna tur sak mek an ni a.

Tin, FCI kudam chungchang member zahawmtak Pu Lalduhawma`an Ramrikawn ami a sawi thin a, hei hi FCI lamte nen pawh kan sawi tawh thin a, sawn pawh an duh a, Sairangah khuan, mahse Sairangah Railhead lo thleng tur anih si chuan, tuna sanction min rawn pek, vaibelchhe 12 nikumah hian athu chuanin sanction pawh kha a awm tawh ani, mahselangin Rail head tur a nih avangin a kudam a hi, Food Supply Depot, an mahni tih danah FSD an ti maia FCI lam chuan, chu chu rail wagon atanga unload zel tur a nih avangin tuna Sairang railhead, rail kawng tura hi chiang taka identify a, khata tanga aram zawn hi angaih tlat avangin kan duh angin kan hmanhmawh pui theilo a, an mamawhna chu kan hriat pui ani. Mahselangin kan duh angin kan kalchak hleitheilo a ni, ram kan identify hleithei rih tlat lo a. Hemi rual hian Oil Depot pawh hi thla khat tal daih tur Mizoramin kan neih a tul a ni kan ti a, Company (IOC) lamah te pawh theihtawp kan chhuah a, Company pawh an inhawng a, ram rawn endik tur te pawh an rawn tir tawh a, mahse Rel kawng laiah bawk khan kan la buai a. Hei pawh hi kan duh angin kan kal chak hlei thei lova. Tuna Vairengte a Satellite Oil Depot kan neih hi a Safety Norms, Central-in an prescribe an phak tawh loh lutuk avangin an khar lo thei lova. Chuvangin Ramnagar atangin oil kan la a, rail head thla khat tal daih thei tur hi keini pawhin kan neih ramchhungah Aizawl hnaih deuhah kan mamawh a ni kan ti a. Bairabi-ah ni mai se, kan han ti thut thut a, mahse Silchar a la hnai lutuk a, chuvangin Sairang Rail a thlen hunah tih theih law law turin a tha zawk ang e, company pawhin min tih pui a, Sairang atan Oil Depot lian pawh hi kan la tum ran a ni tih pawh kha ka`n sawi tel duh a ni.

Tin, weigh bridge hi, bukna dik hi kan mamawh em em a. Weigh Bridge hi kan neih loh chuan bukna dik, hei tunlaia patla a khai ang chi chu a dik hlei thei lo a ni. Mi an sual duh phei chuan bukna diklo in thil hi a tih theih a. A pekchhuah leh a dawna lamah pawh a kal sual thei nasa a. Chuvangin weight bridge hi tunah neih belh zel kan la duh a. Zuangtui leh Serchhipah kan nei a. Hei hi kan privatized a, tunah phei chuan a chhe khat ta hle a.

Tin, a enkawltu hian ₹100 ah 75 a chang a, Sorkarah ₹25, a buk manah khan an rawn deposit ve thung a. Chutiang chuan retailer te leh kha ta tanga phur chhuak reng reng chuan Weigh Bridge a computer print out kha bill-ah an thil tel zel tur a ni. A thil tel lo chu a bill pass loh tur kan ti a. Tunah hi chuan bukna dik pangngaiin kan retailer te, a bik takin Aizawl ami te hi chuan buhfai te pawh hi Kudam atangin an la chhuak tawh a. A buk tling deuh hlekin mipui te pawhin la turah kan ngai a. Kudam atang chuan a buk dikin kan pe chhuak a ni tih kha ka'n sawi duh a ni.

Tin, tunah hian hei Lunglei PDC ami tur hi 2010-2011 Financial Year-ah hian Planning department-in min dah sakin Finance te nen Weight Bridge install lehna tur Nuai 19 min pe a. Hei hi a tender te, a quotation te pawh tihfel vek tawh a ni a. A thawktu tur pawh thlan fel tawh a ni a. Mahse bul kan la tan lo deuh hlek niin ka hria a. Reilo teah hna a tan theihin ka ring a. Tin, tun Financial Year thar 2011-12 ah hian Champhai leh Lawngtlaiah dahna turin tunah hemi budget min pass pui chuan nuai 38 kan nei leh dawn a ni. Chutiang chuan bukna dik zawka mipuiten, a consumer ten kan lak theihna turin theihtawp chhuahin tan kan la ve a ni. Amaherawhchu, kan duh angin PDC zawng zawngah dah thei lo mah ilangin, kan dah theihna chin chinah hi chuan tha taka function thei turin kan duh a ni tih kha kan sawi duh baw a. Tin, nia... sawi tur a tam mai a, mahse Pu Deputy Speaker, a tawi zawng zel a tih hram hi chu tha ka ti si a.

LPG chungchangah pawh hian Sawrkar hmasa sawrkar lai khan 'Gas in duh em' ti a inthing ri rui rui kha bur ruak a ni mai thei a, hmun kilkhawr zawkah hi chuan khatih hun lai chuan keipawh Aizawl-ah ka awm ve reng mai a, kan veng anghah hi chuan a rawn tlan ngai lo reng reng a ni. Kawngpui tlangdung laiah hian a agent hrang hrangte an tlan a, kha tih hun chung kha rei lo te a ni, Sorkar hmasa sawrkar tirh te, anihna takah chuan khatih hun laia han sawi ta ila, Congress sawrkar hmasak tawp dawn a Supply Minister-in a LPG a harsatna mipuiin a kan tawh en thli thlai tura committee a dinin an hmalak rah kha MNF sawrkar a din tirh khan a zar an zova, thawkkhat kha a rawn tam a ni.

Chung chu 2000 bawr vel a ni tawh a, 2000 – 2001, 2000 kum bawr vel a ni tawh mai thei a hnulamah kha chuan tlaivar var in Gas agent ho kawtah khan mipui an intlar thin a ni. Chu chu a kal dan a ni. Kan member zahawmtak Pu Thlenga pawh khan a kum a hriat bik ka ring chiah lo, a kum zawt ta ila chutiang chu a niin ka hria a. Chuvang chuan tunah hian kan duh thal leh kan duh thusam ang hi chuan Gas hi kan inpe ka la ti chuang lova, amaherawhchu, mipuite'n a tlaivar var a gas in chuh a gas agent kawta kawngpui kam tawt baw si traffic rush baw si, gas bur bo hlau baw si rilru hah tak leh taksa rim taka kan chang thin mahni vengchhunga gas point-a chumi point-ah chuan gas an rawn sem dawn a, number chumi atanga chumi inkar chuanin lak tur a ni tia hahtam taka an va lak mai a kan chhawk thei hi kei chu ka lawm a ni. Chuvang chuan an duh tawk leh an duh thal ang chuan kan la pe lo a ni mai thei, amaherawhchu, heng atan pawh theihtawp kan chhuah a ni. Mualkhang Bottling Plant hi 5 carousel a ni a, a rualin bur nga an thun thei a. Tunah hian bur 12 a ruala thun theihna (carousel 12) kuminah a khawl bun fel vek a ni tawh a, 12 carousel. Amaherawhchu, a bula ram, storage capacity han tih len na turin ram hectre hnih lak angaih avang in acquire a ngai a, hei hi la tih fel chiah loh ani a, tunah hian IOC General manager-in August ni 15 hma in hei hi chu kan chingfel ang a ti a, July ni 4 a alo kal khan min assure a, chumi anih chuan August

thla chhunga a tih fel theih (Bullet-in Gas a rawn phurh thlen hi a cylinder-a thun hmaa lo dah khawl na tur hi kan siamthat theih) chuan tun ai chuan a production pawh a sang chho ang a. Tunah hian nikhatah trip 10 atanga trip 12 vel hi an siam chhuak thei a, chung ai chuan kan la thun tam thei turah kan beisei ani.

Tin, Borkhola, Silchar ami pawh khu, kan sawrkar tirh chuan manual an la ni a, a carousel pawh an la sawi phak lova electronic filling pawh ani lova, mihringin an thun a, kan State chhung nilo mahse theihtawp kan chhuah puia kan hotute nen Deptt lam hotute nen tan kan la a, 24 carousel-ah electronic filling in, hei pawh hi a khawl bun fel vek ani tawh a, hemi pahnih atang hian, kuminah phei chuan gas supply pawh hi nikum lam ai chuan kan improve ani, mahse kan duhthusam ang tur erawh hi chuan a storage capacity te leh a raw material (gas) an rawn supply kawngte a that a lo ngai a, tunah hian Meghalaya border-ah Assam lam pang khu kawng chhiat lutuk avangin bullet, a gas phur thin ho a hi a lian deuh chi phei chu an tlan hlei thei lova, hei hian nasa takin problem min la siam a, chungte avang chuan harsatna kan la tawh deuh a.

Tin, Mualkhang bikah phei chuan, khulai Mualkhang vel kawng widening tih khu ruah asur nasat deuh phei chuan problem min siam tel bawh a, buhfai thiarah pawh ani tel deuh hlek a, hengah pawh hian thal hunah chuan kan improve leh ngei ang tih kan in beisei ani.

Tin, P.O.L lamah hi chuan phunna a awm lem lova, nikum lama Manipur an han buai lai tih loh kha chu hei hi chu kan hnianghnar thawkhat a, tin, quality control chungchangah khan Pu K.Liantlinga member zahawmtakin a sawi a, pawimawh kan ti a, hei hi theih ang ang in, a deptt ang pawh in kan check thin a, mahselangin khawi laiah emaw hi chuan lo fuh tawh lo te hi alo awm ve bawh ang a, miin thilsual tih an duh na na na hi chuan rin ai in mihring leh mihring in ven hi alo har hle mai tih hi ka hmu chhuak in ka hria a. Tunah hian kan Legal Metrology lam atang pawhin truck tanker hi 5225 an check zingah hian 38 driver hi an hrem a ni, hei hi quality duhthusam loh vang ani a. Hengah te pawh hian an tih (check) tawh hnuah te pawh hian anlo pawlh dal thei zel niawm tak ani. Zan dar 12-ah te pawh taima takin hna an thawk peih zel ani anti mai a. Heng ang te, a tu ber a chu ka zuk sawi lo a. Amaherawh chu kan thuawih lo lutuk, a Nodal Department ang a dik lo lutuk a an tih hi chu tha kan ti lo a. Nikumah pawh khan petrol pump 2 License kan suspend sak a. Tin, a company IOC pawh min endorse sak tur ani kan ti a, an endorse ve mai bawh a, tichuan a tawp lamah chuan an mangang khan ngaihdam an rawn dil a, tichuan kan revoke leh ta a ni. Chutiang chuan quality leh discipline te pawh hi kenkawh kan duh a, chung ang tur te pawh chuan tan kan la ve fe ani tih te pawh kha member ten min hriatpui ka'n duh a.

Tin, Consumer Affairs lam te pawh hi sawi tur phei chu a awm a, State Commission President te pawh kan nei tawh a, tunah hian State Commission Member tur hi advertise mek ani a, heng te pawh hi qualified diltu te an awm chuan kan la appoint leh turah ka ngai a. Tin, District Forum, President Aizawl te pawh hi a thar nikumah khan ruat ani a, retired District Judge Pu R. Lalthazuala dah ani a. Tichuan hei pawh hi rinai takin mipui te pawn kan hmang tangkai ta viau a. 2009 atanga kumin February thla thleng khan District Forum-ah hian case 1036 a lut a, State Commission-ah hian case

26 a lut a, tichuan case an dispose a chu District Forum-ah hian 1210 ani a, tin State Commission-ah hian 28 lai an dispose bawk a ni. Tichuan a dang hi chu sawi tel tawh lo mai ila a tha in ka ring a. Legal Metrology lamah pawh hian theih ang tawk hi chuan hei retailer bukna te, tin, LPG cylinder buk tling leh tling lo te, theih tawp chhuah in Legal Metrology lamin an check a, an hah ve hle a ni. Tunah hian Mamit District-ah duh angin kan la in dah thei lo a, a dangah hi chuan kan inawh kim ve tawn tawn a, Inspector-te kan indah ve a, mipui lamin an tangkai zia an hria a, rawn dah teh u an rawn ti a, Lawngtlai pawh kha an rawn ti an rawn ti a, an rawn ngen nasa a, Inspector Saiha a mi kan dah thla ta hram a. Khatiang khan Consumer-te thlavang hauhtu an nih avang hian bukna dik chungchangah te leh thil dang dangah hian Legal Metrology tangkaina leh an pawimawhna mipui lamin an hre tulh tulh a, hei hi tun aiin a department te pawh hi ti changtlung thei deuh ila, tun ai hian mipui tan thawk nasa thei ila tihte pawh kan duh khawp a. Mahse, vawiinah kan la ti thei rih lova, hei hi chu sum kan neih dan a zir te in kan la ngaihtuah zel turah ka ngai a.

Tin, Forest lamah hian working scheme te, working plan te hi a pawimawh khawp a, Pu Deputy Speaker, kan Private Teak Planters te hian teak leh thing dang an phun te hi tha taka an hralh theihna tur chuan Supreme Court order ang khan ni 12.5.2001 a Writ Petition No. Civil 202, 1995 a mi ina a tih angin working scheme hi Forest Area-ah hi chuanin siam tur a ni a, tin, working plan a ni bawk tur a ni a. Chuvang chuan, Private Teak Plantation-ah hian working scheme a ni tur a ni a, reserve area chungah chuan working plan a ni tur a ni tih a ni a. Hei hi tun hma in working scheme peih fel sa a lo awm lova, kan han Sorkar hnuah a hmaa an lo lak tawhnate nen theihtawp chhuahin kan han tang chhova, division zawng zawng working scheme kan han peih fel chhova. Tahchuan, Kolasib leh Thenzawl min approve sak a Ministry-in, a bak 12-te erawh chu tun hnaiah an rawn return tawp mai a, hei hi a kalpui zel dan tur kan la en turah ka ngai a, min approved sak mai turah kan ngaih lain, tun Zirtawpniah hian State Level Committee an thukhawm dawn a, Regional Office lam atangte pawhin Ministry aiawhin lo tel turah ka ngai a. Chungahte pawh chuan la sawiho ta sela, kan working scheme te hi a rang thei ang ber a min approve sak a ngaiin ka hria a. Amaherawhchu, tunah hian non Forest Area a mi, reserved pawn lam a mi hi chu guidelines neih sa Supreme Court thu anga siam, Ministry pawhin a min approved, kan gazette tawh angin private a thing lo phunte pawh kih theih tur a nia, a bak working plan erawh hi chu kan member zahawmtak Pu C.Ramhluna hre Chiang em em tu ani a, a pawimawhna pawh kha, nichinah pawh a sawi lang tawh a. Hei hi 13th Finance Commission in a condition pakhat a min siam ve/minpek ani a, chu pawh nilo mahse, he kan teak phun te, a bik takin Mizoramah hian teak kan phun tam a, kan ram economy siamtha thei hi plantation kan nei ani. Chungte avang pawh chuan, tuten emaw min nawr vang pawh ni lovin, vawiin nia a hralh hun tawh si, a hralh dan kan ngaihtuah a tul a, chung atan chuan theihtawp hi department ang pawhin kan chhuah a, tunah hian First Preliminary Working Plan Report te phei hi chu kan zo deuh vek tawh a. Tunah hian Lunglei bik hi zawhfel ani tawh a, Mamit zawh fel ani tawh a, Mamit, Aizawl leh Kolasib Division te tunah reiloteah an zo ang a, tichuan, Tlabung leh N.Vanlaiphai hi reilote, tunkar chhoah hian an zawh theih mai kan beisei a. Chumi chu ni 29 a an meeting-ah hian an approve ang a, heng hi min approved sak chuan a final working plan preparation kha a kal chho thei ang a.

Kan tum dan chuan 80% above tal hi nakum January thla ah hian approve turin Ministry-ah theh lut thei ila tih hi kan tum dan ani. Hei hi tuna kan tanlak dan chu a ni a, chungte chu kan tihfel theih chuan 13th Finance Commission in a condition min siam pawh kha kan tipuitling thei turah kan ngai a.

Tin, Mau hi member tam takin in han sawi ri a, mau hi a pawimawhna member-ten in sawi ang khan kan hria a, tunah hian kan maute hi humhalh a ngai khawp mai. Kan mautuai te hi kan han sawi thin a, Forest Department hi tunhma te pheih kha chuan Rawtuai Bazara an mante hian ramhnuai veng lova bazaar vengtu te an tih thin kha a ni a. Chutiang khawp chuan tawngkam chhe tleuh nan mautuai leh sarep te avang hianin mi hi an hmang thin a. Amaherawhchu, hei hi han inkhap bur leh lamah chuan a har bawk si a, leh lamah keimahni state hnuai corporation MIFCO te pawn a tinin an lo siam a, khap ngawt chu har tak a ni.

Pu NIRUPAM CHAKMA : Pu Deputy Speaker point of clarification CADC chhungah chuan Rawtuai zawrh hi khap ani.

Pu H. ROHLUNA, MINISTER :a lawmawm khawp mai chutianga an khap theih chuan. Helamah pawh hian kan in encourage telh telh a, awareness te pawh hi tun aia kan create nasat hi a tulin kan hre hrim hrim a. Tin, ramhnuai ami veng tur hi chuan staff kan indaihlo hrim hrim mai a, kan veng, kan khap bur pawh ti ilangin khawi laiah emaw midang an chhuak zel dawn tho a, kan inkhap hneh tak tak dawn chuang lova. Amaherawhchu, mipui lamah hian hetiang rawtuai khawrh hi a that loh zia kan inhrilh chian hi a reh hma theihna ber tur chu a nih ka ring a. Tin, tunah hian kan maute humhalha, resting period kan pek hi tul nia hriatna kan nei a, kan revenue tha ber a ni a, Forest Department in, chuti chung chuan mahal tepawh hi kan han titawp ta a ni. Tichuan, a hnuah permit system in mahni huana mite na na na hi chu i pe leh ang hmiang kan han ti a, kan han pe leh chhin a, mahse mahni huan han tih khan, VC pass a ni emaw, periodic patta alo ni emaw, anmahni chin tak nilemlo, ramhnuai amite kha alo nita thin a. Khang kha a lo nih khan vaiho hnenah permit an hralh a, annin dimdawina nei miah lovin an lo ti chereu leh bawk si a, an lo kit zo si a. Chutiang chuan hei pawh hi a thalo a ni an ti a, tunah hian permit system an tih pawh hi kan Chief Minister thurawn angin kan titawp hmak a. Chutiang chuan, Cachar Paper Mills pheih chu an mangang nasa mai a, hemi anih loh chuan raw materials pawh khawi ami mah kan hmu thei ta love an ti a, an mangang a ni. Mahselangin, mautam zo hlim a ni a, kan mau a rem zo mai dawn, resting period pek an ngai, churang chuan thla engemaw zat hi chu kan tih a ngai kan ti a, kan tang lui tlat a, vawiin thlengin mau pum ang hi chuan permit pawh kan pe ta lova, mahal pawh kan pe ta lova, kan chawlh tir rih a.

Amaherawhchu, tunah hian Bamboo Chipping Plan, vawiinah pawh Dapchhuah-ah an flag off dawn a ni a. Tin, NLUP hnuai atang leh mimal ang pawhin Agarbati stick tunah chhungkaw tamtakin Industry an din a, khawl an nei a. Heng raw material atan erawh hi chuan kan pek a tha ang a kan ti a, chutiang chuan BDA kaltlangin permit chu kan pe a ni.

Pu C. RAMHLUNA : Pu Deputy Speaker, ka'n tibuai lawk. Message ka dawn danin Zonuam area-ah sawn tunlaiin vai in mau nasa takin an sat tih thawm kan hria a, hei hi permit pek nge a nih a? Zonuam area velah khuan (DEPUTY SPEAKER : Khawi lai nge Zonuam area? Zawlnuam area zawk a niang.) aw.

Pu H. ROHLUNA, MINISTER : Pu Deputy Speaker, chutiang chu a thawm chu ka hre lova, BDA ah hian a permit kan pe a, chuta tang chuan an lo inruai palh te a nih loh chuan mimal dang tumah permit pek kan nei lo tunah hian. Engpawhnise, kan member zahawm takin khatia a rawn tih chuan kan Officer te pawh an awm a, a mawhphurtuten lo chhinchhiah sela, lo enquire nghal se, khatiang kha a lo awm a nih chuan. Dan anga permit kan pek loh hi chu tunah chuan State pawnah hian thawn chhuah kan phal miah lo a ni, thawn chhuah tur chu Value Edition a awm tal tur a ni. Value Edition awm lo hi chuan kan State pawnah hian Mau hi a chhuak tur ani lo tih hi tunah chuan kan thu ro lum a ni tih hi ka'n sawilang duh a.

Tin, Community Reserve hi, nia hei hi member te pawhin an rawn sawi lang a. Hei hi Department ang pawhin thil thar kan tih tun financial year kaltaah hian a awm a. Tin, 13th Finance Commission Grant atang hian assistance Forest division 6-ah Community reserve 54 hi assistance (tanpuina) kan pe a. Chutiang chuan people's participation in conservation of forest, Mipui tena tha tam zawk an thawh theihna tur atan kan ram Forest humhalh chungchangah tan lak ho a tul a ni tiin hetiang zawng hian kan han kalpui a. Department mi ringawt hi chuan kan duh angin ram ngaw humhalh te, a siam belh te hi kan zo tawk lo a ni tih kan hai lova. Chuvang chuan mipuite nena thawh hona tha zawk kan neih theihna tur atan te, tin, Mizoram te phei chu kan vannei a, Village Council te kan nei tha a, Village safety reserve te, supply reserve te, tin, YMA tlawmngai pawl te pawhin YMA Park te, Community Reserve lo humhalh te an nei a. Hengte hi khawi atang mahin tanpuina dang a awmhlei thei lova, tih hi a department ang pawhin, a nodal department kan ni a lawm keinin i ngaihtuah sak ang tiin an duhthusam ang ni lo mahse, a hming tal pawhin hei hi tanpuina kan pe a. Tin, kawng kam thing hi tha taka kan humhalh theihna turin neitu awm a ni tih hi chhinchhiahna siam ila kan ti a. Division 3-ah Aizawl, Champhai leh Kolasib-ah hian kawng kam thing a tualto te pawh hi YMA rawng leh Forest rawng kan han hnawih tir a, mipui a kal vel te leh veivak ten an zah zawk nan leh an duat zawk theih nan, a puitlin theih nan tiin chutiang chu department atangin kan ti a ni.

Tin, Nauban te hi foreign atang te, khawchhak lam atang ten min run nasa a, ramhnuaiah sumdawn nan te an rawn zawng thin a, a chereu nasa em em mai a. Hei hi Department-in thil thar kan tih bawk chu a ni a. Tunah hian Sairang Hitech nursery hmunah khuan orchi-darium, nauban chi hrang hrang, kan ram chhung ami emaw, state pawn ami te pawh, a bik takin kan ngaihpawimawh chu local variety, kan state chhung ami hi lak khawm vek a, chung chu tha taka enkawl kan duh a. Anih loh chuan nakinah piracy te a nasa a, kan ram chhung ami ngei te pawh min rawn ruk sak anga kan hriat loh in, an ram ami original emaw te min tih sak ang tih kan hlau va, chung

atan chuan orchidarium hi tunah hian a in te pawh kan sa tan der tawh a, kan zo tep tawh ang a.

Tin, medicinal plants-ah pawh hian kan local variety, local medicinal plants hi khulai Sairang hitech-ah khuan chi hrang hrang, mizoten, kan pi pu ten a damdawi a kan lo hman thin, hnim te, thing te, khang ang chi kha kan la khawm a. Chung chu phai lam atang te leh mizo ngei ngei te pawhin en duh kan awm pawh in entir atan te chintir ani tih kha ka'n sawi lang duh a.

Tin, kan Aizawl Zoo-ah hian Member-ten min hriatpui tura ka duh chu nichinah kan Member zahawmtak Dr. Thangtea pawhin a rawn sawi tawh a, Aizawl Zoological Park hi theih ang angin kan enkawl chho va. Khu, record tha deuh mai an nei leh nghal a. Vavu te an tui a, an keu a, khang kha an tipuitling chho thei a. Tin, chumai nilovin Arawn te pawh hi an tui a, an keu a, amaherawhchu, vanduai thlak takin a enkawl tuten an la enkawl thiam tawk lova, a note erawh kha chu kan ti thi palh hlauh va, zep thu a cheng lova. Hauhuk pawhin tunah chuan note a nei tawh a. No a hring tlat mai ani, khuta kan Hauhuk, Zoo ami khuan, hei hi Sahuan dangah a awm ngailo niin kan hre hial a. Chutiang chu record tha deuh deuh mai kan Sahuanah khuan kan nei a, hei hi khawvel hriatah pawh chhuanawm tak ani tih kha kan sawi lang duh ani.

Pu Deputy Speaker, sawi tur a tam a, mahse, kha kha kan sawi theih tawk ni maisela. Tichuan Pu Dy. Speaker, ka Demand No.17-na Food, Civil Supplies & Consumer Affairs - cheng vaibelchhe zahnih sawmhnih pakua, nuai sawmthum pasarih leh sangthum leh Demand No. 36 - Environment & Forest cheng vaibelchhe sawmruk, nuai sawmhnih pakua, a belh khawm in cheng vaibelchhe zahnih sawmriat leh pakua, nuai sawmruk leh paruk leh sangthum hi he House zahawmtakin min pass pui turin ka rawn ngen a ni.

DEPUTY SPEAKER : Awle, Pu H. Rohluna kan Minister zahawmtakin a rawn wind up a, a Demand-te pass a rawn dil a, kan buk dawn ang a. Demand No. 17-na Food, Civil Supplies & Consumer Affairs cheng vaibelchhe zahnih sawmhnih pakua nuai sawmthum pasarih leh sangthum. Demand No. 36 - Environment & Forest cheng vaibelchhe sawmruk, nuai sawmhnih pakua, a belh khawmin cheng vaibelchhe zahnih sawmriat leh pakua, nuai sawmruk leh paruk leh sangthum te hi pass remti a piang in remti ti rawh ule (Members : remti) remti lo kan awm em? Awm lo maw? Awle Pu H. Rohluna Minister zahawm tak Demand No. 17-na Food, Civil Supplies & Consumer Affairs, cheng vaibelchhe zahnih sawmhnih pakua, nuai sawmthum pasarih leh sangthum. Demand No. 17-na Food, Civil Supplies & Consumer Affairs, cheng vaibelchhe zahnih sawmhnih pakua nuai sawmthum pasarih leh sangthum, a vaiin vaibelchhe zahnih sawmriat leh pakua nuai sawmruk leh paruk leh sangthum te hi he House hian lungrual takin a pass ta a ni.

Pu H. ROHLUNA, MINISTER : Pu Dy. Speaker, ka lawm e.

DEPUTY SPEAKER : Awle, tunah chuan kan Minister zahawmtak Pu Zodintluanga, a Demand te rawn wind up a, pass te rawn dil ve leh nghal turin ilo sawm ang.

Pu ZODINTLUANGA, MINISTER : Pu Dy. Speaker, ka lawm e. Kan member zahawmtak takten kan Department chan ve te vawiinniah thahnem ngai takin hma kan sawn ve theih na atan leh an ngaih pawimawh zawng te thahnem ngai taka an rawn sawi avangin lawmthu ka sawi hmasa duh a.

A hmasa berin Information & Technology Demand No. 48-naah hian member pathumin Pu Dy. Speaker, an rawn sawi a. He Department hi Department pawimawh tak mai a ni a. Kan thalai ten a eizawna tam tak an neih theih na tur department a ni a. Vawiinniah hian I&T Department angin sorkarin chak takin hma a la ve a, SWAN “State Wide Area Network” kan ti ve a, hengte hi a bul tan nan Aizawlah tan a ni ang a, chumi dawtah District Capital-ah tih leh a ni ang a, a dawt lehah block headquarter-ah te dah tum a ni. Kum 2011 chhungin Aizawl chu peih hman kan tum a ni. Dist. Headquarter hrang hrang atangin data internet a inzawm khawm kan neih theihna tur ani a, chumi atana pawimawh ber pakhat State data (Center) chu agreement te siam fel in tender te kan ko tawh a ni. Department hrang hrangin anmahni data an hmalakna te, hnathawh te an dah khawm a, chu chu State Data Center-ah hian an rawn dah khawm a, duh duh hunah mipuin an en thei tawh dawn a ni. Tin, Soft-ware Technology Park hi MOU sign theih mai turin kan peih tawh a, tun atanga hun rei lo te chhungin tan kan tum tawh a ni. Kan thalai tam tak te hna hmu lova hna zawnga phai khawpuiah kal thin te hi Aizawlah hna kan pe thei tawh dawn a ni.

Tin, CSC te hi thingtlang hmun kilkhawr tak takah te hman tur atan ruahman ani a, income te, residentiaial etc, certificate te heng atang hian lak theih turin ruahmanna kan nei a district leh block hrang hrangah VSAT dah kan tuma tunah hian, VSAT thenkhat te chu Aizawla lo lut mek tawh a ni. Tin, ‘E’ district kan ti a pilot project atan Aizawl hi min rawn thlang ve a, hlawhtling takin kan zo tawh a, a hawna lampang hi kan la hmanhmawh lova, a chhan chu a programme a te a fel leh fellow a takin mipuiin hmang hmasa se tih avang a ni. A system te tha mahse duh angin kan la hmang lova, chuvangin a hawn lampang hi kan la ti lova ‘E’ district atang pawh hian certificate DC Office atang hian a awm a, on line-in a lak chhuah theih a ni.

District dangah hian kum 2012 chhunga zawhfel vek hman kan inbeisei ani. Tin, hetiang ang Internet leh I&T angah hi chuan a pawimawh ber chu connectivity hi ani a. Connectivity a that loh avangin vawiin niah Company lian tak tak te pawh kan ramah hian an la rawn lut thei lova. Kan hman ber chu BSNL ten Satellite hmangte leh an OFC (Optic Fibre Cable) te lei a phum te an ni a, hengte hi a chak lo em em a. Chungtiang chu kan neih that theihna turin sorkarin theih tawpin hma a la a. Overhead Cable nei turin PGIL kan ti a, chungangte pawh chu kan dawr a. Tender tepawh an chhuah tawh niin kan hria a ni. Chutiang ang huna connectivity tha kan neih hunah chuan kan ramah company liante an rawn lut ang a. Mizo fate hi kan vannei em em a, kan lei te hian tawng chi hrang hrangte hi awlsam takin kan tawng thei a. Vawiinni a phai a mi in luah a, zankhaw tai rek rek a hnathawk thin te pawh

Aizawl khawpui chhung atanga kan thawh tir theih hi kan beisei ve a. Chutiang tur te chuan hma kan la a. Hei thingtlangah te pawh Block Hqrs. ahte Optic Fibre hi tih kan tum a. Chutiang ti tur chuan Ministry of Railway hnuaiiah Railtail kan ti a, chungte chuan kum 2012 February hma ngei a thawkzo turin ruahmanna an siam ani tih kha kanrawn sawi hmasa duh a ni. I&T Deptt., -ah chuan duhtawk mai ila.

Tin, a pahnihna, Demand No. 26 – I&PR Deptt., hi Member 7 lain anrawn sawi ve a. A tam zawkin anrawn sawi chu TV leh Radio an mamawhzia a ni a. Sorkar hmasa kum 10 chhung khan TV vawikhat an sem ve a. Khami ang kha an beisei ve deuh a ni ang. Amaherawhchu, Radio hi chu kan thingtlang lam MLA ten an sem theih turin engemaw zat kanrawn pe ang tih kha kanrawn sawiduh a ni. Tin, Pu Nirupam Chakma'n arawn sawi pakhat ka ngaih pawimawh em em chu kan society a negative lutuk a thil kan chhuah thin te hi a pawika ti a. Hei Internet-ah te Misual.com an tih lawrkhawm an tih leh Mizo website-ah te hian ka lut nasa a. Chanchin bute pawh hi kan en nasa a. Hengah hian kan society hrim hrim hi kan negative khawp mai a ni. Miin thiltha anrawn sawi lain a chhe zawng a sawitu engemaw zat hi kanawm ani. Hetiang ang arawn sawi kha ka ngaih pawimawh zawng tak a ni a. Chanchin buah te pawh hian thil a positive zawnga kan chhuah chuan mipui hi kan la in hruai tha thei a. Entirnan mai mai, Aizawl khawpui chhungah Sorkar hmasaah bawlhhlawh tawp tak tak carbage trailer a awm a. Chutiang ang thenfai a tih kan tum lai chuan Media lamin min pui nasa em em a. Carbage trailer khawpui kawngsira awm, thovin a bawm, khatiang kan pahna PPP Mode-a kan kal naah khan Pu Deputy Speaker, Media ten Aizawl atang tea bawlhhlawh paih chhuah a mawi tawh loh ziate anrawn sawi atang chuan waviina Member tam tak pawhina Aizawl khawpui a fai tawh ziate anrawn sawi a.

Hmanni lawkah pawh kan Media Member te North East Tour-a an kal a, anrawn sawi haw chu Aizawl khawpui lo fai zia tih te kha a ni. Chutiang atangte chuan Media hmangin Mizote hi kan lo in hruai tha thei a, positive thinking nena kan inkaihhruai hi chuan hnam changkang tak, hnam hruai nuam tak kan ni thei dawn a ni tih kha karawn sawi duh a.

Tin, Member zahawmtak Dr. R. Lalthangliana'n arawn sawi, vehicle chungchang kha a dik khawp mai, Pu Deputy Speaker. Kan Department hian Motor kan indaihlo hle mai a, pawika ti a. Amaherawhchu, arawn sawitu kha a sawi awm lo mangle aw, ka ti a. Sorkar Notification No.B.15015/6/2003/GAB dated 26th October, 2007 hian I&PR Department-ah hian Motor Director-in pakhat, standby 1, Pool vehicle 1, VIP Car hi 4 chiah min phal sak a ni. He order a chhuah lai hian a mah Pu Deputy Speaker, Cabinet Minister niin I&PR a chang a. Khatih hun lai khan hetiang hi kan mamawh a ni, hetiang lek hian kan thawk thei lo, lo ti selang chuan waviina kan harsatna hi chu a sutkiang ngei ka ring a. Vawiinah thil tithei tawh lo opposition atanga arawn sawi a, arawn ngai pawimawh tha leh te hi lawmawm ka ti a. Khatih hun lai khan lo ngai pawimawh nise chuan waviinah sawi nawn a ngai tawh lo tur a ni a. Amaherawhchu, Pu Deputy Speaker, kan Member zahawmtakin arawn ngaipawimawh kha Sorkar pawn a ngaipawimawh a. Hei NLUP kan kalpui a, NLUP atangin mipui hnenah NLUP kalpui dan a that zawkna atan te, information tam tak mipui hnenah hrilhfiah tur a ngai a.

Chutiang atan chuan district tinah I&PR tan hian Motor hi pek tumin hma kan la mek a ni, tih kha he House zahawm tak hi ka rawn hrilh duh bawka a ni.

Tin, advertisement chungchanga bill an lak har thu kha an rawn sawi leh a. Hei kan Department atang hi chuan advertisement bill hi an pending ngai lova. Department dangin an lo pending te a nih chuan kha kha chu kan hriatpui lova. Tin, Journalist Welfare Fund kha a lawmawm khawp mai, a hun lai khan Journalist Welfare Fund-ah kumtin nuai 10 an dah a. Khami nuai sawm an dah kha kan lawm tak zet a ni. Amaherawhchu, kha nuai 10 a kha kan hman tangkai dan kan duhtawk lo hle a, an sorkar hmasa a an lo tih ani a, an tih tawh sa kha a aia thain Pu Dy. Speaker he sorkar hian kan chhonzawm a, nuai 10 an dah thin a kha an hman loh chuan kumkhatah khami Dan ah chuan MJA member te an lo thih chuan ex-gratia an tia pawisa hlawm a pek tawp mai an nei a ni. Khatah khan an MJA member, an welfare ina an hman theih hun chu an thih hunah chauh an hmang thei a ni, kumkhat chhung khan an lo hmang lo a nih chuan a lapse tawh mai thin si a, Dan mumal tak siam a nilova, churang chuan kumtawpawh Journalist-te zin nan an hmang zo mai thin. Chungte chu sorkar hmasain a lo tih tawh kha, a aia changtlungin, a aia tha zawkin ruahmanna kan siam a heng pawisa te hi, lapse tawh lovin damlo kan chanchinbu mitten an thih hnu chauh a he welfare fund hi dawng tawh lovin an damlai pawhin chhawr ngei sela tiin Journalist welfare fund hi kan manifesto a kan dah angina kan siamtha a. Chu Dan tharah chuan kan chanchinbu miten natna khirh tak an neih chuan heng pawisa te hi an hmang thei ang, tin, vawiinniah pheih chuan a aia tha lehzualin kan siamtha a, an dependent family thlengin he welfare fund hi an hmang thei tawh ang tiin kan siamtha tawh nghe nghe a ni tih kha kan rawn sawi duh a ni.

Tin, nizan lama local T.V. a sports programme rawn chhuak a kha I & PR hian pawisa pakhatmah a chawi lova. Tin, kan local cable T.V. te hian sports programme te an nei a, Doordarshan pawhin sports programme an nei a, hengah hian an duh hun huna mipui, Zoram mipui tana a hmuhawm tura an rin, hmuh tlak a an rin hi an chhuah ve mai thin ani tih kha ka rawn sawi tel duh a ni e. Kha kha I & PR-ah chuanin kan react theih nisela, khatah khanin duhtawk leh mai ila.

Pu LALDUHOMA : Pu Dy. Speaker, a kalsan leh hma khan T.V. kha thingtlang lamah chauh khan, T.V. kha i ti khan ka hria a (PU ZODINTLUANGA, MINISTER : Sorry, radio) a engapawh chu nise khawpui chhungah hian mamawh ve tak tak an awm tho si a khatia rualkhai lo deuh a tih tur kha emaw ni dawn le ?

Pu ZODINTLUANGA, MINISTER : I bialah pawh thingtlang lam an tam ve tho kha maw. Khalai kha I & PR chungchang a kan sawi theih ni mai sela, Pu Dy.Speaker, hei kan department angin kan hria a, I& PR pawimawhna chu, sawrkar leh mipuite inkara awm, mipuiten an hriat duh sawrkara thlen te leh sawrkarin mipuite hriat atana a duh puan zar hna a ni a, an pawimawh hle a ni, tih kha ka rawn sawi duh a.

Tin, a dawt lehah chuan Demand No – 22 na, Sports & Youth Services hi kan rawn sawi kai leh anga, hetah hian Pu Dy.Speaker, member 19 lai maiin an rawn sawi a, lawmawm ka ti a, a hmasa berin kan member zahawmtak Pu P.P Thawla, hei a awm tawh lo a, alo ngaitthla tho anga, ani sawiah hian Saiha lampang, chhim lampangah min rawn ngaihtuah ve sela tih leh Cricket Stadium chungchang leh Cricket Stadium a donate tute kha a rawn ngaih pawimawh deuh kha ani a, Saiha ah sawn Pu Dy.Speaker, kum 2008, kan sawrkar hnu atang hian Sports & Youth Services hian hma nasa takin a la a, Boxing Ring, boxing an thiam tih kan hria a, kan dah sak a, tunah an field te kan chei sak mek a ni tih kha kan rawn sawi duh a ni. Tin, a ngaihpawimawh heti lampang a bial lampang ai mah hian Cricket lampang kha a rawn ngai pawimawh a, eng nge ni compensation tih vel lamah khan anih ka ringa, hei Cricket Stadium khu DoNOR atangin 11.28 crores sanction ani a, hei hi tah hian sawi kan duh chu, Mizoram Cricket Association te hmalakna hi a ropui ka ti a, an ni hian theih tawpin Mizoin Cricket khawvela hma kanlo sawn ve a, India ram aiawha kan khelth theihna tur Mizo hian talent tha kan nei ani tih hria in, Cricket Association te hian theihtawp an chhuah a, mimal ram te bia in, an mahni pual ngeiin Cricket Stadium neih an lo tum a, chungah te chuan mi tlawmngai tak tak Pu F.Rotluanga Vaivakawn te, Pu H.Siku Ramhlun North te, Pu Lalrinsanga, helaia kan member zahawm tak lo ni thin, kan Deputy Speaker te pawh lo ni thin te, Pi Vanlalremi Model veng te, Pu Rampuia Zarkawt te, heng te hian a kalkawngah te, a ram te khu a thlawna kan neih theihna tur atan an donate a ni. Chuvang chuan nichina compensation an pe em? tih kha mi tlawmngai ten an donate a ni a. Mahse heng zingah hian Sorkar in hna te pek theih ang ang chu kan pe ve a ni tih kha ka'n sawi duh a.

Tin, Cricket chung chang hi Pu Deputy Speaker, a lawmawm ka tih em em chu nimin piah mai khan Pu Sushil Halagiri BCCI Adviser a rawn kal a. Kan Chief Minister zahawmtakte hmuin helaia kan Cricket Stadium tur te, kan Cricket Association in BCCI Affiliation kan neih theihna tur atan te a tangkai theihna tur atan Mizoram a rawn tlawh ve a. Chumiin a sawi, ka lawm em em chu, nichina kan sawi, kan Catch them Young kalpui, kum 2005 atanga an lo kal pui, kan lo hriat mang loh kha a hlawhtling tawh viau a nih ka ring a. Durtlang Cricket Academy a han tlawh chuan (ani hi Pu Sachin Tendulkar-a chhar chhuaktu kha a lo ni a, khawlaia a khel a hmuin) Sachin Tendulkar-a aia tha 5 vel ka hmu a ti tlat a ni, Mizo zingah. A ropui ka ti a. Khatiang ang talent kan nei te kha, waviin niah Court leh mithiam tak tak training na nei lo mah ila Mizo fate zingah talent kan neih a rawn hmu thei kha a lawmawm kan ti a. Khung ang khuan Cricket-ah Stadium puitling kan neih theihna tur bakah India ram pumah Cricket bik atan liau liau a Stadium awm chhun a la niin ka hria te a la ti leh zel a. Chuvang chuan kan Cricket Association ten an hmalakna hi kan Zoram thalai te tan nakinah a la pawimawh dawn a ni tih kha ka'n rawn sawi leh duh bawk a ni. Tin, a tam zawk hi chu Pu Deputy Speaker, lawmthu sawina a ni a. Kan react vak lo ang a.

Pu Rinawma, kan member zahawm takin Tuirial Airfield chung chang kha a rawn sawi a. Tuirial Airfield khu, khu khu kan ngai pawimawh a. Sorkarna Pathian leh mipui zara kan han lak khan engtin nge hma kan lak ang? tiin kan Director te nen a hmunah kan zu en a. Pawi kan tih em em mai chu Sorkar, Pu Lal Thanhawla sorkar hmasa ina Sports & Youth Services Department a a thehlukhan khulai Tuirial Airfield khu a landing area atanga 50 metres khu Sports & Youth Services tana pek a ni. Amaherawhchu kum 10 kan han sawrkar lova kan han sawrkar leh hnua kan han en chuan khulaia metal thlawhna tum chin an black topped chin deuh

chauh mai khu kan lo chang tawh a, a dang zawng chu LSC a lo ni tawh a ni. Pu Deputy Speaker, a pawl khawp mai. Chutiang chu vawinah Sawrkarah, Revenue Department lamah te complaint-te kan thelut a, hma kan la mek a. Khumi atan khuan tunah mithiamte kan ruai a, kan thalai ten infiamna, infrastructure nasa taka hma kan lakna lamah huang zauh zel ila kan ti a, khulaiah khuan Bike racing-te kan tih theihna tur atan DPR siam turin mithiamte kan dawr mek a ni tih kha kanrawn sawi tel duh bawk a ni.

Tin, kan member zahawm tak Pu B. Lalhlengliana'n Rajiv Gandhi Stadium chungchang leh Pu Dr. R. Lalhangliana'n arawn sawi kha Rajiv Gandhi Stadium-a hnathawh an chhonzawm tha an tih kha tlemrawn react leh ka duh a, Pu Deputy Speaker, Rajiv Gandhi Stadium atan hian Twelfth Finance Commission hian Vaibelchhe 25 min pe a, Twelfth Finance Commission hi a period chu 2005 – 2006 leh 2009 – 2010 thleng tur a ni. Chuan 2011 – 2011 atangin Thirteenth Finance Commission arawn in tan leh a, Pu Deputy Speaker, kum nga chung teh meuh mai kha, kha vaibelchhe 25 kha hman ngaihna an hre lo a ni.

Rajiv Gandhi Stadium siam tum kha an sawrkar kum tawp dawn lamah Aizawl Lammualah lung an phum a, vawinah pawh document awm vekin, Assam Rifle atangin permission pawh an la nei lo a ni. Kum 2008 sawrkar thar a lo pian khan bawhzui kan han tum a, kha project-a kha bawhzui tlak a lo ni lo. Vaibelchhe 25 an hman tumna chu saw lai Gallery Block - pahnih chiah saw a ni. Mipui entu tur thalaite'n a an hmannna tur atan, thalaite infiamna atan vaibelchhe 25-ah khan naia khat mah project-ah khan siam a ni lo, an work order atangin. Chutiang anih si avang chuan Pu Deputy Speaker kum 2009 leh kum 2010 hi a ral mai dawn si a, kha vaibelchhe sawmhni leh panga kha hman vat vat loh chuan hman loh ang khan a liam dawn si a, churang chuan kan Chief Minister zahawm tak leh kan Home Minister zahawm tak ten a hmun min dap pui a, khutah mualpuiah thalai te tan bul kan tan ani. Vawin niah enga tinge state plan atang a dah a ngaih tak Pu Deputy Speaker, 12th Finance Commission-ina pawisa min finance kha 13th Finance khan uluk takin an en a chhonzawm tlak an tih te an chhonzawm a, he Aizawla Stadium kan neih theihna tur a tan hian kumnga chungah pawh pawisa hman ala nih loh avang khan chhonzawm tlak loah an ngai tlat. Vawin niah chung avang te chuan kan thalaiten kan tuar tlat ani tih hi he House-ah hian ka sawi duh ani. Chu chu Rajiv Gandhi Stadium chungchang ani a, vawinah vaibelchhe sawmhni panga khuan Pu deputy Speaker, kan thalai ten khelmual thatak an nei dawn a, athletic tract tha tak a awm dawn a, entu mipui tam tak thut theihna tur First phase-ah khuan kan zo dawn a, tin, motor tam tak, za tam tak park na tur hi he vaibelchhe sawmhni panga chungah hian an thawk dawn tih hi he House zahawm takah hian ka hrilh duh ani.

Tin, Member zahawmtak Pu B. Lalhlenglian'an Sorkar hmasa atang a vaibelchhe sawm kan lo lak tawh a tih lai a kha kan Deptt kha kan han zawn tir a, vawinah kan recess lai te khan kan han zawntir a, vaibelchhe sawm hi Pu Deputy Speaker, central sawrkar atangin sanction kan hmu tlat lo mai a, a lo bo em ni aw ! Khawiah nge a awm tih hi kan zawng hmu zo lo ani, churang chuan kan hriat ve chhun chu Zobawk academy atan chuan Pu Deputy Speaker, Donor Ministry in Agust ni hnih 2010 khan sanction arawn pe a, chutah chuan amount chu nuaih sangkhat zasarih sawmnga pakhat leh point sawmhni pali hi donor in a minrawn santion kan hmuh chhun ani a, sawrkar hmasa a vaibelchhe sawm kha kan hmu zo lova, zawnpui

ngai tur chi chu ani lova an hre sual palhah i ngai mai ang, Pu Deputy Speaker, tih kha kan rawn sawi duh a, Tin, District Sport Complex hi sawrkar hmasa atang a, an chhonzawm kha a ti a, Dr Thangtea, kan Member zahawm takin lawmthu a rawn sawi kha a lawmawm ka ti khawp mai, kum 2005-ah khan heng hna zawng zawng hi thawh tawh a lo ni a.

Pu Deputy Speaker, kan chief Minister zahawm takin he pawisa cheng vaibelchhe 11 hi Sorkarna a chan tirth atang khan Planning Commission-ah te, Prime Minister-ah te, “Mizo thalai te tan heng hi chu min pe leh hram rawh u”, tiin a zuk nawr a ni. Central Sorkar chuan an hnathawh kha an rawn en a chhonzawm tlakah an ngai lo, pek tlakah an ngai lo. UC an theh luh a thlalak nena an theh luh te kha thlalak in ang te kha hmun hran hranah thingtlang a mi, khaw hran hran ami thlalak inang te kha theh luh a lo ni a, kha an hmalakna te kha Central Sorkarin Pu Deputy Speaker, an lo phal lo a, kum 5 chhung teh meuh mai kha sanction kha an lo pe duh tawh lo ani a, amaherawhchu, kan Chief Minister goodwill avangin crore 11 kha an rawn release a. Chutah chuan vaibelchhe 4 chuang hna an lo thawh tawhna ang a lo ziah, a tak hmuh tur awm tawh lo, sak laia sak zawh mang si loh, mahse chhonzawm na awm tawh si lo, contractor te tan pawh pawisa a awm tawh loh avangin lo tawih chhe tam tak an awm, chungte chu hrethiam in Pu Deputy Speaker, an leiba zawng zawng te kan rul a, tin, a chhonzawm tlak ni a kan hriat a tih theih ang zawng zawng kha chu kan rawn ti vek ani tih kha ka'n rawn sawi duh baw k a ni.

Tin, kan member zahawmtak Pu K.Liantlinga rawn sawi, education te nen a tan ho rawn tih kha a dik khawp mai a, hei hi kan tumna a rei tawh a. Education-te nen a kan thawh ho theih chuan Mizoramah kan thalai infiammi ten hma kan sawn ngei ang tih kan hria a. Hei hi tun kum kan Sport Budget, vawiin ni a kan sawi mekah pawh hian nuai 10 lai Mizoram School Games atan hian kan budget-ah kan dah ani tih kha ka'n rawn sawi duh a. Tin, Sports Scholarship, hman atanga an lo tih tawp tawhte hi a awm leh theihna tur atan pawisa kan dah belh tih kha ka'n rawn sawi lang duh baw k a ni.

Tin, kan member zahawmtak, Pu K.S. Thanga'n a bial chhung, hnaite a stadium te a awm theih chuan Aizawl khawpui in an ring dawn ani tih kha vawiinah hian Muallungthuah DPR siam zawh tawh ani a NEC ah, tun thla chhung hian an rawn sanction ang a tih te kan beisei a, vaibelchhe 5 tur ang project te kan siam a. Tin, Falkawnah pawh project awm sa a awm tih kha ka'n rawn sawi tel duh baw k a ni. Kan member zahawm tak takte lawmthu sawina hun te an hmang a lawmawm ka ti a, a react theih ang ang hi a pawimawh awm te kan rawn sawi ang a. Pu Lalduhoma kan Member zahawmtakin accident taw k, kan infiam miten accident an tawh palh a enkawl na tur tih kha Pu Deputy Speaker, Congress Sorkar a lo pian tirth atang khan kan lo ti ve a, kum 2009-10 khan nuai 7 kan dah a, kum 2010-11 ah khan nuai 3 kan dah a, hei hi kan hmang zo lo thin a, tun kumah chuan nuai 2 chauh kan dah a hengah hian K. Vanlalruati, Sub-Junior Indoor a kal, Hospital a awmna senso te, R. Zodinpuui, Volleyball player Shillong bul a accident, khang tanpuina te leh mi engemaw zat (tunah chuan chhiar chhuak lo mai ilang hun a duh rei deuh dawn a) khatiang atan khan kan lo dah a,

2009-10 kha nuai 6 zawk a ni e, ka lo tihpalh a, 2010-11 ah nuai 3, 2011-12 ah nuai 2, nikum a mi kha kan hmang zo lo bawk tih kha kan sawi duh a ni.

Tin, kan Member zahawmtak Pu C. Ramhluna rawn sawi “artificial grass in dah vak vak mai a, running track te a awm thei silo ang a, a chhungah a tlan theih lovang” tih kha hei chu a hlauhthawn awm love, running track hi chu artificial grass pawnah mawihnai takin kan rin dawn a chhungah an tlan lovang tih kha kan rawn sawi duh a ni. Tin, natural grass an tih ang kha a rawn sawi a keini pawhin kan ngaihtuah nasa a, Pu Deputy Speaker, hmun te kan la nei tlem si a, natural grass hi chu kan ramah nichina Pu R. Selthuama rawn sawi ang khan Lawipuahte pawh a veng neitute pawn chan loh chang an nei a, a rim em em mai a, hmun tha infiamna tur atan a tak tak a ti tur chuan natural grass hi chu kan ram hian kan la tlin lo ani tih hi vawinah kan rawn sawi theih chu a ni tih kha kan rawn sawi duh a.

Tin, Dr. R. Lalthangliana rawn sawi Rajiv Gandhi Stadium te, District Sports(interruption)

Pu B. LALTHLENGLIANA : Pu Deputy Speaker, kan Minister-in artificial grass aiin natural grass kan tlin lo a tih kha, enge a to zawk nge kan tlin lohna chhan? Thingtlangah te chuan khatiang kha kan hmang a, a tha hle si a, engatinge helaiah Sorkar chak takin kan tlin lo a tih leh tak mai le.

Pu ZODINTLUANGA, MINISTER : Kan Member zahawm tak kha Sports Minister te lo chang tawh a ni a, a ngaihtuahna kha lawmawm ka ti a. Mizoramah hian nichin a ka sawi ang khan kan ground te hi a rak em em mai a, zing khawvar hma atangin tlai thim thleng mai hi chu kan thalaite hi an infiam a ni. Chuti a nih chuan, grass hi chu an rap chhe nasa lutuk a, tui tlina tur nen. Entirnan, example mai mai, Premier League te kan en nasa a. Kar hnih danah an home ground ah te an khel a, heng atan hi chuan an dah a ni. An practice field chu Premiere League club tam tak pawh khuan artificial grass khu an hmang a ni. Inkhelh nan hi chuan dah reng a nih chuan a tha a ni....(Interruption)

Pu B. LALTHLENGLIANA : Pu Deputy Speaker, chuti a nih chuan heng vengchhungah hi chuan tih loh kan tum tihna a ni maw? Zing atanga naupang inkhel awmnaah kha chuan a hman theih loh i tihna ang a ni maw?

Pu ZODINTLAUNGA, MINISTER : A tlo lo a ni. An khal chhe vat mai. Tin, Kawnpui chungchang kha kan Member zahawm takin a rawn sawifiah tawh a. Kawnpuiah kha chuan Boys Academy kan hawng a, tunah khuan Kawnpuiah khuan artificial turf, astro turf kan tih, hockey atan Central sorkarin min rawn sanction thar leh a. Tin, Saidan kan neih te, khangte kha an rawn sawi tawh a. Tin, thil lei chungchang kha kan Member zahawm tak Dr. Thangtea rawn sawi laia kha, helai local purchase an tih hi chuan approved rate an neih ang hian lei mai thin a ni a. Amaherawhchu, Sports Association-tena Sports Council General Body-ina kan rel

ang hi chuan hmanna kan lei angte chu Association-ten an duhna company, an duh rate an zuk zawhchhuah thlapa kha Council hian kan chahsak mai thin a ni. A chhan chu quotation te koh hi chuan sample tha lote leh, a sample a tha a, a tak te hi a tha lo thin a. Chuvangin, kan Association-ten an duh company, a then phe chu foreign company te tam tak chuan an chah a ni. Chutiang ang chu anmahni hman tur atan khan kan chahsak a ni tih kha karawn sawi duh a ni.

Nichina Education lampanga ‘Catch them Young’ te kha a lawmawm ka ti a. Kan Department chuan chu ni lo mah sela kan han be ve dek dek a. E-mail ten ka zuk dawr a. Amaherawhchu, nakinah House pawnah te pawh min la hrilh se la, Fred te nena MOU in ziah kha kan zuk dawr chuan ba min rawn thing reng mai a, “Kan MOU ang hian engatinge? Eng sorkar nge in nih?”. Vawiin niah pawh hian e-mail hi show theih ka nei a. “Kan MOU hi in rawn tihlawhtling dawn em?” tih te hi e-mail kan hmu a ni. Keini ang tan chuan khami MOU a kha enggeni Sorkarin engnge commit na a neih kan hre silova, chhonzawm theih chi ani in kan hre lova, kan ngawihsan ta a ni tih kha kanrawn react theih ani.

Dr. R. LALTHANGLIANA: Pu Deputy Speaker, khatah khanin mumal takin thil a awm vek a, chhiar chian deuh kha a that mai ka ring a, harsatna an siam leh siam loh chu kan hre zui tawh lo a, amaherawhchu, khatih hun lai kha chuan mumal tak khan an mahni signature te leh hemi Sorkar signature awm vek khanin tih kha ania. Nia, Session pawn lam pangah te pawh mumal taka kan sawi te pawh a tha mai thei. A awm vek a kha lai kha.

Pu ZODINTLUANGA, MINISTER : Khami MoU denchhen khan kan zuk dawr ve a, Pu Deputy Speaker hetiang anih chuan programme tha tak ani kan ti a, kan zuk dawr ve a, email in keiman SSA atangin an address ka va dil chhuak a, hei henglaiah te pawh an tar a, Game on Youth Sport tih chhonzawm theih dan a awm em kan ti a. Amaherawhchu, min rawn chhannaah chuan MOU anga kan pawisa min pek tur hi engatinge min pek loh? MOU tihlawhtling tura commitment nei Sorkarin ni em? tihte kha min rawn chhanna ani. Chungte pawh chu kan emailah ala awm vek a, khalaia kha kanrawn sawi tel duh a ni, Pu Deputy Speaker. Sports-ah chuan sawi tur tam tak a awm a.

Dr. R. LALTHANGLIANA : Thil pakhat lawk min chhan theih tho ka ring a, Hnahtial Electric Veng hian an sawi fo mai a, pawisa kan hmuh tawh sa kha engtinge ni? An ground, play ground tan hun tur a kha harsatna a awm em aw? Khalai kha.

Pu LALDUHOMA : Pu Deputy Speaker, kan zawt ve nghal lawk law law ang e, Cricket ground khu hei kan bial a awm ani a, C.M. in a rawn hawn ni pawh khan website te min hawn tir ve a. A approach road, Airport road atanga pennaah khuan Suaka Cricket Ground tiin signboard a intar a. Suaka hi Pu Lalsuaka a ni a, F.Rotluanga pa, ram donate tu tam ber a hi a nia, khami hming kha a puta em ni, pu hlen se a lawmawm ngawt ang. Pu Lalsuaka hi mi ropui tak ani a, Official taka a

hming put hlen tir a ni thei ang em? Kan khua, Tualpui khaw chhuak ngat a ni, kha kha min hrilh teh se ka tia.

Tin, Tuirial Airfield hlui khu Aero-Sport atan hianin Tourist ho hianin an han ti a. Hma chu a sawn lemlo lova, Gliding tih nan te, ballooning tih nan te, kawng tam takah a tha a, hei hi keini sawi awm phe chu anilo na a, Sports Department hnuai hian awmin, Sports lam hian take-up zawk ta sela a inhmeh zawk em aw? tih te kha ka rilruah chuan a awm mai mai a. Kan House leader a awm lova, awmse chuan min han hriatpui se ka duh nghe nghe a, khangkha a inhmeh zawk ang em tih, a kal chak zawk ang em? tih Minister pawhin rilruah min lo paisak sela a thain ka hria...

Pu P.P. THAWLA : Pu Deputy Speaker, khawngaihin, pakhat chauh. Nichinah khan Saiha lampang Sports ngaihsak anihna zingah Saiha Indoor Stadium sak anih thu kha kan hria a. Khati lai kha min han hrilhfiah se ka duh chu he Indoor Stadium hi 1900 kal chhovah khan Congress Sorkar hmasa-ah khan nuai 11 bawr vel sen niin, mahse, a pamtul thak a, a dawt leh Sorkarna kal lai khan chhunzawm tur niawm takin bul an han tan a, a structure chu a'n ding luai a, a tawp leh vang vang a. Tunhnai hian an sa thar leh a, hemi Indoor Stadium thlang lampanga in 7 bawr vel nge in 5 an ti ni, kalkawng nei tawh miah lovin min tiphui daih a, tihte kha anrawn sawi a. Kha kha cheng engzat senga sak nge ni, a bulhnaia kalkawng awmlo khawpa tihpin sak kha anih dan tur ani em? tih kha min han hrilhfiah thei se a lawmawm hle ang.

Pu ZODINTLUANGA, MINISTER : Pu Deputy Speaker, kan Member zahawmtak Pu Lalduhoma zawhna kha Suaka Cricket Stadium tih kha official taka kei kan lo pawm dan kha ani deuh mai a, a hming hran kha a nei lemlo in kan hria a.

Hnahthial chungchang kha sawi ka duh a, Pu Deputy Speaker, sanction arawn kal a, mahse Hnahthial veng Electric veng ground-a sak tur a ni a. Tuna an DPR siam leh a ground-ah sawn a inmil lo em em mai a ni. An DPR-ah chuan a Gallery-te mumal tak a awm a, ground thatak, dressing room-te tha tak awm tur a ni a, infrastructure kimchang. Amaherawhchu, saw DPR an siamna hmun saw a tawi zawngin ka sawi ang a, High School Building, High School ram a ni a, lehlamah, tunah RMSA hnuai atangin High School thar an sa mek a. Tin, a piaphlam saw Electric Department a ni a, chutiangte chu anih avangin tuna kan Stadium an tih ang kha a lenglo in kan hria a. Chungte chu anih avangin sawlai hmuna lo va tih a, 1st installment hman a, 2nd installment a UC mumal pek tur a awmluh kan hlauh avangin Hnahthial khaw mipui hnenah ram tha/ram zau, Hnahthial mipui ina an chhawr theihna tur atana he NEC atang pawisa lokal, Hnahthial thalai tena an chhawr theih ngeina tur, hlawhtling leh he project hi ropui taka Stadium a nihna tur anga siam theihna turrawn zawng rawh u tiin kan chah a, vawiinniah Electric veng te chuan an ui viau tih chu kan hria. Amaherawhchu, Pu Deputy Speaker, sawlai hmunah sawn bul tan ila, Stadium chhun zawm tlak loh First Installment-ah chuan pawisa a awm ang, an siam teuh ang, mahse, UC rawn ti sela, vawiinniah NEC te an alert tawh em em., Saidan te pawh khu vawi thum a hmunah anrawn tlawh tawh a ni. A hmunah anrawn tlawh a, tha an

rawn ti a. Installment dang pawh awlsam takin kan hmu. Amaherawhchu, khatiang tih theihlohna hmunah khan bul kan tan kan hlau a ni. A tuartu tur chu mipui kan ni tlat a ni. Chuvang chuan Pu Deputy Speaker, kha kha a awmdan a ni a. School te saw han sawn dawn ni sela, tunah pawisa neih zawng zawngin High school an sa tan mek chauh a ni a. A piah lamah P & E Quarter engemaw zat a lo awm baw si a. Chung chu vawiinnia kan harsatna a ni a. Amaherawhchu, khawtlang mipuite an la inrawn mek a, chutiang ang chuan hna kan kalpui a ni, tihsual kan hlau a. Sawlai hmuna bul tan ringawt a, NEC tena an duhdan ni lo, an DPR approve ang ni lova, hna kan thawh hi keini chuan kan hlau em em a ni, tih kha ka'n sawi duh a. Khawdangah chuan kan ti lo, anmahni kha hmun rem tha, Hnahtial thalai tena an hman theihna tur, tin, a DPR kha a tha em a, hmun zau tha, free land-ah chuan ti ila chuan a chhawr tu tur chu mipui. Independence day te, nakinah District Capital an nih hun te pawh a la awm ang. Khatiang atana hman tangkaina tur tam tak a ni, tih kha ka rawn sawi duh a ni.

Tin, Saiha chungchang kha a dik chiah mai, Pu PP Thawla sawi kha, Saiha Hall saw a dik. Nichina kan rawn sawi ang khan kum 2005-a District Sport Complex an tih zinga mi, chhun zawm loh zinga mi kha ani a. A contractor pawh kan hotupa a ni a, a mangang hle a, kum 5 dawn lai mai a thawh chin pawh pawisa la thei lova awm kha kan sorkar veleh an bill te kan clear saka, an lawm hle a ni. Chuvang chuan vawiinniah a tharin a design-te kan thlak a, an pawisa lo hman tawh te leh ala awm chhutin, Pu Deputy Speaker, Saiha mipui tena an hman tangkai theih ang ber turin an CEM te, an Autonomous District Council hotute nena inbe rawnin bul saw kan han tan tha leh a ni a. Tin, sawmi saw kan sak zawh phei chuan an CEM te phei chuan a hnuaiah sawn shooting camera min dah sak ve ngei rawh u an ti a, chung te pawh chu kan sak zawh hunah chuan kan ngaihtuah tur zingah a awm a ni tih min lo hriat sak ula.

P.P. THAWLA, MLA : Pu Deputy Speaker, tuna sak thar chu cheng engzat man vel a ruahman nge a nih? tih kha min han hrih tel thei sela.

Pu ZODINTLUANGA, MINISTER : Tunah mai chuan a amount a chu ka rawn sawi thei lovang a, i duh chuan ziakin kan rawn pe mai dawn che ania.

Sports & Youth Services hian nasa takin thalaite tan hma kan la a, NCC-ah te, Scouts & Guides-ah te, thalaite an nundan an naupan lai atanga zirtir turin...

Pu NIRUPAM CHAKMA: Pu Deputy Speaker, point of clarification. Kan sawi pawh a pawimawh niin ka hria, mahse a react duh tlat lova, lehlam chauh a ngaihtuah si a, a fello a ni, hei hi chu. Saw Lawngtlai West, Pu C.Ramhluna bial leh Tuichawng bial lamah Catch them Young hnuaiah catch dawn em? tih leh kuminah Football Ground pakhat tal chu min pe thei dawn em?

Pu ZODINTLUANGA, MINISTER : A sawi kha an tam lutuk a, kan la react seng lo a ni. Kan Member zahawmtak Pu Nirupam Chakma bialah khan Catch them young kalpui mek ani a. Lawngtlaiah, District capital-ah a tan nan catch them young T.Shirt pawh 80 thawn ani tawh a. Sports goods pawh ₹ 19,200/- man lai thawn phei ani tawh ani tih kha ka rawn sawi tawh a ni. Tin, ama sawi ang khan Chawngteah ground tha tak pahnih kan siam sak tawh a, ani chu a fel a, a dang te pawh kan la siam belh zel ang.

Tin, Pu Deputy Speaker, NCC chungchang hi han sawi leh lawk kan duh a, vawiinah hian kan vannei a, kan sorkar tirh atang khan kan Chief Minister ten min tuipui a, NCC neih theih na tur atan hian Central sorkar in demand tam tak a rawn nei ve a, staff kan neih tur zat te, LDC chuti zat, UDC chuti zat. Vawiinah sorkar hnathawk a harsa em em chungin Mizoram sorkarin kan tih theih tur chu, kan tih ve tur chin chu min tih sak tawh a. Chutiang avang chuan Central sorkar pawn zirtirtu tur pilot te pawh Mizoramah an rawn post tawh a. Tun atanga hun reiloteah thlawhna a lo thlen chuan Mizo thalaite, NCC member-te thlawhna khalh an zirtirin a thlawnin an zir thei dawn a ni tih kha ka'n rawn sawi tel duh bawk a ni.

Tin, Pu P.P Thawla rawn sawi kha Saiha Indoor Stadium kha estimated cost chu nuai za pathum leh sing ruk leh sangkhat anih chu. Kha kha sawi tur tam tak a awm a, member zawng zawng hi kan react chuan Pu Dy. Speaker, a rei dawn lutuk a, khalaiah khan Sports & Youth Services kha chu duh tawk dawn mai ila.

Tunah chuan kan Demand No. 46-na UD & PA-ah kan rawn lut ang a, hetah hian member 14-in thahnem ngai takin min rawn sawi sak a, heng hi a tam thei ang ber rawn react leh ka tum ang a. Hei ka hnungah kan Minister zahawmtak a la awm a, ka inthlahrung tawh viau a. Amaherawhchu, a pawimawh tih ho ka theih ang ang ka rawn sawi ang a, ka sawi thelh te a awm anih chuan member ten a tul leh min rawn remind ta ula.

A hmasa berin Member zahawmtak Pu Zothangliana'n Lawngtlaia EWS Scheme neih ve ni sela a rawn tih kha a dik kan ti, amaherawhchu, vanduai thlak takin Lawngtlai kha Town-ah dah/puan a nih tlat loh avang khan kan department dan khan hemi EWS/ISS hnuaia "mirethei in sak" kan tih mai hi khatih hunlai khan siam theih alo ni lova. A mimal takin kan Minister zahawmtak Pi Kumari Selza te pawh lehkha nen kan zuk hmu a, Lawngtlai chauh hi District Capital-ah kan cover loh a ni e, tiin kan zuk ti a. Amaherawhchu, khatiang ang Scheme kha tun dinhmunah a theih tawh hrih loh avang khan kan hlawhtling ta lo a ni, pawl kan ti hle a. Amaherawhchu, vawiinah JNURM hnuaiah hian RAY (Rajiv Award Yojana) kan ti a, hemiah hian mirethei tak tak te khawpui chhunga, thingtlang lama IAY kan tih ang kha Scheme thar an rawn siam hlauh mai a, hemi sawiho tur hian tun ni 30 hian Delhi-a meeting tur hian min rawn ko ve a. Hemi Scheme hi an launch dawn a, chumi chhim tur chuan ka kal dawn a. Hemi Scheme te hi a hlawtlin hunah chuan (interruption)

Pu C. RAMHLUNA : Tunge Lawngtlai area saw town-a puang thei tur?(Pu Zodintluanga keini in a town kan tih chu census hi a ni)

Pu ZODINTLUANGA MINISTER : Chumi lo chu an rawn approved ngai lo a ni. Chuvang chuan Lawngtlai pawh hi RAY in cover ve thei turah kan ngai a ni. Tin, Rengtekawn an sawi pawh kha a pawl kan ti hle a, Kolasib khawpui hnuai a awm a ni a, mahse constituency hran a lo nih avang khan khulai thlan laiah khan lo tih loh a ni a, kan scheme RAY hi chu duh angina kan cover thei tawh dawn a ni. Pu B.Lalthlengliana khan a ngaih pawimawh te a rawn sawi a, culvert chungchang kha chu lawmthu a rawn sawi a, Pu C.Ramhluna pawhin a lawmman entirnan he House zahawm takah Culvert tha tak mai a thlalak te a rawn present a ni. Hemi hi work order ang chiah khan kan sawi a ni. (Pu C.Ramhluna- Construction of RCC culvert on internal road at Salem veng tih a ni Bridge in ti lo reng reng a ni.) RCC culvert kan siama Bridge tih kha PWD a zawt a, PWD kha tunge Bridge ni tih authorized tu vawiin niah tuman an hre lo, PHE hian Bridge nge Culvert an rawn ti dawn, chuvang chuan PWD Engineer pakhatin a zawh a, hei chu bridge a ni a tih avanga bridge a ni chuang lo. Chuvang chuan lawmthu an rawn sawina hi duh tawh ila, a hmingah buai lo ila.

Pu B.LALTHLENGLIANA : Point of clarification – a bialtu MLA zahawm takin helai serial No. 56 na “Construction of Jeepable internal link road near John siamkunga’s house at Salem veng” a rawn tih kha Salem Veng a tih kha Dam veng dik tak a ni a. Kha kha an correct a, Dam vengah an lo dah leh ta anih chuan kan hrethiam a. Amaherawhchu, helai work order-ah hi chuan Salem veng chu a ni.

Pu ZODINTLUANGA, MINISTER : Pu Deputy Speaker, kha thil kha printing mistake a ni a. Hei kan MLA zahawmtak Pu John Siamkunga kawmthlang a ni a. Kha kha Dam veng tih tur ani a, kan lo tihsual palhnaah kha chuan ngaihdam kan dil a. Tukin zingah culvert anih leh nih loh an zuk enfiah chauh reng bawh a ni. Kan kal zel ang a, hun a kal zel a. Member zahawmtak Pu B.Lalthlengliana rawn sawi kha khawngaih taka min hrilh theih chuan hei hi chu a serious kan ti a. Bawngkawn pa in Champhai a EWS in sa tur Bawngkawnah a sa tih kha. A hming leh address te min rawn hrilh theih chuan action kan la ngam ang a. Action kan lo la ang tih kha ka rawn sawi duh a ni.

Pu B.LALTHLENGLIANA : Pu Deputy Speaker, kan Minister zahawm takin mi a ngen takah chuan report ka dawn danah chuan Pu Lalchungnunga, Congress Block President ni thin. Chu chuan a puzawn Pu Kapzauva, Bawngkawn hi a pe a, Bawngkawnah in sak nan an hmang tih kha Chawlhni a report ka dawn a ni a. Chu chu ka rawn sawi a ni. A dik leh dik loh chu ilo enzui tawh mai dawn nia.

Pu ZODINTLUANGA, MINISTER : Pu Deputy Speaker, thudik anih ngai chuan action kan la ngam ang a. A awmzia chu he EWS housing-ah hian kan strict em em a. District in an rawn thlan a pawh hi depts., atingin an zuk verify a. An in awmna

tur (a hma a mi thla) an la vek a. An sak zawh tawh thlalak nen hian Central-ah kan thawn zel a ni. Kolasib-ah pawh kan hotuten an rawn thlan kha concrete ban lo nei anni a, kan cancel mai. Chutiingin Saihaah te pawh, deptt., in dik lo a kan hriat, a guideline in a phalloh chu huaisen takin kan cancel tawp tawp mai a, a mamawh zawkah kan thlak thina. Chuvang chuan khatiang kha thil lo awm anih chuan keini chuan action kan la ang tih kha ka rawn sawiduh a ni.

Tin, Lawipu, Chite kha engatinge a va muang em em ve tih kha Pu B. Lalhlenglian an rawn zawh kha a ni a. Hei hi Pu Deputy Speaker, he project hi a thui deuh hlek tawh a. Kum 2007 November ni 19 khan Hindustan Prefect Limited te nen MOU te nen agreement a inziak a. Hetah hian anni hian Contractor-ah hian Mesnia Enterprise, Arunachal ami an pe a. Hemi te hian Sub-Contractor an lo hmang leh chhawng a. Chumi chuan pawisa an lo pe tha duh leh silova. Wawiinniah kan mizo pui, kan sub-contractor te an buai nasa a. Wawiinni thlengin sum an la hmu lova. Chumi tur chuan keini chuan theihtawp kan chhuah a, tan kan la a, kan meeting pui a. Khatiang anga kum 2007 daih tawh a mi pawh ni sela, khu hna khu miretheite tana in sak tur, miretheite a thlawna chenna tur anih avangin kan ngaipawimawh a. A Contractor te leh a Sub-Contractor te pawh vawi engemaw zat kan meeting pui a, wawiinniah phei chuan a 2nd Instalment pawh hi kan la hren luh sak a. Anmahni leh anmahni inkara rem han siam a, hma han lak sak theih na tur a tan. A Sorkar ang chuan wawiinniah an agreement siam puia te hi action lak mai theih kan nei a ni. Mahse, action kan lak rikngawt chuan wawiinniah kan Mizo Sub-Contractor engemawzat khuan sum tam tak an lo sen, security te kha an lo dah ve si a. An chawi thlawn dawn ta ringawt a. Chumi kan hlauh avang chuan an Contractor thlana te pawh an agreement Sorkar-in a sign pui te pawh hi duh angin action kan la la ngam lova. Khumite kan clear theih veleh chuan na takin action hi lak kan tum a ni tih hi kan sawi duh bawk a ni.

Tin, Pu K.Liantlinga, Member zahawmtakin a rawn sawi Performance Report chungchang kha kan lo tilo hlauh mai a tun kumah. A pawikan ti a, nakumah chuan rawn tih ve ngei kan tum dawn a ni tih kha ka rawn sawi duh a.

Tin, Member zahawmtak Pu Duhawma rawn sawi SJSRY chungchang a rawn sawi a. SJSRY hnuaiah hian Self Health Group hi la din zel theih a ni a. BPL member ngei mai mi panga aia tlem lo leh a aia tam lo, hlawhtling ngei tur department-in a rinte chu kan la pui thei reng a ni tih kha kan hrilh duh a.

Tin, Urban Self Development Programme hnuaia kan BPL te hnena loan pechhuak tura Bank hrang hrang kha ngen a ni a. Mizoram Rural Bank ten a tirah chuan harsatna an neih thu an rawn sawi a. Amaherawhchu, ngun taka kan han meeting pui hnuaiah tunah chuan loan pekchhuah hi an remti ve ta tih kha kan Member zahawmtak kha ka han hrilh duh a.

University panna tur vaibelchhe 13 crore tih DPR an siam te kha chu Central lamah kan thawn thla tawh ani tih kha ka rawn sawi duh a ni.

Ti kha chuan Pu Dy. Speaker, kan member tena an ngaihpaawimawh te an rawn sawi kha chu react zo tawhin ka inhria a.

Pu Dy. Speaker, AMC hi hnathawk thei tura siam kan tum a, kan party ina election manifesto-a kan neih kan ngaihpaawimawh ber zinga mi kan tihhlawhtlin takte zinga mi kha a nia vawiinniah hnathawk turin kan siam mek a, amaherawhchu, Aizawl Development Authority a lo ding a, heng ang te hi sorkar ina pawisa a lo pek tawh te hi hman tangkai i tum ang u, tiin an Engineer, an staff engemawzat hi AMC a an hman tangkai turin ruahmanna kan siam mek ani tih kha ka rawn sawi duh a ni. (PU T.T. ZOTHANSANGA : Pu Dy. Speaker pakhat chauh, hei Champhai IWS Housing-ah khanin an rawn hawn tirh khanin cheng nuai khat leh singnga vel kha ani ang tih kha ani a, nuaikhat singhni zariat sawmruk vel hi tunah hian a rawn ni leh ta a, hei hi tihdanglam ani em? tih kan zawt duh lawk a. Tin, chutihrualin IWS Housing hi Champhaia an rawn tih tirh khanin khilai Champhai kan hotu thenkhat chuanin kan C.M. hmasa in min duhsak bika Champhai chiah ani a ti a, hei khaw dangin an nei ve ta nual mai a, keini chauh hi kan ni lo emaw ni aw ka ti) ...a zawhna kha a chiang mai a. Pu Dy. Speaker, UD & PA Deptt. hi sawi tur tam tak a awm a, kan hmalakna te khawtlang tan Aizawl khawpui te leh khawpui hrang hranga kan hmalakna te a tam a, amaherawhchu, zanin hian sawi sen ani dawn lo tih hi kan sawi duh a. Aizawl khawpuiin tui in tur tha a neih theihna turte, Lunglei, Serchhip, Saiha Tlabung thlengin tui in tur tha an neih theihna tur in hma kan la a, khawpui a lo thianghlim theihna tur atana PPP Mode a bawlhhlawh kan paih te leh solid waste management mumal taka Asian Development Bank atanga Tuiriala bawlhhlawh paihna thianghlim zawk kan neih theih na tur te, tin, Aizawl khawpui chung kan tui luankawr te alo thianghlim theihna tur atan Asian Development Bank atanga tun atanga reilote a kan thawh theih na tur te han sawi a chakawm rual rualin Pu Dy.Speaker, khati lamah chuan ka kal lomai anga, kan member ten an hriat thiam loh leh an hriat mamawh te han sawi a kha, kan rawn sawi hmasa duh a ni e. Awle Pu Dy.Speaker, ka Demand No – 22, Sport & Youth Services, ₹35,29,47,000/-, Demand No – 26 Information & Publicity ₹ 7,45,00,000/-, Demand No – 46 Urban Development & Poverty Alleviation ₹ 93,69,16,000/-, Demand No – 48 Information & Communication Technology, ₹ 3,80,00,000/- a vaiin ₹ 140,23,63,000/- hi he House zahawm takin min pass pui turin ka rawn ngen e. Ka lawm e.

DEPUTY SPEAKER : A lawmawm e, kha kan Minister zahawmtak Pu Zodintluanga'n a rawn wind up a. A react tha a, khatiang tur kha ani. A Demand te Pass a rawn dil nghal bawk a, kan buk dawn anga, Demand No – 22, Sport & Youth Services, ₹ 35,29,47,000/-, Demand No – 26 Information & Publicity ₹ 7,45,00,000/-, Demand No – 46 Urban Development & Poverty Alleviation ₹ 93,69,16,000/-, Demand No – 48 Information & Communication Technology, ₹ 3,80,00,000/- a vaiin ₹ 140,23,63,000/- hi Pass remti apiangin , 'Remti' ti rawh ule. Remtilo kan awm em? Remtilo kan awm loh chuan Pu Zodintluanga, Minister zahawmtak Demand No – 22, Sport & Youth Services, ₹ 35,29,47,000/-, Demand No – 26 Information & Publicity ₹ 7,45,00,000/-, Demand No – 46 Urban Development & Poverty Alleviation ₹ 93,69,16,000/-, Demand No – 48 Information & Communication Technology, ₹ 3,80,00,000/- a vaiin ₹ 140,23,63,000/- hi House in lungrual takin House in a pass ta a ni.

ZODINTLUANGA, MINISTER : Pu Deputy Speaker, ka lawm e.

DEPUTY SPEAKER : Awle, tunah chuan kan Minister zahawmtak, Pu P.C. Lalthanliana, a demand te han wind up a, pass te han dil ve nghal turin i lo sawm ang.

Pu P.C. LALTHANLIANA, MINISTER : Pu Deputy Speaker, ka lawm e. Hei tlai lam a ni tawh a. Catch them Young atangin Catch them Old Aged-ah kan lut dawn a ni a. A hma khan Catch them Young ah khan kan MLA te, an bialah pawh thahnem an ngai a, an tui hle mai a. Catch them Old Aged ah pawh hian MLA te hi phur tlang hle ila ka'n ti a. A hmasa in kan member te ka'n ngen duh a. Hei tlai, chawhnu lam tawp ber kan ni a. A tawi zawnga han tih hram hram ka tum ang a. Kan member zahawmtak tak ten, Pu Deputy Speaker, kan department chan te, thahnemngaihna nen, duhthawhna nen an sawi a. Ngaihthlak a nuam viau a. Amaherawhchu, kan member te hian kan tih dik loh te, kan tihsual te, tam tak he House zahawm takah hian sawilan loh te pawh an neih ka ring tho a. Mihring kan ni a, kan famkim lova. Tam tak erawh helaiah sawi lo mah sela, tih dik loh tam tak te pawh kan neih ka ring a. Amaherawhchu, he House rorelna zahawmtak mai a kan department te mualpho lutuk lova kan awm hi a lawmawm ka ti a. Kan Department - LAD te, Social Welfare a kan officer te, hnathawktu te zawng zawng chungah he House kal tlang hian a hmasain lawmthu ka'n sawi hmasa duh a ni.

Pu Deputy Speaker, member zahawmtak P.P.Thawla, sawi hmasa bertu sawi kha ka bengah hian a la cham reng mai a. Sawi hmasa ber mah ni sela, han react hmasak ber ka duh a. A react pawh a chakawm a. "LAD leh Social Welfare hnathawh hi tha ka ti tawp a ni" tih kha a ni mai a. Ka react danah pawh engngemaw chu ka la khilai ang tih kha ka'n react duh a ni. Pu Deputy Speaker, kan member zahawmtak, Pu Thangtea sawi atang khan han react ila. Sorkar hmasain a lo tih tawh, Tribal Art Centre te, Eklavya School, Lunglei te kha engnge an chanchin? Tunah tangkai taka hman a ni chho em? tih khan bul a'n tan a. Nia, kan Sorkar hmasa khan Tribal Art Centre khu bul a lo tan a. Keini kan han luh khan kan chhonzawm thiam lo lek lek a, amaherawhchu, thiam dan kan ngaihtuah a, tihpuitlin kan duh a, tichuan kan chhonzawm chho ta a. Tunah chuan a thawktu PWD pawhin an zo fel ta a, department kutah remchang hmasa berah kan inhlan dawn a ni tih kha he House zahawmtakah hian kan report duh a.

Tin, Eklavya - Lunglei Pukupui School tih kha Pu Chairman sawrkar hmasa hun laia din chu a ni teh meuh mai a, an ngaihtuah awm lova tun dinhmunah hian. Sorkar hmasa hun lai khan mi thahnem ngai Pu F. Lianchhinga'n project-te siamin sawrkar kal tlangin Delhi-ah project a siam a, Chutih lai pheichuan Treril tih a ni a, Eklavya tih a ni lova. Tichuan, sanction nuai 100 a lokal a, tah chuan kan sawrkar hmasa khanin Aizawl-ah mimal tute emaw khatiang school din nan khan an lo pawt peng a. Lunglei mipui kan thinur nasa mai a, bandh te kan siam a, bandh kan tih lai pheichuan Pu Chairman keipawh hi Commander ka ni a, tichuan nisa hnuaiah Lunglei mipuiin kawng kan zawh a, Lunglei District atana school atana cheng nuai za MNF sawrkarin mimal tan min pawhpensak hi min pe let tur a ni kan ti a. Kawng kan zawh a, Pu Chairman vawiin ni thleng hian ka kawng zawhna ka kheimit na hi a la dam thei lo nghe nghe a.

Chutiang chu saw school saw a ni a, mipuiin kan lo sual a, Independence Day kha boycott kan tum a, tahchuan a engpawh nise tiin khawi atangin nge minrawn pek ka hre lova. Cheng nuai 50 kengin Pu R. Lalawia, khatih laia Speaker kha a lo pheita a. Tichuan, saw school saw din chhoh a ni ta a ni. Sawrkar hmasa hun laia din a ni teh tak meuh mai a, tunah chuan school naupangte pawh an awm a. Tha takin Eklavya school saw a kal chho va, tunah chuan an chanvo te sawrkarin pawh pen sak a nei tawh lova, engkim an kal tluang a ni tih kha member zahawmtak Pu Thangtea han sawi chhan nan ka'n sawi duh a.

Pu LALDUHOMA : Pu Chairman lawk, khami Tribal Art Centre kha ka biala awm a nia, hmannah Committee-in kan zuk tlawh a, hand-over leh take-over theih tawhah kan hmuhpui a, amaherawhchu, a neitu Social Welfare Department hian enkawl zui hi huphurh deuh niin kan hria a, eng Department emaw a hmang tangkai thei tur hnena la pek leh chhawn tumna te a awmin kan hria a, entiran- Art & Culture emaw, a nih loh chuan Sports Department emaw. A hmun khu a tha viau a, riah chilh theih a ni a, tunah hian NIT student dah nan khan an hmang lailawk niin kan hria a, hei hi engchenge anni hian an luah dawn? A enkawltu tur leh a nei zui tu tur department dik tak hi enge ni dawn? Changtlung deuh hlek a, Hnam tana, Ram tana tangkaia rawn enkawlzui thei tur department kutah awm se a duhawm hle in ka hria a, Social Welfare Department pawh khanin a theih chuan a tha tho a, mahse an huphurh deuh niin kan hria a.....

Pu P.C. LALTHANLIANA, MINISTER : Pu Chairman, a neitu Department dik tak chu Social Welfare kan ni mai a. Amaherawh chu Sorkarin tangkai zawk leh tha zawk a ngaihtuah na thar a nei a nih chuan a tul angin a enkawl zuitu tur a chu la ngaihtuah turah ngai ila a tha awm e. Tichuan, nichina ka'n sawi Eklavya School hi a tha khawp mai a, a thlawn in hostel-ah zirlai an awm a, khatiang khan Article 275(1)-na hnuaiah sum, a enkawl na, zirtirtu hlawh te leh khatiang kha hmuh thin ani a, chutianga enkawl chu ani a. Tunah hian Central Sorkarin Mizoramah, District Headquarter 3-ah din minrawn phal sak a, tichuan tun kum Financial Year atan hian Pu Chairman, Serchhipah din tum ani a. Hemi atan hian cheng vaibelchhe 5.52 DPR siam ani a, Central Sorkar pawhin min approve sak tawh a, hmannah khan, "Hemi in tihna hmun tur LSC leh a pass te rawn thawn tel rawh u" anti a, chutiang chuan hma kan la mek a. Mizoramah hian a dang pawh kan din zel dawn ani tih kha ka'n sawi tel pah duh a ni.

Tin, tar pension chung chang kan member zahawmtak Pu Thangtea'n a rawn sawi te leh Pu Rinawma kan member zahawm takin a rawn sawi, tar pension hi a khai rual lo a an lak dan hi. Central in a rawn pek cheng 200 hi mi engemaw zat State Sorkar in cheng 50 a a dolet, cheng 250 a la an awm thin a. Tichuan tun Financial Year tharah hian Pu Chairman, heng hi rual zawk a pek an nih theih na turin kan State Sorkar hian chung ang cheng 250 la ve lo mi 23747 zing a mi 13222 te hi tun kum atang hi chuan cheng 250 dawng ve turin Sorkarin ruahman na a siam ta a. Hemi avang hian State Sorkarin thla tin cheng nuai ruk leh sing ruk vel kan chawi

belh chhoh te pawh a ngai dawn ani tih kha vawiinah hian ka'n sawi duh a ni.

Tin, Anganwadi Center sakna chung chang a member ten a, a tlem tham a, a sak na tur atan, hei aia tam hi a theih lawm ni tih te leh MLA fund te min han dil thin a hetiang sak nan hian ti a sawi te kan awm a. Anganwadi Center Social Welfare Department hnuaiia kan neih hi Centre 1980 a ni a, heng hi chu Central Sorkarin a sakna tur vawiinah a vaia kan sakna tur hi Pu Chairman sum minrawn pe a, kan sa vek dawn a, amaherawhchu, engemaw zat sum leh pai la tihfel loh deuhte a awm a, kan sa vek dawn a ni. Amaherawhchu, hetih lai hian Advisory Board lam atanga Creche Centre kan tih heng Anganwadi Centre ang deuh thova kalpui hi a awm ve a, heng erawh hi chu kan hma tel lova, heng hi NGO MHIP kan tih ang ten an enkawl a, heng ang sakna hi chu kan va pe tel lo a ni. Chung ang chu anmahni NGO te khan an sak ve a ngai a, anih loh chuan keinin, kei ngei pawh hian Pu Chairman, ka bialah pawh hian ka fund te ka pe a, chutianga tihsak ngaite chu an ni thin a, Department hian khang ang kha erawh chu kan hma tel lo a ni tih hi kan sawi duh a ni. Tunah hian kan vannei em em a, State dangah Anganwadi Centre sak loh tam tak sa thei lova an neih laiin Mizoramah kan neih zawng zawng sakna tur sum min pe hi kan vannei hle a ni tih vawiinah hian kan sawi duh a ni.

Tin, kan Member zahawmtak Pu Nirupam Chakma in Multi Sectoral Development Programme hnuaiiah an bial, saw lai area chungchang an sawi kha kan sawi hlek duh a. Multi Sectoral Development Programme hi Mizoramah Lawngtlai leh Mamit District tan kalpui a ni a, heta tan hian Central Sorkarin sum pawh minrawn pe nual tawh a, amaherawhchu, vawiinah hian kan la hmang vek thei lova. Tunah hian Lawngtlai District atan Central Sorkarin minrawn pek tawh hi cheng nuaih 678.32 a ni a, tin, Mamit District atan hian cheng nuai 813.33, chu chu minrawn pek tawh a ni a, a vaiin crore 15 vel hemi district 2 tan hian minrawn pe tawh a ni. Chumi minrawn pek tawhna atang chuan vawiinah hian School te, Health Sub-Centre te, Anganwadi Centre te engemaw zat he programme hnuaiiah hian kan kalpui mek a, tunah hian Lawngtlai District ringawt atan IAY mi 710 tan 1st installment pawh Central Sorkarin minrawn pe tawh a, a sum te pawh kan draw tawh a, a Committee, District Level Committee DC Chairman-na hnuaiiah hengte hi kalpui tur a ni a. Chung sum te pawh chu kan pe pheih tawh a, chutiang chuan an vannei em em a ni tih kha kan sawi duh a. Mamit District tan hian hemi programme hnuaiiah hian IAY mi 210 tan sanction tih fel tawh a ni bawk a, 1st installment. Chutiang chuan ... (Interruption)

Pu C. RAMHLUNA : Pu Chairman, khawngaihin han tihbuai lawk ka duh a. Khami Multi-Sectoral Scheme pawisa kha, khami housing scheme a kha, IAY scheme a kha, tunah hian Lawngtlai District-ah khan Chakma tan deuh bik khan pek a ni ta nge ni a, a dang hote pawh kha pekin an awm ta nge tih kha ka hre duh a. Tin, chubakah chuan engemaw zat kha K. Deposit-ah khan an dah niin ka hria a. Kha kha a la ni ta reng em? tih te kha min chhang thei em aw?

Pu P.C. LALTHANLIANA, MINISTER : Aw, Pu Chairman, a then chu tunah hian K Deposit-ah a la awm a. Hmanni lawkah a then kan draw a. Kan draw te hi DC lamah pawh kan pe phei tawh a. Chakma bik tan chauh tih a awm chuang lova. Nichina kan Member zahawmtak Pu Zothangliana sawi ang khan religious minority hi a majority a benefit tura te chu an ni tih hi a ni ber mai a. Chuvang chuan khunglaia Chakma lo, Tuikuk te pawh an awm vek thova, chung chu pek an ni dawn a. IAY insak tanpuina atan hian cheng 38,500 pek tur an ni a. IAY wait list hi up-date in tunah hian buatsaih mek a ni a. Chung atang chuan an la thlang tur a ni dawn a ni. An vannei hle a ni tih kha ka'n sawi tel duh a.

Tin, kan Member zahawm takin Scheduled Tribe and Other Traditional Forest Dwellers(Recognition of Forest Right) Act, helaiaw pawh kan adopt tak kha a rawn sawi a. Hei hi chak taka kalpui a harsa khawp a, Pu Chairman. Department lam pawhin kan theih ang tawkin kan kalpui a. Hemi atana tul, District tina tih tur tulte kan han ti a. Committee District level-a din tur tein kan han inti a. Chutiang chuan hma kan la a. Amaherawhchu, District thenkhat, khatiang District Level Committee rawn din hleitheih lo kha vawiin ni thleng hian kan la nei leh nghal a. Chung ang te kan nih avang chuan tum angin kan kal chak hleitheih lova. Amaherawhchu, a tam zawkah kan din tawh a, tin, sub-divisional level te kan din fel tawh bawk a. Hemi atan sum hman tur ang tul ang angte pawh kan ngaihtuah a. A hmaa Central sorkarin min lo pek tawh revalidate ngai te pawh hetiang kan State-a kan lo adopt takah chuan kan han revalidate chhova. Chutiang chuan sum pawh tunah hian nuai 68 chuang hemi atan hian implementna turin kan State Sorkar hian kan lo nei ta a. State level Committee te an han thukawm ang a, chu chu August ni 2 ah hian thu tura beisei an ni a, chumi an thut hnuah chuan anih tur ang deuhin he thilah hian kan kalpui theih dawn ani tih kha he House-a he dan an lo adopt tawhte pawh kan sawizau belh hlek duh ani. Kha kha a tlangpui a Social Welfare lama Member tena kan han sawi kan han react duh nisela.

Social Welfare hi kan han sawi tawh ang khan Catch them old aged disable tih kha kan policy hi ani ve a, hetiang ang department hmalatu kha kan ni ve a, chak taka thil han tihte pawh a har a. A bik takin disable, pianphunga rualbanlo te tana Department-in theihtawp a chhuahna hi tlem han tarlan ka duh a, rualbanlo te tan hian NHFDC atangin loan kan han la a, chumi chu channelising agency-ah Rural Bank hmangin mi 122 hnenah heng loan te hi pek ve an ni a, chutiang chuan rualbanlote khaichhuah tumin kan theihtawpin kan Department hian hma a la ve ani. Tin, chumai bakah heng rualbanlote, a bik taka enkawl a, an hmakhuate ngaihsak a, an tana reservation awm ang angte an neih theih na tura a bik a enkawltu tur Commissioner for person with disability Office pawh kan neih thuai theihna turin kan Sorkarin Cabinet in heng angte hi a lo remti tawh a, Tun Sorkar kumah hian hemi hi kan tipuitling chho ang a, chutianga anmahni bik tana Office te kan neih chhoh chuan an hmakhua pawh tun ngawt ai chuan a eng zel ang tih kan beisei dan ani a. Tin, anmahni, heng pianphunga rualbanlote tana Office pawimawh kal theihna tur te, 'Ramp' kan tih ang chi heng wheel chair pawh han tawlh luh theih na tur te, inthiarnaah te pawh awlsam zawkna an neih theihna tur te hian Ministry of Social Justice atang te in cheng nuai 40 lai kan hmu a, chung ang chuan District a kan Deputy Commissioner Office te, helai kan Secretariat te, kan Directorate ang te pawh cheithat, khatiang ang tura ruahmante pawh kan tum a ni tih ka'n sawi tel duh a ni.

Tin, tunah hian scheme thar kan State-ah kan nei ve nual a, vawiinah hian kan sawi seng lo ang a, Integrated Child Protection Scheme (ICPS) kan ti a, hemi hnuaiah hian..

Pu P.P. THAWLA : Pu Deputy Speaker, khawngaihtakin point of clarification. Old aged pension kan pek angte hian Disable hote hi thlatin lawmman pek theih dante hi a awm ve em? tih ka'n zawt lawk a ni.

Pu P.C. LALTHANLIANA, MINISTER : Disabled-ah hian kan sawi seng lova, Disabled Pension Scheme a awm a, Educated Unemployment Scheme a awm bawk a. Tin, Economic Assistance an ti a, chung angte chu kan pe bawk a. Chutiang chuan chi hrang hrang kan pe a, mi engemawzat khatiang khan vawiinah hian kan tanpui an awm nghe nghe a. Student stipend hi kan pe tel bawk thin a ni. Tunah hian Educated Unemployment allowances hi cheng 250 in mi 25 hnenah kan pe ve a. Eco-rehabs kan tih mai nichina kan sawi hi mi 172 kan pe ve a, tun kum kalta-ah khan. Tin, Disabled Pension Scheme hnuaiah mi 200 hi pension kan pek lai mek te an awm ve bawk a ni. Chutiang chuanin, kan theih ang ang chuan an tan tlemlua awm lovin thil kan ti ve a.

Pu P.P. THAWLA : Pu Deputy Speaker, khawngaihin. Khang pension anga disabled ho pek kha thlatin cheng engzatnge? tih kha min han hrilhl tel thei se ka lawm hle ang.

Pu P.C. LALTHANLIANA, MINISTER : Pu Deputy Speaker, hemi tuna ka sawi Educated Unemployment-ah kha chuan cheng 250 a ni a, Eco-rehab hi a inang lova, cheng 1500 te, cheng 2500 te ang khanin pek ve a ni a. Ar vulh tihte, Vawk vulh tihte a ni a, a trade azir khanin a danglam ve a, chu chu kan pek dan tlangpui a ni a. Disabled Pension-ah hianin cheng 150 ami aw kan pek kha, ka chiang mai ta lova, Pu Deputy Speaker, cheng 250 a ni. Chutiang chuanin pianphunga rualbanlote hi kan theih ang tawkin kan Department hian kan tanpui ve thin a ni tih kha ka'n sawi duh a ni.

Awle, nichina kan sawi tak ang khan, ICPS (Integrated Child Protection Scheme) hi nikum lamah MoU te Central sorkar nen sign in thil kan ti tawh a. Hei hianin a tum ber chu, naupang kum tling lo harsatna tawk te, naupang kum tling lo dan bawhchhiate chhanchhuah te, a tul anga enkawl zuite a ni a, chutiang chuan sorkar hian tlawmngai pawl te, mipui vantlang mi tam tak tanpuiin hma a la chho dawn a ni. Hemi tana tanpuina tul thawktu tur te pawh tunah hian lak mek a ni tih kha ka'n sawi duh a.

Tin, a pakhat lehah chuan SAPLA an ti a, hei hi Scheme thar bawk a ni a, tunah hian SAPLA tihna tur hian Mizoramah hian District 3 - Aizawl, Lunglei leh Saiha thlan a ni a. India ramah District 200 thlan chhuah zingah 3 kan chang ve ani. Hetah hian sikul kal lo tleirawl kum 11 atanga 18 inkar te sikul kal si lova, awm mai mai te, khang ho kha khaw tinah heng District kan cover turah hian group te siamin khang ho kha, enkawl na tha, zirtirna tha, tin, Nutrition

tenen lam khatianga theih ang ang a enkawl tum kha ani a. Heta tan hian Central sorkar pawhin cheng nuai 123.12 min pe tawh nghe nghe a ni.

Tin, Pu Deputy Speaker, kan scheme thar Mizoram tana thil thar pakhat tarlan leh kan duh lawk chu IMGSY a ni a, hei hi conditional maternity benefit scheme kan ti mai a. Nu naupai te tana an hamthatna tur ani a. Hei hi Mizoramah India ram puma District 52 thlanchhuah zingah Lawngtlai District hi thlan ve ani a. Hetah hian Central sorkar pawhina bul tanna turin cheng nuai 31.43 min rawn pe tawh a. Tunah hian Department lamin a tul ang survey te, a tul ang ang an buaipui mek a ni a. He scheme hnuaiah hian Nuin nau a pai a, thla ruk a tlin atang khan tih tur ang ang, in enkawlna tha a tihtur ang checkup, sorkar leh Health Department lam te pawh in an tih tur zawng zawng te a tih thlap khan ₹1500/- kha an lo pe phawt dawn ani. Tichuan nau a lo hring ta a, nau a hrin atanga thla 3 chhung khan vaccine leh eng eng emaw tul zawng zawng, naute hriselna tur atana tul zawng zawng a tih ngei chuan ₹1500/- an pe leh ang a. Tin, nau a lo upat deuh a thla ruk anih thleng khan tih tur dang, nau alo hrisel na tur a tih tur sorkarin a tih ang chi a ti leh ngei ani, (vaccine leh a dang te pawh) tih hriat hnuaah ₹1000/- an pe leh dawn a. Duhtaka nupa han inneih a fa hrin lawmawm tawh teh lul nen, naupang hriselna atana duh thala han tih tawh hnuaah pawh khan lawmman avaiin ₹4000/- vel dawn theihna scheme a kha ani ve a. A tha hle a, Lawngtlai district lam an vannei deuh a ni. Chutiang ang ruahmanna chu kan Social Welfare Department atangin scheme thar kan ramah kan neih thar te a ni a. A bak chu Pu Deputy Speaker, sawisen ani lova, kan sawi seng lovang a. A tul angin office lamah te kan inzawt zel thei tho va, chutiang ka sawi thui duah lo mai ang a.

Tin, LAD Department-ah Member ten thahnemngai takin, duhsak takin kan department hnathawh ang te in duhkawp lohna te, in duhthawhna te in sawi a, a lawmawm khawp a. A hmasa in V.C te lawmman chungchangah Member engemawzat in an lawmman a tam tawk tawh lo ani. Han tihpun te pawh a awm tawh lawm ni tih te a awm a. Ni e, Pu Deputy Speaker, hlawh nei chi ang zawng zawng hlawh tih pun theih ang chi chu kan sorkar chak tak hian a tipung ani deuh vek tawh mai a. V.C. lawmman hi a beitham tawh khawp mai a, tunah hian tihpun tura ruahmanna department chuan kan nei a, kan kalpui mek a. Tunah hian Finance lamah te ala awm mek a, ala tlang ve ngei turah kan ngai a, engtik niah emaw chuan kan la tipung ve ngei turah kan ngai ani.

Tin, kan hriat theuh angin hmanni lawkah V/C te an thil tih kawng engkimah dik taka, fel taka an kalpui theih na turin kal dik lo te leh chung ang kal dik lo te hrem thei tur a, Bill Ombudsman thuneitak kan lo passed tawh a, khang te kha kan tihpuitlin theih phei chuan he ramah hian Village Council te roelna tha an neih theih na tur kawng inhawanna tur niin ka hria. Tin, V/C Member hi Pu Deputy Speaker, vawiina kan dinhmunah chuan 3,4,5,6 angin kan kal a, number in kawp kim ang a V/C member in zat, inkawp zat, in tluk thei opposition emaw ruling emaw ang a kan kal hi tha kan ti lo khawp a. Amaherawhchu sorkarin V/C member inthlan dawnah te a la ennawn ang a, vawiina kan member dinhmun ai hi chuan kan tih tam theih pawh ka beisei a, chutiang ang chu kan kalpui tum dan leh chu V/C ah chuan

chutiang ang a member an awm theih chuan member tha pawh an awm theih kan beisei a ni. Chu chu kan la ngaihtuah turah kan ngai a ni.

Tin, V/C te hian langtlang taka vantlang tan a an thawh leh sanction an neih te hi vantlang in an hriat hi tha kan ti a. Tunah hian hei helai Assembly House-ah pawh member-te kan han inpe fel vek tawh a. Tun 2011 leh 2012-a Village council a sum awm tur zawng zawng 13th Finance Commission-in a min pek tur a te chu (interruption) V/C term hi tunah chuan tih danglam tumna kan neilo a ni. Tichuan V/C member lam ni lovin kha village a a in tam dan a zir leh an population a zirin 13th Finance Commission-in a Grant min pek dan ang a zir in kan sem a, a tlem berin nuai khat leh sing riat atangin an tan dawn a, a tam in nuai nga thleng in tun kum chhungah hian an dawng dawn a. Hetah hian MLA bial tina khaw pakhat mah hmaih lovin an rawn ziak a, kan in pe vek tawh a, chuvangin kan MLA te pawh hian mahni bialah kan V/C te hnathawh hi a tul angin kan enpui theiin ka ring a, hei hi kan hman tangkai ka duh khawp a, i hmang tangkai ang u hmiang, infinchhuah te pawh a thain ka ring a.

Tin, LAD Department-ah hian kan subject anih angin kan ramah hian park tha hi kan neilo em em a, tun tlai khawhnuah hian tha tak han nei dawn ila thil alo har tawh khawp a, vantlang ram hi a lo awm tawh lova, mimal ram a tam a Hmuifangah theih tawpin bul kan tan a, park nuam tha tak siam kan tuma 45% vel hna kan zo tawh a ni. Tin, Thenzawlah sawn kan bei mek bawk a park nuam tak tur. Tin, Lungleiah, Kawmzawlah ram zau tak kan nei bawk a chungah te chuan bul kan tan ani, chutiang chuan park lam te pawh LAD hian tha tak kan ram tan siam tumin hma kan la a ni tih kha kan sawi duh ani. Chutiang chuan kan budget atang te pawn sum hi kan hmang dawn ani. Tin, kuminah hian Housing Loan lamah duhsakna kan han dawng a, a hma kum aia tam pawisa kan dawng a, nikum lam aiin a tamin kan in pe thei dawn ani. Tin, Step leh retaining wall siamna tura minor work atana sum kan neih te hi tha taka hman kan tum a ni. Chung angah chuan MLA ten bial chhungah pawimawh tak tih ngei tur te kan neih chuan chungte pawh chu member-ten inthlahrung lovin in hriih hre tlang ila, chutiang chuan thingtlang khaw tinte sum kan neih hian theih ang tawkin hna kan thawk ang tih han hre tlang ila.

Dr. R. LALTHANGLIANA : Hindi zirtirtu Thinglian a mi te VCP ni lai mek kha ala awm a Rahsi vengah te, khang ang kha a then kan ban a, Sazai a mite, kha kha engnge a chanchin ni ta le ?

Pu P.C.LALTHANLIANA, MINISTER : Pu Deputy Speaker, helai hi a buaithlak khawp mai a. V/C kan neih, kan dan hman mek hi a famkim lo em em mai a. Mi roll-a a awm chuan V/C Member a ni thei a, a chuh thei tih kha a ni mai a. Tichuan, tuna Member zahawmtak Pu Thangtea sawi ang khan khaw tam takah chuan M.R. te pawh kha V/C-ah an lo thlang tling nawlh mai a. a M.R. a kha sorkar anga han hrem dawn khan sorkar hnathawh an lo ni bawk si lova. A tih tak tak theih lova, hmun tam takah pawh an awm ka ring a. Sorkar hmasaah pawh khan tuna kan Member zahawm tak sawitu ngei, a biala kan veng a VCP kha SSA zirtirtu a lo ni reng mai a.

Dr. R. LALTHANGLIANA : Ka zawhna chhan chu khalai fello a kha tun sorkarah hian ngaihdan fel tak kan neih kha a ngai a. Entirnan Sazai V/C nilai Lalthangmawia te ang kha chu kan chawlh tir ta mai a, ka bialah khan, “chawl mai rawh”, keipawhin ka ti a. Hetah ngaihmawhna DLAO atanga a awm avang khan. Kha kha DLAO lampang atang khan emaw pawnlam atanga complaint a awm chauh khan action kan la dawn nge ni ? Hemi kan zawhna chhan tak laia kha chu mumal deuh a, helaiah hian ngaihtuahna kan hman hi V/C kan inthlang leh mai dawn a, nakin lawkah tih thilah khan ka rawn zawt a ni.

Pu P.C.LALTHANLIANA, MINISTER : Ni e, Pu Deputy Speaker, kan Member zahawmtak Pu Thangtea sawi kha a dik a. Tuna kan sorkarah hian khatiang report dawn kha kan nei a. Keipawh ka bialah Thiltlangah khian VLA kha a ding a, a tling a. Amaherawhchu, i duh zawk thlang rawh, a mawilo e ka ti a. VLA kha a thlang a, a seat kha a ruak ta a. Tin, ka bial Zohnuai ami pawh i duh zawk thlang rawh kan inti a. Tin, tuna Member zahawm tak sawi ang khan Rahsi veng ami pawh kha Electric Deptt., a thawk a ni a, Sazaikawn ami kha. A duh thlan tir rawh u te kan in ti a. Khatiang khan ani pawhin a duh thlang a. Ni e, a dan ang tak kha chuan va inthluh theihna chu kan nei lova. Amaherawhchu, a chawlhsan ve thei ta a.

DEPUTY SPEAKER : Ngawi rawh lawk. Khatiang kha ka bialah pawh a awm a, an ni chu kan ban tir a. Engpawhnisela, khatilai V/C dan a kha nakum lawkah kan inthlang dawn a, that chu a tha khawp mai. In ngaihtuahna lo hman deuh ta ula. Tin, Zokhaw kilkhawr deuh thenkhatah te phei chuanin BPL chu in ding thei lo an ti ve hmiah mai a. Chuvangin, dan mumal deuh kha chu siam tha ngawtin ka hria. In Department lam lo in en deuh ula a tha awm e.

Pu P.C.LALTHANLIANA, MINISTER : Pu Deputy Speaker, hemi avang hian dan pawh siamthat kan tum a, kan bei mek a. Vawiinnia kan Session-ah hian a lut hman lo hi pawh ka ti a. Village Council kan inthlan hma ngei hian neih hman ka duh a. Amaherawhchu, kan hman ngang lo a ni, a tirah repeal tawp turin hma ila ang u, kan ti a. Chutih lain amendment zawngin kal zawk mai ang u, a hautak em mai kan ti leh a. Vawiinniah hian inpeih chhuak hman ila ka duh khawp mai a keipawhin, a famkim loh zia hi hrechiantgute zinga mi ka ni ve a.

Tin, MNF Sorkar lai khan nichina kan sawi ang deuh khan Bazar veng V/C Member kha Zirtirtu a ni tlat mai a, tin Phairuankai V/CP kha Zirtirtu a ni bawh a. Tin, precedence tha lo a hring ang, an duh zawk thlan tir rawh u, titu pawh ka ni a. Chutiang chuanin he Sorkar lo pawh sorkar hmasaah te pawh hetiang hi a lo tam a. Engpawhnisela, kan dan kan siamthat thuai a, fel zawka kan kal hi keini pawhin kan duh a ni tih kha Member-ten min lo hriat sak ula a tha awm e.

Pu Deputy Speaker, engngemaw han react loh Member te atanga chu chu min react lo han tih em em a awm tawhlo bawh a. Ka Demand No. 19 – Local Administration Department ₹ 45,88,89,000.00, Demand No 29- Social

Welfare – ₹ 39,33,55,000.00. A vaiin ₹ 85,22,44,000.00 he House zahawmtak hian min passed sak turin ka rawn ngen e.

DEPUTY SPEAKER : A lawmawm e, wind-up thiam hle mai. Awle, kan Minister zahawmtak Pu P.C. Lalthanliana'n a rawn wind-up a, Demand te passed a rawn dil a, kan buk dawn anga, Demand No. 19 - L.A.D. ₹ 45,88,89,000/-, Demand No. 29 Social Welfare ₹ 39,33,55,000/-, a vaiin ₹ 85,22,44,000/- te hi passed remti apiangin remti ti rawh ule. Remti lo kan awm em, remti lo kan awm loh chuan Pu P.C. Lalthanliana Demand No. 19 LAD ₹ 45,88,89,000/-, Demand No. 29 - Social Welfare ₹ 39,33,55,000/-, a vaiin ₹ 85,22,44,000/- te chu House in lungrual takin a passed ta a ni.

Pu P.C. LALTHANLIANA, MINISTER : Pu Dy. Speaker ka lawm e.

DEPUTY SPEAKER : Awle tikhan vawiin a kan business chu kan zo ta a, naktuk ni 27 Nilaini zing dar 10:30 ah kan thukhawm leh dawn nia, in zavaiin mangtha ule, sitting is adjourned.

Sitting is adjourned at 8:10 P.M.